

॥ नमो तस्स भगवतो अरहतो सम्मासम्बुद्धस्स ॥

# विनयपिटके

## सारथदीपनी-टीका (ततियो भागो)

### ५. पाचित्तियकण्डं

#### १. मुसावादवग्गो

#### १. मुसावादसिक्खापदवण्णना

१. मुसावादवग्गस्स पठमसिक्खापदे **खुद्दकानन्ति** एत्थ “**खुद्दक**-सद्दो बहु-सद्दपरियायो। बहुभावतो इमानि खुद्दकानि नाम जातानी”ति वदन्ति। **तत्था**ति तेसु नवसु वग्गेषु, तेसु वा खुद्दकेसु। कारणेन कारणन्तरपटिच्छादनमेव विभावेतुं “**रूपं अनिच्च**”न्तिआदिमाह। रूपं अनिच्चन्ति पटिजानित्वा तत्थ कारणं वदन्तो “**जानितब्बतो**”ति आह। “यदि एवं निब्बानस्सपि अनिच्चता आपज्जती”ति परेन वुत्तो तं कारणं पटिच्छादेतुं पुन “**जातिधम्मतो**”ति अज्जं कारणं वदति।

“सम्पजानं मुसा भासती”ति वत्तब्बे **सम्पजान मुसा भासती**ति अनुनासिकलोपेन निद्देशोति आह “**जानन्तो मुसा भासती**”ति।

२. **जानित्वा जानन्तस्स च मुसा भणने**ति पुब्बभागेपि जानित्वा वचनक्खणोपि जानन्तस्स मुसा भणने। भणनञ्च नाम इध अभूतस्स वा भूततं भूतस्स वा अभूततं कत्वा कायेन वा वाचाय वा विज्जापनपयोगो। **सम्पजानमुसावादे**ति च निमित्तत्थे भुम्मवचनं, तस्मा यो सम्पजान मुसा वदति, तस्स तंनिमित्तं तंहेतु तप्पच्चया पाचित्तियं होतीति एवमेत्थ अज्जेसु च ईदिसेसु अत्थो वेदितब्बो।

३. विसंवादेन्ति एतेनाति **विसंवादनं**, वज्जनाधिप्पायवसप्पवत्तं चित्तं। तेनाह “**विसंवादनचित्तं पुरतो कत्वा वदन्तस्सा**”ति। वदति एतायाति **वाचा**, वचनसमुट्ठापिका चेतना। तेनाह “**मिच्छावाचा...पे०... चेतना**”ति। **पभेदगता वाचा**ति अनेकभेदभिन्ना। **एवं पठमपदेन सुद्धचेतना...पे०... कथिता**ति वेदितब्बाति इमिना इमं दीपेति — सुद्धचेतना वा सुद्धसद्दो वा सुद्धविज्जति वा मुसावादो नाम न होति, विज्जत्तिया सद्देन च सहिता तंसमुट्ठापिका चेतना मुसावादोति। **चक्खुवसेन अग्गहितारम्मणन्ति** चक्खुसन्निस्सितेन विज्जाणेन अग्गहितमारम्मणं। घानादीनं तिण्णं इन्द्रियानं सम्पत्तविसयग्गाहकत्ता वुत्तं “**तीहि इन्द्रियेहि एकाबद्धं विय कत्वा**”ति। “**धनुना विज्जती**”तिआदीसु विय “**चक्खुना दिट्ठ**”न्ति अयं वोहारो लोके पाकटोति आह “**ओळारिकेनेव नयेना**”ति।

११. **अवीमंसित्वा**ति अनुपपरिक्खित्वा। **अनुपधारेत्वा**ति अविनिच्छिनित्वा। **जळत्ता**ति अज्जाणताय। **दारुसकटं योजेत्वा गतो**ति दारुसकटं योजेत्वा तत्थ निसीदित्वा गतोति अधिप्पायो। **गतो भविस्सती**ति तथेव सन्निट्ठानं कत्वा वुत्तत्ता मुसावादो जातो। केचि पन “**केळिं कुरुमानो**ति वुत्तत्ता एवं वदन्तो दुब्भासितं आपज्जती”ति वदन्ति, तं न गहेतब्बं।

जातिआदीहियेव हि दसहि अक्कोसवत्थूहि दवकम्यताय वदन्तस्स दुब्भासितं वुत्तं । वुत्तज्जेतं —

“हीनुक्कट्टेहि उक्कट्टं, हीनं वा जातिआदिहि ।

उजुं वाज्जापदेसेन, वदे दुब्भासितं दवा”ति ॥

चित्तेन थोकतरभावंयेव अग्गहेत्वा बहुभावंयेव गहेत्वा वुत्तत्ता “गामो एकतेलो”तिआदिनापि मुसावादो जातो । चारेसुन्ति उपनेसुं । विसंवादनपुरेक्खारता, विसंवादनचित्तेन यमत्थं वत्तुकामो, तस्स पुग्गलस्स विज्जापनपयोगो चाति इमानेत्थ द्वे अङ्गानि । उत्तरिमनुस्सधम्ममारोचनत्थं मुसा भणन्तस्स पाराजिकं, अमूलकेन पाराजिकेन अनुद्धंसनत्थं सङ्घादिसेसो, सङ्घादिसेसेन अनुद्धंसनत्थं पाचित्तियं, आचारविपत्तिया दुक्कटं, “यो ते विहारे वसती”तिआदिपरियायेन उत्तरिमनुस्सधम्ममारोचनत्थं पटिविजानन्तस्स मुसा भणिते थुल्लच्चयं, अप्पटिविजानन्तस्स दुक्कटं, केवलं मुसा भणन्तस्स इध पाचित्तियं वुत्तं ।

मुसावादसिक्खापदवण्णना निड्डिता ।

## २. ओमसवादसिक्खापदवण्णना

१२. दुतिये कण्णकटुकताय अमनापं वदन्ता कण्णेसु विज्झन्ता विय होन्तीति आह “ओमसन्तीति ओविज्झन्ती”ति । पधंसेन्तीति अभिभवन्ति ।

१३. बोधिसत्तो तेन समयेन होतीति तेन समयेन बोधिसत्तो नन्दिविसालो नाम अहोसीति अत्थो । अतीतत्थे वत्तमानवचनं, किरियाकालवचनिच्छाय वा वत्तमानपयोगो सद्दन्तरसन्निधानेन भूततावगमो सियाति । पच्चेसीति “अमनापं इद”न्ति अज्जासि । हेट्ठारुक्खे दत्त्वाति उपत्थम्भके दत्त्वा । पुब्बे पतिट्ठितारप्पदेसं पुन अरे पत्तेति पुब्बे उजुकं हेट्ठामुखं पतिट्ठितारप्पदेसं पुन तस्मिंयेव अरे परिवत्तेत्वा हेट्ठामुखभावेन सम्पत्ते, पठमं भूमियं पतिट्ठितनेमिप्पदेसे परिवत्तेत्वा पुन भूमियं पतिट्ठितेति वुत्तं होति । सिथिलकरणन्ति सिथिलकिरिया ।

१५. पुब्बेति अट्ठुप्पत्तियं । तच्छककम्मन्ति वड्ढकीकम्मं । कोट्टककम्मन्ति वा पासाणकोट्टककम्मं । हत्थमुद्दागणनाति अङ्गुलिसङ्कोचेनेव गणना । पादसिकमिलक्खकादयो विय नवन्तवसेन गणना अच्छिद्दकगणना । आदि-सद्देन सङ्कलनपटुप्पादनवोक्लनभागहारादिवसेन पवत्ता पिण्डगणना गहिता । यस्स सा पगुणा होति, सो रुक्खम्पि दिस्वा “एत्तकानि एत्थ पण्णानी”ति जानाति । यभ मेथुनेति वचनतो य-कार भ-कारे एकतो योजिते असद्धम्मवचनं होति ।

१६-२६. आपत्तिया कारेतब्बोति पाचित्तियेन कारेतब्बो उपसग्गादिमत्तविसिद्धानं अतिचण्डालादिपदानं पाळियं आगतेसुयेव सङ्गहितत्ता । चोरोसीतिआदीनं पन केनचि परियायेन पाळियं अनागतत्ता दुक्कटं वुत्तं । हसाधिप्पायताति पुरिमपदस्स अत्थविवरणं । पाळियं अवुत्तेपि “जातिआदीहि अक्कोसवत्थूहि परम्मुखा अक्कोसन्तस्स वत्थूनं अनज्जभावतो यथा दुक्कटं, तथा दवकम्यताय परम्मुखा वदन्तस्सपि दुब्भासितमेवा”ति आचरिया वदन्ति । सब्बसत्ताति एत्थ वचनत्थविजाननपकतिका तिरच्छानगतापि गहेतब्बा ।

३५. अनुसासनिपुरेक्खारताय ठत्वा वदन्तस्स चित्तस्स लहुपरिवत्तिभावतो अन्तरा कोपे उप्पन्नेपि अनापत्ति । यं अक्कोसति, तस्स उपसम्पन्ता, अनज्जापदेसेन जातिआदीहि अक्कोसनं, “मं अक्कोसती”ति जानना,

अथपुरेक्खारतादीनं अभावताति इमानेत्य चत्तारि अङ्गानि ।

ओमसवादसिक्खापदवण्णना निड्ढिता ।

### ३. पेसुञ्जसिक्खापदवण्णना

३६. ततिये भण्डनं जातं एतेसन्ति **भण्डनजाता** । **सम्मन्तनन्ति** रहो संसन्दनं । हत्थपरामासादिवसेन मत्थकं पत्तो कलहो जातो एतेसन्ति **कलहजाता** । अनापत्तिगामिकं विरुद्धवादभूतं विवादं आपन्नाति **विवादापन्ना** । विग्गहसंवत्तनिका कथा **विग्गाहिककथा** । पिसतीति पिसुणा, वाचा, समग्गे सत्ते अवयवभूते वग्गे भिन्ने करोतीति अत्थो । पिसुणा एव **पेसुञ्जं** । ताय वाचाय वा समन्नागतो पिसुणो, तस्स कम्मं **पेसुञ्जं** । **पियभावस्स सुञ्जकरणवाचन्ति** इमिना पन “पियसुञ्जकरणतो पिसुणा”ति निरुत्तिनयेन अत्थं वदति ।

इधापि “दसहाकारेहि पेसुञ्जं उपसंहरती”ति वचनतो दसविधअक्कोसवत्थुवसेनेव पेसुञ्जं उपसंहरन्तस्स पाचित्तियं । पाळिमुत्तकानं चोरोतिआदीनं वसेन पन दुक्कटमेवाति वेदितब्बं । “अनक्कोसवत्थुभूतं पन पेसुञ्जकरं तस्स किरियं वचनं वा पियकम्यताय उपसंहरन्तस्स किञ्चापि इमिना सिक्खापदेन आपत्ति न दिस्सति, तथापि दुक्कटेनेत्य भवितब्बं”न्ति वदन्ति । जातिआदीहि अनञ्जापदेसेन अक्कोसन्तस्स भिक्खुनो सुत्वा भिक्खुस्स उपसंहरणं, पियकम्यताभेदाधिप्पायेसु अञ्जतरता, तस्स विजाननाति इमानेत्य तीणि अङ्गानि ।

पेसुञ्जसिक्खापदवण्णना निड्ढिता ।

### ४. पदसोधम्मसिक्खापदवण्णना

४५. चतुत्थे **एकतो**ति अनुपसम्पन्नेन सद्धिं । **पुरिमव्यञ्जनेन सदिसं पच्छाव्यञ्जन्ति** “रूपं अनिच्च”न्ति एत्थ अनिच्च-सद्देन सदिसं “वेदना अनिच्चा”ति एत्थ अनिच्च-सद्दं वदति । **अक्खरसमूहो**ति अविभक्तिको अक्खरसमूहो । **अक्खरानुव्यञ्जनसमूहो पदन्ति** विभक्तिअन्तं पदमाह । विभक्तिअन्तमेव पदं गहेत्वा “**पठमपदं पदमेव, दुतियं अनुपदं**”न्ति वुत्तं ।

**एकं पदन्ति** गाथापदं सन्धाय वदति । **पदगणनायाति** गाथापदगणनाय । **अपापुणित्वाति** सद्धिं अकथेत्वा । **रुन्ति ओपातेतीति** एत्थ अनुनासिको आगमवसेन वुत्तो, संयोगपुब्बस्स रस्सत्तं कतन्ति वेदितब्बं । तेनाह “**रू-कारमत्तमेवा**”ति । एत्थ च “रूपं अनिच्चन्ति भण सामणेरा”ति वुच्चमानो सचे रू-कारं अवत्वा रु-इति रस्सं कत्वा वदति, अञ्जं भणितं नाम होति, तस्मा अनापत्ति । एवञ्च कत्वा “वेदना अनिच्चा”ति एत्थापि अनिच्च-सद्दमत्तेनेव आपत्ति होतीति वेदितब्बं । **एस नयोति** एकमेवक्खरं वत्वा ठानं । “मनोपुब्बङ्गमा धम्मा”ति वुच्चमानो हि म-कारमत्तमेव वत्वा तिड्ढति । “एवं मे सुत”न्तिआदिसुत्तं भणापियमानो ए-कारं वत्वा तिड्ढति चे, अन्वक्खरेन पाचित्तियं, अपरिपुण्णपदं वत्वा ठिते अनुव्यञ्जनेन । पदेसु एकं पठमपदं विरज्झति, दुतियेन अनुपदेन पाचित्तियं ।

**अनङ्गणसुत्तं** (म० नि० १.५७ आदयो) **सम्मादिट्ठिसुत्तं** (म० नि० १.८९ आदयो) **महावेदल्लज्ज** (म० नि० १.४४९ आदयो) धम्मसेनापतिना भासितं, **अनुमानसुत्तं** (म० नि० १.१८१ आदयो) महामोगल्लानत्थेरेन, **चूळवेदल्लसुत्तं** (म० नि० १.४६० आदयो) धम्मदिन्नाय थेरिया भासितं । पच्चेकबुद्धभासितम्पि बुद्धभासितेयेव सङ्गहं गच्छति ।

अट्टकथानिस्सितोति पुब्बे मगधभासाय वुत्तं धम्मसङ्गहारुळ्हं अट्टकथं सन्धाय वदति । इदानिपि “यथापि दीपिको नाम, निलीयित्वा गण्हते मिगे”ति (मि० प० ६.१.५) एवमादिकं सङ्गहारुळ्हं अट्टकथावचनं गहेतब्बन्ति वदन्ति ।  
**पाळिनिस्सितोति** “मक्कटी वज्जिपुत्ता चा”ति एवमादिना (पारा० ६६) पाळियंयेव आगतो । **विवट्टूपनिस्सितन्ति** निब्बानुपनिस्सितं । विवट्टुनिस्सितं पन सामञ्जतो गहेतब्बन्ति आह “**किञ्चापी**”ति आदि । **थेरस्साति** नागसेनत्थेरस्स । **मग्गकथादीनि** पकरणानि । “अक्खरेन वाचेति, अक्खरक्खरे आपत्ति पाचित्तियस्सा”ति वत्तब्बे “**अक्खराय वाचेति, अक्खरक्खराय आपत्ति पाचित्तियस्सा**”ति पाळियं वुत्तं ।

**४८. अनुपसम्पन्नेन सद्धिं गण्हन्तस्स अनापत्तीति** अनुपसम्पन्नेन सह निसीदित्वा उद्देसं गण्हन्तस्स अनापत्ति वुत्ता । **दहरिभक्खु निसिन्नो...पे०... भणतो अनापत्तीति** एत्थ द्वीसुपि ठितेसु निसिन्नेसु वा उपसम्पन्नस्स भणामीति भणन्तस्स अनापत्तियेव । **उपचारं मुञ्चित्वाति** परिसपरियन्ततो द्वादसहत्थं मुञ्चित्वा । “निसिन्ने वाचेमी”ति भणन्तस्सपि उपचारं मुञ्चित्वा निसिन्नत्ता अनापत्ति । सचे पन दूरे निसिन्नम्पि वाचेमीति विसुं सल्लक्खेत्वा भणति, आपत्तियेव । **एको पादो न आगच्छतीति** पुब्बे पगुणोयेव पच्छा असरन्तस्स न आगच्छति, तं “एवं भणाही”ति एकतो भणन्तस्स अनापत्ति । **ओपातेतीति** सद्धिं कथेति । सेसमेत्थ उत्तानमेव । अनुपसम्पन्नता, वुत्तलक्खणधम्मं पदसो वाचनता, एकतो भणनञ्चाति इमानेत्थ तीणि अङ्गानि ।

पदसोधम्मसिक्खापदवण्णना निट्ठिता ।

#### ५. सहसेय्यसिक्खापदवण्णना

**४९-५०.** पञ्चमे **विकूजमानाति** नित्थुनन्ता । **काकच्छमानाति** रोदन्ता । तत्रिदं वत्थुनिदस्सनं वा । **तेन नु खो पातितन्ति** पुच्छावसेन कथितत्ता नत्थि मुसावादो । केचि पन “सन्देहवसेन वचनं मुसा नाम न होति, तस्मा एवं वुत्त”न्ति वदन्ति । **सन्तिकं अगन्त्वाति** “यं एतेसं न कप्पति, तं तेसम्पि न कप्पती”ति अधिप्पायेन अगन्त्वा ।

**५१. दिरत्ततिरत्तन्ति** एत्थ वचनसिलिडुतामत्तेन **दिरत्त-**ग्गहणं कतन्ति वेदितब्बं । तिरत्तज्झि सहवासे लब्धमाने दिरत्ते वत्तब्बमेव नत्थीति दिरत्तग्गहणं विसुं न योजेति । तेनेवाह “**उत्तरिदिरत्ततिरत्तन्ति भगवा सामणेरां सङ्गहकरणत्थाय तिरत्तपरिहारं अदासी**”ति । निरन्तरं तिरत्तदस्सनत्थं वा दिरत्तग्गहणं कतं । केवलज्झि तिरत्तन्ति वुत्ते अञ्जत्थ वासेन अन्तरिकम्पि तिरत्तं गण्हेय्य, दिरत्तविसिद्धं पन तिरत्तं वुच्चमानं तेन अनन्तरिकमेव तिरत्तं दीपेति । सयनं **सेय्या**, सयन्ति एत्थातिपि **सेय्याति** आह “**कायप्पसारणसङ्घात**”न्ति आदि । **तस्माति** यस्मा उभयम्पि परिग्गहितं, तस्मा । **पञ्चहि छदनेहीति** इट्टकसिलासुधातिणपण्णसङ्घा आतेहि पञ्चहि छदनेहि । **वाचुग्गतवसेनाति** पगुणवसेन । **दियट्ठुहत्थुब्बेधो** वट्ठुकीहत्थेन गहेतब्बो । **एकूपचारोति** वळञ्जनद्वारस्स एकत्तं सन्धाय वुत्तं । सतगब्भं वा चतुस्सालं एकूपचारं होतीति सम्बन्धो ।

**उपरिमतलेन सद्धिं असम्बद्धभित्तिकस्साति** इदं तुलाय अब्भन्तरे सयित्वा पुन तेनेव सुसिरेन निक्खमित्वा भित्तिअन्तरेन हेट्ठिमतलं पविसितुं योगेपि उपरिमतलेन असम्बद्धभित्तिके सेनासने अनापत्तिया वुत्ताय तथा पविसितुं असक्कुणेय्ये सम्बद्धभित्तिके वत्तब्बमेव नत्थीति दस्सनत्थं वुत्तं, न पन सम्बद्धभित्तिके आपत्तीति दस्सनत्थं वुत्तं । **हेट्ठापासादे सयितभक्खुस्स अनापत्तीति** इदम्पि तादिसे सेनासने हेट्ठिमतले सयितस्सेव आपत्तिप्पसङ्का सियाति तनिवारणत्थं वुत्तं, न पन उपरिमतले सयितस्स आपत्तीति दस्सनत्थं । **नानूपचारेति** यत्थ बहि निस्सेणिं कत्वा उपरिमतलं

आरोहन्ति, तादिसं सन्धाय वुत्तं। उपरिमतलेपि आकासङ्गणे निपज्जन्तस्स आपत्तिया अभावतो “छदनब्भन्तरे”ति वुत्तं।

सभासङ्घेपेनाति सभाकारेन। अट्टकुट्टके सेनासनेति एत्थ “अट्टकुट्टकं नाम यत्थ एकं पस्सं मुञ्चित्वा तीसु पस्सेसु भित्तियो बद्धा होन्ति, यत्थ वा एकस्मिं पस्से भित्तिं उट्ठापेत्वा उभोसु पस्सेसु उपट्ठं उपट्ठं कत्वा भित्तियो उट्ठापेन्ति, तादिसं सेनासन”न्ति तीसुपि गण्ठपदेसु वुत्तं। गण्ठपदे पन “अट्टकुट्टकेति छदनं अट्ठेन असम्पत्तकुट्टके”ति वुत्तं, तम्पि नो न युत्तं। “वाळसङ्घाटो नाम थम्भानं उपरि वाळरूपेहि कतसङ्घाटो वुच्चती”ति वदन्ति। परिकखेपस्स बहिगतेति एत्थ यस्मिं पस्से परिकखेपो नत्थि, तत्थापि परिकखेपारहणपदेसतो बहिगते अनापत्तियेवाति दट्ठब्बं। अपरिच्छिन्नगब्भूपचारेति एत्थ मज्झे विवटङ्गणवन्तासु पमुखमहाचतुस्सालासु यथा आकासङ्गणं अनोतरित्वा पमुखेनेव गन्त्वा सब्बगब्भे पविसितुं न सक्का होति, एवं एकेकगब्भस्स द्वीसु पस्सेसु कुट्टं नीहरित्वा कतं परिच्छिन्नगब्भूपचारं नाम, इदं पन तादिसं न होतीति “अपरिच्छिन्नगब्भूपचारे”ति वुत्तं। सब्बगब्भे पविसन्तीति गब्भूपचारस्स अपरिच्छिन्नत्ता आकासङ्गणं अनोतरित्वा पमुखेनेव गन्त्वा तं तं गब्भं पविसन्ति। अथ कुतो तस्स परिकखेपोयेव सब्बपरिच्छिन्नत्ताति वुत्तन्ति आह “गब्भपरिकखेपोयेव हिस्स परिकखेपो”ति। इदञ्च समन्ता गब्भभित्तियो सन्धाय वुत्तं। चतुस्सालवसेन सन्निविट्ठेपि सेनासने गब्भपमुखं विसुं अपरिक्खित्तम्पि समन्ता ठितगब्भभित्तीनं वसेन परिक्खित्तं नाम होति।

“ननु च ‘अपरिक्खित्ते पमुखे अनापत्ती’ति अन्धकट्टकथायं अविसेसेन वुत्तं, तस्मा चतुस्सालवसेन सन्निविट्ठेपि सेनासने विसुं अपरिक्खित्ते पमुखे अनापत्तियेवा”ति यो वदेय्य, तस्स वादपरिमोचनत्थं इदं वुत्तं “यं पन...पे०... पाटेक्कसन्निवेसा एकच्छदना गब्भपाळियो सन्धाय वुत्त”न्ति। इदं वुत्तं होति — “अपरिक्खित्ते पमुखे अनापत्तीति यं वुत्तं, तं न चतुस्सालवसेन सन्निविट्ठा गब्भपाळियो सन्धाय वुत्तं, किञ्चरहि विसुं सन्निविट्ठं एकमेव गब्भपाळिं सन्धाय। तादिसाय हि गब्भपाळिया अपरिक्खित्ते पमुखे अनापत्ति, न चतुस्सालवसेन सन्निविट्ठाया”ति। एकाय च गब्भपाळिया तस्स तस्स गब्भस्स उपचारं परिच्छिन्दित्वा अन्तमसो उभोसु पस्सेसु खुद्दकभित्तीनं उट्ठापनमत्तेनपि पमुखं परिक्खित्तं नाम होति, चतुस्सालवसेन सन्निविट्ठासु पन गब्भपाळीसु उभोसु पस्सेसु गब्भभित्तीनं वसेनपि पमुखं परिक्खित्तं नाम होति। तस्मा यं इमिना लक्खणेन परिक्खित्तं पमुखं, तत्थ आपत्ति, इतरत्थ अनापत्तीति इदमेत्थ सन्निट्ठानं।

इदानी “अपरिक्खित्ते पमुखे अनापत्ती”ति वत्वा तस्सेव वचनस्स अधिप्पायं पकासेन्तेन यं वुत्तं “भूमियं विना जगतिया पमुखं सन्धाय कथित”न्ति, तस्स अयुत्तताविभावनत्थं “यञ्च तत्था”तिआदि आरब्धं। भूमियं विना जगतिया पमुखं सन्धाय कथितन्ति हि इमस्स वचनस्स अयमधिप्पायो — “अपरिक्खित्ते पमुखे अनापत्ती”ति यं वुत्तं, तं विना वत्थुं भूमियं कतगेहस्स पमुखं सन्धाय कथितं। सचे पन उच्चवत्थुकं पमुखं होति, परिक्खित्तसङ्ख्यं न गच्छतीति। तेनेवाह “दसहत्थुब्बेधापि हि जगति परिकखेपसङ्ख्यं न गच्छती”ति। हेट्ठापि इदमेव मनसि सन्निधाय वुत्तं “उच्चवत्थुकं चेपि होति, पमुखे सयितो गब्भे सयितानं आपत्तिं न करोती”ति। तत्थाति अन्धकट्टकथायं। जगतिया पमाणं वत्वाति “सचे जगतिया ओतरित्वा भूमियं सयितो, जगतिया उपरि सयितं न पस्सती”ति एवं जगतिया उब्बेधेन पमाणं वत्वा। एकसालादीसु उजुकमेव दीघं कत्वा सन्निवेसितो पासादो एकसालसन्निवेसो। द्विसालसन्निवेसादयोपि वुत्तानुसारतो वेदितब्बा। सालप्पभेददीपनमेव चेत्थ हेट्ठा वुत्ततो विसेसो।

मज्झेपाकारं करोन्तीति एत्थापि परिकखेपस्स हेट्ठिमपरिच्छेदेन दियड्ढहत्थुब्बेधत्ता दियड्ढहत्थं चेपि मज्झे पाकारं करोन्ति, नानूपचारमेव होतीति वेदितब्बं। न हि छिद्देन गेहं एकूपचारं नाम होतीति एत्थ सचे उब्बेधेन दियड्ढहत्थुब्भन्तरे

मनुस्सानं सञ्चारप्पहोनकं छिदं होति, तम्पि द्वारमेवाति एकूपचारं होति । किं परिकखेपोविद्धस्तोति पमुखस्स परिकखेपं सन्धाय वदति । सब्बत्थ पञ्चन्नंयेव छदनानं आगतत्ता वदति “पञ्चन्नं अञ्जतरेन छदनेन छन्ना”ति ।

५३. पाळियं “सेय्या नाम सब्बच्छन्ना सब्बपरिच्छन्ना येभ्य्येनच्छन्ना येभ्य्येनपरिच्छन्ना”ति वदन्तेन येभ्य्येनच्छन्नयेभ्य्येनपरिच्छन्नसेनासनं पाचित्तियस्स अवसानं विय कत्वा दस्सितं, “उपड्डच्छन्ने उपड्डपरिच्छन्ने आपत्ति दुक्कटस्सा”ति वदन्तेन च उपड्डच्छन्नउपड्डपरिच्छन्नसेनासनं दुक्कटस्स आदिं कत्वा दस्सितं, उभिन्नमन्तरा केन भवितब्बं पाचित्तियेन, उदाहु दुक्कटेनाति? लोकवज्जसिक्खापदस्सेव अनवसेसं कत्वा पज्जापनतो इमस्स च पण्णत्तिवज्जत्ता येभ्य्येनच्छन्नयेभ्य्येनपरिच्छन्नस्स उपड्डच्छन्नउपड्डपरिच्छन्नस्स च अन्तरा पाचित्तियं अनिवारितमेव, तस्मा विनयविनिच्छये च गरुकेयेव ठातब्बत्ता अट्ठकथायम्पि पाचित्तियमेव दस्सितं । सत्त पाचित्तियानीति पाळियं वुत्तपाचित्तियं सामञ्जतो एकत्तेन गहेत्वा वुत्तं । विसुं पन गह्ममाने “सब्बच्छन्ने सब्बपरिच्छन्ने पाचित्तियं, येभ्य्येनच्छन्ने येभ्य्येनपरिच्छन्ने पाचित्तिय”न्ति अट्ठेव पाचित्तियानि होन्ति ।

सेनम्बमण्डपवण्णं होतीति सीहळदीपे किर उच्चवत्थुको सब्बच्छन्नो सब्बअपरिच्छन्नो एवंनामको सन्निपातमण्डपो अत्थि, तं सन्धायेतं वुत्तं । यदि जगतिपरिकखेपसङ्ख्यं गच्छति, उच्चवत्थुकत्ता मण्डपस्स सब्बअपरिच्छन्नता न युज्जतीति आह “इमिनापेतं वेदितब्ब”न्तिआदि । चूळकच्छन्नादीनि चेत्य एवं वेदितब्बानि — यस्स चतूसु भागेषु एको छन्नो, सेसा अच्छन्ना, इदं चूळकच्छन्नं । यस्स तीसु भागेषु द्वे छन्ना, एको अच्छन्नो, इदं येभ्य्येनच्छन्नं । यस्स द्वीसु भागेषु एको छन्नो, एको अच्छन्नो, इदं उपड्डच्छन्नं नाम सेनासनं । चूळकपरिच्छन्नादीनिपि इमिनाव नयेन वेदितब्बानि । सेसं उत्तानमेव । पाचित्तियवत्थुकसेनासनं, तत्थ तत्थ अनुपसम्पन्नेन सह निपज्जनं, चतुत्थदिवसे सूरियत्थङ्गमनन्ति इमानेत्य तीणि अङ्गानि ।

सहसेय्यसिक्खापदवण्णना निड्डिता ।

## ६. दुतियसहसेय्यसिक्खापदवण्णना

५५. छट्ठे “पठमसिक्खापदे ‘भिक्षुं ठपेत्वा अवसेसो अनुपसम्पन्नो नामा’ति वुत्तत्ता ‘मातुगामोपि अनुपसम्पन्नगहणेन गहितोयेवा’ति चतुत्थदिवसे मातुगामेन सद्धिं सयन्तस्स द्वीहि सिक्खापदेहि द्वे पाचित्तियानि होन्ती”ति वदन्ति । गण्ठपदेसु पन तीसुपि “इमस्मिं सिक्खापदे मातुगामस्स विसुं वुच्चमानत्ता पठमसिक्खापदे ‘भिक्षुं ठपेत्वा अवसेसो अनुपसम्पन्नो नामा’ति पुरिसस्सेव गहणं अनुच्छविक”न्ति वुत्तं, तदेव च युत्ततरं ।

यच्च इध “पठमदिवसेपीति पि-सद्धेन चतुत्थदिवसेपीति वुत्तं होती”ति कारणं वदन्ति, तम्पि अकारणं पि-सद्धो सम्पिण्डनत्थोयेवाति नियमाभावतो अवधारणत्थस्स च सम्भवतो । सम्भावने वा पि-सद्धो दट्ठब्बो । तेन इध पठमदिवसेपि ताव आपत्ति, दुतियादिवसे किमेव वत्तब्बन्ति इममत्थं दीपेति । सम्पिण्डनत्थेपि पि-सद्धे गह्ममाने इमिनाव सिक्खापदेन आपज्जितब्बापत्तिया अञ्जस्मिम्पि दिवसे आपज्जनं दीपेति, न पठमसिक्खापदेन आपज्जितब्बापत्तियाति अकारणमेव तन्ति दट्ठब्बं । “मतित्थी पाराजिकवत्थुभूतापि अनुपादिन्नपक्खे ठितत्ता सहसेय्यापत्तिं न जनेती”ति वदन्ति । “अत्थङ्गते सूरिये मातुगामे निपन्ने भिक्षु निपज्जती”ति वचनतो दिवा सयन्तस्स सहसेय्यापत्तिं न होतियेवाति दट्ठब्बं । पाचित्तियवत्थुकसेनासनं, तत्थ मातुगामेन सह निपज्जनं, सूरियत्थङ्गमनन्ति इमानेत्य तीणि अङ्गानि ।

दुतियसहसेय्यसिक्खापदवण्णना निड्ढिता ।

### ७. धम्मदेसनासिक्खापदवण्णना

६०-६४. सत्तमे घरं नयतीति घरणी, घरनायिका । तेनाह “घरसामिनी”ति । सुण्हाति सुणिंसा । न यक्खेनातिआदीनं “अज्जत्रा”ति इमिना सम्बन्धो । पुरिसविग्गहं गहेत्वा ठितेन यक्खेन वा पेतेन वा तिरच्छानेन वा सद्धिं ठितायपि देसेतुं न वट्ठति । अक्खराय देसेतीति एत्थ “छप्पज्जवाचतो उत्तरि ‘इमं पदं भासिस्सामी’ति एकम्पि अक्खरं वत्वा तिड्ढति, आपत्तियेवा”ति वदन्ति ।

६६. “एको गाथापादोति इदं गाथाबन्धमेव सन्धाय वुत्तं, अज्जत्थ पन विभत्तिअन्तपदमेव गहेतब्ब”न्ति वदन्ति । “अट्ठकथं धम्मपदं जातकादिवत्थुं वाति इमिनापि पोराणं सङ्गीतिआरुळ्हमेव अट्ठकथादि वुत्तं”न्ति वदन्ति । अट्ठकथादिपाठं ठपेत्वा दमिळादिभासन्तरेन यथारुचि कथेतुं वट्ठति । पदसोधम्मे वुत्तप्पभेदोति इमिना अज्जत्थ अनापत्तीति दीपेति । उट्ठित्वा पुन निसीदित्वाति इरियापथपरिवत्तनयेन नानाइरियापथेनपि अनापत्तीति दीपेति । सब्बं चेपि दीघनिकायं कथेतीति याव न निड्ढाति, ताव पुनदिवसेपि कथेति ।

दुतियस्स विज्जूपुरिसस्स अग्गहणं अकिरिया । मातुगामेन सद्धिं ठितस्स च विज्जूपुरिसस्स च उपचारो अनियतेसु वुत्तनयेनेव गहेतब्बो । सेसं उत्तानमेव । वुत्तलक्खणस्स धम्मस्स छन्नं वाचानं उपरि देसना, वुत्तलक्खणो मातुगामो, इरियापथपअवत्तनाभावो, विज्जूपुरिसाभावो, अपज्जहविस्सज्जनाति इमानि पनेत्थ पज्ज अङ्गानि ।

धम्मदेसनासिक्खापदवण्णना निड्ढिता ।

### ८. भूतारोचनसिक्खापदवण्णना

७७. अट्ठमे अन्तराति परिनिब्बानसमयतो अज्जस्मिं काले । अतिकङ्खियमानेनाति “वदथ, भन्ते, किं तुम्हेहि अधिगत”न्ति एवं निष्पीळियमानेन । अनतिकङ्खियमानेनपि पुच्छिते वा अपुच्छिते वा तथारूपे कारणे सति आरोचेतुं वट्ठतियेव । तेनेव अज्जतरेन दहरभिक्षुना उपवदितो अज्जतरो थेरो “आवुसो, उपरिमग्गत्थाय वायामं मा अकासि, खीणासवो तथा उपवदितो”ति आह । थेरेन च “अत्थि ते, आवुसो, इमस्मिं सासने पतिट्ठा”ति वुत्तो दहरभिक्षु “आम, भन्ते, सोतापन्नो अह”न्ति अवोच । “कारको अयं”न्ति जत्वापि पटिपत्तिया अमोघभावदस्सनेन समुत्तेजनाय सम्महंसनाय च अरिया अत्तानं पकासेन्तियेव । सुतपरियत्तिसीलगुणन्ति सुतगुणं परियत्तिगुणं सीलगुणज्ज । उम्मत्तकस्स इध अवचने कारणं वदन्तेन खित्तचित्तवेदनट्टानम्पि अवचने कारणं वुत्तमेवाति दट्ठब्बं । इति-सद्देन वा आदिअत्थेन खित्तचित्तवेदनट्टे सङ्गण्हाति । तेनेव वदति “चित्तक्खेपस्स वा अभावा”ति । दिट्ठिसम्पन्नानन्ति मग्गफलदिट्ठिया समन्नागतानं । अरियानमेव हि उम्मत्तकादिभावो नत्थि । ज्ञानलाभिनो पन तस्मिं सति ज्ञाना परिहायन्ति, तस्मा तेसं अभूतारोचनपच्चया अनापत्ति वत्तब्बा, न भूतारोचनपच्चया । तेनेवाह “भूतारोचनपच्चया अनापत्ति न वत्तब्बा”ति ।

पुब्बे अवुत्तेहीति चतुत्थपाराजिके अवुत्तेहि । इदज्ज सिक्खापदं पण्णत्तिअजाननवसेन अचित्तकसमुद्धानं होति । अरिया चेत्थ पण्णत्तिं जानन्ता वीतिक्कमं न करोन्ति, पुत्थुज्जना पन पण्णत्तिं जानित्वापि वीतिक्कमं करोन्ति, ते च सत्थुनो आणावीतिक्कमचेतनाय बलवअकुसलभावतो ज्ञाना परिहायन्तीति दट्ठब्बं, उक्कट्टपरिच्छेदेन अरियपुगले एव सन्धाय “कुसलाब्बाकतचित्तेहि द्विचित्त”न्ति वुत्तं । पण्णत्तिं अजानन्ता पन ज्ञानलाभी पुत्थुज्जना वत्थुम्हि लोभवसेन

अकुसलचित्तेनपि न आरोचेन्तीति नत्थि । इध दुक्खवेदनाय अभावतो “द्विवेदन”न्ति इमस्स अनुरूपं कत्वा द्विचित्तन्ति इदं वुत्तन्ति एवं वा एत्थ अधिप्पायो गहेतब्बो । सेसं उत्तानमेव । उत्तरिमनुस्सधम्मस्स भूतता, अनुपसम्पन्नस्स आरोचनं, तद्धणविजानना, अनञ्जप्पदेसोति इमानि पनेत्थ चत्तारि अङ्गानि ।

भूतारोचनसिक्खापदवण्णना निट्ठिता ।

## ९. दुट्ठुल्लारोचनसिक्खापदवण्णना

७८. नवमे दुट्ठुल्लसद्वत्थदस्सनत्थन्ति दुट्ठुल्लसद्वस्स अत्थदस्सनत्थं । अत्थे हि दस्सिते सद्दोपि “अयं एतेसु अत्थेसु वत्तती”ति दस्सितोयेव होति । “यं यं दुट्ठुल्लसद्देन अभिधीयति, तं सब्बं दस्सेतुं पाराजिकानि वुत्तानी”ति अयज्हेत्थ अधिप्पायो । तत्रायं विचारणाति तत्र पाळियं अयं विचारणा, तत्र पाळिअट्ठकथासु वा अयं विचारणा । तत्थ भवेय्याति तत्थ कस्सचि विमति एवं भवेय्य । अनुपसम्पन्नस्स दुट्ठुल्लारोचने विय दुक्कटेन भवितव्वन्ति आह “दुक्कटं आपज्जती”ति । अक्कोसन्तोपि दुक्कटं आपज्जेय्याति ओमसवादेन दुक्कटं आपज्जेय्य । अधिप्पायं अजानन्तेनपि अट्ठकथाचरियानं वचनेयेव ठातव्वन्ति दीपनत्थं “अट्ठकथाचरियाव एत्थ पमाण”न्ति वुत्तं । पुनपि अट्ठकथावचनमेव उपपत्तितो दळ्हं कत्वा पतिट्ठपेन्तो “इमिनापि चेत”न्तिआदिमाह ।

८०. “अञ्जत्र भिक्खुसम्मुतिया”ति वुत्तत्ता सम्मुति अत्थीति गहेतव्व्वाति आह “इध वुत्तत्तायेवा”तिआदि ।

८२. आदितो पञ्च सिक्खापदानीति पाणातिपातादीनि पञ्च सिक्खापदानि । “सेसानीति विकालभोजनादीनि पञ्चा”ति वदन्ति । केचि पन “आदितो पट्ठाय पञ्च सिक्खापदानीति सुक्कविस्सट्ठिआदीनि पञ्चा”ति वदन्ति, तं न गहेतव्वं । पाणातिपातादीनि हि दसेव सिक्खापदानि सामणेरानं पञ्जत्तानि । वुत्तज्हेतं —

“अथ खो सामणेरानं एतदहोसि ‘कति नु खो अम्हाकं सिक्खापदानि, कत्थ च अम्हेहि सिक्खितव्व’न्ति? भगवतो एतमत्थं आरोचेसुं । अनुजानामि, भिक्खवे, सामणेरानं दस सिक्खापदानि, तेसु च सामणेरेहि सिक्खितुं, पाणातिपाता वेरमणी अदिन्नादाना वेरमणी”तिआदि (महाव० १०६) ।

तेसं पञ्जत्तेसुयेव सिक्खापदेसु दुट्ठुल्लादुट्ठुल्लविचारणा कातव्व्वा, न च सुक्कविस्सट्ठिआदीनि विसुं तेसं पञ्जत्तानि अत्थीति । अथ भिक्खुनो दुट्ठुल्लसद्द्वत्तानि सुक्कविस्सट्ठिआदीनि अनुपसम्पन्नस्स किं नाम होन्तीति आह “सुक्कविस्सट्ठि...पे०... अज्झाचारो नामाति वुत्त”न्ति । इमिनापि चेतं सिद्धं “अनुपसम्पन्नस्स सुक्कविस्सट्ठिआदि दुट्ठुल्लं नाम न होती”ति । अज्झाचारो नामाति हि वदन्तो अनुपसम्पन्नस्स सुक्कविस्सट्ठिआदि केवलं अज्झाचारो नाम होति, न पन दुट्ठुल्लो नाम अज्झाचारोति दीपेति । “अज्झाचारो नामाति च अट्ठकथायं वुत्तत्ता अकत्तव्वरूपत्ता च अनुपसम्पन्नस्स सुक्कविस्सट्ठिआदीनि दण्डकम्मवत्थुपक्खं भजन्ति, तानि च अञ्जस्स अनुपसम्पन्नस्स अवण्णकामताय आरोचेन्तो भिक्खु दुक्कटं आपज्जती”ति वदन्ति । इध पन अनुपसम्पन्नगहणेन सामणेरसामणेरीसिक्खमानानं गहणं वेदितव्वं । सेसमेत्थ उत्तानमेव । अन्तिमवत्थुं अनज्झापन्नस्स भिक्खुनो सवत्थुको सद्वादिसेसो, अनुपसम्पन्नस्स आरोचनं, भिक्खुसम्मुतिया अभावोति इमानि पनेत्थ तीणि अङ्गानि ।

दुट्ठुल्लारोचनसिक्खापदवण्णना निट्ठिता ।



## १०. पथवीखणनसिक्खापदवण्णना

८४-८६. दसमे एकिन्द्रियन्ति “कायिन्द्रियं अत्थी”ति मज्झमाना वदन्ति । मुट्ठिप्पमाणाति मुट्ठिना सङ्गहेतव्वप्पमाणा । एत्थ किञ्चापि येभ्यपसं सुं अप्पसं सुञ्च पथविं वत्त्वा उपट्ठपंसुका पथवी न वुत्ता, तथापि पण्णत्तिवज्जसिक्खापदेसु सावसेसपज्जत्तियापि सम्भवतो उपट्ठपंसुकायपि पथविया पाचित्तियमेवाति गहेतव्वं । केचि पन “सव्वच्छन्नादीसु उपट्ठे दुक्कटस्स वुत्तत्ता इधापि दुक्कटं युत्त”न्ति वदन्ति, तं न युत्तं पाचित्तियवत्थुकञ्च अनापत्तिवत्थुकञ्च दुविधं पथविं ठपेत्त्वा अज्जिस्सा दुक्कटवत्थुकाय तत्तियाय पथविया अभावतो । द्वेयेव हि पथवियो वुत्ता “जाता च पथवी अजाता च पथवी”ति । तस्मा द्वीसु अज्जतराय पथविया भवितव्वं, विनयविनिच्छये च सम्पत्ते गरुकेयेव ठातव्वत्ता न सक्का एत्थ अनापत्तिया भवितुं । सव्वच्छन्नादीसु पन उपट्ठे दुक्कटं युत्तं तत्थ तादिसस्स दुक्कटवत्थुनो सव्भावा ।

“पोक्खरणिं खणा”ति वदति, वट्ठतीति “इमस्मिं ओकासे”ति अनियमेत्त्वा वुत्तत्ता वट्ठति । “इमं वल्लिं खणा”ति वुत्तेपि पथवीखणनं सन्धाय पवत्तवोहारत्ता इमिनाव सिक्खापदेन आपत्ति, न भूतगामपातव्यताय । कुटेहीति घटेहि । तनुककदमोति उदकमिस्सककदमो । सो च उदकगतिकत्ता वट्ठति । ओमकचातुमासन्ति ऊनचातुमासं । ओवट्ठन्ति देवेन ओवट्ठं । अकतपब्भारेति अवळज्जनट्टानदस्सनत्थं वुत्तं । तादिसे हि वम्मिकस्स सव्भावोति । मूसिकुक्कुरं नाम मूसिकाहि खणित्वा बहि कतपंसुरासि । एसेव नयोति ओमकचातुमासओवट्ठोयेव वट्ठतीति अत्थो ।

एकदिवसम्पि न वट्ठतीति ओवट्ठएकदिवसातिक्कन्तोपि विकोपेतुं न वट्ठति । “हेट्ठाभूमिसम्बन्धेपि च गोकण्टके भूमितो छिन्दित्वा उद्धं ठितत्ता अच्चुगगतमत्थकतो छिन्दित्वा गहेतुं वट्ठती”ति वदन्ति । सकट्टाने अतिट्टमानं कत्वा पादेहि मदित्वा छिन्दित्वा आलोळितकदमम्पि गहेतुं वट्ठति । ततोति ततो पुराणसेनासनतो । इट्ठकं गणहामीतिआदि सुद्धचित्तं सन्धाय वुत्तं । उदकेनाति उजुकं आकासतोयेव पतनकउदकेन । “सचे पन अज्जत्थ पहरित्वा पतितेन उदकेन तेमितं होति, वट्ठती”ति वदन्ति । उच्चालेत्त्वाति उक्खिपित्वा । तेन अपदेसेनाति तेन लेसेन ।

८७-८८. अविसयत्ता अनापत्तीति एत्थ सचेपि निब्बापेतुं सक्का होति, पठमं सुद्धचित्तेन दिन्नत्ता “दहतू”ति सल्लक्खेत्त्वापि तिट्ठति, अनापत्ति । ओवट्ठं छन्नन्ति पठमं ओवट्ठं पच्छा छन्नं । सेसं उत्तानमेव । जातपथवी, पथवीसज्जिता, खणनखणापनानं अज्जतरन्ति इमानि पनेत्थ तीणि अङ्गानि ।

पथवीखणनसिक्खापदवण्णना निट्ठिता ।

निट्ठितो मुसावादवग्गो पठमो ।

## २. भूतगामवग्गो

### १. भूतगामसिक्खापदवण्णना

८९. सेनासनवग्गस्स पठमे निग्गहेतुं असक्कोन्तोति सन्धारेतुं असक्कोन्तो । इमिना पन वचनेन दारकस्स तत्थ उपनीतभावो तेन च दिट्ठभावो वुत्तोयेवाति दट्ठव्वं । तेन हि भिक्खुना तं रुक्खं छिन्दितुं आरद्धे तत्थ निव्वत्ता एका तरुणपुत्ता देवधीता पुत्तं अङ्केनादाय ठिता तं याचि “मा मे सामि विमानं छिन्दि, न सक्खिस्सामि पुत्तकं आदाय अनावासा

विचरितुं'न्ति । सो “अहं अञ्जत्थ ईदिसं रुक्खं न लभिस्सामी”ति तस्सा वचनं नादियि । सा “इमम्पि ताव दारकं ओलोकेत्वा ओरमिस्सती”ति पुत्तं रुक्खसाखाय ठपेसि । सो भिक्खु उक्खित्तं फरसुं सन्धारेतुं असक्कोन्तो दारकस्स बाहं छिन्दि । एवञ्च सयितो विमाने सयितो नाम होतीति कत्वा वुत्तं “रुक्खट्टकदिब्बविमाने निपन्नस्सा”ति ।

रुक्खट्टकदिब्बविमानेति च साखट्टकविमानं सन्धाय वुत्तं । रुक्खस्स उपरि निब्बत्तज्झि विमानं रुक्खपटिबद्धत्ता “रुक्खट्टकविमान”न्ति वुच्चति । साखट्टकविमानं पन सब्बसाखासन्निस्सितं हुत्वा तिट्ठति । तत्थ यं रुक्खट्टकविमानं होति, तं याव रुक्खस्स मूलमत्तम्पि तिट्ठति, ताव न नस्सति । साखट्टकविमानं पन साखासु भिज्जमानासु तत्थ तत्थेव भिज्जित्वा सब्बसाखासु भिन्नासु सब्बं भिज्जति, इदम्पि च विमानं साखट्टकं, तस्मा रुक्खे छिन्ने तं विमानं सब्बसो विनट्ठं, तेनेव सा देवता भगवतो सन्निका लद्धे अञ्जस्मिं विमाने वसि । बाहुं थनमूलेयेव छिन्दीति अंसेन सद्धिं बाहं छिन्दि । इमिना च रुक्खदेवतानं गत्तानि छिज्जन्ति, न चातुमहाराजिकादीनं विय अच्छेज्जानीति दट्ठब्बं । रुक्खधम्मोति रुक्खपकतियं, रुक्खसभावेति अत्थो । रुक्खानं विय छेदनादीसु अकुप्पनज्झि रुक्खधम्मो नाम ।

उप्पतितन्ति उप्पन्नं । भन्तन्ति धावन्तं । वारयेति निग्गणहेय्य । इदं वुत्तं होति — यथा नाम छेको सारथि अतिवेगेन धावन्तं रथं निग्गहेत्वा यथिच्छकं पेसेति, एवं यो पुग्गलो उप्पन्नं कोधं वारये निग्गण्हितुं सक्कोति, तमहं सारथिं ब्रूमि । इतरो पन राजउपराजादीनं रथसारथिजनो रस्मिग्गाहो नाम होति, न उत्तमसारथीति ।

दुतियगाथाय पन अयमत्थो — योति (सु० नि० अट्ठ० १.१) यो यादिसो खत्तियकुला वा पब्बजितो ब्राह्मणकुला वा पब्बजितो नवो वा मज्झिमो वा थेरो वा । उप्पतितन्ति उद्धमुद्धं पतितं, गतं पवत्तन्ति अत्थो, उप्पन्नन्ति वुत्तं होति । कोधन्ति “अनत्थं मे चरतीति आघातो जायती”तिआदिना (दी० नि० ३.३४०; अ० नि० ९.२९) नयेन सुत्ते वुत्तानं नवन्नं, “अत्थं मे न चरती”तिआदीनञ्च तप्पटिपक्खतो सिद्धानं नवन्नमेवाति अट्टारसन्नं खाणुकण्टकादिना अट्टानेन सद्धिं एकूनवीसतिया आघातवत्थूनं अञ्जतराघातवत्थुसम्भवं आघातं । विसटन्ति वित्थतं । सप्पविसन्ति सप्पस्स विसं । इवाति ओपम्मवचनं । इ-कारलोपं कत्वा व-इच्चेव वुत्तं । ओसधेहीति अगदेहि । इदं वुत्तं होति — यथा विसतिकिच्छको वेज्जो सप्पेन दट्ठो सब्बं कायं फरित्वा ठितं विसटं सप्पविसं मूलखन्धतचपत्तपुप्फादीनं अञ्जतरेहि, नानाभेसज्जेहि पयोजेत्वा कतेहि वा ओसधेहि खिप्पमेव विनेय्य, एवमेव यो यथावुत्तेन आघातवत्थुना उप्पतितं चित्तसन्तानं व्यापेत्वा ठितं कोधं विनयनुपायेसु तदङ्गविनयादीसु येन केनचि उपायेन विनेति नाधिवासेति पजहति विनोदेति ब्यन्तिं करोति, सो भिक्खु जहाति ओरपारं । सो एवं कोधं विनेन्तो भिक्खु यस्मा कोधो ततियमग्गेन सब्बसो पहीयति, तस्मा ओरपारसज्जितानि पञ्चोरम्भागियसंयोजनानि जहातीति । अविसेसेन हि पारन्ति तीरस्स नामं, तस्मा ओरानि च तानि संसारसागरस्स पारभूतानि चाति कत्वा “ओरपार”न्ति वुच्चति ।

अथ वा यो उप्पतितं विनेति कोधं विसटं सप्पविसंव ओसधेहि, सो ततियमग्गेन सब्बसो कोधं विनेत्वा अनागामिफले ठितो भिक्खु जहाति ओरपारं । तत्थ ओरन्ति सकत्तभावो । पारन्ति परत्तभावो । ओरं वा छ अज्झत्तिकानि आयतनानि, पारं छ बाहिरायतनानि । तथा ओरं मनुस्सलोको, पारं देवलोको । ओरं कामधातु, पारं रूपारूपधातु । ओरं कामरूपभवो, पारं अरूपभवो । ओरं अत्तभावो, पारं अत्तभावसुखुपकरणानि । एवमेतस्मिं ओरपारे चतुत्थमग्गेन छन्दरागं पजहन्तो “जहाति ओरपार”न्ति वुच्चति । एत्थ च किञ्चापि अनागामिनो कामरागस्स पहीनत्ता इधत्तभावादीसु छन्दरागो एव नत्थि, अपिच खो पनस्स वण्णप्पकासनत्थं सब्बमेतं ओरपारभेदं सङ्गहेत्वा तत्थ छन्दरागप्पहानेन “जहाति ओरपार”न्ति वुत्तं ।

इदानी तस्सत्थस्स विभावनत्थाय उपमं आह “उरगो जिण्णमिवत्तचं पुराण”न्ति । तत्थ उरेन गच्छतीति उरगो,

सप्पस्सेतं अधिवचनं । सो दुविधो कामरूपी च अकामरूपी च । कामरूपीपि दुविधो जलजो थलजो च । जलजो जले एव कामरूपं लभति, न थले **सङ्खपालजातके** (जा० २.१७.१४३ आदयो) सङ्खपालनागराजा विय । थलजो थले एव, न जले । सो जज्जरभावेन जिण्णं, चिरकालताय पुराणज्वाति सङ्खं गतं तचं जहन्तो चतुब्बिधेन जहति सजातियं ठितो जिगुच्छन्तो निस्साय थामेनाति । सजाति नाम सप्पजाति दीघत्तभावो । उरगा हि पञ्चसु ठानेसु सजातिं नातिवत्तन्ति उपपत्तियं चुतियं विस्सट्ठनिद्वोक्कमने सजातिया मेथुनपटिसेवने जिण्णतचापनयने चाति । तस्मा यदा तचं जहति, तदा सजातियंयेव ठत्वा जहति । सजातियं ठितोपि च जिगुच्छन्तो जहति । जिगुच्छन्तो नाम यदा उपड्डुट्टाने मुत्तो होति, उपड्डुट्टाने अमुत्तो ओलम्बति, तदा नं अट्टीयन्तो जहति, एवं जिगुच्छन्तोपि च दण्डन्तरं वा मूलन्तरं वा पासाणन्तरं वा निस्साय जहति । निस्साय जहन्तोपि च थामं जनेत्वा उस्साहं करित्वा वीरियेन वङ्कं नङ्गुट्ठं कत्वा पस्ससन्तोव फणं करित्वा जहति । एवं जहित्वा येनकामं पक्कमति ।

एवमेव अयम्पि भिक्खु ओरपारं जहितुकामो चतुब्बिधेन जहति सजातियं ठितो जिगुच्छन्तो निस्साय थामेनाति । सजाति नाम भिक्खुनो “अरियाय जातिया जातो”ति (म० नि० २.३५१) वचनतो सीलं । तेनेवाह “सीले पतिट्ठाय नरो सपज्जो”ति (सं० नि० १.२३, १९२) । एवमेतिस्सं सजातियं ठितो भिक्खु तं सकत्तभावादिभेदं ओरपारं जिण्णपुराणत्तचमिव तं दुक्खं जनेन्तं तत्थ तत्थ आदीनवदस्सनेन जिगुच्छन्तो कल्याणमित्ते निस्साय अधिमत्तसम्मावायामसङ्घातं थामं जनेत्वा “दिवसं चङ्कमेन निसज्जाय आवरणीयेहि धम्मेहि चित्तं परिसोधेती”ति (अ० नि० ३.१६; ४.३७) वुत्तनयेन रत्तिन्दिवं छधा विभजित्वा घटेन्तो वायमन्तो उरगो विय वङ्कं नङ्गुट्ठं पल्लङ्कं आभुजित्वा उरगो विय पस्ससन्तो अयम्पि असिथिलपरक्कमताय वायमन्तो उरगोव फणं करित्वा अयम्पि जाणविप्फारं जनेत्वा उरगोव तचं ओरपारं जहति, जहित्वा च उरगो विय ओहिततचो येनकामं पक्कमति, अयम्पि ओहितभारो अनुपादिसेसनिब्बानधातुदिसं पक्कमतीति ।

**१०. भवन्तीति** इमिना विरुळ्हमूले नीलभावं आपज्जित्वा वड्डमानके तरुणगच्छे दस्सेति । अहुवुन्ति इमिना पन वड्डित्वा ठिते महन्ते रुक्खगच्छादिके दस्सेति । **भवन्तीति** इमस्स विवरणं “**जायन्ति वड्डन्ती**”ति, अहुवुन्ति इमस्स “**जाता वड्डिता**”ति । **रासीति** सुद्धट्ठकधम्मसमूहो । **भूतानन्ति** तथालद्धसमज्जानं अट्ठधम्मानं । “भूतानं गामो”ति वुत्तेपि अवयवविनिमुत्तस्स समुदायस्स अभावतो भूतसज्जिता तेयेव तिणरुक्खलतादयो गय्हन्ति । “भूमियं पतिट्ठहित्वा हरितभावमापन्ना रुक्खगच्छादयो देवताहि परिगय्हन्ति, तस्मा भूतानं निवासट्ठानताय भूतानं गामो”तिपि वदन्ति । **रुक्खादीनन्ति आदि-**सद्देन ओसधिगच्छलतादयो वेदितब्बा ।

ननु च रुक्खादयो चित्तरहितताय न जीवा, चित्तरहितता च परिप्फन्दाभावतो छिन्नेपि रुहनतो विसदिसजातिकभावतो चतुथोनिअपरियापन्नतो च वेदितब्बा, वुट्ठि पन पवाळसिलालवणानम्पि विज्जतीति न तेसं जीवभावे कारणं, विसयगगहणज्च नेसं परिकप्पनामत्तं सुपनं विय चिज्वादीनं, तथा दोहळादयो, तत्थ कस्मा भूतगामस्स छेदनादिपच्चया पाचित्तियं वुत्तन्ति? समणसारुप्यतो तंनिवाससत्तानुरक्खणतो च । तेनेवाह “**जीवसज्जिनो हि मोघपुरिसा मनुस्सा रुक्खस्मि**”न्तिआदि ।

**११. “मूले जायन्ती”**तिआदीसु अत्थो उपरि अत्तना वुच्चमानप्पकारेन सीहळट्ठकथायं वुत्तोति आह “**एवं सन्तेपि... पे०... न समेन्ती**”ति । **विजात-**सद्दो इध **वि-**सद्दलोपं कत्वा निद्विट्ठोति आह “**विजातानी**”ति । **विजात-**सद्दो च “विजाता इत्थी”तिआदीसु विय पसूतवचनोति आह “**पसूतानी**”ति । पसूति च नामेत्य निब्बत्तपण्णमूलताति आह “**निब्बत्तपण्णमूलानी**”ति । इमिना इमं दीपेति “निब्बत्तपण्णमूलानि बीजानि भूतगामसङ्खमेव गच्छन्ति, तेसु च वत्तमानो

बीजजात-सद्दो रुळ्हीवसेन रुक्खादीसुपि वत्तती'ति । पुरिमस्मिं अत्थविकप्पे पन बीजेहि जातानं रुक्खलतादीनंयेव भूतगामता वुत्ता ।

तानि दस्सेन्तोति तानि बीजानि दस्सेन्तो । मूलबीजन्ति आदीसु मूलमेव बीजं मूलबीजं । सेसेसुपि एसेव नयो । फलुबीजन्ति पब्बबीजं । पच्चयन्तरसमवाये सदिसफलुप्पत्तिया विसेसकारणभावतो विरुहनसमत्थे सारफले निरुळ्हो बीज-सद्दो । तदत्थसंसिद्धिया मूलादीसुपि केसुचि पवत्ततीति मूलादितो निवत्तनत्थं एकेन बीजसद्देन विसेसेत्वा वुत्तं “बीजबीज”न्ति “रूपरूपं, दुक्खदुक्ख”न्ति च यथा । बीजतो निब्बत्तेन बीजं दस्सितन्ति कारियोपचारेन कारणं दस्सितन्ति दीपेति ।

९२. बीजे बीजसज्जीति एत्थ कारणूपचारेन कारियं वुत्तन्ति दस्सेन्तो “तत्थ यथा”ति आदिमाह । भूतगामपरिमोचनं कत्वाति भूतगामतो मोचेत्वा, वियोजेत्वाति अत्थो । यं बीजं भूतगामो नाम होतीति बीजानि च तानि जातानि चाति वुत्तमत्थं सन्धाय वदति । तत्थ यं बीजन्ति यं निब्बत्तपण्णमूलं बीजं । तस्मिं बीजेति तस्मिं भूतगामसज्जिते बीजे । एत्थ च बीजजात-सद्दस्स विय रुळ्हीवसेन रुक्खादीसु बीज-सद्दस्सपि पवत्ति वेदितब्बा । यथारुतन्ति यथापाळि ।

यत्थ कत्थचीति मूले अगो मज्जे वा । सज्जिच्च उक्खिपितुं न वट्ठतीति एत्थ सचेपि सरीरे लग्गभावं जानन्तोव उदकतो उट्ठति, “तं उद्धरिस्सामी”ति सज्जाय अभावतो वट्ठति । उप्पाटितानीति उद्धटानि । बीजगामे सङ्गहं गच्छन्तीति भूतगामतो परिमोचितत्ता वुत्तं । अनन्तक-ग्गहणेन सासपमत्तिका गहिता । नामज्जेतं तस्सा सेवालजातिया । मूलपण्णानं असम्पुण्णत्ता “असम्पुण्णभूतगामो नामा”ति वुत्तं । अभूतगाममूलत्ताति एत्थ भूतगामो मूलं कारणं एतस्साति भूतगाममूलो, भूतगामस्स वा मूलं कारणन्ति भूतगाममूलं । बीजगामो हि नाम भूतगामतो सम्भवति, भूतगामस्स च कारणं होती, अयं पन तादिसो न होतीति “अभूतगाममूलत्ता”ति वुत्तं । तत्रट्ठकत्ता वुत्तं “सो बीजगामेन सङ्गहितो”ति । इदञ्च “अभूतगाममूलत्ता”ति एत्थ पठमं वुत्तअत्थसम्भवतो वुत्तं । किञ्चापि हि तालनाळिकेरादीनं खाणु उद्धं अवट्ठनतो भूतगामस्स कारणं न होती, तथापि भूतगामसङ्ख्युपगतनिब्बत्तपण्णमूलबीजतो सम्भूतत्ता भूतगामतो उप्पन्नो नाम होतीति बीजगामेन सङ्गहं गच्छति ।

“अङ्कुरे हरिते”ति वत्ता तमेव विभावेति “नीलपण्णवण्णे जाते”ति, नीलपण्णस्स वण्णसदिसे वण्णे जातेति अत्थो । “नीलवण्णे जाते”ति वा पाठो गहेतब्बो । अमूलकभूतगामे सङ्गहं गच्छतीति नाळिकेरस्स आवेणिकं कत्वा वदति । “पानीयघटादीनं बहि सेवालो उदके अट्ठितत्ता बीजगामानुलोमत्ता च दुक्कटवत्थू”ति वदन्ति । कण्णकम्पि अब्बोहारिकमेवाति नीलवण्णम्पि अब्बोहारिकमेव । सेलेय्यकं नाम सिलाय सम्भूता एका सुगन्धजाति । “रुक्खत्तचं विकोपेतीति वुत्तत्ता रुक्खे जातं यं किञ्चि छत्तकं रुक्खत्तचं अविकोपेत्वा मत्थकतो छिन्दित्वा गहेतुं वट्ठती”ति वदन्ति । रुक्खतो मुच्चित्वा तिट्ठतीति एत्थ “यदिपि किञ्चिमत्तं रुक्खे अल्लीना हुत्वा तिट्ठति, रुक्खतो गह्ममानो पन रुक्खच्छविं न विकोपेति, वट्ठती”ति वदन्ति । अल्लरुक्खतो न वट्ठतीति एत्थापि रुक्खत्तचं अविकोपेत्वा मत्थकतो तच्छेत्वा गहेतुं वट्ठतीति वेदितब्बं । हत्थकुक्कुच्चेनाति हत्थानं असंयतभावेन, हत्थचापल्लेनाति वुत्तं होती । पानीयं न वासेतब्बन्ति इदं अत्तनो अत्थाय नामितं सन्धाय वुत्तं । केवलं अनुपसम्पन्नस्स अत्थाय नामिते पन पच्छा ततो लभित्वा न वासेतब्बन्ति नत्थि । “येसं रुक्खानं साखा रुहतीति वुत्तत्ता येसं साखा न रुहति, तत्थ कप्पियकरणकिच्चं नत्थी”ति वदन्ति ।

९३. पञ्चहि समणकप्पेहीति पञ्चहि समणवोहारेहि । किञ्चापि हि बीजानं अग्गिना फुट्ठमत्तेन नखादीहि विलिखनमत्तेन च अविरोळ्हीधम्मता न होती, तथापि एवं कतेयेव समणानं कप्पतीति अग्गिपरिजितादयो समणवोहारा

नाम जाता, तस्मा तेहि समणवोहारेहि करणभूतेहि फलं परिभुञ्जितुं अनुजानामीति अधिष्पायो ।  
 अबीजनिब्बट्टबीजानिपि समणानं कप्पन्तीति पञ्चत्तपण्णत्तिभावतो समणवोहाराइच्चेव सङ्खं गतानि । अथ वा  
 अग्गिपरिजितादीनं पञ्चन्नं कप्पियभावतोयेव पञ्चहि समणकप्पियभावसङ्खातेहि कारणेहि फलं परिभुञ्जितुं  
 अनुजानामीति एवमेत्थ अधिष्पायो वेदितब्बो । **अग्गिपरिजितन्ति** आदीसु “परिचित”न्तिपि पठन्ति । **अबीजं** नाम  
 तरुणम्बफलादि । **निब्बट्टबीजं** नाम अम्बपनसादि, यं बीजं निब्बट्टेत्वा विसुं कत्वा परिभुञ्जितुं सक्का होति ।  
 “**कप्पियं**”न्ति वत्ताव कातब्बन्ति यो कप्पियं करोति, तेन कत्तब्बाकारस्सेव वुत्तत्ता भिक्खुना अवुत्तेपि कातुं वट्ठतीति न  
 गहेतब्बं । पुन “कप्पियं कारेतब्बं”न्ति कारापनस्स पठममेव कथितत्ता भिक्खुना “कप्पियं करोही”ति वुत्तेयेव  
 अनुपसम्पन्नेन “कप्पियं”न्ति वत्ता अग्गिपरिजितादि कातब्बन्ति गहेतब्बं । “कप्पियन्ति वचनं पन याय कायचि भासाय  
 वत्तुं वट्ठती”ति वदन्ति । “कप्पियन्ति वत्ताव कातब्बं”न्ति वचनतो पठमं “कप्पियं”न्ति वत्ता पच्छा अग्गिआदिना  
 फुसनादि कातब्बन्ति वेदितब्बं । “पठमं अग्गिं निक्खिपित्वा नखादिना वा विज्झित्वा तं अनुद्धरित्वाव ‘कप्पियं’न्ति वत्तुम्पि  
 वट्ठती”ति वदन्ति ।

**एकस्मिं बीजे वाति** आदीसु “एकंयेव कारेमीति अधिष्पाये सतिपि एकाबद्धत्ता सब्बं कतमेव होती”ति वदन्ति । **दारुं**  
**विज्झतीति** एत्थ “जानित्वापि विज्झति वा विज्झापेति वा, वट्ठतियेवा”ति वदन्ति । **भत्तसित्थे विज्झतीति** एत्थापि एसेव  
 नयो । “तं विज्झति, न वट्ठतीति रज्जुआदीनं भाजनगतिकत्ता”ति वदन्ति । **मरिचपक्कादीहि मिस्सेत्वाति** एत्थ  
 भत्तसित्थसम्बन्धवसेन एकाबद्धता वेदितब्बा, न फलानंयेव अज्जमज्जं सम्बन्धवसेन । **भिन्दापेत्वा कप्पियं**  
**कारापेतब्बन्ति** बीजतो मुत्तस्स कटाहस्स भाजनगतिकत्ता वुत्तं ।

**निक्खामेतुन्ति** तं भिक्खुं निक्खामेतुं । “सचे एतस्स अनुलोम”न्ति सेनासनरक्खणत्थाय अनुज्जातम्पि पटग्गिदानादिं  
 अत्तनापि कातुं वट्ठतीति एत्तकेनेव इदम्पि एतस्स अनुलोमन्ति एवमधिष्पायो सिया । पटग्गिदानं परित्तरणञ्च अत्तनो  
 परस्स वा सेनासनरक्खणत्थाय वट्ठतियेव । तस्मा सचे तस्स सुत्तस्स एतं अनुलोमं सिया, अत्तनो न वट्ठति, अज्जस्स  
 वट्ठतीति अयं विसेसो कुतो लब्धतीति आह “**अत्तनो न वट्ठति...पे०... न सक्का लब्धुं**”न्ति । सेसमेत्थ उत्तानमेव ।  
 भूतगामो, भूतगामसज्जिता, विकोपनं वा विकोपापनं वाति इमानि पनेत्थ तीणि अङ्गानि ।

भूतगामसिक्खापदवण्णना निट्ठिता ।

## २. अज्जवादकसिक्खापदवण्णना

१४-१८. दुतिये अज्जं वचनन्ति यं चोदकेन चुदितकस्स दोसविभावनवचनं वुत्तं, तं ततो अज्जेनेव वचनेन  
 पटिचरति । अथ वा **अज्जेनज्जं पटिचरतीति** अज्जेन कारणेन अज्जं कारणं पटिचरतीति एवमेत्थ अत्थो वेदितब्बो, यं  
 चोदकेन चुदितकस्स दोसविभावनकारणं वुत्तं, ततो अज्जेन चोदनाय अमूलकभावदीपकेन कारणेन पटिचरतीति वुत्तं  
 होति । **पटिचरतीति** च पटिच्छादनवसेन चरति, पवत्ततीति अत्थो । पटिच्छादनत्थो एव वा **चरति**-सद्दो अनेकत्थत्ता धातूनां ।  
 तेनाह “**पटिच्छादेती**”ति । **को आपन्नोति** आदिना पाळियं चोदनं अविस्सज्जेत्वा विक्खेपापज्जनवसेन अज्जेन अज्जं  
 पटिचरणं दस्सितं । अपरम्पि पन चोदनं विस्सज्जेत्वा बहिद्वा कथाअपनामवसेन पवत्तं पाळिमुत्तकं अज्जेनज्जं पटिचरणं  
 वेदितब्बं । “इत्थन्नामं आपत्तिं आपन्नोसी”ति पुट्ठो “पाटलिपुत्तं गतोम्ही”ति वत्ता पुन “न तव पाटलिपुत्तगमनं पुच्छाम,  
 आपत्तिं पुच्छामा”ति वुत्ते “ततो राजगहं गतोम्ही”ति वत्ता “राजगहं वा याहि ब्राह्मणगहं वा, आपत्तिं आपन्नोसी”ति वुत्ते  
 “तत्थ मे सूकरमंसं लब्धुं”न्ति आदीनि वत्ताव कथं बहिद्वा विक्खिपन्तोपि हि “अज्जेनज्जं पटिचरति”च्चेव सङ्खं गच्छति ।

यदेतं अज्जेन अज्जं पटिचरणवसेन पवत्तवचनं, तदेव पुच्छितमत्थं ठपेत्वा अज्जं वदतीति अज्जवादकन्ति आह “अज्जेनज्जं पटिचरणस्सेतं नाम”न्ति । तुण्हीभूतस्सेतं नामन्ति तुण्हीभावस्सेतं नामं, अयमेव वा पाठो । अज्जवादकं आरोपेतूति अज्जवादककम्मं आरोपेतु, अज्जवादकत्तं वा इदानीं करियमानेन कम्मेन आरोपेतूति अत्थो । विहेसकं आरोपेतूति एत्थापि विहेसककम्मं विहेसकभावं वा आरोपेतूति एवमत्थो दट्ठब्बो ।

अनारोपिते अज्जवादके वुत्तदुक्कटं पाळियं आगतअज्जेनज्जंपटिचरणवसेन युज्जति । अट्ठकथायं आगतेन पन पाळिमुत्तकअज्जेनज्जंपटिचरणवसेन अनारोपिते अज्जवादके मुसावादेन पाचित्तियं, आरोपिते इमिनाव पाचित्तियन्ति वेदितब्बं । केचि पन “आरोपिते अज्जवादके मुसावादेन इमिना च पाचित्तियद्वयं होती”ति वदन्ति, तं वीमंसित्वा गहेतब्बं । या सा आदिकम्मिकस्स अनापत्ति वुत्ता, सापि पाळियं आगतअज्जेनज्जंपटिचरणवसेन वुत्ताति दट्ठब्बा, इमिना सिक्खापदेन अनापत्तिदस्सनत्थं वा । सेसं उत्तानमेव । धम्मकम्मेन आरोपितता, आपत्तिया वा वत्थुना वा अनुयुज्जियमानता, छादेतुकामताय अज्जेनज्जं पटिचरणं वा तुण्हीभावो वाति इमानि पनेत्थ तीणि अङ्गानि ।

अज्जवादकसिक्खापदवण्णना निट्ठिता ।

### ३. उज्झापनकसिक्खापदवण्णना

१०३. ततिये धातुपाठे ज्ञे-सद्धो चिन्तायं पठितोति आह “लामकतो वा चिन्तापेन्ती”तिआदि । अयमेव च अनेकत्थत्ता धातूनं ओलोकनत्थोपि होतीति दट्ठब्बं । “अक्खराय वाचेती”तिआदीसु (पाचि० ४६) विय “छन्दाया”ति लिङ्गविपल्लासवसेन वुत्तन्ति आह “छन्देना”ति ।

१०५. येन वचनेनाति येन “छन्दाय इत्थन्नामो इदं नाम करोती”तिआदिवचनेन । येन च खिय्यन्तीति येन “छन्दाय इत्थन्नामो”तिआदिवचनेन तत्थ तत्थ भिक्खूनं सवनूपचारे ठत्वा अवण्णं पकासेन्ति ।

१०६. अज्जं अनुपसम्पन्नं उज्झापेतीति अज्जेन अनुपसम्पन्नेन उज्झापेति । तस्स वा तं सन्तिके खिय्यतीति तस्स अनुपसम्पन्नस्स सन्तिके तं सङ्गेन सम्मतं उपसम्पन्नं खिय्यति, अवण्णं वदन्तो वा पकासेति । अनुपसम्पन्नं सङ्गेन सम्मतन्ति एत्थ सम्मतपुब्बो सम्मतोति वुत्तो । तेनाह “किञ्चापी”तिआदि । यस्मा उज्झापनं खिय्यनञ्च मुसावादवसेनेव पवत्तं, तस्मा आदिकम्मिकस्स अनापत्तीति पाचित्तियद्वाने दुक्कटद्वाने च इमिनाव अनापत्तिदस्सनत्थं वुत्तन्ति गहेतब्बं । एवञ्च कत्वा उज्झापेन्तस्स खिय्यन्तस्स च एकक्खणे द्वे द्वे आपत्तियो होन्तीति आपन्नं । अथ वा ईदिसं सिक्खापदं मुसावादतो पठमं पज्जत्तन्ति गहेतब्बं । सेसमेत्थ उत्तानमेव । धम्मकम्मेन सम्मतता, उपसम्पन्नता, अगतिगमनाभावो, तस्स अवण्णकामता, यस्स सन्तिके वदति, तस्स उपसम्पन्नता, उज्झापनं वा खिय्यनं वाति इमानि पनेत्थ छ अङ्गानि ।

उज्झापनकसिक्खापदवण्णना निट्ठिता ।

### ४. पठमसेनासनसिक्खापदवण्णना

१०८-११०. चतुत्थे हिमवस्सेनाति हिममेव वुत्तं । अपज्जातेति अप्पतीते, अप्पसिद्धेति अत्थो । “मण्डपे वा रुक्खमूले वाति वचनतो विवटङ्गणोपि निक्खिपितुं वट्ठती”ति तीसुपि गण्ठपदेसु वुत्तं । गोचरप्पसुताति गोचरद्वानं पटिपन्ना । “अट्ठ मासे”ति इमिना वस्सानं चातुमासं चेपि देवो न वस्सति, पटिक्खित्तमेवाति आह “अट्ठ मासेति

वचनतो...पे०... निक्खिपितुं न वट्टतियेवा”ति । तत्थ चत्तारो मासेति वस्सानस्स चत्तारो मासे । अवस्सिकसङ्केतेति इमिना अनुज्जातेपि अट्ठ मासे यत्थ हेमन्ते देवो वस्सति, तत्थ अपरेपि चत्तारो मासा पटिक्खित्ताति आह “अवस्सिकसङ्केतेति वचनतो”तिआदि । इमिना इमं दीपेति “यस्मिं देसे हेमन्ते देवो वस्सति, तत्थ अट्ठ मासे पटिक्खिपित्वा चत्तारो मासा अनुज्जाता । यत्थ पन वस्सानेयेव वस्सति, तत्थ चत्तारो मासे पटिक्खिपित्वा अट्ठ मासा अनुज्जाता”ति ।

इमिनाव नयेन मज्झिमपदेसे यत्थ हेमन्ते हिमवस्सं वस्सति, तत्थापि अट्ठेव मासा पटिक्खित्ताति वेदितब्बा । तस्मा वस्सानकाले पकतिअज्झोकासे ओवस्सकमण्डपे रुक्खमूले च सन्थरितुं न वट्टति, हेमन्तकाले पकतिअज्झोकासे ओवस्सकमण्डपादीसुपि वट्टति । तच्च खो यत्थ हिमवस्सेन सेनासनं न तेमति, गिम्हकालेपि पकतिअज्झोकासादीसु वट्टतियेव, तच्च खो अकालमेघादस्सने, काकादीनं निबद्धवासरुक्खमूले पन कदाचिपि न वट्टतीति एवमेत्थ विनिच्छयो वेदितब्बो ।

इमच्च पन अत्थविसेसं गहेत्वा भगवता पठममेव सिक्खापदं पज्जत्तन्ति विसुं अनुपज्जत्ति न वुत्ता । तेनेव हि मातिकाटुकथायं (कङ्का० अट्ठ० पठमसेनासनसिक्खापदवण्णना) वुत्तं “इति यत्थ च यदा च सन्थरितुं न वट्टति, तं सब्बमिध अज्झोकाससङ्खमेव गत”न्ति । अथ वा अविसेसेन अज्झोकासे सन्थरणसन्थरापनानि पटिक्खिपित्वा “ईदिसे काले ईदिसे च पदेसे ठपेथा”ति अनुजाननमत्तेनेव अलन्ति न सिक्खापदे विसुं अनुपज्जत्ति उद्धटाति वेदितब्बा । परिवारे (परि० ६५-६७) पन इमस्सेव सिक्खापदस्स अनुरूपवसेन पज्जत्तत्ता “एका अनुपज्जत्ती”ति वुत्तं ।

नववायिमो सीघं न नस्सतीति आह “नववायिमो वा”ति । ओनद्धकोति चम्मेन ओनद्धो । उक्कट्टअब्भोकासिकोति इदं तस्स परिवितक्कदस्सनमत्तं, उक्कट्टअब्भोकासिकस्स पन चीवरकुटि न वट्टतीति नत्थि । कायानुगतिकत्ताति भिक्खुनो तत्थेव सन्निहितभावं सन्थाय वुत्तं । इमिना च तस्मिंयेव काले अनापत्ति वुत्ता, चीवरकुटितो निक्खमित्त्वा पन अज्जत्थ गच्छन्तस्स पिण्डाय पविसन्तस्सपि आपत्तियेव । “यस्मा पन दायकेहि दानकालेयेव सहस्सग्घनकम्पि कम्बलं ‘पादपुञ्छनिं कत्वा परिभुज्जथा’ति दिन्नं तथेव परिभुज्जितुं वट्टति, तस्मा ‘इमं मज्जपीठादिसेनासनं अब्भोकासेपि यथासुखं परिभुज्जथा’ति दायकेहि दिन्नं चे, सब्बस्मिम्पि काले अब्भोकासे निक्खिपितुं वट्टती”ति वदन्ति । पेसेत्वा गन्तब्बन्ति एत्थ “यो भिक्खु इमं ठानं आगन्त्वा वसति, तस्स देथा”ति वत्त्वा पेसेतब्बं ।

वलाहकानं अनुट्टितभावं सल्लक्खेत्वाति इमिना च गिम्हानेपि मेघे उट्टिते मज्जपीठादिं यंकिज्जि सेनासनं अज्झोकासे निक्खिपितुं न वट्टतीति दीपितन्ति वेदितब्बं । “पादट्टानाभिमुखाति निसीदन्तानं पादपतनट्टानाभिमुख”न्ति केचि । “सम्मज्जन्तस्स पादट्टानाभिमुख”न्ति अपरे । “बहि वालुकाय अगमननिमित्तं पादट्टानाभिमुखा वालिका हरितब्बाति वुत्त”न्ति एके । कचवरं हत्थेहि गहेत्वा बहि छट्टेतब्बन्ति इमिना कचवरं छट्टेस्सामीति वालिका न छट्टेतब्बाति दीपेति ।

१११. अन्तो संवेठेत्वा बद्धन्ति एकपत्तादीहि वेणिं कत्वा ताय वेणिया उभोसु पस्सेसु वित्थतट्टानेसु बहुं वेठेत्वा ततो पट्टाय याव मज्झट्टानं, ताव अन्तो आकट्टनवसेन वेठेत्वा मज्जे सङ्घिपित्वा तिरियं तत्थ तत्थ बन्धित्वा कतं । कप्पं लभित्वाति गच्छाति वुत्तवचनेन कप्पं लभित्वा । थेरस्स हि आणत्तिया गच्छन्तस्स अनापत्ति । पुरिमनयेनेवाति “निसीदित्वा सयं गच्छन्तो”तिआदिना पुब्बे वुत्तनयेनेव । अज्जत्थ गच्छतीति तं मगं अतिक्कमित्त्वा अज्जत्थ गच्छति । लेडुपातुपचारतो बहि ठितत्ता “पादुद्धारेन कारेतब्बो”ति वुत्तं, अज्जत्थ गच्छन्तस्स पठमपादुद्धारे दुक्कटं, दुतियपादुद्धारे

पाचित्तियन्ति अत्थो। **पाकतिकं अकत्वा**ति अप्पटिसामेत्वा। **अन्तरसन्निपाते**ति अन्तरन्तरा सन्निपाते।

**आवासिकानंयेव पलिबोधो**ति एत्थ आगन्तुकेहि आगन्त्वा किञ्चि अवत्वा तत्थ निसिन्नेपि आवासिकानंयेव पलिबोधोति अधिप्पायो। **महापच्चरिवादे** पन “अञ्जेसु आगन्त्वा निसिन्नेसू”ति इदं अम्हाकन्ति वत्वा वा अवत्वा वा निसिन्नेसूति अधिप्पायो। **महाअट्ठकथावादे** “आपत्ती”ति पाचित्तियमेव वुत्तं। **महापच्चरियं** पन सन्थरणसन्थरापने सति पाचित्तियेन भवितब्बन्ति अनाणत्तिया पञ्जत्तत्ता दुक्कटं वुत्तं। “इदं उस्सारकस्स, इदं धम्मकथिकस्सा”ति विसुं पञ्जत्तत्ता अनाणत्तिया पञ्जत्तेपि पाचित्तियेनेव भवितब्बन्ति अधिप्पायेन “तस्मिं आगन्त्वा निसिन्ने तस्स पलिबोधो”ति वुत्तं। केचि पन वदन्ति “अनाणत्तिया पञ्जत्तेपि धम्मकथिकस्स अनुट्ठापनीयत्ता पाचित्तियेन भवितब्बं, आगन्तुकस्स पन पच्छा आगतेहि वुट्ठतरेहि उट्ठापेतब्बत्ता दुक्कटं वुत्त”न्ति।

**११२. भूमियं अत्थरितब्बा**ति चिमिलिकाय सति तस्सा उपरि, असति सुद्धभूमियं अत्थरितब्बा। **सीहचम्मादीनं परिहरणेयेव पटिक्खेपो वेदितब्बो**ति इमिना —

“न, भिक्खवे, महाचम्मानि धारेतब्बानि सीहचम्मं ब्यग्घचम्मं दीपिचम्मं, यो धारेय्य, आपत्ति दुक्कटस्सा”ति (महाव० २५५) —

एवं वुत्ताय **खन्धकपाळिया** अधिप्पायं विभावेति। इदं वुत्तं होति — “अन्तोपि मज्जे पञ्जत्तानि होन्ति, बहिपि मज्जे पञ्जत्तानि होन्ती”ति इमस्मिं वत्थुस्मिं सिक्खापदस्स पञ्जत्तत्ता मज्जपीठेसु अत्थरित्वा परिभोगोयेव पटिक्खतो, भूमत्थरणवसेन परिभोगो पन अप्पटिक्खतोति। यदि एवं “परिहरणेयेव पटिक्खेपो”ति इदं कस्मा वुत्तन्ति? यथा “अनुजानामि, भिक्खवे, सब्बं पासादपरिभोग”न्ति (चूळव० ३२०) वचनतो पुगालिकेपि सेनासने सेनासनपरिभोगवसेन नियमितं सुवण्णघटादिकं परिभुज्जितुं वट्टमानम्पि केवलं अत्तनो सन्तकं कत्वा परिभुज्जितुं न वट्टति, एवमिदं भूमत्थरणवसेन परिभुज्जियमानम्पि अत्तनो सन्तकं कत्वा तं तं विहारं हरित्वा परिभुज्जितुं न वट्टतीति दस्सनत्थं “परिहरणेयेव पटिक्खेपो वेदितब्बो”ति वुत्तं। **दारुमयपीठन्ति** फलकमयमेव पीठं वुत्तं। **पादकथलिकन्ति** अधोतपादट्टपनकं। **अज्झोकासे रजनं पचित्वा...पे०... पटिसामेतब्बन्ति** एत्थ थेवे असति रजनकम्मे निट्ठिते पटिसामेतब्बं।

**११३. “भिक्खु वा सामणेरो वा आरामिको वा लज्जी होती**ति वुत्तत्ता अलज्जिं आपुच्छित्वा गन्तुं न वट्टती”ति वदन्ति। **ओतापेन्तो गच्छती**ति एत्थ “किञ्चापि ‘एत्तकं दूरं गन्तब्ब’न्ति परिच्छेदो नत्थि, तथापि लेड्डुपातं अतिक्कम्म नातिदूरं गन्तब्ब’न्ति वदन्ति। सेसमेत्थ उत्तानमेव। मज्जादीनं सङ्घिकता, वुत्तलक्खणे देसे सन्थरणं वा सन्थरापनं वा, अपलिबुद्धता, आपदाय अभावो, लेड्डुपातातिक्कमोति इमानि पनेत्थ पञ्च अङ्गानि।

**मातिकाट्ठकथायं** (कङ्का० अट्ठ० पठमसेनासनसिक्खापदवण्णना) पन **अनापुच्छं वा गच्छेय्या**ति एत्थ “यो भिक्खु वा सामणेरो वा आरामिको वा लज्जी होति, अत्तनो पलिबोधं विय मज्जति, तथारूपं अनापुच्छित्वा तं सेनासनं तस्स अनिय्यातेत्वा निरपेक्खो गच्छति, थाममज्झिमस्स पुरिसस्स लेड्डुपातं अतिक्कमेय्य, एकेन पादेन लेड्डुपातातिक्कमे दुक्कटं, दुतियपादातिक्कमे पाचित्तिय”न्ति वत्वा अङ्गेसुपि निरपेक्खताय सद्धिं छ अङ्गानि वुत्तानि। पाळियं पन अट्ठकथायज्ज “निरपेक्खो गच्छती”ति अयं विसेसो न दिस्सति। “ओतापेन्तो गच्छती”ति च ओतापनविसये एव सापेक्खगमने अनापत्ति वुत्ता। यदि अज्जत्थापि सापेक्खगमने अनापत्ति सिया, “अनापत्ति सापेक्खो गच्छती”ति अविसेसेन वत्तब्बं



भवेय्य, तस्मा वीमंसित्वा युत्तरं गहेतब्बन्ति ।

पठमसेनासनसिक्खापदवण्णना निड्ढिता ।

#### ५. दुतियसेनासनसिक्खापदवण्णना

११६. दुतियसेनासनसिक्खापदे एत्तकमेव वुत्तन्ति अट्ठकथासु वुत्तं । “इदञ्च अट्ठकथासु तथावुत्तभावदस्सनत्थं वुत्तं, अज्जम्पि तादिसं मज्जपीठेसु अत्थरितं पच्चत्थरणमेवा”ति तीसुपि गण्ठपदेसु वुत्तं । मातिकाट्ठकथायं पन “पच्चत्थरणं नाम पावारो कोजवोति एत्तकमेवा”ति नियमेत्वा वुत्तं, तस्मा गण्ठपदेसु वुत्तं इमिना न समेति, वीमंसित्वा गहेतब्बं । सेनासनतोति सब्बपच्छिमसेनासनतो । यो कोचीति तस्स जातको वा अज्जातको वा यो कोचि ।

११७. परिवेणन्ति एकेकस्स विहारस्स परिकखेपब्भन्तरं । कुरुन्दट्ठकथायं वुत्तमेवत्थं सविसेसं कत्वा दस्सेतुं “किञ्चापि वुत्तो”ति आदि आरब्धं । “अपरिच्छन्ने मण्डपे”ति विसुं योजेतब्बं । तेनेव मातिकाट्ठकथायं (कङ्का० अट्ठ० दुतियसेनासनसिक्खापदवण्णना) “अपरिच्छन्नमण्डपे वा परिच्छन्ने वापि बहूनं सन्निपातभूते”ति वुत्तं । भोजनसालायम्पि अयं विसेसो लब्धतियेव । वत्तब्बं नत्थीति विसेसेत्वा किञ्चि वत्तब्बं नत्थि । पलुज्जतीति विनस्सति । नस्सेय्याति चोरादीहि विनस्सेय्य ।

११८. येन मज्जं वा पीठं वा विनन्ति, तं मज्जपीठकवानं । सिलुच्चयलेणन्ति सिलुच्चये लेणं, पब्बतगुहाति अत्थो । “सेनासनं उपचिकाहि खायित”न्ति इमस्मिं वत्थुस्मिं पज्जत्तत्ता वत्थुअनुरूपवसेन अट्ठकथायं उपचिकासङ्काय अभावे अनापत्ति वुत्ता । वत्तक्खन्धके गमिकवत्तं पज्जपेन्तेन “सेनासनं आपुच्छितब्ब”न्ति वुत्तत्ता केवलं इतिकत्तब्बाकारमत्तदस्सनत्थं “आपुच्छनं पन वत्त”न्ति वुत्तं, न पन वत्तभेदेन दुक्कटन्ति दस्सनत्थं । तेनेव अन्धकट्ठकथायं “सेनासनं आपुच्छितब्ब”न्ति एत्थ “यं पासाणपिट्ठियं वा पासाणत्थम्भेसु वा कतसेनासनं यत्थ उपचिका नारोहन्ति, तं अनापुच्छन्तस्सपि अनापत्ती”ति वक्खति, तस्मा यं वुत्तं गण्ठपदे “तादिसे सेनासने अनापुच्छा गच्छन्तस्स पाचित्तियं नत्थि, गमिकवत्तवसेन पन अनापुच्छा गच्छतो वत्तभेदो होति, तस्मा दुक्कटं आपज्जती”ति, तं न गहेतब्बं ।

पच्छिमस्स आभोगेन मुत्ति नत्थीति तस्स पच्छतो गच्छन्तस्स अज्जस्स अभावतो वुत्तं । एकं वा पेसेत्वा आपुच्छितब्बन्ति एत्थ गमनचित्तस्स उप्पन्नद्वानतो अनापुच्छित्वा गच्छतो दुतियपादुद्दारे पाचित्तियं । किञ्चापि मज्जं वा पीठं वा अज्झोकासे निक्खिपित्वा गच्छन्तस्स इध विसुं आपत्ति न वुत्ता, तथापि अकाले अज्झोकासे मज्जपीठानि पज्जपेत्वा गच्छन्तस्स लेड्डुपातातिक्कमे पुरिमसिक्खापदेन पाचित्तियं, परिकखेपातिक्कमे इमिना दुक्कटन्ति वेदितब्बं । “मण्डपे वा रुक्खमूले वा”ति इमिना अज्झोकासोपि सङ्गहितोयेवाति तत्थापि दुक्कटं इध वुत्तमेवाति दट्ठब्बं । सेय्यं पन अज्झोकासे सन्थरित्वा गच्छन्तस्स उभयेनपि दुक्कटमेव । “सङ्घिके विहारे सङ्घिकंयेव सेय्यं सन्थरित्वा पक्कमन्तस्स पाचित्तियं वुत्तन्ति उभोसु एकेकस्मिं सङ्घिके दुक्कट”न्ति वदन्ति । सेसमेत्थ उत्तानमेव । वुत्तलक्खणसेय्या, तस्सा सङ्घिकता, वुत्तलक्खणे विहारे सन्थरणं वा सन्थरापनं वा, अपलिबुद्धता, आपदाय अभावो, अनपेक्खस्स दिसापक्कमनं, उपचारसीमातिक्कमोति इमानि पनेत्थ सत्त अङ्गानि ।

दुतियसेनासनसिक्खापदवण्णना निड्ढिता ।

#### ६. अनुपखज्जसिक्खापदवण्णना

११९-१२१. छट्ठे अनुपविसित्वाति समीपं पविसित्वा । बहूपकारतं गुणविसिट्ठतज्ज सल्लक्खेन्तोति भण्डागारिकस्स बहूपकारतं धम्मकथिकादीनं गुणविसिट्ठतज्ज सल्लक्खेन्तो । समन्ता दियड्ढो हत्थोति मज्झे पज्जत्तमज्जपीठं सन्धाय वुत्तं ।

१२२. उपचारं ठपेत्वाति वुत्तलक्खणं उपचारं ठपेत्वा । एकविहारेति एकस्मिं सेनासने । एकपरिवेणेति तस्स विहारस्स परिक्खेपब्भन्तरे । “गिलानो पविसतीति आदीसु अनापत्तिकारणसम्भावतो गिलानादिताय पविसिस्सामीति उपचारं पविसन्तस्स सतिपि सम्बाधेतुकामताय अनापत्ति वुत्तायेवा”ति तीसुपि गण्ठपदेसु वुत्तं । एवञ्च सति अगिलानादिभावोपि विसुं अङ्गेसु वत्तब्बो सिया, मातिकाट्ठकथायं (कङ्का० अट्ठ० अनुपखज्जसिक्खापदवण्णना) पन “सङ्घिकविहारता, अनुट्ठापनीयभावजाननं, सम्बाधेतुकामता, उपचारे निसीदनं वा निपज्जनं वाति इमानि पनेत्थ चत्तारि अङ्गानी”ति एत्तकमेव वुत्तं, तस्मा वीमंसितब्बं ।

अनुपखज्जसिक्खापदवण्णना निट्ठिता ।

### ७. निक्कट्ठनसिक्खापदवण्णना

१२६. सत्तमे कोट्टकानीति द्वारकोट्टकानि । “निक्खमाति वचनं सुत्वापि अत्तनो रुचिया निक्खमति, अनापत्ती”ति वदन्ति ।

१२८. अलज्जिं निक्कट्ठतीति आदीसु पठमं अलज्जीआदिभावेन निक्कट्ठिस्सामीति चिन्तेत्वा निक्कट्ठन्तस्स चित्तस्स लहुपरिवत्तिताय कोपे उप्पन्नेपि अनापत्ति । सेसमेत्थ उत्तानमेव । सङ्घिकविहारो, उपसम्पन्नस्स भण्डनकारकभावादिविनिमुत्तता, कोपेन निक्कट्ठनं वा निक्कट्ठापनं वाति इमानि पनेत्थ तीणि अङ्गानि ।

निक्कट्ठनसिक्खापदवण्णना निट्ठिता ।

### ८. वेहासकुटिसिक्खापदवण्णना

१२९-१३१. अट्ठमे उपरिमतले पदरानं असन्थरितत्ता “उपरिअच्छन्नतलाया”ति वुत्तं । पुब्बे वुत्तनयेनेवाति अनुपखज्जसिक्खापदे वुत्तनयेनेव । सेसं सुविज्जेय्यमेव । सङ्घिको विहारो, असीसघट्टा वेहासकुटि, हेट्ठा सपरिभोगता, अपटाणिदिन्ने आहच्चपादके निसीदनं वा निपज्जनं वाति इमानि पनेत्थ चत्तारि अङ्गानि ।

वेहासकुटिसिक्खापदवण्णना निट्ठिता ।

### ९. महल्लकविहारसिक्खापदवण्णना

१३५. नवमे “महल्लको नाम विहारो ससामिको”ति वुत्तत्ता सज्जाचिकाय कुटिया अनापत्ति । “अट्ठतेय्यहत्थम्पी”ति उक्कट्ठपरिच्छेदेन वुत्तवचनं पाळिया समेतीति आह “तं सुवुत्त”न्ति । “पाळियं अट्ठकथायज्ज उक्कट्ठपरिच्छेदेन अट्ठतेय्यहत्थप्पमाणस्स ओकासस्स दस्सितत्ता कवाटं अट्ठतेय्यहत्थवित्थारतो ऊनकं वा होतु अधिकं वा, अट्ठतेय्यहत्थप्पमाणंयेव ओकासो”ति वदन्ति ।

यस्स वेमज्झेति यस्स विहारस्स वेमज्झे । सा अपरिपूरुपचारपि होतीति विवरियमानं कवाटं यं भित्तिं आहनति, सा समन्ता कवाटवित्थारप्पमाणउपचाररहितापि होतीति अत्थो । आलोकं सन्धेति पिधेतीति **आलोकसन्धि** । “पुनप्पुनं छादापेसि, पुनप्पुनं लिम्पापेसीति इमस्मिं वत्थुस्मिं उप्पन्नदोसेन सिक्खापदस्स पञ्चत्तत्ता लेपं अनुजानन्तेन च द्वारबन्धस्स समन्ता अट्टतेय्यहत्थप्पमाणेयेव पदेसे पुनप्पुनं लेपस्स अनुज्जातत्ता ततो अज्जत्थ पुनप्पुनं लिम्पेन्तस्स वा लिम्पापेन्तस्स वा भित्तिं मत्तिकाय कत्तब्बकिच्चं निट्ठापेत्वा पुन चतुत्थलेपे दिन्ने पाचित्तियेन भवितब्ब”न्ति वदन्ति । **गण्ठपदेसु** पन तीसुपि “पुनप्पुनं लेपदानस्स वुत्तप्पमाणतो अज्जत्थ पटिक्खित्तमत्तं ठपेत्वा पाचित्तियस्स अवुत्तत्ता दुक्कटं अनुरूप”न्ति वुत्तं ।

**अधिट्ठातब्बन्ति** संविधातब्बं । **अप्पहरितेति** एत्थ **अप्प**-सद्दो “अप्पिच्छो”ति आदीसु विय अभावत्थोति आह “अहरिते”ति । **पतनोकासोति** पतनोकासत्ता तत्र ठितस्स भिक्खुनो उपरि पतेय्याति अधिप्पायो । **सचे हरिते ठितो अधिट्ठेति**, **आपत्ति दुक्कटस्साति** वचनेन इममत्थं दीपेति — सचे विहारस्स समन्ता वुत्तप्पमाणे परिच्छेदे पुब्बण्णादीनि न सन्ति, तत्थ विहारो कारेतब्बो । यत्थ पन सन्ति, तत्थ कारापेन्तस्स दुक्कटन्ति ।

१३६. एकेकं मग्गं उज्जुक्मेव उट्ठपेत्वा छादनं मग्गेन छादनं नाम होतीति दस्सेतुं “**मग्गेन छादेन्तस्सा**”ति वुत्तं । इमिना पन नयेन सब्बस्मिं विहारे एकवारं छादिते तं छदनं एकमग्गन्ति गहेत्वा “**द्वे मग्गे**”ति आदि वुत्तं । “परियायेन छादनेपि इमिनाव नयेन योजेतब्ब”न्ति तीसुपि **गण्ठपदेसु** वुत्तं, तं “पुनप्पुनं छादापेसी”ति इमाय पाळिया “सब्बम्पि चेतं छदनं छदनूपरि वेदितब्ब”न्ति इमिना अट्ठकथावचनेन च समेति, तस्मा द्वे **मग्गे अधिट्ठित्वा ततियाय मग्गं आणापेत्वा पक्कमितब्बन्ति** एत्थ द्वे छदनानि अधिट्ठित्वा ततियं छदनं “एवं छादेही”ति आणापेत्वा पक्कमितब्बन्ति एवमत्थो गहेतब्बो ।

केचि पन “पठमं ताव एकवारं अपरिसेसं छादेत्वा पुन छदनदण्डके बन्धित्वा दुतियवारं तथेव छादेतब्बं, ततियवारचतुत्थवारे सम्पत्ते द्वे मग्गे अधिट्ठित्वा आणापेत्वा पक्कमितब्ब”न्ति वदन्ति । अपरे पन “पठमवारेयेव तयोपि मग्गे अधिट्ठातुं वट्ठति, चतुत्थतो पट्ठाय आपत्ति पाचित्तिय”न्ति वदन्ति । तदुभयम्पि पाळिया अट्ठकथाय च न समेति । **ततियाय मग्गन्ति** एत्थ **ततियायाति** उपयोगत्थे सम्पदानवचनं, ततियं मग्गन्ति अत्थो । **तिण्णं मग्गानन्ति** मग्गवसेन छादितानं तिण्णं छदनानं । **तिण्णं परियायानन्ति** एत्थापि एसेव नयो । **चतुत्थे मग्गे वा परियाये वाति** च तथा छादेन्तानं चतुत्थं छादनमेव वुत्तं । सेसं उत्तानमेव । महल्लकविहारता, अत्तनो वासागारता, उत्तरि अधिट्ठानन्ति इमानि पनेत्थ तीणि अङ्गानि ।

महल्लकविहारसिक्खापदवण्णना निट्ठिता ।

## १०. सप्पाणकसिक्खापदवण्णना

१४०. दसमे इमस्स सिक्खापदस्स “सिज्जेय्य वा सिज्जापेय्य वा”ति बाहिरपरिभोगवसेन पठमं पञ्चत्तत्ता “सप्पाणकं उदकं परिभुज्जेय्या”ति सिक्खापदं अत्तनो नहानपानादिपरिभोगवसेन पञ्चत्तन्ति वेदितब्बं । तस्मिं वा पठमं पञ्चत्तेपि अत्तनो परिभोगवसेनेव पञ्चत्तत्ता पुन इमं सिक्खापदं बाहिरपरिभोगवसेनेव पञ्चत्तन्ति गहेतब्बं ।

सप्पाणकसज्जिस्स “परिभोगेन पाणका मरिस्सन्ती”ति पुब्बभागे जानन्तस्सपि सिज्जनसिज्जापनं “पदीपे निपतित्वा

पटङ्गादिपाणका मरिस्सन्ती’ति जानन्तस्स पदीपुज्जलनं विय विनापि वधकचेतनाय होतीति आह “**पण्णत्तिवज्ज**”न्ति । सेसं उत्तानत्थमेव । उदकस्स सप्पाणकता, “सिञ्चनेन पाणका मरिस्सन्ती’ति जाननं, तादिसमेव च उदकं, विना वधकचेतनाय केनचिदेव करणीयेन तिणादीनं सिञ्चनन्ति इमानि पनेत्थ चत्तारि अङ्गानि ।

सप्पाणकसिक्खापदवण्णना निट्ठिता ।

निट्ठितो सेनासनवग्गो दुतियो ।

भूतगामवग्गोतिपि इमस्सेव नामं ।

### ३. ओवादवग्गो

#### १. ओवादसिक्खापदवण्णना

१४४. भिक्खुनिवग्गस्स पठमसिक्खापदे **कथानुसारेना**ति “सो थेरो किंसीलो किंसमाचारो कतरकुला पब्बजितो’तिआदिना पुच्छन्तानं पुच्छाकथानुसारेन । **कथेतुं वट्ठन्ती**ति निरामिसेनेव चित्तेन कथेतुं वट्ठन्ति । अनिय्यानिकत्ता सग्गमोक्खमग्गानं तिरच्छानभूता कथा **तिरच्छानकथा**ति आह “**सग्गमग्गमनेपी**’तिआदि । **अपि-**सद्देन पगेव मोक्खमग्गमनेति दीपेति । **तिरच्छानभूतन्ति** तिरोकरणभूतं, बाधिकन्ति वुत्तं होति । लद्धासेवना हि तिरच्छानकथा सग्गमोक्खानं बाधिकाव होति । **समिद्धो**ति परिपुण्णो । **सहितत्थो**ति युत्तत्थो । अत्थगम्भीरतादियोगतो **गम्भीरो** । **बहुरसो**ति अत्थरसादिबहुरसो । **लक्खणपटिवेधसंयुत्तो**ति अनिच्चादिलक्खणपटिवेधरसआवहनतो लक्खणपटिवेधसंयुत्तो ।

१४५-१४७. **परतो**ति परत्थ, उत्तरिन्ति अत्थो । **करोन्तोवा**ति परिबाहिरे करोन्तोयेव । **पातिमोक्खो**ति चारित्तवारित्तप्पभेदं सिक्खापदसीलं । तज्झि यो नं पाति रक्खति, तं मोक्खेति मोचेति आपायिकादीहि दुक्खेहि, तस्मा “**पातिमोक्ख**”न्ति वुच्चति । संवरणं **संवरो**, कायवचीद्वारानं पिदहनं । येन हि ते संवुता पिहिता होन्ति, सो संवरो, कायिकवाचसिकस्स अवीतिककमस्सेतं नामं । **पातिमोक्खसंवरेन संवुतो**ति पातिमोक्खसंवरेन पिहितकायवचीद्वारो । तथाभूतो च यस्मा तेन समङ्गी नाम होति, तस्मा वुत्तं “**समन्नागतो**”ति । **वत्तती**ति अत्तभावं पवत्तेति । **विहरती**ति इमिना पातिमोक्खसंवरसीले ठितस्स भिक्खुनो इरियापथविहारो दस्सितो ।

सङ्खेपतो वुत्तमत्थं वित्थारतो पाळिया विभावेतुं “**वुत्तज्हेत**”न्तिआदि आरब्धं । तत्थ **विभङ्गे**ति ज्ञानविभङ्गे । **सीलं पतिट्ठा**तिआदीनि पातिमोक्खस्सेव वेवचनानि । तत्थ (विभ० अट्ठ० ५११) सीलन्ति कामज्चेतं सह कम्मवाचापरियोसानेन इज्जनकस्स पातिमोक्खस्सेव वेवचनं, एवं सन्तेपि धम्मतो एतं सीलं नाम पाणातिपातादीहि वा विरमन्तस्स वत्तपटिपत्तिं वा पूरेन्तस्स चेतनादयो धम्मा वेदितब्बा । यस्मा पन पातिमोक्खसीलेन भिक्खु सासने पतिट्ठाति नाम, तस्मा तं “**पतिट्ठा**”ति वुत्तं । पतिट्ठहति वा एत्थ भिक्खु, कुसलधम्मा एव वा एत्थ पतिट्ठहन्तीति **पतिट्ठा** । अयमत्थो “सीले पतिट्ठाय नरो सपज्जो’ति (सं० नि० १.२३, १९२) च “पतिट्ठा, महाराज, सीलं सब्बेसं कुसलानं धम्मानं”न्ति (मि० प० २.१.९) च “सीले पतिट्ठितस्स खो, महाराज, सब्बे कुसला धम्मा न परिहायन्ती’ति च आदिसुत्तवसेन वेदितब्बो ।

तदेतं पुब्बुप्पत्तिअत्थेन **आदि** । वुत्तम्पि चेतं —

“तस्मातिह त्वं, उत्तिय, आदिमेव विसोधेहि कुसलेसु धम्मेसु । को चादि कुसलानं धम्मानं? सीलञ्च सुविसुद्धं दिट्ठि च उजुका”ति (सं० नि० ५.३८२) ।

यथा हि नगरवट्टकी नगरं मापेतुकामो पठमं नगरद्वानं सोधेति, ततो अपरभागे वीथिचतुक्कसिङ्घाटकादिपरिच्छेदेन विभजित्वा नगरं मापेति, एवमेव योगावचरो आदिमिह सीलं सोधेति, ततो अपरभागे समाधिविपस्सनामगगफलनिब्बानानि सच्छिकरोति । यथा वा पन रजको पठमं तीहि खारेहि वत्थं धोवित्वा परिसुद्धे वत्थे यदिच्छकं रङ्गजातं उपनेति, यथा वा पन छेको चित्तकारो रूपं लिखितुकामो आदितो भित्तिपरिकम्मं करोति, ततो अपरभागे रूपं समुद्धापेति, एवमेव योगावचरो आदितो व सीलं विसोधेत्वा अपरभागे समथविपस्सनादयो धम्मे सच्छिकरोति । तस्मा सीलं “आदी”ति वुत्तं ।

तदेतं चरणसरिक्खताय **चरणं** । “चरणा”ति पादा वुच्चन्ति । यथा हि छिन्नचरणस्स पुरिसस्स दिसंगमनाभिसङ्खारो न जायति, परिपुण्णपादस्सेव जायति, एवमेव यस्स सीलं भिन्नं होति खण्डं अपरिपुण्णं, तस्स निब्बानगमनाय जाणगमनं न सम्पज्जति । यस्स पन तं अभिन्नं होति अखण्डं परिपुण्णं, तस्स निब्बानगमनाय जाणगमनं सम्पज्जति । तस्मा सीलं “चरण”न्ति वुत्तं ।

तदेतं संयमनवसेन **संयमो**, संवरणवसेन **संवरो**ति उभयेनपि सीलसंयमो चेव सीलसंवरो च कथितो । वचनत्थो पनेत्थ संयमेति वीतिक्कमविप्फन्दनं, पुग्गलं वा संयमेति वीतिक्कमवसेन तस्स विप्फन्दितुं न देतीति **संयमो**, वीतिक्कमस्स पवेसनद्वारं संवरति पिदहतीति **संवरो** । **मोक्खन्ति** उत्तमं मुखभूतं वा । यथा हि सत्तानं चतुब्बिधो आहारो मुखेन पविसित्वा अङ्गमङ्गानि फरति, एवं योगिनोपि चतुभूमककुसलं सीलमुखेन पविसित्वा अत्थसिद्धिं सम्पादेति । तेन वुत्तं “मोक्ख”न्ति । पमुखे साधूति **पमोक्खं**, पुब्बङ्गमं सेट्ठं पधानन्ति अत्थो । **कुसलानं धम्मानं समापत्तियाति** चतुभूमककुसलानं पटिलाभत्थाय पमोक्खं पुब्बङ्गमं सेट्ठं पधानन्ति वेदितब्बं ।

**कायिको अवीतिक्कमो**ति तिविधं कायसुचरितं । **वाचसिको**ति चतुब्बिधं वचीसुचरितं । **कायिकवाचसिको**ति तदुभयं । इमिना आजीवट्टमकसीलं परियादाय दस्सेति । **संवुतो**ति पिहितो, संवुतिन्द्रियो पिहितिन्द्रियोति अत्थो । यथा हि संवुतद्वारं गेहं “संवुतगेहं पिहितगेह”न्ति वुच्चति, एवमिध संवुतिन्द्रियो “संवुतो”ति वुत्तो । **पातिमोक्खसंवरेनाति** पातिमोक्खसङ्घातेन संवरेन । **उपेतो**ति आदीनि सब्बानि अज्जमज्जवेवचनानि ।

**इरियतीति** आदीहि सत्तहिपि पदेहि पातिमोक्खसंवरसीले ठितस्स भिक्खुनो इरियापथविहारो कथितो । तत्थ **इरियतीति** चतुन्नं इरियापथानं अज्जतरसमङ्गिभावतो इरियति । तेहि इरियापथचतुक्केहि कायसकटवत्तनेन **वत्तति** । एकं इरियापथदुक्खं अपरेन इरियापथेन विच्छिन्दित्वा चिरट्ठितिभावेन सरीररक्खणतो **पालेति** । एकस्मिं इरियापथे असण्ठहित्वा सब्बइरियापथे वत्तनतो **यपेति** । तेन तेन इरियापथेन तथा तथा कायस्स यापनतो **यापेति** । चिरकालवत्तापनतो **चरति** । इरियापथेन इरियापथं विच्छिन्दित्वा जीवितहरणतो **विहरति** ।

**मिच्छाजीवपटिसेधकेनाति** —

“इधेकच्चो वेळुदानेन वा पत्तदानेन वा पुप्फ फल सिनानदन्तकट्टदानेन वा चाटुकम्यताय वा मुग्गसूयताय वा पारिभटयताय वा जङ्घपेसनिकेन वा अज्जतरज्जतरेन वा बुद्धपटिकुट्टेन मिच्छाआजीवेन जीविकं कप्पेति, अयं वुच्चति अनाचारो”ति (विभ० ५१३) —

एवं वुत्तअनाचारसङ्घातमिच्छाजीवपटिपक्खेन ।

**न वेळुदानादिना आचारेनाति —**

“इधेकच्चो न वेळुदानेन न पत्त न पुप्फ न फल न सिनान न दन्तकट्ट न चाटुकम्यताय न मुग्गसूय्यताय न पारिभटयताय न जङ्घपेसनिकेन न अज्जतरज्जतरेन बुद्धपटिकुट्टेन मिच्छाआजीवेन जीविकं कप्पेति, अयं वुच्चति आचारो”ति (विभ० ५१३) —

एवं वुत्तेन न वेळुदानादिना आचारेन ।

**वेसियादिअगोचरं पहायाति —**

“इधेकच्चो वेसियगोचरो वा होति विधव थुल्लकुमारि पण्डक भिक्खुनि पानागारगोचरो वा, संसट्ठो विहरति राजूहि राजमहामत्तेहि तिथियेहि तिथियसावकेहि अननुलोमिकेन संसग्गेन, यानि पन तानि कुलानि अस्सद्धानि अप्पसन्नानि अनोपानभूतानि अक्कोसकपरिभासकानि अनत्थकामानि अहितकामानि अफासुककामानि अयोगक्खेमकामानि भिक्खूनं भिक्खुनीनं उपासकानं उपासिकानं, तथारूपानि कुलानि सेवति भजति पयिरुपासति, अयं वुच्चति अगोचरो”ति (विभ० ५१४) —

एवमागतं वेसियादिअगोचरं पहाय ।

**सद्धासम्पन्नकुलादिनाति** एत्थ आदि-सद्धेन उपनिस्सयगोचरादिं सङ्गणहाति । तिविधो हि गोचरो उपनिस्सयगोचरो आरक्खगोचरो उपनिबन्धगोचरोति । कतमो उपनिस्सयगोचरो? दसकथावत्थुगुणसमन्नागतो कल्याणमित्तो, यं निस्साय असुतं सुणाति, सुतं परियोदपेति, कङ्कं वितरति, दिट्ठिं उजुं करोति, चित्तं पसादेति । यस्स वा पन अनुसिक्खमानो सद्धाय वड्ढति, सीलेन सुतेन चागेन पज्जाय वड्ढति, अयं **उपनिस्सयगोचरो** । कतमो आरक्खगोचरो? इध भिक्खु अन्तरघरं पविट्ठो वीथिं पटिपन्नो ओक्खित्तचक्खु युगमत्तदस्सावी संवुतो गच्छति, न हत्थिं ओलोकेन्तो, न अस्सं, न रथं, न पत्तिं, न इत्थिं, न पुरिसं ओलोकेन्तो, न उद्धं ओलोकेन्तो, न अधो ओलोकेन्तो, न दिसाविदिसं विपेक्खमानो गच्छति, अयं **आरक्खगोचरो** । कतमो उपनिबन्धगोचरो? चत्तारो सतिपट्ठाना, यत्थ चित्तं उपनिबन्धति । वुत्तज्जेतं भगवता “को च, भिक्खवे, भिक्खुनो गोचरो सको पेत्तिको विसयो? यदिदं चत्तारो सतिपट्ठाना”ति (सं० नि० ५.३७२), अयं **उपनिबन्धगोचरो** । इति अयं तिविधो गोचरो इध आदि-सद्धेन सङ्गहितोति दट्ठब्बो ।

**अप्पमत्तकेसु वज्जेसूति** असज्जिच्च आपन्नसेखियअकुसलचित्तुप्पादादिभेदेसु वज्जेसु । **भयतो दस्सनसीलोति** परमाणुमत्तं वज्जं अट्ठसट्ठियोजनसतसहस्सुब्बेधसिनेरुपब्बतसदिसं कत्वा दस्सनसभावो, सब्बलहुकं वा दुब्भासितमत्तं पाराजिकसदिसं कत्वा दस्सनसभावो । **सम्मा आदायाति** सम्मदेव सक्कच्चं सब्बसो वा आदियित्वा ।

वट्ठदुक्खनिस्सरणत्थिकेहि सोतब्बतो **सुतं**, परियत्तिधम्मो । तं धारेतीति **सुतधरो**, सुतस्स आधारभूतो । यस्स हि इतो गहितं एतो पलायति, छिद्दघटे उदकं विय न तिड्ढति, परिसमज्झे एकं सुतं वा जातकं वा कथेतुं वा वाचेतुं वा न सक्कोति, अयं न सुतधरो नाम । यस्स पन उग्गहितं बुद्धवचनं उग्गहितकालसदिसमेव होति, दसपि वीसतिपि वस्सानि सज्झायं अकरोन्तस्स न नस्सति, अयं सुतधरो नाम । तेनेवाह “**यदस्स तं**”न्तिआदि । एकपदम्पि एकक्खरम्पि अविनट्ठं हुत्वा

सन्निचयतीति सन्निचयो, सुतं सन्निचयो एतस्मिन्ति **सुतसन्निचयो**ति आह “**सुतं सन्निचितं अस्मिन्ति सुतसन्निचयो**”ति । यस्स हि सुतं हृदयमञ्जुसायं सन्निचितं सिलाय लेखा विय सुवण्णघटे पक्खित्ता सीहवसा विय च साधु तिष्ठति, अयं सुतसन्निचयो नाम । तेनाह “**एतेन... पे०... अविनासं दस्सेती**”ति ।

**धाता**ति पगुणा वाचुग्गता । एकस्स हि उग्गहितबुद्धवचनं निच्चकालिकं न होति, “असुकसुत्तं वा जातकं वा कथेही”ति वुत्ते “सज्झायित्वा अज्जेहि संसन्दित्वा परिपुच्छावसेन अत्थं ओगाहित्वा जानिस्सामी”ति वदति । एकस्स पगुणं पबन्धविच्छेदाभावतो गङ्गासोतसदिसं भवङ्गसोतसदिसञ्च अकित्तिमं सुखप्पवत्ति होति, “असुकसुत्तं वा जातकं वा कथेही”ति वुत्ते उद्धरित्वा तमेव कथेति । तं सन्धाय वुत्तं “**धाता**”ति । **वाचाय पगुणा कता**ति सुत्तदसकवग्गदसकपण्णासदसकवसेन वाचाय सज्झायिता, दस सुत्तानि गतानि, दस वग्गानि गतानीति आदिना सल्लकखेत्वा वाचाय सज्झायिताति अत्थो । सुत्तेकदेसस्स हि सुत्तमत्तस्स च वचसा परिचयो इध नाधिप्पेतो, अथ खो वग्गादिवसेनेव । **मनसा अनुपेक्खिता**ति मनसा अनु अनु पेक्खिता, भागसो निज्झायिता चिन्तिताति अत्थो । **आवज्जन्तस्सा**ति वाचाय सज्झायितुं बुद्धवचनं मनसा चिन्तेन्तस्स । **सुद्धु पटिविद्धा**ति निज्जटं निग्गुम्बं कत्वा सुद्धु याथावतो पटिविद्धा ।

**द्वे मातिका**ति भिक्खुमातिका भिक्खुनीमातिका च । **वाचुग्गता**ति पुरिमस्सेव वेवचनं । **तिस्सो अनुमोदना**ति सङ्गभत्ते दानानिसंसपटिसंयुत्तानुमोदना, विहारादिमङ्गले मङ्गलसुत्तादिअनुमोदना, मतकभत्तादिअवमङ्गले तिरोकुट्टादिअनुमोदनाति इमा तिस्सो अनुमोदना । **कम्माकम्मविनिच्छयो**ति परिवारावसाने कम्मवग्गे वुत्तविनिच्छयो । “विपस्सनावसेन उग्गहन्तेन चतुधातुववत्थानमुखेन उग्गहेतब्ब”न्ति तीसुपि **गण्ठपदेसु** वुत्तं । चतूसु दिसासु अप्पटिहतत्ता चतस्सो दिसा एतस्साति चतुदिसो, चतुदिसोयेव **चातुदिसो**, चतस्सो वा दिसा अरहति, चतूसु वा दिसासु साधूति **चातुदिसो** ।

**अभिविनये**ति सकले विनयपिटके । **विनेतु**न्ति सिक्खापेतुं । “**द्वे विभङ्गा पगुणा वाचुग्गता कातब्बा**ति इदं परिपुच्छावसेन उग्गहणम्पि सन्धाय वुत्त”न्ति वदन्ति । एकस्स पमुट्ठं, इतरस्स पगुणं होतीति आह “**तीहि जनेहि सद्धिं परिवत्तनक्खमा कातब्बा**”ति । **अभिधम्म**ेति नामरूपपरिच्छेदे । **हेट्ठिमा वा तयो वग्गा**ति महावग्गतो हेट्ठा सगाथकवग्गो निदानवग्गो खन्धकवग्गोति इमे तयो वग्गा । “धम्मपदम्पि सह वत्थुना उग्गहेतुं वट्ठती”ति **महापच्चरियं** वुत्तत्ता जातकभाणकेन साट्ठकथं जातकं उग्गहेत्वापि धम्मपदम्पि सह वत्थुना उग्गहेतब्बमेव ।

कल्याणा सुन्दरा परिमण्डलपदव्यञ्जना वाचा अस्साति **कल्याणवाचो** । तेनाह “**सिथिलधनितादीनं... पे०... वाचाय समन्नागतो**”ति । तत्थ **परिमण्डलपदव्यञ्जना**याति ठानकरणसम्पत्तिया सिक्खासम्पत्तिया च कत्थचिपि अनूनताय परिमण्डलपदानि व्यञ्जनानि अक्खरानि एतिस्साति परिमण्डलपदव्यञ्जना, पदमेव वा अत्थस्स व्यञ्जनतो **पदव्यञ्जनं**, तं अक्खरपारिपूरिं कत्वा सिथिलधनितादिदसविधं व्यञ्जनबुद्धिं अपरिहापेत्वा वुत्तं **परिमण्डलं** नाम होति । अक्खरपारिपूरिया हि पदव्यञ्जनस्स परिमण्डलता । तेन वुत्तं “**सिथिलधनितादीनं यथाविधानवचनेना**”ति, परिमण्डलं पदव्यञ्जनं एतिस्साति **परिमण्डलपदव्यञ्जना** । अथ वा पज्जति जायति अत्थो एतेनाति पदं, नामादि । यथाधिप्पेतमत्थं व्यञ्जेतीति व्यञ्जनं, वाक्यं । तेसं परिपुण्णताय **परिमण्डलपदव्यञ्जना** ।

अपिच यो भिक्खु परिसति धम्मं देसेन्तो सुत्तं वा जातकं वा निक्खिपित्वा अज्जं उपारम्भकरं सुत्तं आहरति, तस्स उपमं कथेति, तदत्थं ओतारेति, एवं इदं गहेत्वा एत्थ खिपन्तो एकपस्सेनेव परिहरन्तो कालं अत्वा वुट्ठहति, निक्खित्तसुत्तं

पन निक्खित्तमत्तमेव होति, तस्स कथा अपरिमण्डला नाम होति अत्थस्स अपरिपुण्णभावतो । यो पन सुत्तं वा जातकं वा निक्खिपित्वा बहि एकपदमि अगन्त्वा यथानिक्खित्तस्स सुत्तस्स अत्थसंवण्णनावसेनेव सुत्तन्तरमि आनेन्तो पाळिया अनुसन्धिञ्च पुब्बापरञ्च अपेक्खन्तो आचरियेहि दिन्ननये ठत्वा तुलिकाय परिच्छिन्दन्तो विय तं तं अत्थं सुववत्थितं कत्वा दस्सेन्तो गम्भीरमातिकाय उदकं पेसेन्तो विय गम्भीरमत्थं गमेन्तो वग्गिहारिगतिया पदे पदं कोट्टेन्तो सिन्धवाजानीयो विय एकंयेव पदं अनेकेहि परियायेहि पुनप्पुनं संवण्णन्तो गच्छति, तस्स कथा परिमण्डला नाम होति धम्मतो अत्थतो अनुसन्धितो पुब्बापरतो आचरियुग्गहोति सब्बसो परिपुण्णभावतो । एवरूपमि कथं सन्धाय “परिमण्डलपदव्यञ्जनाया”ति वुत्तं ।

गुणपरिपुण्णभावेन पुरे भवाति पोरी, तस्स भिक्खुनो तेनेतं भासितब्बं अत्थस्स गुणपरिपुण्णभावेन पुरे पुण्णभावे भवाति अत्थो । पुरे वा भवत्ता पोरिया नागरिकित्थिया सुखुमालत्तनेन सदिसाति पोरी, पुरे संवड्डनारी विय सुकुमाराति अत्थो । पुरस्स एसातिपि पोरी, पुरस्स एसाति नगरवासीनं कथाति अत्थो । नगरवासिनो हि युत्तकथा होन्ति पितिमत्तं “पिता”ति, भातिमत्तं “भाता”ति वदन्ति । एवरूपी हि कथा बहुनो जनस्स कन्ता होति मनापा, ताय पोरिया ।

विस्सट्ठायाति पित्तसेम्हादीहि अपलिबुद्धाय सन्दिट्ठविलम्बितादिदोसरहिताय । अथ वा नातिसीघं नातिसणिकं निरन्तरं एकरसञ्च कत्वा परिसाय अज्झासयानुरूपं धम्मं कथेन्तस्स वाचा विस्सट्ठा नाम । यो हि भिक्खु धम्मं कथेन्तो सुत्तं वा जातकं वा आरभित्वा आरब्धकालतो पट्ठाय तुरिततुरितो अरणिं मन्थेन्तो विय उण्हखादनीयं खादन्तो विय पाळिया अनुसन्धिपुब्बापरेसु गहितं गहितमेव, अगगहितं अगगहितमेव कत्वा पुराणपण्णन्तरेसु चरमानं गोधं उट्ठापेन्तो विय तत्थ तत्थ पहरन्तो ओसापेत्वा उट्ठाय गच्छति । पुराणपण्णन्तरेसु हि परिपातियमाना गोधा कदाचि दिस्सति कदाचि न दिस्सति, एवमेकच्चस्स अत्थवण्णना कत्थचि दिस्सति कत्थचि न दिस्सति । योपि धम्मं कथेन्तो कालेन सीघं, कालेन सणिकं, कालेन मन्दं, कालेन महासदं, कालेन खुदकसदं करोति, यथा निज्झामतण्हकपेतस्स मुखतो निच्छरणकअग्गि कालेन जलति कालेन निब्बायति, एवं पेतधम्मकथिको नाम होति, परिसाय उट्ठातुकामाय पुन आरभति । योपि कथेन्तो तत्थ तत्थ वित्थायति, अप्पटिभानताय आपज्जति, केनचि रोगेन नित्थुनन्तो विय कन्दन्तो विय कथेति, इमेसं सब्बेसमि कथा विस्सट्ठा नाम न होति सुखेन अप्पवत्तभावतो । यो पन सुत्तं आहरित्वा आचरियेहि दिन्ननये ठितो आचरियुग्गहं अमुञ्चन्तो यथा च आचरिया तं तं सुत्तं संवण्णेसुं, तेनेव नयेन संवण्णन्तो नातिसीघं नातिसणिकन्तिआदिना वुत्तनयेन कथापबन्धं अविच्छिन्नं कत्वा नदीसोतो विय पवत्तेति, आकासगङ्गातो भस्समानउदकं विय निरन्तरकथं पवत्तेति, तस्स कथा विस्सट्ठा नाम होति । तं सन्धाय वुत्तं “विस्सट्ठाया”ति ।

अनेलगळायाति एलगळविरहिताय । कस्सचि हि कथेन्तस्स एलं गळति, लाला पग्घरति, खेळफुसितानि वा निक्खमन्ति, तस्स वाचा एलगळा नाम होति, तब्बिपरीतायाति अत्थो । अत्थस्स विज्जापनियाति आदिमज्झपरियोसानं पाकटं कत्वा भासितत्थस्स विज्जापनसमत्थताय अत्थजापने साधनाय ।

वाचाव करणन्ति वाक्करणं, उदाहारघोसो । कल्याणं मधुरं वाक्करणं अस्साति कल्याणवाक्करणो । तेनेवाह “मधुरस्सरो”ति । हीळेतीति अवजानाति । मातुगामोति सम्बन्धो । मनं अपायति वड्ढेतीति मनापो । तेनाह “मनवड्ढनको”ति । वट्ठभयेन तज्जेत्वाति योब्बनमदादिमत्ता भिक्खुनियो संसारभयेन तासेत्वा । गिहिकालेति अत्तनो गिहिकाले । भिक्खुनिया मेथुनेन भिक्खुनीदूसको होतीति भिक्खुनिया कायसंसग्गमेव वदति । सिक्खमानासामणेरीसु पन मेथुनेनपि भिक्खुनीदूसको न होतीति आह “सिक्खमानासामणेरीसु मेथुनधम्म”न्ति । “कासायवत्थवसनाया”ति



वचनतो दुस्सीलासु भिक्खुनीसिक्खमानासामणेरीसु गरुधम्मं अज्झापन्नपुब्बो पटिक्खित्तोयेवाति दट्ठब्बं । तस्सा भिक्खुनिया अभावेपि या या तस्सा वचनं अस्सोसुं, ता ता तथेव मज्जन्तीति आह “**मातुगामो ही**”तिआदि ।

इदानी अट्ठ अङ्गानि समोधानेत्वा दस्सेतुं “**एत्थ चा**”तिआदि आरब्धं । इमेहि पन अट्ठहङ्गेहि असमन्नागतं जत्तिचतुत्थेन कम्मेन सम्मन्नेन्तो दुक्कटं आपज्जति, भिक्खु पन सम्मतोयेव होति ।

**१४८. गरुकेहीति** गरुकातब्बेहि । **एकतोउपसम्पन्नायाति** उपयोगत्थे भुम्मवचनं । “**ओवदती**”ति वा इमस्स “**वदती**”ति अत्थे सति सम्पदानवचनम्पि युज्जति । भिक्खून् सन्तिके उपसम्पन्ना नाम परिवत्तलिङ्गा वा पञ्चसतसाकियानियो वा ।

**१४९. आसनं पज्जपेत्वा**ति एत्थ “**सचे भूमि मनापा होति, आसनं अपज्जापेतुम्पि वट्ठी**”ति तीसुपि **गण्ठपदेसु** वुत्तं । **मातुगामगहणेन** भिक्खुनीपि सङ्गहिताति आह “**धम्मदेसनापत्तिमोचनत्थ**”न्ति । सम्मतस्स भिक्खुनो सन्तिकं पाटिपदे ओवादत्थाय सब्बाहि भिक्खुनीहि आगन्तब्बतो “**समग्गात्थ भगिनियो**”ति इमिना सब्बासं आगमनं पुच्छतीति आह “**सब्बा आगतात्था**”ति । गिलानासु अनागतासुपि गिलानानं अनागमनस्स अनुज्जातत्ता आगन्तुं समत्थाहि च सब्बाहि आगतत्ता “**समग्गाम्हय्या**”ति वत्तुं वट्ठीति । **अन्तोगामे वा**तिआदीसु यत्थ पञ्च अङ्गानि भूमियं पटिपेत्वा वन्दितुं न सक्का होति, तत्थ ठिताय एव कायं पुरतो नामेत्वा “**वन्दामि अय्या**”ति अज्जलिं पग्गह गन्तुम्पि वट्ठीति । **अन्तरघरन्ति** कत्थचि नगरद्वारस्स बहिइन्दखीलतो पट्टाय अन्तोगामो वुच्चति, कत्थचि घरुम्मरतो पट्टाय अन्तोगेहं । इध पन “**अन्तोगामे वा**”ति विसुं वुत्तत्ता “**अन्तरघरे वा**”ति अन्तोगेहं सन्धाय वुत्तन्ति दट्ठब्बं । **यत्थ कत्थची**ति अन्तोगामादीसु यत्थ कत्थचि ।

**वट्ठीतीति** “**वसथ अय्ये, मयं भिक्खू आनेस्सामा**”ति वुत्तवचनं सद्वहन्तीहि वसितुं वट्ठीति । **न निमन्तिता हुत्वा गन्तुकामा**ति मनुस्सेहि निमन्तिता हुत्वा गन्तुकामा न होन्तीति अत्थो, तत्थेव वस्सं उपगन्तुकामा होन्तीति अधिप्पायो । **यतो**ति भिक्खुनुपस्सयतो । **याचित्वा**ति “**तुम्हेहि आनीतओवादेनेव मयम्पि वसिस्सामा**”ति याचित्वा । **तत्था**ति तस्मिं भिक्खुनुपस्सये । **आगतानं सन्तिके ओवादेन वसितब्बन्ति** पच्छिमिकाय वस्सं वसितब्बं । **अभिक्खुकावासे वसन्तिया आपत्ती**ति चोदनामुखेन सामज्जतो आपत्तिप्पसङ्गं वदति, न पन तस्सा आपत्ति । **वस्सच्छेदं कत्वा गच्छन्तियापि आपत्ती**ति वस्सानुपगममूलं आपत्तिं वदति । इतराय आपत्तिया अनापत्तिकारणसम्भावतो “**सा रक्खितब्बा**”ति वुत्तं, सा वस्सानुपगममूला आपत्ति रक्खितब्बाति अत्थो, अभिक्खुकेपि आवासे ईदिसासु आपदासु वस्सं उपगन्तब्बन्ति अधिप्पायो । तेनाह “**आपदासु हि...पे... अनापत्ति वुत्ता**”ति । इतराय पन आपत्तिया अनापत्ति, कारणे असति पच्छिमिकायपि वस्सं न उपगन्तब्बं । सन्तेसु हि भिक्खूसु वस्सं अनुपगच्छन्तिया आपत्ति । **तत्थ गन्त्वा पवारेतब्बन्ति** एत्थ अपवारेन्तीनं आपत्तिसम्भवतो । सचे दूरेपि भिक्खून् वसनट्ठानं होति, सक्का च होति नवमियं गन्त्वा पवारेतुं, तत्थ गन्त्वा पवारेतब्बं । सचे पन नवमियं निक्खमित्वा सम्पापुणितुं न सक्का होति, अगच्छन्तीनं अनापत्ति ।

उपोसथस्स पुच्छनं उपोसथपुच्छा, सायेव **क-प्पच्चयं रस्सत्तज्ज कत्वा उपोसथपुच्छकन्ति** वुत्ताति आह “**उपोसथपुच्छन**”न्ति । **उपोसथो पुच्छितब्बो**ति “**कदा, अय्य, उपोसथो**”ति पुच्छितब्बो । भिक्खुनापि “**स्वे, भगिनि, उपोसथो**”ति वत्तब्बं । भिक्खू कदाचि केनचि कारणेन पन्नरसिकं वा चातुद्दसीउपोसथं, चातुद्दसिकं वा पन्नरसीउपोसथं करोन्ति, यस्मिञ्च दिवसे भिक्खूहि उपोसथो कतो, तस्मिंयेव भिक्खुनीहिपि उपोसथो कातब्बोति अधिप्पायेन “**पक्खस्स तेरसियंयेव गन्त्वा**”तिआदि वुत्तं । एवं पुच्छितेन भिक्खुना सचे चातुद्दसियं उपोसथं करोन्ति, “**चातुद्दसिको भगिनी**”ति

वत्तब्बं । सचे पन पन्नरसियं करोन्ति, “पन्नरसिको भगिनी”ति आचिक्खितब्बं । ओवादत्थायाति ओवादयाचनत्थाय । पाटिपददिवसतो पन पट्टाय धम्मसवनत्थाय गन्तब्बन्ति पाटिपददिवसे ओवादगगहणत्थाय दुतियदिवसतो पट्टाय अन्तरन्तरा धम्मसवनत्थाय गन्तब्बं । ओवादगगहणम्मि हि “धम्मसवनमेवा”ति अभेदेन वुत्तं । निरन्तरं विहारं उपसङ्कमिंसूति येभ्युयेन उपसङ्कमनं सन्धाय वुत्तं । वुत्तज्जेतन्तिआदिना यथानुसिद्धं पटिपज्जिस्सामाति सब्बासंयेव भिक्खुनीनं उपसङ्कमनदीपनत्थं पाळि निदस्सिता । ओवादं गच्छतीति ओवादं याचितुं गच्छति । द्वे तिस्सोति द्वीहि तीहि । करणत्थे चेतं पच्चत्तवचनं ।

पासादिकेनाति पसादजनकेन निदोसेन कायकम्मादिना । सम्पादेतूति तिविधं सिक्खं सम्पादेतु । सचे पातिमोक्खुद्देसकंयेव दिस्वा ताहि भिक्खुनीहि ओवादो याचितो भवेय्य, तेन किं कातब्बन्ति? उपोसथगगे सन्निपतिते भिक्खुसङ्घे पुब्बकिच्चवसेन “अत्थि काचि भिक्खुनियो ओवादं याचमाना”ति पुच्छियमाने “एवं वदेही”ति ओवादपटिग्गाहकेन वत्तब्बवचनं अज्जेन भिक्खुना कथापेत्वा पातिमोक्खुद्देसकेन वत्तब्बवचनं अत्तना वत्त्वा पुन सयमेव गन्त्वा भिक्खुनीनं आरोचेतब्बं, अज्जेन वा भिक्खुना तस्मिं दिवसे पातिमोक्खं उद्दिशापेतब्बं । एतं वुत्तन्ति “ताही”ति एतं बहुवचनं वुत्तं ।

एका भिक्खुनी वाति इदं बहूहि भिक्खुनुपस्सयेहि एकाय एव भिक्खुनिया सासनपटिग्गहणं सन्धाय वुत्तं, न पन दुतियिकाय अभावं सन्धाय । बहूहि भिक्खुनुपस्सयेहीति अन्तरामगगे वा तस्मिंयेव वा गामे बहूहि भिक्खुनुपस्सयेहि । “भिक्खुनिसङ्घो च अय्य भिक्खुनियो च भिक्खुनी चा”ति इमिना नानाउपस्सयेहि सासनं गहेत्वा आगतभिक्खुनिया वत्तब्बवचनं दस्सेति । इदञ्च एकेन पकारेन मुखमत्तनिदस्सनत्थं वुत्तं, तस्मिं तस्मिं पन भिक्खुनुपस्सये भिक्खुनीनं पमाणं सल्लक्खेत्वा तदनुरूपेन नयेन वत्तब्बं । भिक्खुसङ्घस्स अय्यानं अय्यस्साति इदं सङ्घिपित्वा वुत्तं ।

पातिमोक्खुद्देसकेनपीति इदं सङ्घुपोसथवसेनेव दस्सितं । यत्थ पन तिण्णं द्विन्नं वा वसनट्टाने पातिमोक्खुद्देसो नत्थि, तत्थापि जत्तिठपनकेन इतरेन वा भिक्खुना इमिनाव नयेन वत्तब्बं । एकपुग्गलेनपि उपोसथदिवसे ओवादयाचनं सम्पटिच्छित्वा पाटिपदे आगतानं भिक्खुनीनं “नत्थि कोची”तिआदि वत्तब्बमेव । सचे सयमेव, “सम्मतो अह”न्ति वत्तब्बं । इमं विधिं अजानन्तो इध बालोति अधिप्पेतो ।

१५०. अधम्मकम्मे अधम्मकम्मसज्जी वग्गं भिक्खुनिसङ्घं वग्गसज्जी ओवदति, आपत्ति पाचित्तियस्सातिआदीसु विज्जमानेसुपि वग्गादिभावनमित्तेसु दुक्कटेसु अधम्मकम्ममूलकं पाचित्तियमेव पाळियं सब्बत्थ वुत्तन्ति आह “अधम्मकम्मे द्विन्नं नवकानं वसेन अट्टारस पाचित्तियानी”ति । सेसमेत्थ उत्तानमेव । असम्मतता, भिक्खुनिया परिपुण्णूपसम्पन्नता, ओवादवसेन अट्टगुरुधम्मभणनन्ति इमानि पनेत्थ तीणि अङ्गानि ।

ओवादसिक्खापदवण्णना निट्ठिता ।

## २. अत्थङ्गतसिक्खापदवण्णना

१५३. दुतिये कुसलानं धम्मानं सातच्चकिरियायाति पुब्बभागप्पटिपत्तिवसेन वुत्तं । मुनातीति जानाति । तेन जाणेनाति तेन अरहत्तफलपज्जासङ्घातेन जाणेन । पथेसूति उपायमग्गेसु । अरहतो परिनिट्ठितसिक्खत्ता आह “इदञ्च... पे०... वुत्त”न्ति । अथ वा “अप्पमज्जतो सिक्खतो”ति इमेसं पदानं हेतुअत्थता दट्ठब्बा, तस्मा अप्पमज्जनहेतु सिक्खनहेतु

च अधिचेतसोति अत्थो । सोकाति चित्तसन्तापा । एत्थ च अधिचेतसोति इमिना अधिचित्तसिक्खा, अप्पमज्जतोति इमिना अधिसीलसिक्खा, मुनिनो मोनपथेसु सिक्खतोति एतेहि अधिपज्जासिक्खा, मुनिनोति वा एतेन अधिपज्जासिक्खा, मोनपथेसु सिक्खतोति एतेन तासं लोकुत्तरसिक्खानं पुब्बभागप्पटिपदा, सोका न भवन्तीति आदीहि सिक्खापारिपूरिया आनिसंसा पकासिताति वेदितब्बं ।

कोकनुदन्ति पदुमविसेसनं यथा “कोकासय”न्ति, तं किर बहुपत्तं वण्णसम्पन्नं अतिविय सुगन्धञ्च होति । “कोकनुदं नाम सेतपदुम”न्तिपि वदन्ति । पातोति पगेव । अयञ्हेत्थ अत्थो — यथा कोकनुदसङ्घातं पदुमं पातो सूरियुग्गमनवेलायं फुल्लं विकसितं अवीतगन्धं सिया विरोचमानं, एवं सरीरगन्धेन गुणगन्धेन च सुगन्धं सरदकाले अन्तलिक्खे आदिच्चमिव अत्तनो तेजसा तपन्तं अङ्गेहि निच्छरणजुतिताय अङ्गीरसं सम्मासम्बुद्धं पस्साति ।

अभब्बोति पटिपत्तिसारमिदं सासनं, पटिपत्ति च परियत्तिमूलिका, त्वञ्च परियत्तिं उग्गहेतुं असमत्थो, तस्मा अभब्बोति अधिप्पायो । सुद्धं पिलोतिकखण्डन्ति इद्धिया अभिसङ्घतं परिसुद्धं चोळखण्डं । तदा किर भगवा “न सज्झायं कातुं असक्कोन्तो मम सासने अभब्बो नाम होति, मा सोचि भिक्खू”ति तं बाहायं गहेत्वा विहारं पविसित्वा इद्धिया पिलोतिकखण्डं अभिनिम्मिनित्वा “हन्द, भिक्खु, इमं परिमज्जन्तो ‘रजोहरणं रजोहरण’न्ति पुनप्पुनं सज्झायं करोही”ति वत्वा अदासि तत्थ पुब्बेकताधिकारत्ता ।

सो किर पुब्बे राजा हुत्वा नगरं पदक्खिणं करोन्तो नलाटतो सेदे मुच्चन्ते परिसुद्धेन साटकेन नलाटं पुज्झि, साटको किलिद्धो अहोसि । सो “इमं सरीरं निस्साय एवरूपो परिसुद्धसाटको पकतिं जहित्वा किलिद्धो जातो, अनिच्चा वत सङ्घारा”ति अनिच्चसज्जं पटिलभति, तेन कारणेनस्स रजोहरणमेव पच्चयो जातो । रजं हरतीति रजोहरणं । संवेगं पटिलभित्वाति असुभसज्जं अनिच्चसज्जञ्च उपट्टपेन्तो संवेगं पटिलभित्वा । सो हि योनिसो उम्मज्जन्तो “परिसुद्धं वत्थं, नत्थेत्थ दोसो, अत्तभावस्स पनायं दोसो”ति असुभसज्जं अनिच्चसज्जञ्च पटिलभित्वा नामरूपपरिग्गहादिना पञ्चसु खन्धेसु जाणं ओतारेत्वा कलापसम्मसनादिक्कमेन विपस्सनं वड्ढेत्वा उदयब्बयजाणादिपअपाटिया विपस्सनं अनुलोमगोत्रभुसमीपं पापेसि । तं सन्धाय वुत्तं “विपस्सनं आरभी”ति । ओभासगाथं अभासीति ओभासविस्सज्जनपुब्बकभासितगाथा ओभासगाथा, तं अभासीति अत्थो ।

एत्थ च “अधिचेतसोति इमं ओभासगाथं अभासी”ति इधेव वुत्तं । विसुद्धिमग्गे (विसुद्धि० २.३८६) पन धम्मपददुक्कायां (ध० प० अट्ठ० १. चूळपन्थकत्थेरवत्थु) थेरगाथासंवण्णनायञ्च (थेरगा० अट्ठ० २.५६६) —

“रागो रजो न च पन रेणु वुच्चति ।  
रागस्सेतं अधिवचनं रजोति ।  
एतं रजं विप्पजहित्वा पण्डिता ।  
विहरन्ति ते विगतरजस्स सासने ॥

“दोसो...पे०... सासने ॥

“मोहो रजो न च पन रेणु वुच्चति ।  
मोहस्सेतं अधिवचनं रजोति ।

एतं रजं विप्पजहित्वा पण्डिता ।  
विहरन्ति ते विगतरजस्स सासनेति ॥ —

इमा तिस्सो ओभासगाथा अभासी”ति वुत्तं । **अधिचेतसो**ति च अयं चूळपन्थकत्थेरस्स उदानगाथाति इमिस्सायेव पाळिया आगतं । थेरगाथायं पन चूळपन्थकत्थेरस्स उदानगाथासु अयं अनारुळ्हा, “एकुदानियत्थेरस्स पन अयं उदानगाथा”ति (थेरगा० अट्ठ० १.एकुदानियत्थेरगाथावण्णना) तत्थ वुत्तं । एवं सन्तेपि इमिस्सा पाळिया अट्ठकथाय च एवमागतत्ता चूळपन्थकत्थेरस्सपि अयं उदानगाथा ओभासगाथावसेन च भगवता भासिताति गहेतब्बं । **अरहत्तं पापुणी**ति अभिज्जापटिसम्भिदापरिवारं अरहत्तं पापुणि । **अभब्बो** त्वन्तिआदिवचनतो अनुकम्पावसेन सद्धिविहारिकादिं सद्धिकविहारा निक्कट्ठापेन्तस्स अनापत्ति विय दिस्सति । अभब्बो हि थेरो सज्जिच्च तं कातुं, निक्कट्ठनसिक्खापदे वा अपज्जत्ते थेरेन एवं कतन्ति गहेतब्बं ।

**१५६. ओवदन्तस्स पाचित्तियन्ति** अत्थङ्गते सूरिये गरुधम्मोहि वा अज्जेन वा धम्मेनेव ओवदन्तस्स सम्मतस्सपि पाचित्तियं । सेसमेत्थ उत्तानमेव । अत्थङ्गतसूरियता, परिपुण्णूपसम्पन्नता, ओवदनन्ति इमानि पनेत्थ तीणि अङ्गानि ।

अत्थङ्गतसिक्खापदवण्णना निट्ठिता ।

### ३. भिक्खुनुपस्सयसिक्खापदवण्णना

**१६२.** ततियं उत्तानत्थमेव । उपस्सयूपगमनं, परिपुण्णूपसम्पन्नता, समयाभावो, गरुधम्मोहि ओवदनन्ति इमानि पनेत्थ चत्तारि अङ्गानि ।

भिक्खुनुपस्सयसिक्खापदवण्णना निट्ठिता ।

### ४. आमिससिक्खापदवण्णना

**१६४.** चतुत्थे “उपसम्पन्नं...पे०... भिक्खुनोवादक”न्ति इमेसं “मङ्कुक्कुत्तुकामो”ति इमिना सम्बन्धो । “अवण्णं कत्तुकामो अयसं कत्तुकामो”ति इमेसं पन वसेन “उपसम्पन्न”न्तिआदीसु “उपसम्पन्नस्सा”ति विभत्तिविपरिणामो कातब्बोति इममत्थं सन्धाय “उज्झापनके वुत्तनयेनेवत्थो वेदितब्बो”ति वुत्तं । “चीवरहेतु ओवदती”तिआदिना भणन्तस्स एकेकस्मिं वचने निट्ठिते पाचित्तियं वेदितब्बं । “उपसम्पन्नं सङ्गेन असम्मत”न्ति पाळिवचनतो “सम्मतनेन वा सङ्गेन वा भारं कत्वा ठपितो”ति अट्ठकथावचनतो च अट्ठहि अङ्गेहि समन्नागतो सम्मतनेन वा विप्पवसितुकामेन “यावाहं आगमिस्सामि, ताव ते भारो होतू”ति याचित्वा ठपितो तस्साभावतो सङ्गेन वा तथेव भारं कत्वा ठपितो अट्ठहि गरुधम्मोहि अज्जेन वा धम्मेन ओवदितुं लभतीति वेदितब्बं । तस्मा “यो पन, भिक्खु, असम्मतो भिक्खुनियो ओवदेय्य, पाचित्तिय”न्ति इदं पगेव भारं कत्वा अट्ठपितं सन्धाय वुत्तन्ति गहेतब्बं ।

**१६८. अनापत्ति पकतिया चीवरहेतु...पे०... ओवदन्तं भणतीति** एत्थ आमिसहेतु ओवदन्तं “आमिसहेतु ओवदती”ति सज्जाय एवं भणन्तस्स अनापत्ति, “न आमिसहेतु ओवदती”ति सज्जिनो पन दुक्कटं, न आमिसहेतु ओवदन्तं पन “आमिसहेतु ओवदती”ति सज्जाय भणन्तस्सपि अनापत्ति सचित्तकत्ता सिक्खापदस्स । सेसमेत्थ उत्तानमेव । उपसम्पन्नता, धम्मेन लद्धसम्मुत्तिता, अनामिसन्तरता, अवण्णकामताय एवं भणनन्ति इमानि पनेत्थ चत्तारि

अङ्गानि ।

आमिससिक्खापदवण्णना निट्ठिता ।

१६९. पञ्चमं उत्तानत्थमेव ।

#### ६. चीवरसिब्बापनसिक्खापदवण्णना

१७५. छट्ठे सचे सा भिक्खुनी तं चीवरं आदितोव पारुपेय्य, अज्जा भिक्खुनियो दिस्वा उज्झापेय्युं, ततो महाजनो पस्सितुं न लभतीति मज्जमानो “यथासंहटं हरित्वा निक्खिपित्वा”ति आदिमाह ।

१७६. नीहरतीति सकिं नीहरति । येपि तेसं निस्सितकाति सम्बन्धो । कथिनवत्तन्ति “सब्रह्मचारीनं कातुं वट्ठती”ति इतिकत्तब्बतावसेन सूचिकम्मकरणं । आचरियुपज्झायानं दुक्कटन्ति अकप्पियसमादानवसेन दुक्कटं । वज्जेत्वाति “तव जातिकाया”ति अवत्वा “एकिस्सा भिक्खुनिया”ति एतकमेव वत्वा । “एकिस्सा भिक्खुनिया”ति सुत्वा ते अज्जातिकसज्जिनो भवेय्युन्ति आह “अकप्पिये नियोजितत्ता”ति । “इदं ते मातु चीवर”न्ति आदीनि अवत्वापि “इदं चीवरं सिब्बेही”ति सुद्धचित्तेन सिब्बापेन्तस्सपि अनापत्ति ।

१७९. उपाहनत्थविकादिन्ति आदि-सद्धेन यं चीवरं निवासेतुं वा पारुपितुं वा न सक्का होति, तम्पि सङ्गण्हाति । सेसमेत्थ उत्तानमेव । अज्जातिकाय भिक्खुनिया सन्तकता, निवासनपारुपनूपगता, वुत्तनयेन सिब्बनं वा सिब्बापनं वाति इमानि पनेत्थ तीणि अङ्गानि ।

चीवरसिब्बापनसिक्खापदवण्णना निट्ठिता ।

#### ७. संविदहनसिक्खापदवण्णना

१८१. सत्तमे “पच्छा गच्छन्तीनं चोरा अच्छिन्दिसू”ति एत्थ “पत्तचीवर”न्ति पाठसेसोति आह “पच्छा गच्छन्तीनं पत्तचीवर”न्ति । ता भिक्खुनियोति पच्छा गच्छन्तियो भिक्खुनियो । “पच्छा गच्छन्तीन”न्ति च विभत्तिविपरिणामेनेत्थ सम्बन्धो वेदितब्बो । पाळियं “गच्छाम भगिनि, गच्छाम अय्या”ति भिक्खुपुब्बकं संविधानं वुत्तं, “गच्छाम अय्य, गच्छाम भगिनी”ति भिक्खुनीपुब्बकं । एकद्धानमगन्ति एकं अद्धानसङ्घातं मगं, एकतो वा अद्धानमगं । हिज्जोति सुवे । परेति ततियदिवसे ।

१८२-१८३. द्विधा वुत्तप्पकारोति पादगमनवसेन पक्खगमनवसेन वाति द्विधा वुत्तप्पभेदो । चतुन्नं मगानं सम्बन्धट्ठानं चतुक्कं, तिण्णं मगानं सम्बन्धट्ठानं सिङ्घाटकं । “गामन्तरे गामन्तरे”ति एत्थ अज्जो गामो गामन्तरन्ति आह “निक्खमने अनापत्ति...पे०... भिक्खुनो पाचित्तिय”न्ति । “संविधाया”ति पाळियं अविसेसेन वुत्तत्ता “नेव पाळिया समेती”ति वुत्तं, “एत्थन्तरे संविदहितेपि भिक्खुनो दुक्कट”न्ति वुत्तत्ता “न सेसअट्ठकथाय समेती”ति वुत्तं । अद्धयोजनं अतिक्कमन्तस्साति असति गामे अद्धयोजनं अतिक्कमन्तस्स । यत्थ हि अद्धयोजनम्भन्तरे अज्जो गामो न होति, तं इध अगामकं अरज्जन्ति अधिप्पेतं, अद्धयोजनम्भन्तरे पन गामे सति गामन्तरगणनाय एव आपत्ति ।

१८५. रट्टुभेदेति रट्टुविलोपे । चक्कसमारुळाति इरियापथचक्कं सकटचक्कं वा समारुळा । सेसं उत्तानमेव । द्विन्नम्पि संविदहित्वा मग्गप्पटिपत्ति, अविस्सङ्केतं, समयाभावो, अनापदा, गामन्तरोक्कमनं वा अद्ध्ययोजनातिक्कमो वाति इमानि पनेत्थ पञ्च अङ्गानि । एकतोउपसम्पन्नादीहि सद्धिं गच्छन्तस्स पन मातुगामसिक्खापदेन आपत्ति ।

संविदहनसिक्खापदवण्णना निट्ठिता ।

#### ८. नावाभिरुहनसिक्खापदवण्णना

१८८. अट्टमे लोकस्सादमित्तसन्धववसेन कीळापुरेक्खारा संविदहित्वाति अयं विसेसो “एवमिमे...पे०... भिक्खुनीहि सद्धिं नावाय कीळन्ती”ति इमिना “उद्धं गामिनिं वा अधोगामिनिं वा”ति इमिना च सिद्धो ।

१८९. नदिया कुतो गामन्तरन्ति आह “यस्सा नदिया”तिआदि । “तस्सा सगामकतीरपस्सेन...पे०... अद्ध्ययोजनगणनायाति एकेकपस्सेनेव गमनं सन्धाय वुत्तता तादिसिकाय नदिया मज्झेन गच्छन्तस्स गामन्तरगणनाय अद्ध्ययोजनगणनाय च आपत्ती”ति वदन्ति । सब्बअट्टकथासूतिआदिना अत्तना वुत्तमेवत्थं समत्थेति । “कीळापुरेक्खारताय भिक्खुनिया सद्धिं संविधाय नावं अभिरुहन्तस्स नदियंयेव पाचित्तियस्स वुत्तता वापिसमुद्दादीसु कीळापुरेक्खारताय दुक्कटमेव, न पाचित्तिय”न्ति वदन्ति । “लोकस्सादमित्तसन्धववसेन कीळापुरेक्खारा संविदहित्वा”ति वचनतो केचि “इमं सिक्खापदं अकुसलचित्तं लोकवज्ज”न्ति वदन्ति, तं न गहेतब्बं । कीळापुरेक्खारताय हि अभिरुहित्वापि गामन्तरोक्कमने अद्ध्ययोजनातिक्कमे वा कुसलाब्बाकतचित्तसमङ्गीपि हुत्वा आपत्तिं आपज्जति । यदि हि सो संवेगं पटिलभित्वा अरहत्तं वा सच्छिक्करेय्य, निहं वा ओक्कमेय्य, कम्मट्ठानं वा मनसि करोन्तो गच्छेय्य, कुतो तस्स अकुसलचित्तसमङ्गिता, येनिदं सिक्खापदं अकुसलचित्तं लोकवज्जन्ति वुच्चति, तस्मा पण्णत्तिवज्जं तिचित्तन्ति सिद्धं । सेसमेत्थ उत्तानमेव ।

नावाभिरुहनसिक्खापदवण्णना निट्ठिता ।

#### ९. परिपाचितसिक्खापदवण्णना

१९४. नवमे पटियादितन्ति भिक्खूनं अत्थाय सम्पादितं । जातका वा होन्ति पवारिता वाति एत्थ सचेपि भिक्खुनो अज्जातका अप्पवारिता च सियुं, भिक्खुनिया जातका पवारिता चे, वट्ठति ।

१९७. पापभिक्खूनं पक्खुपच्छेदाय इदं पज्जत्तं, तस्मा पञ्चभोजनेयेव आपत्ति वुत्ता । पञ्च भोजनानि ठपेत्वा सब्बत्थ अनापत्तीति इदं पन इमिना सिक्खापदेन अनापत्तिदस्सनत्थं वुत्तं । विज्जत्तिया उप्पन्नं परिभुज्जन्तस्स हि अज्जत्थ वुत्तनयेन दुक्कटं । सेसं उत्तानमेव । भिक्खुनिपरिपाचितभावो, जाननं, गिहिसमारम्भाभावो, ओदनादीनं अज्जतरता, तस्स अज्झोहरणन्ति इमानि पनेत्थ पञ्च अङ्गानि ।

परिपाचितसिक्खापदवण्णना निट्ठिता ।

#### १०. रहोनिसज्जसिक्खापदवण्णना

१९८. दसमे उपनन्दस्स चतुत्थसिक्खापदेनाति अप्पटिच्छन्ने मातुगामेन सद्धिं रहोनिसज्जसिक्खापदं सन्धाय वुत्तं ।

किञ्चापि तं अचेलकवग्गे पञ्चमसिक्खापदं होति, उपनन्दत्थेरं आरब्ध पञ्चत्तेसु पन चतुत्थभावतो “उपनन्दस्स चतुत्थसिक्खापदेना”ति वुत्तं । चतुत्थसिक्खापदस्स वत्थुतो इमस्स सिक्खापदस्स वत्थुनो पठमं उप्पन्नत्ता इदं सिक्खापदं पठमं पञ्चत्तं । इमिना च सिक्खापदेन केवलं भिक्खुनिया एव रहोनिस्सज्जाय आपत्ति पञ्चत्ता, उपरि मातुगामेन सद्धिं रहोनिस्सज्जाय आपत्ति विसुं पञ्चत्ताति दट्ठब्बं ।

रहोनिस्सज्जसिक्खापदवण्णना निट्ठिता ।

निट्ठितो भिक्खुनिवग्गो ततियो ।

## ४. भोजनवग्गो

### १. आवसथपिण्डसिक्खापदवण्णना

२०६. भोजनवग्गस्स पठमसिक्खापदे अद्धयोजनं वा योजनं वा गन्तुं सक्कोतीति एत्थ तत्तकं गन्तुं सक्कोन्तस्सपि तावतकं गन्त्वा अलद्धभिक्खस्स इतो भुज्जितुं वट्ठति । इमेसंयेवाति इमेसं पासण्डानंयेव । एत्तकानन्ति इमस्मिं पासण्डे एत्तकानं । एकदिवसं भुज्जितब्बन्ति एकदिवसं सकियेव भुज्जितब्बं । “एकदिवसं भुज्जितब्ब”न्ति वचनतो पन एकस्मिं दिवसे पुनप्पुनं भुज्जितुं वट्ठतीति न गहेतब्बं । पुन आदितो पट्टाय भुज्जितुं न वट्ठतीति इमिना पठमं भुत्तट्टानेसु पुन एकस्मिम्पि ठाने भुज्जितुं न वट्ठतीति दस्सेति ।

२०८. “गच्छन्तो वा आगच्छन्तो वाति इदं अद्धयोजनवसेन गहेतब्ब”न्ति वदन्ति । अन्तरामग्गे गतट्टानेति एकस्सेव सन्तकं सन्थाय वुत्तं । “आगच्छन्तेपि एसेव नयो”ति सङ्खेपेन वुत्तमेवत्थं विभावेन्तो “गन्त्वा पच्चागच्छन्तो”तिआदिमाह । आपत्तिट्टानेयेव पुन भुज्जन्तस्स अनापत्ति वत्तब्बाति गमने आगमने च पठमं भोजनं अवत्वा अन्तरामग्गे एकदिवसं गतट्टाने च एकदिवसन्ति पुनप्पुनं भोजनमेव दस्सितं, गमनदिवसे पन आगमनदिवसे च “गमिस्सामि आगमिस्सामी”ति भुज्जितुं वट्ठतियेव । सुद्धचित्तेन पुनप्पुनं भुज्जन्तस्सपि पुनप्पुनं भोजने अनापत्ति । अज्जस्सत्थाय उद्दिसित्वा पञ्चत्तं भिक्खुनो गहेतुमेव न वट्ठतीति आह “भिक्खूनंयेव अत्थाया”ति । सेसमेत्थ उत्तानमेव । आवसथपिण्डता, अगिलानता, अनुवसित्वा भोजनन्ति इमानि पनेत्थ तीणि अङ्गानि ।

आवसथपिण्डसिक्खापदवण्णना निट्ठिता ।

### २. गणभोजनसिक्खापदवण्णना

२०९. दुतिये अभिमारेति अभिगन्त्वा भगवतो मारणत्थाय नियोजिते धनुद्धरे । गुळहपटिच्छन्नोति अपाकटो । पविज्झीति विस्सज्जेसि । ननु राजानम्पि मारापेसीति वचनतो इदं सिक्खापदं अजातसत्तुनो काले पञ्चत्तन्ति सिद्धं, एवञ्च सति परतो अनुपञ्चत्तियं —

“तेन खो पन समयेन रज्जो मागधस्स सेनियस्स बिम्बिसारस्स जातिसालोहितो आजीवकेसु पब्बजितो होति । अथ खो सो आजीवको येन राजा मागधो सेनियो बिम्बिसारो तेनुपसङ्गमि, उपसङ्गमित्वा राजानं मागधं सेनियं बिम्बिसारं एतदवोच...पे०... कुक्कुच्चायन्ता नाधिवासेन्ती”ति —

इदं कस्मा वृत्तन्ति? सो किर आजीवको तं दानं देन्तो बिम्बिसारकालतो पट्टाय अदासि, पच्छा अजातसत्तुकाले सिक्खापदपञ्जत्तितो पट्टाय भिक्खू कुक्कुच्चायन्ता तं दानं न पटिग्गण्हिंसु, तस्मा आदितो पट्टाय तं वत्थु दस्सितन्ति वेदितब्बं। “अथ खो सो आजीवको भिक्खून् सन्तिके दूतं पाहेसी”ति इदञ्च ततो पभुति सो आजीवको अन्तरन्तरा भिक्खू निमन्तेत्वा दानं देन्तो अजातसत्तुकाले सिक्खापदे पञ्जत्ते यं भिक्खून् सन्तिके दूतं पाहेसि, तं सन्धाय वृत्तं।

२१५. अञ्जमञ्जविसिद्धत्ता विसदिसं रज्जं विरज्जं, ततो आगता, तत्थ वा जाता, भवाति वा वेरज्जा, ते एव वेरज्जका। ते पन यस्मा गोत्तचरणादिविभागेन नानप्पकारा, तस्मा वृत्तं “नानावेरज्जके”ति। अट्टकथायं पन नानाविधेहि अञ्जरज्जेहि आगतेति रज्जानंयेव वसेन नानप्पकारता वृत्ता।

२१७-२१८. इमस्स सिक्खापदस्स विज्जत्तिं कत्वा भुज्जनवत्थुस्मिं पञ्जत्तत्ता विज्जत्तितो गणभोजनं वत्थुवसेनेव पाकटन्ति तं अवत्वा “गणभोजनं नाम यत्थ...पे०... निमन्तिता भुज्जन्ती”ति निमन्तनवसेनेव पदभाजने गणभोजनं वृत्तं। “किञ्चि पन सिक्खापदं वत्थुअननुरूपमि सियाति पदभाजने वृत्तनयेन निमन्तनवसेनेव गणभोजनं होतीति केसञ्चि आसङ्का भवेय्या”ति तंनिवत्तनत्थं “तं पनेतं गणभोजनं द्वीहाकारेहि पसवती”ति वृत्तं। पञ्चन्नं भोजनानं नामं गहेत्वाति एत्थ “भोजनं गणहथाति वृत्तेपि गणभोजनं होतियेवा”ति वदन्ति। “हेट्ठा अद्धानगमनवत्थुस्मिं नावाभिरुहनवत्थुस्मिञ्च ‘इधेव, भन्ते, भुज्जथा’ति वृत्ते यस्मा कुक्कुच्चायन्ता न पटिग्गण्हिंसु, तस्मा ‘भुज्जथा’ति वृत्तेपि गणभोजनं न होतियेवा”ति तीसुपि गण्ठपदेसु वृत्तं। “पञ्चन्नं भोजनानं नामं गहेत्वा निमन्तेती”ति वृत्तत्ता पन “ओदनं भुज्जथा”ति वा “भत्तं भुज्जथा”ति वा भोजननामं गहेत्वाव वृत्ते गणभोजनं होति, न अञ्जथा। “इधेव, भन्ते, भुज्जथा”ति एत्थापि “ओदनं”न्ति वा “भत्तं”न्ति वा वत्ताव ते एवं निमन्तेसुन्ति गहेतब्बं। गणवसेन वा निमन्तितत्ता ते भिक्खू अपकतञ्जुताय कुक्कुच्चायन्ता न पटिग्गण्हिंसूति अयं अम्हाकं खन्ति, वीमंसित्वा युत्ततरं गहेतब्बं।

एकतो गणहन्तीति एत्थ अञ्जमञ्जस्स द्वादसहत्थं अमुञ्चित्वा ठिता एकतो गणहन्ति नामाति गहेतब्बं। “अम्हाकं चतुन्नम्पि भत्तं देहीति वा विज्जापेय्यु”न्ति वचनतो हेट्ठा “त्वं एकस्स भिक्खुनो भत्तं देहि, त्वं द्विन्नन्ति एवं विज्जापेत्वा”ति वचनतो च अत्तनो अत्थाय अञ्जेहि विज्जत्तम्पि सादियन्तस्स गणभोजनं होतियेवाति दट्ठब्बं। एवं विज्जत्तितो पसवतीति एत्थ विज्जत्तिया सति गणहन्तस्स एकतो हुत्वा गहणे इमिना सिक्खापदेन आपत्ति, विसुं गहणे पणीतभोजनसूपोदनविज्जत्तीहि आपत्ति वेदितब्बा।

विचारेतीति पञ्चखण्डादिवसेन संविदहति। घट्टेतीति अनुवातं छिन्दित्वा हत्थेन दण्डकेन वा घट्टेति। सुत्तं करोतीति सुत्तं वट्टेति। वलेतीति दण्डके वा हत्थे वा आवट्टेति। “अभिनवस्सेव चीवरस्स करणं इध चीवरकम्मं नाम, पुराणचीवरे सूचिकम्मं नाम न होती”ति वदन्ति। “चतुत्थे आगते न यापेन्तीति वचनतो सचे अञ्जो कोचि आगच्छन्तो नत्थि, चत्तारोयेव च तत्थ निसिन्ना यापेतुं न सक्कोन्ति, न वट्टेती”ति वदन्ति।

२२०. गणभोजनापत्तिजनकनिमन्तनभावतो “अकप्पियनिमन्तन”न्ति वृत्तं। सम्पवेसेत्वाति निसीदापेत्वा। गणो भिज्जतीति गणो आपत्तिं न आपज्जतीति अधिप्पायो। “यत्थ चत्तारो भिक्खू...पे०... भुज्जन्ती”ति इमाय पाळिया संसन्दनतो “इतरेसं पन गणपूरको होती”ति वृत्तं। अविसेसेनाति “गिलानो वा चीवरकारको वा”ति अविसेसेत्वा सब्बसाधारणवचनेन। तस्माति अविसेसितत्ता। भुत्वा गतेसूति एत्थ अगतेसुपि भोजनकिच्चे निट्ठिते गण्हितुं वट्टेति। तानि च तेहि एकतो न गहितानीति येहि भोजनेहि विसङ्केतो नत्थि, तानि भोजनानि तेहि भिक्खूहि एकतो न गहितानि एकेन पच्छा गहितत्ता। महाथेरेति भिक्खू सन्धाय वृत्तं। दूतस्स पुन पटिपथं आगन्त्वा “भत्तं गणहथा”ति वचनभयेन



“गामद्वारे अट्टत्वावा”ति वुत्तं । तत्थ तत्थ गन्त्वाति अन्तरवीथिआदीसु तत्थ तत्थ ठितानं सन्निकं गन्त्वा । भिक्खूनां अत्थाय घरद्वारे ठपेत्वा दिव्यमानेपि एसेव नयो । निवत्तथाति वुत्तपदे निवत्तितुं वट्टतीति “निवत्तथा”ति विच्छिन्दित्वा पच्छा “भत्तं गणहथा”ति वुत्तत्ता वट्टति । सेसमेत्थ उत्तानमेव । गणभोजनता, समयाभावो, अज्झोहरणन्ति इमानि पनेत्थ तीणि अङ्गानि ।

गणभोजनसिक्खापदवण्णना निट्ठिता ।

### ३. परम्परभोजनसिक्खापदवण्णना

२२१. ततिये कुलपटिपाटिया अब्बोच्छिन्नं कत्वा निरन्तरं दिव्यमानत्ता “भत्तपटिपाटि अट्टिता होती”ति पाळियं वुत्तं, अन्तरा अट्टत्वा निरन्तरं पवत्ताति वुत्तं होति । उपचारवसेनाति वोहारवसेन । न हि सो बदरमत्तमेव देति, उपचारवसेन पन एवं वदति । बदरचुण्णसक्खरादीहि पयोजितं “बदरसाळव”न्ति वुच्चति ।

२२६. विकप्पनावसेनेव तं भत्तं असन्तं नाम होतीति अनुपज्जत्तिवसेन विकप्पनं अट्टपेत्वा यथापज्जत्तं सिक्खापदमेव ठपितं । परिवारे पन विकप्पनाय अनुजाननम्पि अनुपज्जत्तिसमानन्ति कत्वा “चतस्सो अनुपज्जत्तियो”ति वुत्तं । महापच्चरिआदीसु वुत्तनयं पच्छा वदन्तो पाळिया संसन्दनतो परम्मुखाविकप्पनमेव पटिट्ठापेसि । केचि पन “तदा अत्तनो सन्निके ठपेत्वा भगवन्तं अज्जस्स अभावतो थेरो सम्मुखाविकप्पनं नाकासि, भगवता च विसुं सम्मुखाविकप्पना न वुत्ता, तथापि सम्मुखाविकप्पनापि वट्टती”ति वदन्ति । तेनेव मातिका अट्टकथायम्पि (कङ्का० अट्ट० परम्परभोजनसिक्खापदवण्णना) “यो भिक्खु पज्चसु सहधम्मिकेसु अज्जतरस्स ‘मय्हं भत्तपच्चासं तुय्हं दम्मी’ति वा ‘विकप्पेमी’ति वा एवं सम्मुखा वा ‘इत्थन्नामस्स दम्मी’ति वा ‘विकप्पेमी’ति वा एवं परम्मुखा वा पठमनिमन्तनं अविकप्पेत्वा पच्छा निमन्तितकुले लद्धभिक्खतो एकसित्थम्पि अज्झोहरति, पाचित्तिय”न्ति वुत्तं ।

२२९. पज्चहि भोजनेहि निमन्तितस्स येन येन पठमं निमन्तितो, तस्स तस्स भोजनतो उप्पटिपाटिया अविकप्पेत्वा वा परस्स परस्स भोजनं परम्परभोजनन्ति आह “सचे पन मूलनिमन्तनं हेट्ठा होति, पच्छिमं पच्छिमं उपरि, तं उपरितो पट्टाय भुज्जन्तस्स आपत्ती”ति । हत्थं अन्तो पवेसेत्वा सब्बहेट्ठिमं गणहन्तस्स मज्झे ठितम्पि अन्तोहत्थगतं होतीति आह “हत्थं पन...पे०... यथा तथा वा भुज्जन्तस्स अनापत्ती”ति । खीरस्स रसस्स च भत्तेन अमिस्सं हुत्वा उपरि ठितत्ता “खीरं वा रसं वा पिवतो अनापत्ती”ति वुत्तं ।

महाउपासकोति गेहसामिको । “महाअट्टकथायं ‘आपत्ती’ति वचनेन कुरुन्दियं ‘वट्टती’ति वचनं विरुद्धं विय दिस्सति, द्विन्मि अधिप्पायो महापच्चरियं विभावितो”ति महागण्ठपदेसु वुत्तं । सब्बे निमन्तेन्तीति अकप्पियनिमन्तनेन निमन्तेन्ति । “परम्परभोजनं नाम पज्चन्नं भोजनानं अज्जतरेन भोजनेन निमन्तितो, तं ठपेत्वा अज्जं पज्चन्नं भोजनानं अज्जतरं भोजनं भुज्जति, एतं परम्परभोजनं नामा”ति वुत्तत्ता सतिपि भिक्खाचरियाय पठमं लद्धभावे “पिण्डाय चरित्वा लद्धभत्तं भुज्जति, आपत्ती”ति वुत्तं । अविकप्पवसेन “वचीकम्म”न्ति वुत्तं । सेसमेत्थ उत्तानमेव । परम्परभोजनता, समयाभावो, अज्झोहरणन्ति इमानि पनेत्थ तीणि अङ्गानि ।

परम्परभोजनसिक्खापदवण्णना निट्ठिता ।

### ४. काणमातासिक्खापदवण्णना

**२३०-२३१.** चतुर्थे **काणाय माता**ति काणाति लद्धनामाय दारिकाय माता । कस्मा पनेसा काणा नाम जाताति आह “**सा किरस्सा**”तिआदि । इमिस्सा दहरकाले मातापितरो सिनेहवसेन “अम्म काणे, अम्म काणे”ति वोहरिंसु, सा तदुपादाय काणा नाम जाता, तस्सा च माता “काणमाता”ति पाकटा अहोसीति एवमेत्थ कारणं वदन्ति । **पटियालोकन्ति** पच्छिमं दिसं, पच्चादिच्चन्ति वुत्तं होति ।

**२३३. पूवगणनाय पाचित्तियन्ति** मुखवट्टिया हेड्डिमलेखतो उपरिद्धितपूवगणनाय पाचित्तियं । “द्वत्तिपत्तपूरा पटिगहेतब्बा”ति हि वचनतो मुखवट्टिया हेड्डिमलेखं अनतिक्कन्ते द्वे वा तयो वा पत्तपूरे गहेतुं वट्टति ।

**२३५. अट्टकथासु पन...पे०... वुत्तन्ति** इदं अट्टकथासु तथा आगतभावमत्तदीपनत्थं वुत्तं, न पन तस्स वादस्स पतिट्ठापनत्थं । अट्टकथासु वुत्तज्झि पाळिया न समेति । ततुत्तरिगहणे अनापत्तिदस्सनत्थज्झि “जातकानं पवारितान”न्ति वुत्तं । अज्जथा “अनापत्ति द्वत्तिपत्तपूरे पटिगण्हाती”ति इमिनाव पमाणयुत्तगहणे अनापत्तिसिद्धितो “जातकानं पवारितान”न्ति विसुं न वत्तब्बं । यदि एवं “तं पाळिया न समेती”ति कस्मा न वुत्तन्ति? हेड्डा ततुत्तरिसिक्खापदे वुत्तनयेनेव सक्का विज्जातुन्ति न वुत्तं । वुत्तज्झि तत्थ (पारा० अट्ट० २.५२६) “अट्टकथासु पन जातकपवारितद्वाने पकतियाव बहुम्पि वट्टति, अच्छिन्नकारणा पमाणमेव वट्टतीति वुत्तं, तं पाळिया न समेती”ति । “अपाथेय्यादिअत्थाय पटियादित”न्ति सज्जाय गणहन्तस्सपि आपत्तियेव अचित्तकत्ता सिक्खापदस्स । अत्तनोयेव गहणत्थं “इमस्स हत्थे देही”ति वचनेनपि आपज्जनतो “**वचीकम्म**”न्ति वुत्तं । सेसं उत्तानमेव । वुत्तलक्खणपूवमन्थता, असेसकता, अपटिप्पस्सद्भगमनता, न जातकादिता, अतिरेकपटिगहणन्ति इमानि पनेत्थ पच्च अङ्गानि ।

काणमातासिक्खापदवण्णना निट्ठिता ।

#### ५. पठमपवारणासिक्खापदवण्णना

**२३६.** पच्चमे **भुत्तावीति** भुत्ताविनो भुत्तवन्तो, कतभत्तकिच्चाति वुत्तं होति । **पवारिताति** एत्थ चतूसु पवारणासु यावदत्थपवारणा पटिक्खेपपवारणा च लब्भतीति आह “**ब्राह्मणेन...पे०... पटिक्खेपपवारणाय पवारिता**”ति । चतुब्बिधा हि पवारणा वस्संवुत्थपवारणा, पच्चयपवारणा, पटिक्खेपपवारणा, यावदत्थपवारणाति । तत्थ “अनुजानामि, भिक्खवे, वस्संवुत्थानं भिक्खूनं तीहि ठानेहि पवारेतु”न्ति (महाव० २०९) अयं **वस्संवुत्थपवारणा** । पकारेहि दिट्ठादीहि वारेति सङ्घादिके भजापेति भत्ते करोति एतायाति पवारणा, आपत्तिविसोधनाय अत्तवोस्सग्गोकासदानं । सा पन यस्मा येभुय्येन वस्संवुत्थेहि कातब्बा वुत्ता, तस्मा “वस्संवुत्थपवारणा”ति वुच्चति । “इच्छामहं, भन्ते, सङ्घं चातुमासं भेसज्जेन पवारेतु”न्ति (पाचि० ३०३) च, “अज्जत्र पुन पवारणाय अज्जत्र निच्चपवारणाया”ति (पाचि० ३०६) च अयं **पच्चयपवारणा** पवारेति पच्चये इच्छापेति एतायाति कत्वा, चीवरादीहि उपनिमन्तनायेतं अधिवचनं । “पवारितो नाम असनं पज्जायति, भोजनं पज्जायति, हत्थपासे ठितो अभिहरति, पटिक्खेपो पज्जायति, एसो पवारितो नामा”ति (पाचि० २३९) अयं **पटिक्खेपपवारणा** । विप्पकतभोजनतादिपच्चङ्गसहितो भोजनपटिक्खेपोयेव हेत्थ पकारयुत्ता वारणाति पवारणा । “पणीतेन खादनीयेन भोजनीयेन सहत्था सन्तप्पेसि सम्पवारेसी”ति (म० नि० १.३६३) अयं **यावदत्थपवारणा** । यावदत्थं भोजनस्स पवारणा यावदत्थपवारणा ।

**२३७. ति-कारं अवत्वा...पे०... वत्तुं वट्टतीति** इदं वत्तब्बाकारदस्सनत्थं वुत्तं । “ति-कारे पन वुत्तेपि अकतं नाम न होती”ति तीसुपि **गण्ठपदेसु** वुत्तं ।

**२३८-२३९. पवारितोति** पटिक्खेपितो । यो हि भुज्जन्तो परिवेसकेन उपनीतं भोजनं अनिच्छन्तो पटिक्खपति, सो तेन पवारितो पटिक्खेपितो नाम होति । ब्यज्जनं पन अनादियित्वा अत्थमत्तमेव दस्सेतुं **“कतपवारणो कतपटिक्खेपो”**ति वुत्तं । यस्मा **“असन”**न्ति इमिनाव पदेन **“भुत्तावी”**ति इमस्स अत्थो वुत्तो, तस्मा न तस्स किञ्चि पयोजनं विसुं उपलब्धति । यदि हि उपलब्धेय्य, पवारणा छळङ्गसमन्नागता आपज्जेय्याति मनसि कत्वा पञ्चसमन्नागतत्तंयेव दस्सेतुं **“वुत्तम्पि चेत”**न्तिआदिना पाळिं आहरति । केचि पन **“हत्थपासे ठितो अभिहरती”**ति एकमेव अङ्गं कत्वा **“चतुरङ्गसमन्नागता पवारणा”**तिपि वदन्ति ।

**अम्बिलपायासादीसूति आदि-**सद्देन खीरपायासादिं सङ्गहति । तत्थ अम्बिलपायासगहणेन तक्कादिअम्बिलसंयुत्ता घनयागु वुत्ता । खीरपायासगहणेन खीरसंयुत्ता यागु सङ्गहति । **पवारणं न जनेतीति** अनतिरिक्तभोजनापत्तिनिबन्धनं पटिक्खेपं न सार्धेति । कतोपि पटिक्खेपो अनतिरिक्तभोजनापत्तिनिबन्धनो न होतीति अकतद्वानेयेव तिद्वतीति आह **“पवारणं न जनेती”**ति । **“यागु-सदस्स पवारणजनकयागुयापि साधारणत्ता ‘यागुं गणहथा’ति वुत्तेपि पवारणा होतीति पवारणं जनेतियेवाति वुत्तं”**न्ति तीसुपि **गण्ठपदेसु** वुत्तं, तं परतो तत्थेव **“भत्तमिस्सकं यागुं आहरित्वा”**ति एत्थ वुत्तकारणेन न समेति । वुत्तज्झि तत्थ **“हेट्ठा अयागुके निमन्तने उदककज्जिकखीरादीहि सद्धिं मद्धितं भत्तमेव सन्धाय ‘यागुं गणहथा’ति वुत्तत्ता पवारणा होति, ‘भत्तमिस्सकं यागुं आहरित्वा’ति एत्थ पन विसुं यागुया विज्जमानत्ता पवारणा न होती”**ति । तस्मा तत्थ वुत्तनयेनेव खीरादीहि संमद्धितं भत्तमेव सन्धाय **“यागुं गणहथा”**ति वुत्तत्ता यागुया च तत्थ अभावतो पवारणा होतीति एवमेत्थ कारणं वत्तब्बं । एवज्झि सति परतो **“येनापुच्छितो, तस्स अत्थिताया”**ति अट्ठकथायं वुत्तकारणेनपि संसन्दति, अज्जथा गण्ठपदेसुयेव पुब्बापरविरोधो आपज्जति । अट्ठकथावचनेन च न समेति । **सचे...पे०... पज्जायतीति** इमिना वुत्तप्पमाणस्स मच्छमंसखण्डस्स नहारुनो वा सब्भावमत्तं दस्सेति । ताहीति पुथुकाहि ।

**सालिवीहियवेहि कतसत्तूति** येभुय्यनयेन वुत्तं, सत्त धज्जानि पन भज्जित्वा कतोपि सत्तुयेव । तेनेवाह **“कङ्कुवरक... पे०... सत्तुसङ्गहमेव गच्छती”**ति । **सत्तुमोदकोति** सत्तुयो पिण्डेत्वा कतो अपक्को सत्तुगुळो । पज्जन्नं भोजनानं अज्जतरवसेन विष्पकतभोजनभावस्स उपच्छिन्नत्ता **“मुखे सासपमत्तम्पि...पे०... न पवारेती”**ति वुत्तं । **“अकप्पियमंसं पटिक्खपति, न पवारेती”**ति वचनतो सचे सङ्घिकं लाभं अत्तनो अपापुणन्तं जानित्वा वा अजानित्वा वा पटिक्खपति, न पवारेति पटिक्खपितब्बस्सेव पटिक्खत्तत्ता । अलज्जिसन्तकं पटिक्खपन्तोपि न पवारेति । **अवत्थुतायाति** अनतिरिक्तापत्तिसाधिकाय पवारणाय अवत्थुभावतो । एतेन पटिक्खपितब्बस्सेव पटिक्खत्तभावं दीपेति । यज्झि पटिक्खपितब्बं होति, तस्स पटिक्खेपो आपत्तिअङ्गं न होतीति तं **“पवारणाय अवत्थू”**ति वुच्चति ।

**उपनामेतीति** इमिना कायाभिहारं दस्सेति । हत्थपासतो बहि ठितस्स सतिपि दातुकामाभिहारे पटिक्खपन्तस्स दूरभावेनेव पवारणाय अभावतो थेरस्सपि दूरभावमत्तं गहेत्वा पवारणाय अभावं दस्सेन्तो **“थेरस्स दूरभावतो”**ति आह, न पन थेरस्स अभिहारसब्भावतो । सचेपि गहेत्वा गतो हत्थपासे ठितो होति, किञ्चि पन अवत्वा आधारकट्टाने ठितत्ता अभिहारो नाम न होतीति **“दूतस्स च अनभिहरणतो”**ति वुत्तं । **“गहेत्वा गतेन ‘भत्तं गणहथा’ति वुत्ते अभिहारो नाम होतीति ‘सचे पन गहेत्वा आगतो भिक्खु...पे०... पवारणा होती’ति वुत्तं”**न्ति तीसुपि **गण्ठपदेसु** वुत्तं । केचि पन **“पत्तं किञ्चि उपनामेत्वा ‘इमं भत्तं गणहथा’ति वुत्तन्ति गहेतब्ब”**न्ति वदन्ति, तं युत्तं विय दिस्सति वाचाभिहारस्स इध अनधिप्पेतत्ता ।

परिवेसनायाति भत्तगो। अभिहटाव होतीति परिवेसकेनेव अभिहटा होती। ततो दातुकामताय गणहन्तं पटिक्खिपन्तस्स पवारणा होतीति एत्थ अगणहन्तम्पि पटिक्खिपतो पवारणा होतियेव। कस्मा? दातुकामताय अभिहटता। “तस्मा सा अभिहटाव होती”ति हि वुत्तं। तेनेव तीसुपि गण्ठपदेसु “दातुकामाभिहारे सति केवलं ‘दस्सामी’ति गहणमेव अभिहारो नाम न होति, ‘दस्सामी’ति गणहन्तेपि अगणहन्तेपि दातुकामाभिहारोव अभिहारो नाम होति, तस्मा गहणसमये वा अगगहणसमये वा तं पटिक्खिपतो पवारणा होती”ति वुत्तं। इदानी असति तस्स दातुकामाभिहारे गहणसमयेपि पटिक्खिपतो पवारणा न होतीति दस्सेतुं “सचे पना”तिआदि वुत्तं।

“रसं गणहथा”ति अपवारणजनकस्स नामं गहेत्वा वुत्तत्ता “तं सुत्वा पटिक्खिपतो पवारणा नत्थी”ति वुत्तं। मच्छरसं मंसरसन्ति एत्थ पन न केवलं मच्छस्स रसं मच्छरसमिच्चेव विज्जायति, अथ खो मच्छो च मच्छरसञ्च मच्छरसन्ति एवं पवारणजनकसाधारणनामवसेनपि विज्जायमानत्ता तं पटिक्खिपतो पवारणाव होति। परतो मच्छसूपन्ति एत्थापि एसेव नयो। “इदं गणहथा”ति वुत्तेपीति एत्थ एवं अवत्वापि पवारणपहोनकं यंकिञ्चि अभिहटं पटिक्खिपतो पवारणा होतियेवाति दडुब्बं। करम्बकोति मिस्सकाधिवचनमेतं। यज्झि अज्जेनज्जेन मिस्सेत्वा करोन्ति, सो “करम्बको”ति वुच्चति। सो सचेपि मंसेन मिस्सेत्वा कतोव होति, “करम्बकं गणहथा”ति अपवारणारहस्स नामेन वुत्तत्ता पटिक्खिपतो पवारणा न होति। “मंसकरम्बकं गणहथा”ति वुत्ते पन मंसमिस्सकं गणहथाति वुत्तं होति, तस्मा पवारणाव होति।

“उद्दिस्सकत”न्ति मज्जमानोति एत्थ “वत्थुनो कप्पियत्ता अकप्पियसज्जाय पटिक्खिपतोपि अचित्तकत्ता इमस्स सिक्खापदस्स पवारणा होती”ति वदन्ति। “हेट्ठा अयागुके निमन्तने उदककज्जिकखीरादीहि सद्धिं मद्धितं भत्तमेव सन्धाय ‘यागुं गणहथा’ति वुत्तत्ता पवारणा होति, ‘भत्तमिस्सकं यागुं आहरित्वा’ति एत्थ पन विसुं यागुया विज्जमानत्ता पवारणा न होती”ति वदन्ति। अयमेत्थ अधिप्पायोति “येनापुच्छितो”तिआदिना वुत्तमेवत्थं सन्धाय वदति। कारणं पनेत्थ दुद्दसन्ति एत्थ एके ताव वदन्ति “यस्मा यागुमिस्सकं नाम भत्तमेव न होति, खीरादिकम्पि होतियेव, तस्मा करम्बके विय पवारणाय न भवितब्बं। एवञ्च सति यागु बहुतरा वा होति समसमा वा, न पवारेति। ‘यागु मन्दा, भत्तं बहुतरं, पवारेती’ति एत्थ कारणं दुद्दस”न्ति। केचि पन वदन्ति “यागुमिस्सकं नाम भत्तं, तस्मा तं पटिक्खिपतो पवारणाय एव भवितब्बं। एवञ्च सति ‘इध पवारणा होति न होती’ति एत्थ कारणं दुद्दस”न्ति।

यथा चेत्थ कारणं दुद्दसं, एवं परतो “मिस्सकं गणहथा”ति एत्थापि कारणं दुद्दसमेवाति वेदितब्बं। न हि पवारणप्पहोनकस्स अप्पबहुभावो पवारणाय भावाभावनिमित्तं, किञ्चरहि पवारणजनकस्स नामगगहणमेवेत्थ पमाणं, तस्मा “इदञ्च करम्बकेन न समानेतब्ब”न्तिआदिना यम्पि कारणं वुत्तं, तम्पि पुब्बे वुत्तेन संसन्दियमानं न समेति। यदि हि “मिस्सक”न्ति भत्तमिस्सकेयेव रुळ्हं सिया, एवं सति यथा “भत्तमिस्सकं गणहथा”ति वुत्ते भत्तं बहुतरं वा समं वा अप्पतरं वा होति, पवारेतियेव, एवं “मिस्सकं गणहथा”ति वुत्तेपि अप्पतरेपि भत्ते पवारणाय भवितब्बं मिस्सकन्ति भत्तमिस्सकेयेव रुळ्हत्ता। तथा हि “मिस्सकन्ति भत्तमिस्सकेयेव रुळ्हवोहारत्ता इदं पन ‘भत्तमिस्सकमेवा’ति वुत्त”न्ति तीसुपि गण्ठपदेसु वुत्तं। अथ “मिस्सक”न्ति भत्तमिस्सके रुळ्हं न होति, मिस्सकभत्तं पन सन्धाय “मिस्सकं गणहथा”ति वुत्तन्ति। एवम्पि यथा अयागुके निमन्तने खीरादीहि सद्धिं मद्धितं भत्तमेव सन्धाय “यागुं गणहथा”ति वुत्ते पवारणा होति, एवमिधापि मिस्सकभत्तमेव सन्धाय “मिस्सकं गणहथा”ति वुत्ते भत्तं अप्पं वा होतु बहु वा, पवारणा एव सिया। तस्मा “मिस्सक”न्ति भत्तमिस्सके रुळ्हं वा होतु सन्धायभासितं वा, उभयत्थापि पुब्बेनापरं न समेतीति किमेत्थ कारणाचिन्ताय, ईदिसेसु पन ठानेसु अट्ठकथापमाणेनेव गन्तब्बन्ति अयं अम्हाकं खन्ति।

“**विसुं कत्वा देतीति** भत्तस्स उपरि ठितं रसादिं विसुं गहेत्वा देती”ति तीसुपि **गण्ठपदेसु** वुत्तं। **केनचि** पन “यथा भत्तसित्थं न पतति, तथा गाळ्हं हत्थेन पीळेत्वा परिस्सावेत्वा देती”ति वुत्तं। तथापि कारणं न दिस्सति। यथा हि भत्तमिस्सकं यागुं आहरित्वा “यागुं गण्हथा”ति वत्वा यागुमिस्सकं भत्तम्पि देन्तं पटिक्खिपतो पवारणा न होति, एवमिधापि बहुखीररसादीसु भत्तेसु “खीरं गण्हथा”ति आदीनि वत्वा खीरादीनि वा देतु खीरादिमिस्सकभत्तं वा, उभयथापि पवारणाय न भवितब्बं, तस्मा “विसुं कत्वा देती”ति तेनाकारेण देन्तं सन्धाय वुत्तं, न पन भत्तमिस्सकं कत्वा दिव्यमानं पटिक्खिपतो पवारणा होतीति दस्सनत्थन्ति गहेतब्बं। यदि पन भत्तमिस्सकं कत्वा दिव्यमाने पवारणा होतीति अधिप्पायेन अट्ठकथायं “विसुं कत्वा देती”ति वुत्तं, एवं सति अट्ठकथायेवेत्थ पमाणन्ति गहेतब्बं, न पन कारणन्तरं गवेसितब्बं।

सचे उक्कुटिकं निसिन्नो पादे अमुज्जित्वापि भूमियं निसीदति, इरियापथं विकोपेन्तो नाम होतीति उक्कुटिकासनं अविकोपेत्वाव सुखेन निसीदितुं “**तस्स पन हेट्ठा...पे०... निसीदनकं दातब्ब**”न्ति वुत्तं। “**आसनं अचालेत्वा**ति पीठे फुट्ठोकासतो आनिसदमंसं अमोचेत्वा, अनुट्ठित्वाति वुत्तं होति, अदिन्नादाने विय ठानाचावनं न गहेतब्ब”न्ति तीसुपि **गण्ठपदेसु** वुत्तं।

**अकप्पियकतन्ति** एत्थ अकप्पियकतस्सेव अनतिरित्तभावतो कप्पियं अकारापेत्वा तस्मिं पत्ते पक्खित्तमूलफलादियेव अतिरित्तं न होति, सेसं पन पत्तपरियापन्नं अतिरित्तमेव होति, परिभुज्जितुं वट्टति। तं पन मूलफलादिं परिभुज्जितुकामेन ततो नीहरित्वा कप्पियं कारापेत्वा अज्जस्मिं भाजने ठपेत्वा अतिरित्तं कारापेत्वा भुज्जितब्बं।

**सो पुन कातुं न लभतीति** तस्मियेव भाजने करियमानं पठमं कतेन सद्धिं कतं होतीति पुन सोयेव कातुं न लभति, अज्जो लभति। अज्जस्मिं पन भाजने तेन वा अज्जेन वा कातुं वट्टति। तेनाह “**येन अकतं, तेन कातब्बं। यज्ज अकतं, तं कातब्ब**”न्ति। **तेनपीति** एत्थ पि-सद्धो न केवलं अज्जेन वाति इममत्थं दीपेति। **एवं कतन्ति** अज्जस्मिं भाजने कतं। **पेसेत्वाति** अनुपसम्पन्नस्स हत्थे पेसेत्वा। इमस्स विनयकम्मभावतो “**अनुपसम्पन्नस्स हत्थे ठितं न कारेतब्ब**”न्ति वुत्तं।

**सचे पन आमिससंसद्धानीति** एत्थ सचे मुखगतेनपि अनतिरित्तेन आमिसेन संसद्धानि होन्ति, पाचित्तियमेवाति वेदितब्बं। तस्मा पवारितेन भोजनं अतिरित्तं कारापेत्वा भुज्जन्तेनपि यथा अकतेन मिस्सं न होति, एवं मुखज्ज हत्थज्ज सुद्धं कत्वा भुज्जितब्बं। किज्जापि अप्पवारितस्स पुरेभत्तं यामकालिकादीनि आहारत्थाय परिभुज्जतोपि अनापत्ति, पवारितस्स पन पवारणमूलकं दुक्कटं होतियेवाति “यामकालिकं...पे०... अज्झोहारे आपत्ति दुक्कटस्सा”ति पाळियं वुत्तं।

**२४१.** कायेन भुज्जनतो वाचाय आणापेत्वा अतिरित्तं अकारापनतो च आपज्जतीति “**कायवाचतो**”ति वुत्तं। सेसमेत्थ उत्तानमेव। पवारितभावो, आमिसस्स अनतिरित्तता, काले अज्झोहरणन्ति इमानि पनेत्थ तीणि अङ्गानि।

पठमपवारणासिक्खापदवण्णना निट्ठिता।

## ६. दुतियपवारणासिक्खापदवण्णना

**२४३.** छट्ठे **साधारणमेवाति** “हन्द भिक्खु खाद वा”ति आदिना वुत्तपवारणाय साधारणं। “भुत्तस्मिं पाचित्तिय”न्ति मातिकायं वुत्तत्ता भोजनपरियोसाने आपत्ति, न अज्झोहारे अज्झोहारे। **अभिहट्ठं पवारेति, आपत्ति पाचित्तियस्साति**

इदञ्च भोजनपरियोसानंयेव सन्धाय वुत्तन्ति वेदितब्बं । सेसमेत्थ उत्तानमेव । पवारितता, पवारितसज्जिता, आसादनापेक्खता, अनतिरित्तेन अभिहट्ठं पवारणा, भोजनपरियोसानन्ति इमानि पनेत्थ पञ्च अङ्गानि ।

दुतियपवारणासिक्खापदवण्णना निड्डिता ।

### ७. विकालभोजनसिक्खापदवण्णना

२४७. सत्तमे अग्गसमज्जोति उत्तमं नच्चं । तं किर पब्बतमत्थके ठत्वा एकं देवतं उद्दिस्स करोन्ति । नटानं नाटकानि नटनाटकानि, सीताहरणादीनि । अपञ्जत्ते सिक्खापदेति ऊनवीसतिवस्ससिक्खापदे अपञ्जत्ते । अदंसूति “विहारं नेत्वा खादिस्सथा”ति अदंसु ।

२४८-२४९. मूलकमूलादीनि उपदेसतोयेव वेदितब्बानि । न हि तानि परियायन्तरेन वुच्चमानानिपि सक्का विज्जातुं । परियायन्तरेपि हि वुच्चमाने तं तं नामं अजानन्तानं सम्मोहोयेव सिया, तस्मा तत्थ न किञ्चि वक्खाम । खादनीयत्थन्ति खादनीयेन कत्तब्बकिच्चं । नेव फरन्तीति न निष्फादेन्ति । तेसु तेसु जनपदेसूति एत्थ “एकस्मिं जनपदे आहारकिच्चं साधेन्तं सेसजनपदेसुपि न कप्पती”ति वदन्ति । रुक्खवल्लिआदीनन्ति हेट्ठा वुत्तमेव सम्पिण्डेत्वा वुत्तं । अन्तोपथवीगतोति सालकल्याणीखन्धं सन्धाय वुत्तं । सब्बकप्पियानीति मूलखन्धतचपत्तादिवसेन सब्बसो कप्पियानि । तेसम्पि नामवसेन न सक्का परियन्तं दस्सेतुन्ति सम्बन्धो । अच्छिवादीनं अपरिपक्कानेव फलानि यावजीविकानीति दस्सेतुं “अपरिपक्कानी”ति वुत्तं ।

हरीतकादीनं अट्टीनीति एत्थ मिज्जं पटिच्छादेत्वा ठितकपालानि यावजीविकानीति आचरिया । मिज्जम्पि यावजीविकन्ति एके । हिङ्गुति हिङ्गुरुक्खतो पग्घरितनिय्यासो । हिङ्गुजतुआदयोपि हिङ्गुविकतियो एव । तत्थ हिङ्गुजतु नाम हिङ्गुरुक्खस्स दण्डपत्तानि पचित्वा कतनिय्यासो, हिङ्गुसिपाटिकं नाम हिङ्गुपत्तानि पचित्वा कतनिय्यासो । “अज्जेन मिस्सेत्वा कतो”तिपि वदन्ति । तक्कन्ति अग्गकोटिया निक्खन्तसिलेसो । तक्कपत्तिन्ति पत्ततो निक्खन्तसिलेसो । तक्कपण्णिन्ति पलासे भज्जित्वा कतसिलेसो । “दण्डतो निक्खन्तसिलेसो तिपि वदन्ति । सेसमेत्थ उत्तानमेव । विकालता, यावकालिकता, अज्झोहरणन्ति इमानि पनेत्थ तीणि अङ्गानि ।

विकालभोजनसिक्खापदवण्णना निड्डिता ।

### ८. सन्निधिकारकसिक्खापदवण्णना

२५२-३. अट्टमे तादिसन्ति असूपब्यज्जनं । यंकिञ्चि यावकालिकं वा यामकालिकं वाति एत्थ “यामकालिक”न्ति इमिना न केवलं यावकालिके एव सन्निधिपच्चया पाचित्तियं, अथ खो यामकालिकेपीति दस्सेति । ननु च यामकालिकं नेव खादनीयेसु अन्तोगधं, न भोजनीयेसु । तेनेव पदभाजनीये “खादनीयं नाम पञ्च भोजनानि यामकालिकं सत्ताहकालिकं यावजीविकं ठपेत्वा अवसेसं खादनीयं नाम । भोजनीयं नाम पञ्च भोजनानी”ति वुत्तं, “यो पन भिक्खु सन्निधिकारकं खादनीयं वा भोजनीयं वा खादेय्य वा भुज्जेय्य वा, पाचित्तिय”न्ति च वुत्तं, तस्मा यामकालिके पाचित्तियेन भवितब्बन्ति कथं विज्जायतीति? वुच्चते — पदभाजने खादनीय-सदस्स अत्थदस्सनत्थं “यामकालिकं ठपेत्वा”ति वुत्तं, न पन सन्निधिपच्चया अनापत्तिदस्सनत्थं । खादितब्बज्झि यंकिञ्चि खादनीयन्ति अधिप्पेतं, न च यामकालिकेसु किञ्चि खादितब्बं अत्थि पातब्यभावतो । तस्मा किञ्चापि यामकालिकं खादनीयभोजनीयेहि न सङ्गहितं,

तथापि अनापत्तिं दस्सेन्तेन “अनापत्तिं यामकालिकं यामे निदहित्वा भुञ्जती”ति वचनतो यामातिक्कमे सन्निधिपच्चया पाचित्तियेन भवितव्वन्ति विज्जायति । “यामकालिकेन, भिक्खवे, सत्ताहकालिकं यावजीविकं तदहुपटिग्गहितं यामे कप्पति, यामातिक्कन्ते न कप्पती”ति (महाव० ३०५) इमिनापि चायमत्थो सिद्धो । तेनेव भगवतो अधिप्पायज्जूहि अट्ठकथाचरियेहि यामकालिके पाचित्तियमेव वुत्तं ।

**पटिग्गहणेति** गहणमेव सन्धाय वुत्तं । पटिग्गहितमेव हि तं, पुन पटिग्गहणकिच्चं नत्थि । तेनेव “अज्झोहरितुकामताय गणहन्तस्स पटिग्गहणे”ति वुत्तं । **मातिकाट्ठकथायं** (कङ्का० अट्ठ० सन्निधिकारकसिक्खापदवण्णना) पन “अज्झोहरिस्सामीति गणहन्तस्स पटिग्गहणे”इच्चेव वुत्तं । यन्ति यं पत्तं । **सन्दिस्सतीति** यागुया उपरि सन्दिस्सति । तेलवण्णे पत्ते सतिपि निस्सेहभावे अङ्गुलिया घंसन्तस्स वण्णवसेनेव लेखा पज्जायति, तस्मा तत्थ अनापत्तीति दस्सनत्थं “सा अब्बोहारिका”ति वुत्तं । **सयं पटिग्गहेत्वा अपरिच्चत्तमेव हि दुतियदिवसे न वट्ठीतीति** एत्थ पटिग्गहणे अनपेक्खविस्सज्जनेन अनुपसम्पन्नस्स निरपेक्खदानेन वा विजहितपटिग्गहणं परिच्चत्तमेव होतीति “अपरिच्चत्तं”न्ति इमिना उभयथापि अविजहितपटिग्गहणमेव वुत्तं । तस्मा यं परस्स परिच्चजित्वा अदिन्नम्पि सचे पटिग्गहणे निरपेक्खविस्सज्जनेन विजहितपटिग्गहणं होति, तम्पि दुतियदिवसे वट्ठीतीति वेदितव्वं ।

यदि एवं “पत्तो दुद्धोतो होती”ति आदीसु कस्मा आपत्तिं वुत्ताति? “पटिग्गहणं अविस्सज्जेत्वाव सयं वा अज्जेन वा तुच्छं कत्वा न सम्मा धोवित्वा निट्ठापिते पत्ते लग्गम्पि अविजहितपटिग्गहणमेव होतीति तत्थ आपत्ती”ति तीसुपि **गण्ठपदेसु** वुत्तं । केचि पन “सामणेराणं परिच्चजन्तीति इमस्मिं अधिकारे ठत्वा ‘अपरिच्चत्तमेवा’ति वुत्तत्ता अनुपसम्पन्नस्स परिच्चत्तमेव वट्ठीति, अपरिच्चत्तं न वट्ठीतीति आपन्नं, तस्मा निरालयभावेन पटिग्गहणे विजहितेपि अनुपसम्पन्नस्स अपरिच्चत्तं न वट्ठीतीति वदन्ति, तं युत्तं विय न दिस्सति । यदग्गेन हि पटिग्गहणं विजहति, तदग्गेन सन्निधिम्पि न करोति विजहितपटिग्गहणस्स अप्पटिग्गहितसदिसत्ता । पटिग्गहेत्वा निदहितेयेव च सन्निधिपच्चया आपत्तिं वुत्ता । “पटिग्गहेत्वा एकरत्तं वीतिनामितस्सेतं अधिवचनं”न्ति हि वुत्तं ।

पाळियं “सत्ताहकालिकं यावजीविकं आहारत्थाय पटिग्गण्हाति, आपत्तिं दुक्कटस्सा”ति आदिना सन्निहितेसु सत्ताहकालिकयावजीविकेसु पुरेभत्तम्पि आहारत्थाय अज्झोहरणेपि दुक्कटस्स वुत्तत्ता यामकालिकेपि आहारत्थाय अज्झोहरणे विसुं दुक्कटेनपि भवितव्वन्ति आह “आहारत्थाय अज्झोहरतो दुक्कटेन सद्धिं पाचित्तियं”न्ति । **पकतिआमिसेति** ओदनादिकप्पियामिसे । **यामकालिकं सति पच्चये सामिसेन मुखेन अज्झोहरतो** द्वेति हिय्यो पटिग्गहितयामकालिकं अज्ज पुरेभत्तं सामिसेन मुखेन भुञ्जतो सन्निहितयामकालिकपच्चया एकं पाचित्तियं, सन्निहितेन संसट्ठआमिसपच्चया एकन्ति द्वे पाचित्तियानि । **विकप्पद्वयेपीति** सामिसेन निरामिसेनाति वुत्तविधानद्वये । **दुक्कटं वट्ठीतीति** आहारत्थाय अज्झोहरणपच्चया दुक्कटं वट्ठीति । **थुल्लच्चयज्ज दुक्कटज्ज वट्ठीतीति** मनुस्समंसे थुल्लच्चयं, सेसअकप्पियमंसेसु दुक्कटं वट्ठीति ।

**२५५. पटिग्गहणपच्चया ताव दुक्कटन्ति** एत्थ सन्निहितत्ता पुरेभत्तम्पि दुक्कटमेव । सति पच्चये पन सन्निहितम्पि सत्ताहकालिकं यावजीविकं भेसज्जत्थाय गणहन्तस्स परिभुञ्जन्तस्स च अनापत्तियेव । सेसमेत्थ उत्तानमेव । यावकालिकयामकालिकता, सन्निधिभावो, तस्स अज्झोहरणन्ति इमानि पनेत्थ तीणि अङ्गानि ।

सन्निधिकारकसिक्खापदवण्णना निट्ठिता ।

## ९. पणीतभोजनसिक्खापदवण्णना

२५७-२५९. नवमे पणीतसंसद्धानि भोजनानि **पणीतभोजनानि** । यथा हि आजञ्जयुत्तो रथो “आजञ्जरथो”ति वुच्चति, एवमिधापि पणीतसंसद्धानि सत्तधञ्जनिब्बत्तानि भोजनानि “पणीतभोजनानी”ति वुत्तानि । येहि पन पणीतेहि संसद्धानि, तानि “पणीतभोजनानी”ति वुच्चन्ति, तेसं पभेददस्सनत्थं “सेय्यथिदं, सप्पि नवनीत”न्तिआदि पाळियं वुत्तं । “येसं मंसं कप्पती”ति इदञ्च पाचित्तियवत्थुपरिच्छेददस्सनत्थं वुत्तं, न पन कप्पियवत्थुपरिच्छेददस्सनत्थं । न हि अकप्पियमंससत्तानं सप्पिआदीनि न कप्पन्ति । एकञ्चि मनुस्सवसातेलं ठपेत्वा सब्बेसं खीरसप्पिनवनीतवसातेलेसु अकप्पियं नाम नत्थि । **सप्पिभत्तन्ति** एत्थ किञ्चापि सप्पिसंसद्वं भत्तं सप्पिभत्तं, सप्पि च भत्तञ्च सप्पिभत्तन्तिपि विज्जायति, अट्ठकथासु पन “सालिभत्तं विय सप्पिभत्तं नाम नत्थी”ति कारणं वत्वा दुक्कटस्सेव दळ्ळहतरं कत्वा वुत्तत्ता न सक्का अञ्जं वत्तुं । अट्ठकथाचरिया एव हि ईदिसेसु ठानेसु पमाणं ।

**मूलन्ति** कप्पियभण्डं सन्धाय वुत्तं । **अनापत्तीति** विसङ्केतत्ता सब्बाहियेव आपत्तीहि अनापत्ति । केचि पन “पाचित्तियेनेव अनापत्ति वुत्ता, सूपोदनविज्जत्तिदुक्कटं पन होतियेवा”ति वदन्ति, तं न गहेतब्बं । **कप्पियसप्पिना** **अकप्पियसप्पिनाति** च इदं कप्पियाकप्पियमंसानं वसेन वुत्तं, तस्मा कप्पियमंससप्पिना अकप्पियमंससप्पिनाति एवमेत्थ अत्थो गहेतब्बो । **नानावत्थुकानीति** सप्पिनवनीतादीनं वसेन वुत्तं ।

### २६१. महानामसिक्खापदेन कारेतब्बोति एत्थ —

“अगिलानेन भिक्खुना चतुमासपच्चयपवारणा सादितब्बा अञ्जत्र पुनपवारणाय अञ्जत्र निच्चपवारणाय, ततो चे उत्तरि सादियेय्य, पाचित्तिय”न्ति (पाचि० ३०६) —

इदं महानामसिक्खापदं नाम । इमिना च सिक्खापदेन सङ्गवसेन गिलानपच्चयपवारणाय पवारितद्धाने सचे तत्थ रत्तीहि वा भेसज्जेहि वा परिच्छेदो कतो होति, एत्तकायेव रत्तियो एत्तकानि वा भेसज्जानि विज्जापेतब्बानीति । अथ ततो रत्तिपरियन्ततो वा भेसज्जपरियन्ततो वा उत्तरि न भेसज्जकरणीयेन वा भेसज्जं अञ्जभेसज्जकरणीयेन वा अञ्जं भेसज्जं विज्जापेन्तस्स पाचित्तियं वुत्तं । तस्मा अगिलानो गिलानसज्जी हुत्वा पञ्च भेसज्जानि विज्जापेन्तो न भेसज्जकरणीयेन भेसज्जं विज्जापेन्तो नाम होतीति “महानामसिक्खापदेन कारेतब्बो”ति वुत्तं । **एतानि पाटिदेसनीयवत्थूनीति** पाळियं आगतसप्पिआदीनि सन्धाय वुत्तं । पाळियं अनागतानि पन अकप्पियसप्पिआदीनि भिक्खुनीनम्पि दुक्कटवत्थूनीति वेदितब्बं । **सूपोदनविज्जत्तियन्ति** भिक्खूनं पाचित्तियवत्थूनि भिक्खुनीनं पाटिदेसनीयवत्थूनि च ठपेत्वा अवसेसविज्जत्तिं सन्धाय वुत्तं । सेसमेत्थ उत्तानमेव । पणीतभोजनता, अगिलानता, अकतविज्जत्तिया पटिलाभो, अज्झोहरणन्ति इमानि पनेत्थ चत्तारि अङ्गानि ।

पणीतभोजनसिक्खापदवण्णना निट्ठिता ।

## १०. दन्तपोनसिक्खापदवण्णना

२६३. दसमे **अय्यवोसाटितकानीति** पितुपिण्डस्सेतं अधिवचनं । **उम्मारेलि** सुसाने कतगेहस्स अत्तनो गेहस्स वा उम्मारेलि । **घनबद्धोति** घनमंसेन सम्बद्धो, कथिनसंहतसरीरोति वुत्तं होति ।



**२६४. मुखद्वारन्ति गलनाळिकं । आहारन्ति अज्झोहरितब्बं यंकिञ्च यावकालिकादिं । आहरेय्याति मुखद्वारं पवेसेय्य । मुखेन वा पविट्ठं होतु नासिकाय वा, गलेन अज्झोहरणीयत्ता सब्बम्पि तं मुखद्वारं पवेसितमेव होति । यस्मा पन ते भिक्खू अनाहारेपि उदके आहारसज्जाय दन्तपोने च मुखद्वारं आहटं इदन्ति सज्जाय कुक्कुच्चायिसू, तस्मा वुत्तं “ते भिक्खू अदिन्नं...पे०... सम्मा अत्थं असल्लक्खेत्वा कुक्कुच्चायिसू”ति । उदकज्झि यथासुखं पातुं दन्तकट्ठञ्च दन्तपोनपरिभोगेन परिभुज्जितुं वट्ठति, तस्स पन रसं गिलितुं न वट्ठति । सचेपि दन्तकट्ठरसो अजानन्तस्स अन्तो पविसति, पाचित्तियमेव । अनज्झोहरन्तेन पन दन्तकट्ठं वा होतु अज्जं वा, किञ्चि मुखे पक्खिपितुं वट्ठति ।**

**२६५. अकल्लकोति गिलानो सहत्था परिभुज्जितुं असक्कोन्तो मुखेन पटिग्गणाति । उच्चारणमत्तन्ति उक्खिपनमत्तं । एकदेसेनपीति अङ्गुलियापि फुट्टमत्तेन । तं चे पटिग्गणाति, सब्बं पटिग्गहितमेवाति वेणुकोटिया बन्धित्वा ठपितत्ता । सचेपि भूमियं ठितमेव घटं दायकेन हत्थपासे ठत्वा घटं दस्सामीति दिन्नवेणुकोटिग्गहणवसेन पटिग्गणाति, उभयकोटिबद्धं सब्बम्पि पटिग्गहितमेव होति । भिक्खुस्स अत्थाय अपीळेत्वा पकतिया पीळियमानउच्छुरसं सन्थाय “गण्ठथा”ति वुत्तत्ता “अभिहारो न पज्जायती”ति वुत्तं । हत्थपासे ठितस्स पन भिक्खुस्स अत्थाय पीळियमाना उच्छुरतो पघरन्तं रसं गण्हितुं वट्ठति, दोणिकाय सयं पघरन्तं उच्छुरसं मज्झे आवरित्वा आवरित्वा विस्सज्जितम्पि गण्हितुं वट्ठति । कत्थचि अट्ठकथासु ।**

**असंहारिमेति थाममज्झिमेन पुरिसेन असंहारिये । “तिन्तिणिकादिपण्णेसू”ति वचनतो साखासु पटिग्गहणं रुहतीति दट्ठब्बं । पुज्झित्वा पटिग्गहेत्वाति एत्थ “पुज्झिते पटिग्गहणकिच्चं नत्थि, तस्मा पुज्झित्वा गहेत्वाति एवमत्थो गहेतब्बो”ति वदन्ति । पुज्झित्वा पटिग्गहेत्वा वाति एवमेत्थ अत्थो दट्ठब्बो । पत्ते पतितरजनचुण्णज्झि अब्भन्तरपरिभोगत्थाय अपरिहटभावतो पटिग्गहेत्वा परिभुज्जितुं वट्ठति । पुब्बाभोगस्स अनुरूपेन “अनुपसम्पन्नस्स दत्त्वा...पे०... वट्ठती”ति वुत्तं । यस्मा पन तं “अज्जस्स दस्सामी”ति चित्तुप्पादमत्तेन परसन्तकं नाम न होति, तस्मा तस्स अदत्त्वापि पटिग्गहेत्वा परिभुज्जितुं वट्ठति ।**

**भिक्खुस्स देतीति अज्जस्स भिक्खुस्स देति । कज्जिकन्ति खीररसादिं यंकिञ्चि द्रवं सन्थाय वुत्तं । हत्थतो मोचेत्वा पुन गण्हाति, उग्गहितकं होतीति आह “हत्थतो अमोचेन्तेनेवा”ति । आलुलेन्तानन्ति आलोलेन्तानं, अयमेव वा पाठो । आहरित्वा भूमियं ठपितत्ता अभिहारो नत्थीति आह “पत्तो पटिग्गहेतब्बो”ति । पठमतरं उलुङ्कतो थेवा पत्ते पतन्तीति एत्थ “यथा पठमतरं पतितथेवे दोसो नत्थि, तथा आकिरित्वा अपनेन्तानं पच्छा पतितथेवेपि अभिहटत्ता नेवत्थि दोसो”ति वदन्ति । चरुकेनाति खुद्दकभाजनेन । मुखवट्ठियापि गहेतुं वट्ठतीति मुखवट्ठिं उक्खिपित्वा हत्थे फुसापिते गण्हितुं वट्ठति । केचीति अभयगिरिवासिनो । एस नयोति कायपटिबद्धपटिबद्धम्पि कायपटिबद्धमेवाति अयं नयो । तथा च तत्थ कायपटिबद्धे तंपटिबद्धे च थुल्लच्चयमेव वुत्तं ।**

**तेनाति यस्स भिक्खुनो सन्तिकं गतं, तेन । तस्माति यस्मा मूलट्ठस्सेव परिभोगो अनुज्जातो, तस्मा । तं दिवसं हत्थेन गहेत्वा दुतियदिवसे पटिग्गहेत्वा परिभुज्जन्तस्स उग्गहितकपटिग्गहितं होतीति आह “अनामसित्वा”ति । अप्पटिग्गहितत्ता “सन्निधिपच्चया अनापत्ती”ति वुत्तं । अप्पटिग्गहेत्वा परिभुज्जन्तस्स अदिन्नमुखद्वारापत्ति होतीति आह “पटिग्गहेत्वा पन परिभुज्जितब्ब”न्ति । “तं दिवसं...पे०... न ततो पर”न्ति वचनतो तं दिवसं हत्थेन गहेत्वा वा अग्गहेत्वा वा ठपितं दुतियदिवसे अप्पटिग्गहेत्वा परिभुज्जन्तस्स अदिन्नमुखद्वारापत्ति होति, हत्थेन गहेत्वा ठपितं दुतियदिवसे पटिग्गहेत्वा परिभुज्जन्तस्स पन उग्गहितकपटिग्गहितं होति । अप्पटिग्गहितमेव हि हत्थेन गहेत्वा ठपितं । “सामं गहेत्वा**

**परिभुञ्जितुं**’न्ति हि वचनतो अप्पटिग्गहितस्सेव तस्मिं दिवसे परिभोगो अनुज्जातो । तस्मा यं वृत्तं **गण्ठपदे** “**तं दिव्यमानं पततीति** एत्थ यथा गणभोजनादीसु गिलानादीनं कुक्कुच्चायन्तानं गणभोजनं अनुज्जातं, एवमिधापि भगवता पटिग्गहितमेव कुक्कुच्चविनोदनत्थं अनुज्जातं’न्ति, तं न गहेतब्बं । “तं दिव्यमानं पतती”ति अविसेसेन वृत्तत्ता चतूसुपि कालिकेसु अयं नयो वेदितब्बो ।

**सत्थकेनाति** पटिग्गहितसत्थकेन । कस्मा पनेत्थ उग्गहितपच्चया सन्निधिपच्चया वा दोसो न सियाति आह “**न हि तं परिभोगत्थाय परिहरन्ती**”ति । इमिनाव बाहिरपरिभोगत्थं सामं गहेत्वा अनुपसम्पन्नेन दिन्नं वा गहेत्वा परिहरितुं वट्टतीति दीपेति । तस्मा पत्तसम्पक्खनादिअत्थं सामं गहेत्वा परिहटतेलादिं सचे परिभुञ्जितुकामो होति, पटिग्गहेत्वा परिभुञ्जन्तस्स अनापत्ति । अब्भन्तरपरिभोगत्थं पन सामं गहितं पटिग्गहेत्वा परिभुञ्जन्तस्स उग्गहितकपटिग्गहितं होति, अप्पटिग्गहेत्वा परिभुञ्जन्तस्स अदिन्नमुखद्वारापत्ति होति, अब्भन्तरपरिभोगत्थमेव अनुपसम्पन्नेन दिन्नं गहेत्वा परिहरन्तस्स सिङ्गीलोनकप्पो विय सन्निधिपच्चया आपत्ति होति । केचि पन “**थाममज्झिमस्स पुरिसस्स उच्चारणमत्तं** होतीतिआदिना वृत्तपञ्चङ्गसम्पत्तिया पटिग्गहणस्स रुहनतो बाहिरपरिभोगत्थम्पि सचे अनुपसम्पन्नेन दिन्नं गण्हाति, पटिग्गहितमेवा”ति वदन्ति । एवं सति इध बाहिरपरिभोगत्थं अनुपसम्पन्नेन दिन्नं गहेत्वा परिहरन्तस्स सन्निधिपच्चया आपत्ति वत्तब्बा सिया, “**न हि तं परिभोगत्थाय परिहरन्ती**”ति च न वत्तब्बं, तस्मा बाहिरपरिभोगत्थं गहितं पटिग्गहितं नाम न होतीति वेदितब्बं । यदि एवं पञ्चसु पटिग्गहणङ्गेषु “**परिभोगत्थाया**”ति विसेसनं वत्तब्बन्ति? न वत्तब्बं । पटिग्गहणज्झि परिभोगत्थमेव होतीति “**परिभोगत्थाया**”ति विसुं अवत्वा “**तज्जे भिक्खु कायेन वा कायपटिबद्धेन वा पटिग्गहणी**”ति एत्तकमेव वृत्तं । अपरे पन “**सतिपि पटिग्गहणे** ‘**न हि तं परिभोगत्थाय परिहरन्ती**’ति इध अपरिभोगत्थाय परिहरणे अनापत्ति वृत्ता”ति वदन्ति । **उदुक्खलमुसलानि खियन्तीति** एत्थ उदुक्खलमुसलानं खयेन पिसितकोट्टितभेसज्जेसु सचे आगन्तुकवण्णो पज्जायति, न वट्टति ।

**सुद्धं उदकं होतीति** रुक्खसाखादीहि गळित्वा पतनउदकं सन्धाय वृत्तं । **पत्तो वास्स पटिग्गहेतब्बोति** एत्थापि पत्तगतं छुपित्वा देन्तस्स हत्थलग्गेन आमिसेन दोसाभावत्थं पत्तपटिग्गहणन्ति अब्भन्तरपरिभोगत्थमेव पटिग्गहणं वेदितब्बं । **यं सामणेस्स पत्ते पतति...पे०... पटिग्गहणं न विजहतीति** एत्थ पुनप्पुनं गणहन्तस्स अत्तनो पत्ते पक्खित्तमेव “**अत्तनो सन्तक**”न्ति सन्निट्ठानकरणतो हत्थगतं पटिग्गहणं न विजहति, परिच्छिन्दित्वा दिन्नं पन गणहन्तस्स गणहणसमयेयेव “**अत्तनो सन्तक**”न्ति सन्निट्ठानस्स कतत्ता हत्थगतं पटिग्गहणं विजहति । **केसज्जि अत्थाय ओदनं पक्खिपतीति** एत्थ अनुपसम्पन्नस्स अत्थाय पक्खिपन्तेपि “**आगन्त्वा गणिहस्सती**”ति सयमेव पक्खिपित्वा ठपनतो पटिग्गहणं न विजहति, अनुपसम्पन्नस्स हत्थे पक्खित्तं पन अनुपसम्पन्नेनेव ठपितं नाम होतीति पटिग्गहणं विजहति परिच्चत्तभावतो । तेन वृत्तं “**सामणेस्स...पे०... परिच्चत्तत्ता**”ति ।

**पटिग्गहणूपगं भारं** नाम थाममज्झिमस्स पुरिसस्स उक्खेपारहं । किञ्चापि अविस्सज्जेत्वाव अज्जेन हत्थेन पिदहन्तस्स दोसो नत्थि, तथापि न पिदहितब्बन्ति अट्ठकथापमाणेनेव गहेतब्बं । **मच्छिकवारणत्थन्ति** एत्थ “**सचेपि साखाय लग्गरजं पत्ते पतति, सुखेन परिभुञ्जितुं सक्काति साखाय पटिग्गहितत्ता अब्भन्तरपरिभोगत्थमेविध पटिग्गहणन्ति मूलपटिग्गहणमेव वट्टती**”ति वृत्तं । अपरे पन “**मच्छिकवारणत्थन्ति** एत्थ वचनमत्तं गहेत्वा बाहिरपरिभोगत्थं गहित”न्ति वदन्ति । **तस्मिम्पि असतीति** चाटिया वा कुण्डके वा असति । **अनुपसम्पन्नं गाहापेत्वाति** तंयेव अज्झोहरणीयभण्डं अनुपसम्पन्नेन गाहापेत्वा । **थेरस्स पत्तं अनुथेरस्साति** थेरस्स पत्तं अत्तना गहेत्वा अनुथेरस्स देति । **तुय्हं यागुं मय्हं देहीति** एत्थ एवं वत्वा सामणेस्स पत्तं गहेत्वा अत्तनोपि पत्तं तस्स देति । **एत्थ पनाति** पण्डितो

सामणोरोतिआदिपत्तपरिवत्तनकथाय । **कारणं उपपरिक्खितब्बन्ति** यथा मातुआदीनं तेलादीनि हरन्तो तथारूपे किच्चे अनुपसम्पन्नेन अपरिवत्तेत्वाव परिभुज्जितुं लभति, एवमिध पत्तपरिवत्तनं अकत्वा परिभुज्जितुं न लभतीति एत्थ कारणं वीमंसितब्बन्ति अत्थो ।

एत्थ पन “सामणोरेहि गहिततण्डुलेसु परिक्खीणेषु अवस्सं अम्हाकं सामणोरा सङ्गहं करोन्तीति वितक्कुप्पत्ति सम्भवति, तस्मा तं परिवत्तेत्वाव परिभुज्जितब्बं । मातापितूनं अत्थाय पन छायात्थाय वा गहणे परिभोगासा नत्थि, तस्मा तं वट्टती”ति कारणं वदन्ति । तेनेव **आचरियबुद्धदत्तत्थेरेनपि** वुत्तं —

“मातापितूनमत्थाय, तेलादिहरतोपि च ।  
साखं छायादिअत्थाय, इमेसं न विसेसति ॥

“तस्मा हिस्स विसेसस्स, चिन्तेतब्बं तु कारणं ।  
तस्स सालयभावं तु, विसेसं तक्कयाम त”न्ति ॥

इदमेवेत्थ युत्तरं अवस्सं तथाविधवितक्कुप्पत्तिया सम्भवतो । न सक्का हि एत्थ वितक्कं सोधेतुन्ति । मातादीनं अत्थाय हरणे पन नावस्सं तथाविधवितक्कुप्पत्तीति सक्का वितक्कं सोधेतुं । यत्थ हि वितक्कं सोधेतुं सक्का, तत्थ नेवत्थि दोसो । तेनेव वक्खति “सचे पन सक्कोति वितक्कं सोधेतुं, ततो लद्धं खादितुम्पि वट्टती”ति ।

**निच्चालेतुं न सक्कोतीति** निच्चालेत्वा सक्खरा अपनेतुं न सक्कोति । **आधारके पत्तो ठपितो होतीति** पटिगहेतब्बपत्तं सन्धाय वुत्तं । **चालेतीति** विना कारणं चालेति । सतिपि कारणे भिक्खूनं परिभोगारहं चालेतुं न वट्टति । किञ्चापि “अनुजानामि, भिक्खवे, अमनुस्सिकाबाधे आमकमंसं आमकलोहित”न्ति (महाव० २६४) तादिसे आबाधे अत्तनो अत्थाय आमकमंसपटिगहणं अनुज्जातं, “आमकमंसपटिगहणा पटिविरतो होती”ति च सामञ्जसो पटिक्खत्तं, तथापि अत्तनो अज्जस्स वा भिक्खुनो अत्थाय अगगहितत्ता “**सीहविघासादिं...पे०... वट्टती**”ति वुत्तं । **सक्कोति वितक्कं सोधेतुन्ति** मय्हम्पि देतीति वितक्कस्स अनुप्पन्नभावं सल्लक्खेतुं सक्कोति, सामणेरस्स दस्सामीति सुद्धचित्तेन मया गहितन्ति वा सल्लक्खेतुं सक्कोति ।

**सचे पन मूलेपि पटिग्गहितं होतीति** एत्थ “गहेत्वा गते मय्हम्पि ददेय्युन्ति सज्जाय सचे पटिग्गहितं होती”ति वदन्ति । **कोट्टासे करोतीति** भिक्खुसामणोरा च अत्तनो अत्तनो अभिरुचितं कोट्टासं गणहन्तूति सब्बेसं समके कोट्टासे करोति । **गहितावसेसन्ति** सामणोरेहि गहितकोट्टासतो अवसेसं । **गण्हित्वाति** “मय्हं इदं गण्हिस्सामी”ति गहेत्वा । इध गहितावसेसं नाम तेन गण्हित्वा पुन ठपितं । **पटिग्गहेत्वाति** तदहु पटिग्गहेत्वा । तेनेव “**यावकालिकेन यावजीविकसंसग्गे दोसो नत्थी**”ति वुत्तं । सचे पन पुरिमदिवसे पटिग्गहेत्वा ठपिता होति, सामिसेन मुखेन तस्सा वट्टिया धूमं पिबितुं न वट्टति । **समुदोदकेनाति** अप्पटिग्गहितसमुदोदकेन । यस्मा कतकट्टि उदकं पसादेत्वा विसुं तिड्ढति, तस्मा “**अब्बोहारिक**”न्ति वुत्तं । **लग्गतीति** मुखे हत्थे च उदके सुक्खे सेतवण्णं दस्सेन्तं लग्गति । **पानीयं गहेत्वाति** अत्तनोयेव अत्थाय गहेत्वा । सचे पन पीतावसेसं तत्थेव आकिरिस्सामीति गण्हाति, पुन पटिग्गहणकिच्चं नत्थि । **विक्खम्भेत्वाति** वियूहित्वा, अपनेत्वाति अत्थो ।

**महाभूतेसूति** सरीरनिस्सितेसु महाभूतेसु । **पततीति** विच्छिन्दित्वा पतति । विच्छिन्दित्वा पतितमेव हि पटिग्गहेतब्बं, न

इतरं । अल्लदारुं रुक्खतो छिन्दित्वापि कातुं वट्टतीति एत्थ मत्तिकत्थाय पथविं खणितुम्पि वट्टतीति वेदितब्बं । सप्पदट्टक्खणेयेव वट्टतीति असति कप्पियकारके सामं गहेत्वा परिभुज्जितुं वट्टति, अज्जदा पटिग्गहापेत्वा परिभुज्जितब्बं । सेसमेत्थ उत्तानमेव । अप्पटिग्गहितता, अननुज्जातता, धूमादिअब्बोहारिकाभावो, अज्झोहरणन्ति इमानि पनेत्थ चत्तारि अङ्गानि ।

दन्तपोनसिक्खापदवण्णना निट्ठिता ।

निट्ठितो भोजनवग्गो चतुत्थो ।

## ५. अचेलकवग्गो

### १. अचेलकसिक्खापदवण्णना

२७३. अचेलकवग्गस्स पठमसिक्खापदे तेसन्ति तित्थियानं । तत्थाति भाजने । इतोति पत्ततो । सचे तित्थियो वदतीति “पठममेव मं सन्धाय अभिहरित्वा ठपितं मय्हं सन्तकं होति, इमस्मिं भाजने आकिरथा”ति वदति, वट्टति । सेसमेत्थ उत्तानमेव । अज्जतित्थियता, अज्झोहरणीयता, अज्झोहरणत्थाय सहत्था अनिक्खित्तभाजने दानन्ति इमानि पनेत्थ तीणि अङ्गानि ।

अचेलकसिक्खापदवण्णना निट्ठिता ।

### २. उय्योजनसिक्खापदवण्णना

२७४. दुतियं उत्तानत्थमेव । अनाचारं आचरितुकामता, तदत्थमेव उपसम्पन्नस्स उय्योजना, एवं उय्योजेन्तस्स उपचारातिक्कमोति इमानि पनेत्थ तीणि अङ्गानि ।

उय्योजनसिक्खापदवण्णना निट्ठिता ।

### ३. सभोजनसिक्खापदवण्णना

२८०. ततिये पिट्टसङ्घाटोति द्वारबाहायेतं अधिवचनं । खुद्दकं नाम सयनिघरं वित्थारतो पञ्चहत्थप्पमाणं होति, तस्स च मज्झिमट्टानं पिट्टसङ्घाटतो अट्टतेय्यहत्थप्पमाणमेव होति, तस्मा तादिसे सयनिघरे पिट्टसङ्घाटतो हत्थपासं विजहित्वा निसिन्नो पिट्टिवंसं अतिक्कमित्वा निसिन्नो नाम होति । एवं निसिन्नो च मज्झं अतिक्कमित्वा निसिन्नो नाम होतीति आह “इमिना मज्झातिक्कमं दस्सेती”ति । यथा वा तथा वा कतस्साति पिट्टिवंसं आरोपेत्वा वा अनारोपेत्वा वा कतस्स । सच्चित्तकन्ति अनुपविसित्वा निसीदनचित्तेन सच्चित्तकं । सेसमेत्थ उत्तानमेव । परियुट्ठितरागजायम्पतिकानं सन्निहितता, सयनिघरता, दुतियस्स भिक्खुनो अभावो, अनुपखज्ज निसीदनन्ति इमानि पनेत्थ चत्तारि अङ्गानि ।

सभोजनसिक्खापदवण्णना निट्ठिता ।

२८४-२८९. चतुत्थपञ्चमेसु नत्थि किञ्चि वत्तब्बं ।

## ६. चारित्तसिक्खापदवण्णना

२९८. छट्ठे पकतिवचनेनाति एत्थ यं द्वादसहत्थब्भन्तरे ठितेन सोतुं सक्का भवेय्य, तं पकतिवचनं नाम । आपुच्छितब्बोति “अहं इत्थन्नामस्स घरं गच्छामी”ति वा “चारित्तं आपज्जामी”ति वा ईदिसेन वचनेन आपुच्छितब्बो । सेसमेत्थ उत्तानमेव । पच्चन्नं भोजनानं अज्जतरेन निमन्तनसादियनं, सन्तं भिक्खुं अनापुच्छना, भत्तिघरतो अज्जघरप्पवेसनं, मज्झन्हिकानतिक्कमो, समयस्स वा आपदानं वा अभावोति इमानि पनेत्थ पच्च अङ्गानि ।

चारित्तसिक्खापदवण्णना निट्ठिता ।

## ७. महानामसिक्खापदवण्णना

३०३. सत्तमे महानामो नामाति अनुरुद्धत्थेरस्स भाता भगवतो चूळपितु पुत्तो । सुद्धोदनो सक्कोदनो सुक्कोदनो धोतोदनो अमितोदनोति इमे हि पच्च जना भातरो । अमिता नाम देवी तेसं भगिनी, तिस्सत्थेरो तस्सा पुत्तो । तथागतो च नन्दत्थेरो च सुद्धोदनस्स पुत्ता, महानामो च अनुरुद्धत्थेरो च सुक्कोदनस्स, आनन्दत्थेरो अमितोदनस्स । सो भगवतो कनिट्ठो, महानामो महल्लकतरो सकदागामी अरियसावको । तेन वुत्तं “महानामो नाम...पे०... अरियसावको”ति ।

३०५-३०६. पाळियं अज्जण्होति अज्ज एकदिवसन्ति अत्थो, “अज्जनो”ति वा अत्थो गहेतब्बो, नो अम्हाकं । कालं आहरिस्सथाति स्वे हरिस्सथ । ततो चे उत्तरि सादियेय्याति सचे तत्थ रत्तीहि वा भेसज्जेहि वा परिच्छेदो कतो होति “एत्तकायेव वा रत्तियो एत्तकानि वा भेसज्जानि विज्जापेतब्बानी”ति, ततो रत्तिपरियन्ततो वा भेसज्जपरियन्ततो वा उत्तरि विज्जापेत्तो सादियेय्य । “इमेहि तया भेसज्जेहि पवारितम्ह, अम्हाकच्च इमिनाव भेसज्जेन अत्थो”ति आचिक्खित्वा विज्जापेतुम्पि गिलानोव लभति ।

३१०. यस्मा सङ्गपवारणायमेवायं विधि, तस्मा “ये अत्तनो पुग्गलिकाय पवारणाय पवारिता”ति वुत्तं । सेसं उत्तानमेव । सङ्गपवारणता, भेसज्जविज्जत्ति, अगिलानता, परियन्तातिक्कमोति इमानि पनेत्थ चत्तारि अङ्गानि ।

महानामसिक्खापदवण्णना निट्ठिता ।

## ८. उय्युत्तसेनासिक्खापदवण्णना

३११. अट्ठमं उत्तानत्थमेव । उय्युत्तसेना, दस्सनत्थाय गमनं, अनुज्जातोकासतो अज्जत्र दस्सनं, तथारूपपच्चयस्स आपदाय वा अभावोति इमानि पनेत्थ चत्तारि अङ्गानि ।

उय्युत्तसेनासिक्खापदवण्णना निट्ठिता ।

## ९. सेनावाससिक्खापदवण्णना

३१७. नवमसिक्खापदम्पि उत्तानमेव । तिरत्तातिक्कमो, सेनाय सूरियस्स अत्थङ्गमो, गिलानतादीनं अभावोति इमानि पनेत्थ तीणि अङ्गानि ।

सेनावाससिक्खापदवण्णना निट्ठिता ।

## १०. उय्योधिकसिक्खापदवण्णना

३२२. दसमे कति ते लक्खानि लब्धानीति तव सरप्पहारस्स लक्खणभूता कित्तका जना तथा लब्धाति अत्थो, कित्तका तथा विद्धानि वुत्तं होति । सेसमेत्थ उत्तानमेव । उय्योधिकादिदस्सनत्थाय गमनं, अनुज्जातोकासतो अज्जत्र दस्सनं, तथारूपपच्चयस्स आपदाय वा अभावोति इमानि पनेत्थ तीणि अङ्गानि ।

उय्योधिकसिक्खापदवण्णना निट्ठिता ।

निट्ठितो अचेलकवग्गो पच्चमो ।

## ६. सुरापानवग्गो

### १. सुरापानसिक्खापदवण्णना

३२६-३२८. सुरापानवग्गस्स पठमसिक्खापदे वतियाति गामपरिक्खेपवतिया । पाळियं पिट्टसुरादीसु पिट्ठं भाजने पक्खिपित्वा तज्जं उदकं दत्वा मद्दित्वा कता पिट्टसुरा । एवं पूवे ओदने च भाजने पक्खिपित्वा तज्जं उदकं दत्वा मद्दित्वा कता पूवसुरा ओदनसुराति च वुच्चति । “किण्णा”ति पन तस्सा सुराय बीजं वुच्चति । ये सुरामोदकातिपि वुच्चन्ति, ते पक्खिपित्वा कता किण्णपक्खित्ता । हरीतकीसासपादिनानासम्भारेहि संयोजिता सम्भारसंयुत्ता ।

मधुकतालनाळिकेरादिपुप्फरसो चिरपरिवासितो पुप्फासवो । पनसादिफलरसो फलासवो । मुद्दिकारसो मध्वासवो । उच्छुरसो गुळासवो । हरीतकामलककटुकभण्डादिनानासम्भारानं रसो चिरपरिवासितो सम्भारसंयुत्तो । बीजतो पट्टायाति सम्भारे पट्टियादेत्वा चाटियं पक्खित्तकालतो, तालनाळिकेरादीनं पुप्फरसस्स गहितअभिनवकालतोयेव च पट्टाय ।

३२९. लोणसोवीरकं सुत्तज्ज अनेकेहि भेसज्जेहि अभिसङ्खतो अमज्जभूतो आसवविसेसो । वासग्गाहापनत्थन्ति सुगन्धिभावग्गाहापनत्थं । अचित्तकं लोकवज्जन्ति एत्थ यं वत्तब्बं, तं पठमपाराजिकवण्णनायं वुत्तनयेन वेदितब्बं । सेसमेत्थ उत्तानमेव । मज्जभावो, तस्स पानज्जाति इमानि पनेत्थ द्वे अङ्गानि ।

सुरापानसिक्खापदवण्णना निट्ठिता ।

### २. अङ्गुलिपतोदकसिक्खापदवण्णना

३३०. दुतिये भिक्खुनीपि अनुपसम्पन्नट्टाने ठिताति एत्थ भिक्खुपि भिक्खुनिया अनुपसम्पन्नट्टाने ठितोति वेदितब्बो । सेसमेत्थ उत्तानमेव । हसाधिप्पायता, उपसम्पन्नस्स कायेन कायामसनन्ति इमानि पनेत्थ द्वे अङ्गानि ।

अङ्गुलिपतोदकसिक्खापदवण्णना निट्ठिता ।

### ३. हसधम्मसिक्खापदवण्णना

३३५. ततियं उत्तानत्थमेव । उपरिगोष्फकता, हसाधिप्पायेन कीळनन्ति इमानि पनेत्थ द्वे अङ्गानि ।

हसधम्मसिक्खापदवण्णना निट्ठिता ।

#### ४. अनादरियसिक्खापदवण्णना

३४४. चतुत्थे गारहो आचरियुग्गहो न गहेतब्बोति यस्मा उच्छुरसो सत्ताहकालिको, तस्स कसटो यावजीविको, द्विन्नयेव समवायो उच्छुरयट्ठि, तस्मा विकाले उच्छुरयट्ठिं खादितुं वट्ठति गुळहरीतकं वियाति एवमादिको गारह्याचरियवादो न गहेतब्बो । लोकवज्जे आचरियुग्गहो न वट्ठतीति लोकवज्जसिक्खापदे आपत्तिट्ठाने यो आचरियवादो, सो न गहेतब्बो, लोकवज्जं अतिक्कमित्वा “इदं अम्हाकं आचरियुग्गहो”ति वदन्तस्स उग्गहो न वट्ठतीति अधिप्पायो । सुत्तानुलोमं नाम अट्ठकथा । पवेणिया आगतसमोधानं गच्छतीति “पवेणिया आगतो आचरियुग्गहोव गहेतब्बो”ति एवं वुत्ते महाअट्ठकथावादेयेव सङ्गहं गच्छतीति अधिप्पायो । सेसमेत्थ उत्तानमेव । उपसम्पन्नस्स पज्जत्तेन वचनं, अनादरियकरणन्ति इमानि पनेत्थ द्वे अङ्गानि ।

अनादरियसिक्खापदवण्णना निट्ठिता ।

#### ५. भिसापनसिक्खापदवण्णना

३४५. पज्चमं उत्तानत्थमेव । उपसम्पन्नता, तस्स दस्सनसवनविसये भिसापेतुकामताय वायमनन्ति इमानि पनेत्थ द्वे अङ्गानि ।

भिसापनसिक्खापदवण्णना निट्ठिता ।

#### ६. जोतिसिक्खापदवण्णना

३५०. छट्ठे भग्गा नाम जनपदिनो राजकुमारा, तेसं निवासो एकोपि जनपदो रुळ्हीसदेन “भग्गा”ति वुच्चति । तेन वुत्तं “भग्गाति जनपदस्स नाम”न्ति । सुसुमारगिरेति एवंनामके नगरे । तस्स किर नगरस्स मापनत्थं वत्थुविज्जाचरियेन नगरट्ठानस्स परिग्गण्हनदिवसे अविदूरे सुसुमारो सद्धमकासि गिरं निच्छारेसि । अथ अनन्तरायेन नगरे मापिते तमेव सुसुमारगिरणं सुभनिमित्तं कत्वा सुसुमारगिरंत्वेवस्स नामं अकंसु । केचि पन “सुसुमारसण्ठानत्ता सुसुमारो नाम एको गिरि, सो तस्स नगरस्स समीपे, तस्मा तं सुसुमारगिरि एतस्स अत्थीति ‘सुसुमारगिरी’ति वुच्चती”ति वदन्ति । तथा वा होतु अज्जथा वा, नाममेतं तस्स नगरस्साति आह “सुसुमारगिरन्ति नगरस्स नाम”न्ति । भेसकळाति घम्पण्डनामको गच्छविसेसो । केचि “सेतरुक्खो”तिपि वदन्ति । तेसं बहुलताय पन तं वनं भेसकळावनन्त्वेव पज्जायित्थ । “भेसगळावने”तिपि पाठो । “भेसो नाम एको यक्खो अयुत्तकारी, तस्स ततो गळितट्ठानताय तं वनं भेसगळावनं नाम जात”न्ति हि केचि ।

३५२. जोतिकरणेति अगिकरणे । सेसमेत्थ उत्तानमेव । अगिलानता, अनुज्जातकरणाभावो, विसिब्बेतुकामता, समादहनन्ति इमानि पनेत्थ चत्तारि अङ्गानि ।

जोतिसिक्खापदवण्णना निट्ठिता ।

### ७. नहानसिक्खापदवण्णना

३५७. सत्तमसिक्खापदस्स पाळियं असम्भिन्नेनाति अमक्खितेन, अनट्ठेनाति अत्थो । ओरेनद्धमासं नहायेय्याति नहातदिवसतो पट्ठाय अद्धमासे अपरिपुण्णे नहायेय्य । सेसमेत्थ उत्तानमेव । मज्झिमदेसो, ऊनकद्धमासे नहानं, समयानं वा नदीपारगमनस्स वा आपदानं वा अभावोति इमानि पनेत्थ तीणि अङ्गानि ।

नहानसिक्खापदवण्णना निट्ठिता ।

### ८. दुब्बण्णकरणसिक्खापदवण्णना

३६८. अट्ठमे “चम्मकारनीलं नाम पकतिनीलं”न्ति तीसुपि गण्ठपदेसु वुत्तं । गण्ठपदे पन “चम्मकारा उदके तिपुमलं अयगूथञ्च पक्खिपित्वा चम्मं काळं करोन्ति, तं चम्मकारनीलं”न्ति वुत्तं । सेसमेत्थ उत्तानमेव । वुत्तप्पकारस्स चीवरस्स अकतकप्पता, अनट्ठचीवरादिता, निवासनं वा पारुपनं वाति इमानि पनेत्थ तीणि अङ्गानि ।

दुब्बण्णकरणसिक्खापदवण्णना निट्ठिता ।

### ९. विकप्पनसिक्खापदवण्णना

३७४. नवमे अपच्चुद्धारणन्ति “मय्हं सन्तकं परिभुज्ज वा विस्सज्जेहि वा”तिआदिना अकतपच्चुद्धारं । येन विनयकम्मं कतन्ति येन सद्धिं विनयकम्मं कतं । तिसकवण्णनायन्ति निस्सगियवण्णनायं । परिभोगेन कायकम्मं, अपच्चुद्धारापनेन वचीकम्मं । सेसमेत्थ उत्तानमेव । सामं विकप्पितस्स अपच्चुद्धारो, विकप्पनुपगचीवरता, परिभोगोति इमानि पनेत्थ तीणि अङ्गानि ।

विकप्पनसिक्खापदवण्णना निट्ठिता ।

### १०. चीवरअपनिधानसिक्खापदवण्णना

३७७. दसमं उत्तानत्थमेव । उपसम्पन्नस्स सन्तकानं पत्तादीनं अपनिधानं, विहेसेतुकामता वा हसाधिप्पायता वाति इमानि पनेत्थ द्वे अङ्गानि ।

चीवरअपनिधानसिक्खापदवण्णना निट्ठिता ।

निट्ठितो सुरापानवग्गो छट्ठो ।

### ७. सप्पाणकवग्गो

### १. सज्जिच्चसिक्खापदवण्णना



३८२. सप्पाणकवग्गस्स पठमसिक्खापदे उंसुं सरं अस्सति खिपतीति **इस्सासो**, धनुसिप्पकुसलोति आह “**धनुग्गहाचरियो**”ति । पटिसत्तुविधमनत्थं धनुं गण्हन्तीति धनुग्गहा, तेसं आचरियो **धनुग्गहाचरियो** । **अप्पमत्तेन वत्तं कातब्बन्ति** यथा ते पाणा न मरन्ति, एवं सूपड्डितस्सतिना सेनासने वत्तं कातब्बं । सेसमेत्थ उत्तानमेव । अङ्गानिपि मनुस्सविग्गहे वुत्तनयेन वेदितब्बानीति ।

सज्जिच्चसिक्खापदवण्णना निट्ठिता ।

## २. सप्पाणकसिक्खापदवण्णना

३८७. दुतिये **उदकसण्ठानकप्पदेसे**ति यत्थ भूमिभागे उदकं निक्खित्तं सन्तिट्ठति, न सहसा परिक्खयं गच्छति, तादिसे पदेसे । सेसमेत्थ उत्तानमेव । अङ्गानि सिज्जनसिक्खापदे वुत्तनयानेव ।

सप्पाणकसिक्खापदवण्णना निट्ठिता ।

## ३. उक्कोटनसिक्खापदवण्णना

३९२. ततिये **यथापतिट्ठितभावेन पतिट्ठातुं न देन्तीति** तेसं पवत्तिआकारदस्सनत्थं वुत्तं । यं पन धम्मेन अधिकरणं निहतं, तं सुनिहतमेव । सचे विप्पकते कम्मे पटिक्कोसति, तं सज्जापेत्वाव कातब्बं । इतरथा कम्मज्ज कुप्पति, कारकानज्ज आपत्ति । सेसमेत्थ उत्तानमेव । यथाधम्मं निहतभावो, जानना, उक्कोटनाति इमानि पनेत्थ तीणि अङ्गानि ।

उक्कोटनसिक्खापदवण्णना निट्ठिता ।

## ४. दुट्ठुल्लसिक्खापदवण्णना

३९९. चतुत्थे **तस्सेवा**ति यो आपन्नो, तस्सेव । **आरोचेतीति** पटिच्छादनत्थमेव मा कस्सचि आरोचेसीति वदति । **वत्थुपुग्गलो**ति आपन्नपुग्गलो । **येनस्स आरोचितन्ति** येन दुतियेन अस्स ततियस्स आरोचितं । **कोटि छिन्ना** होतीति यस्मा पटिच्छादनपच्चया आपत्तिं आपज्जित्वाव दुतियेन ततियस्स आरोचितं, तस्मा तप्पच्चया पुन तेन आपज्जितब्बापत्तिया अभावतो आपत्तिया कोटि छिन्ना नाम होति ।

४००. “**अनुपसम्पन्नस्स सुक्कविस्सट्ठि च कायसंसग्गो चाति अयं दुट्ठुल्लअज्झाचारो नामा**”ति इदं दुट्ठुल्लारोचनसिक्खापदट्ठकथाय न समेति । वुत्तज्झि तत्थ (पाचि० अट्ठ० ८२) “अनुपसम्पन्नस्स दुट्ठुल्लं वा अदुट्ठुल्लं वा अज्झाचारन्ति एत्थ आदितो पज्ज सिक्खापदानि दुट्ठुल्लो नाम अज्झाचारो, सेसानि अदुट्ठुल्लो, सुक्कविस्सट्ठिकायसंसग्गदुट्ठुल्लअत्तकामा पनस्स अज्झाचारो नामा”ति । “आरोचने अनुपसम्पन्नस्स दुट्ठुल्लं अज्जथा अधिप्पेतं, पटिच्छादने अज्जथा”ति एत्थापि विसेसकारणं न दिस्सति, तस्मा अट्ठकथाय पुब्बेनापरं न समेति । अविरोधं इच्छन्तेन पन वीमंसितब्बमेत्थ कारणं । सेसमेत्थ उत्तानमेव । उपसम्पन्नस्स दुट्ठुल्लापत्तिजाननं, पटिच्छादेतुकामताय नारोचेस्सामीति धुरनिक्खेपोति इमानि पनेत्थ द्वे अङ्गानि ।

दुट्ठुल्लसिक्खापदवण्णना निट्ठिता ।

## ५. ऊनवीसतिवस्ससिक्खापदवण्णना

४०२. पञ्चमे रूपसुत्तन्ति हेरञ्जिकानं सुत्तं । दुरुत्तानन्ति अक्कोसवसेन दुरुत्तानं, दुरुत्तत्तायेव दुरागतानं । वचनपथानन्ति एत्थ वचनमेव तदत्थं आतुकामानं आपेतुकामानञ्च पथोति वचनपथो । दुक्खमानन्ति दुक्खेन खमितब्बानं ।

४०४. गब्भे सयितकालेन सद्धिं वीसतिमं वस्सं अस्साति गब्भवीसो । हायनवड्ढन्ति गब्भमासेसु अधिकेसु उत्तरिहायनं, ऊनेसु वड्ढन्ति वेदितब्बं । एकूनवीसतिवस्सन्ति द्वादसमासे मातुकुच्छिस्मिं वसित्वा महापवारणाय जातकालतो पट्टाय एकूनवीसतिवस्सं । पाटिपददिवसेति पच्छिमिकाय वस्सूपगमनदिवसे । “तिसरत्तिदिवो मासो”ति (अ० नि० ३.७१; ८.४३; विभ० १०२३) वचनतो “चत्तारो मासा परिहायन्ती”ति वुत्तं । वस्सं उक्कड्ढन्तीति वस्सं उद्धं कड्ढन्ति, ततिये संवच्छरे एकमासं अधिकमासवसेन परिच्चजन्ता वस्सं उद्धं कड्ढन्तीति अत्थो, तस्मा ततियो संवच्छरो तेरसमासिको होति, संवच्छरस्स पन द्वादसमासिकत्ता अट्टारससु वस्सेसु अधिकमासे विसुं गहेत्वा “छ मासा वड्ढन्ती”ति वुत्तं । ततोति छमासतो । निक्कड्ढा हुत्वाति अधिकमासेहि सद्धिं परिपुण्णवीसतिवस्सत्ता निब्बेमतिका हुत्वा । यं पन वुत्तं तीसु गण्ठपदेसु “अट्टारसन्नयेव वस्सानं अधिकमासे गहेत्वा गणितत्ता सेसवस्सद्वयस्सपि अधिकानि दिवसानि होन्तेव, तानि अधिकदिवसानि सन्धाय ‘निक्कड्ढा हुत्वा’ति वुत्तं”न्ति, तं न गहेतब्बं । न हि द्वीसु वस्सेसु अधिकदिवसानि नाम विसुं उपलब्धन्ति ततिये वस्से वस्सुक्कड्ढनवसेन अधिकमासे परिच्चत्तेयेव अतिरेकमाससम्भवतो । तस्मा द्वीसु वस्सेसु अतिरेकदिवसानि नाम विसुं न सम्भवन्ति ।

ननु च “ते द्वे मासे गहेत्वा वीसतिवस्सानि परिपुण्णानि होन्ती”ति कस्मा वुत्तं, एकूनवीसतिवस्समिहि पुन अपरस्मिं वस्से पक्खित्ते वीसतिवस्सानि परिपुण्णानि होन्तीति आह “एत्थ पन...पे०... वुत्त”न्ति । अनेकत्थत्ता निपातानं पन-सद्धो हि-सद्धत्थे, एत्थ हीति वुत्तं होति । इदञ्चि वुत्तस्सेवत्थस्स समत्थनवसेन वुत्तं । इमिना च इमं दीपेति “यं वुत्तं ‘एकूनवीसतिवस्सं सामणेरे निक्खमनीयपुण्णमासिं अतिक्कम्म पाटिपददिवसे उपसम्पादेन्ती’ति, तत्थ गब्भमासेपि अगगहेत्वा द्वीहि मासेहि अपरिपुण्णवीसतिवस्सं सन्धाय ‘एकूनवीसतिवस्सं’ति वुत्तं, तस्मा अधिकमासेसु द्वीसु गहितेसु वीसतिवस्सानि परिपुण्णानि नाम होन्ती”ति । तस्माति यस्मा गब्भमासापि गणनूपगा होन्ति, तस्मा । एकवीसतिवस्सो होतीति जातदिवसतो पट्टाय वीसतिवस्सो समानो गब्भमासेहि सद्धिं एकवीसतिवस्सो होति ।

४०६. अज्जं उपसम्पादेतीति उपज्झायो कम्मवाचाचरियो वा हुत्वा उपसम्पादेति । सेसमेत्थ उत्तानमेव । ऊनवीसतिवस्सता, ऊनकसज्जिता, उपसम्पादनन्ति इमानि पनेत्थ तीणि अङ्गानि ।

ऊनवीसतिवस्ससिक्खापदवण्णना निट्ठिता ।

## ६. थेय्यसत्थसिक्खापदवण्णना

४०७. छट्ठसिक्खापदं उत्तानत्थमेव । थेय्यसत्थकभावो, जाननं, संविधानं, अविसङ्केतेन गमनन्ति इमानि पनेत्थ चत्तारि अङ्गानि ।

थेय्यसत्थसिक्खापदवण्णना निट्ठिता ।

४१२. सत्तमे नत्थि किञ्चि वत्तब्बं ।

## ८. अरिट्टसिक्खापदवण्णना

४१७. अट्टमे बाधयिंसूति हनिंसु । तंतंसम्पत्तिया विबन्धनवसेन सत्तसन्तानस्स अन्तरे वेमज्झे एति आगच्छतीति अन्तरायो, दिट्ठधम्मिकादिअनत्थो । अनतिक्कमनट्ठेन तस्मिं अन्तराये नियुत्ता, अन्तरायं वा फलं अरहन्ति, अन्तरायस्स वा करणसीलाति अन्तरायिका । तेनाह “अन्तरायं करोन्तीति अन्तरायिका”ति । आनन्तरियधम्माति आनन्तरिकसभावा चेतनाधम्मा । तत्रायं वचनत्थो — चुतिअनन्तरफलं अनन्तरं नाम, तस्मिं अनन्तरे नियुत्ता, तंनिब्वत्तनेन अनन्तरकरणसीला, अनन्तरप्पयोजनाति वा आनन्तरिका, ते एव आनन्तरियाति वुत्ता । कम्मानि एव अन्तरायिकाति कम्मन्तरायिका । मोक्खस्सेव अन्तरायं करोति, न सग्गस्साति मिच्छाचारलक्खणाभावतो वुत्तं । न हि भिक्खुनिया धम्मरक्खितभावो अत्थि । पाकतिकभिक्खुनीवसेन चेतं वुत्तं । अरियाय पन पवत्तं अपायसंवत्तनिकमेव, नन्दमाणवको चेत्य निदस्सनं । उभिन्नं समानच्छन्दतावसेन वा न सग्गन्तरायिकता, मोक्खन्तरायिकता पन मोक्खत्थाय पटिपत्तिया विदूसनतो । अभिभवित्वा पन पवत्तियं सग्गन्तरायिकतापि न सक्का निवारेतुन्ति ।

अहेतुकदिट्ठिअकिरियदिट्ठिनत्थिकदिट्ठियोव नियतभावं पत्ता नियतमिच्छादिट्ठिधम्मा । पटिसन्धिधम्माति पटिसन्धिचित्तुप्पादमाह । पण्डकादिग्गहणज्वेत्थ निदस्सनमतं सब्बायपि अहेतुकपटिसन्धिया विपाकन्तरायिकभावतो । याहि अरिये उपवदति, ता चेतना अरियूपवादा जाता । ततो परन्ति खमापनतो उपरि । यं पनेत्थ वत्तब्बं, तं दिब्वचक्खुक्थायं वुत्तमेव । सज्जिच्च आपन्ना आपत्तियोति सज्जिच्च वीतिक्कन्ता सत्त आपत्तिकखन्धा । सज्जिच्च वीतिक्कन्तज्झि अन्तमसो दुक्कटदुब्भासितम्पि सग्गमग्गफलानं अन्तरायं करोति । याव भिक्खुभावं पटिजानाति पाराजिकं आपन्नो, न वुट्ठाति सेसगरुकापत्तिं आपन्नो, न देसेति लहुकापत्तिं आपन्नो ।

अयं भिक्खूति अरिट्ठो भिक्खु । रसेन रसं संसन्दित्वाति अनवज्जेन पच्चयपरिभुज्जनरसेन सावज्जकामगुणपरिभोगरसं समानेत्वा । योनिस्सो पच्चवेक्खणेन नत्थि एत्थ छन्दरागोति निच्छन्दरागो, पच्चयपरिभोगो । उपनेन्तो वियाति बन्धनं उपनेन्तो विय । “घटेन्तो विया”तिपि पाठो । उपसंहरन्तो वियाति सदिसतं उपसंहरन्तो विय एकन्तसावज्जे अनवज्जभावपक्खेपनतो । पापकन्ति लामकट्टेन दुग्गतिसम्पापनट्ठेन च पापकं । महासमुदं बन्धन्तेन वियाति सेतुकरणवसेन महासागरं बन्धन्तेन विय । सब्बज्जुतज्जाणेन सद्धिं पटिविरुज्जन्तोति सब्बज्जुतज्जाणेन “सावज्ज”न्ति दिट्ठं “अनवज्ज”न्ति गहणेन तेन सह पटिविरुज्जन्तो । आणाचक्केति पठमपाराजिकसिक्खापदसङ्घाते, “अब्रह्मचरियं पहाया”तिआदिदेसनासङ्घाते च आणाचक्के ।

अट्ठिकङ्कलं नाम उरट्ठि वा पिट्ठिकण्टकं वा सीसट्ठि वा । तज्झि निम्मंसत्ता “कङ्कल”न्ति वुच्चति । विगतमंसाय हि अट्ठिसङ्कलिकाय एकट्ठिम्हि वा कङ्कल-सद्वो निरुळ्हो । अनुदहनट्ठेनाति अनुपायपटिपत्तिया सम्पति आयतिज्ज अनुदहनट्ठेन । महाभितापनट्ठेन अनवट्ठितसभावताय, इत्तरपच्चपट्टानट्ठेन मुहुत्तकरणीयताय, तावकालिकट्ठेन परेहि अभिभवनताय, सब्बङ्गपच्चङ्गपलिभज्जनट्ठेन भेदनादिअधिकरणभावेन, उग्घाटसदिसताय अधिकुट्टनट्ठेन, अवणे वणं उप्पादेत्वा अन्तो अनुपविसनभावताय विनिविज्जनट्ठेन, दिट्ठधम्मिकसम्परायिकअनत्थनिमित्तताय सासङ्कसप्पटिभयट्ठेन ।

पाळियं “थामसा परामासा”तिआदीसु एवमत्थो वेदितब्बो । थामसाति दिट्ठिथामेन, तस्सा दिट्ठिया थामगतभावेनाति

अत्थो । परामासाति दिट्ठिपरामासेन, दिट्ठिसङ्घातपरामासेनाति अत्थो । दिट्ठियेव हि धम्मसभावं अतिक्कमित्वा परतो आमसनेन परामासो । अभिनिविस्साति तण्हाभिनिवेसपुब्बङ्गमेन दिट्ठाभिनिवेसेन “इदमेत्थ सच्च”न्ति अभिनिविसित्वा । वोहरतीति कथेति । यतो च खो ते भिक्खूति यदा ते भिक्खू । एवंब्बाखो अहं, भन्ते, भगवताति इदं एस अत्तनो लद्धि निगूहितुकामताय नत्थीति वत्तुकामोपि भगवतो आनुभावेन सम्पटिच्छति । बुद्धानं किर सम्मुखा द्वे कथा कथेतुं समत्थो नाम नत्थि । कस्स नु खो नाम त्वं मोघपुरिसाति त्वं मोघपुरिस कस्स खत्तियस्स वा ब्राह्मणस्स वा वेस्सस्स वा सुद्धस्स वा गहट्ठस्स वा पब्बजितस्स वा देवस्स वा मनुस्सस्स वा मया एवं धम्मं देसितं आजानासि । सेसमेत्थ उत्तानमेव । धम्मकम्मता, समनुभासना, अप्पटिनिस्सज्जनन्ति इमानि पनेत्थ तीणि अङ्गानि ।

अरिट्ठसिक्खापदवण्णना निट्ठिता ।

## ९. उक्खित्तसम्भोगसिक्खापदवण्णना

४२४. नवमे पयोगगणनायाति दानग्गहणप्पयोगगणनाय । संवासे कम्मपरियोसानवसेन, सहसेय्याय एकस्मिं निपन्ने इतरस्स निपज्जनपयोगवसेन आपत्तिपरिच्छेदो वेदितब्बो । एत्थ च पदभाजने “एकच्छन्ने”ति अविसेसेन वुत्तत्ता नानूपचारेपि एकच्छन्ने निपज्जन्तस्स आपत्ति । तेनेव मातिकाटुकथायं (कङ्का<sup>०</sup> अट्ठ<sup>०</sup> उक्खित्तसम्भोगसिक्खापदवण्णना) वुत्तं “सह वा सेय्यं कप्पेय्याति नानूपचारेपि एकच्छन्ने निपज्जेय्या”ति । पण्णात्ति अजानन्तेन अरहतापि किरियाब्बाकतचित्तेन आपज्जितब्बत्ता “तिचित्त”न्ति वुत्तं । यं पन केनचि वुत्तं “तिचित्तन्ति एत्थ विपाकाब्बाकतचित्तेन सह वा सेय्यं कप्पेय्याति एवमत्थो दट्ठब्बो, अज्जथा सचित्तकत्ता सिक्खापदस्स किरियाब्बाकतं सन्धाय न युज्जती”ति, तं न गहेतब्बं । न हि सचित्तकसिक्खापदवीतिक्कमो अरहतो न सम्भवति । तेनेव पथवीखणनादीसु सचित्तकसिक्खापदेसु तिचित्तमेव वुत्तं । सेसमेत्थ उत्तानमेव । अकतानुधम्मता, जानना, सम्भोगादिकरणन्ति इमानि पनेत्थ तीणि अङ्गानि ।

उक्खित्तसम्भोगसिक्खापदवण्णना निट्ठिता ।

## १०. कण्टकसिक्खापदवण्णना

४२८. दसमे पिरेति निपातपदं । सम्बोधने वत्तमानं पर-सद्धेन समानत्थं वदन्तीति आह “पर अमामका”ति, अम्हाकं अनज्झत्तिकभूताति अत्थो । पिरेति वा “परतो”ति इमिना समानत्थं निपातपदं, तस्मा चर पिरेति परतो गच्छ, मा इध तिट्ठाति एवम्पेत्थ अत्थो वेदितब्बो । सेसमेत्थ पुरिमसिक्खापदद्वये वुत्तनयमेव ।

कण्टकसिक्खापदवण्णना निट्ठिता ।

निट्ठितो सप्पाणकवग्गो सत्तमो ।

## ८. सहधम्मिकवग्गो

### १. सहधम्मिकसिक्खापदवण्णना

४३४. सहधम्मिकवग्गस्स पठमसिक्खापदे वाचाय वाचाय आपत्तीति अनादरियभया लेसेन एवं वदन्तस्स आपत्ति । सेसमेत्थ उत्तानमेव । उपसम्पन्नस्स पज्जत्तेन वचनं, असिक्खितुकामताय एवं वचनन्ति इमानि पनेत्थ द्वे

अङ्गानि ।

सहधम्मिकसिक्खापदवण्णना निड्डिता ।

## २. विलेखनसिक्खापदवण्णना

४३८. दुतिये विनयस्स परियापुणनं विनयपरियत्तीति आह “विनयं परियापुणन्तान”न्तिआदि । सुगुत्तोति यथा करण्डके पक्खित्तमणिक्खन्धो विय न नस्सति विपत्तिं न पापुणाति, एवं सुट्ठु गोपितो । सुरक्खितोति तस्सेव परियायवचनं । यथा हि किलेसचोरेहि अविलुम्पनीयो होति, एवं सब्बदा सूपड्डितस्सतिताय सुट्ठु रक्खितो । कुक्कुच्चपकतानन्ति कप्पियाकप्पियं निस्साय उप्पन्नकुक्कुच्चेन अभिभूतानं । सारज्जनं सारदो, ब्यामोहभयं । विगतो सारदो एतस्साति विसारदो । सहधम्मेनाति सकारणेन वचनेन । सुनिग्गहितं निग्गणहातीति यथा न पुन सीसं उक्खिपन्ति, अथ खो अप्पटिभाना मङ्कुभूतायेव होन्ति, एवं सुट्ठु निग्गणहाति ।

अलज्जिताति य-कारलोपेन निद्वेसो, अलज्जितायाति वुत्तं होति । अज्जाणतातिआदीसुपि एसेव नयो । मन्दो मोमूहोति अज्जाणभावेन मन्दो, अविसयतो मोमूहो, महामूळहोति अत्थो ।

अत्तपच्चत्थिकाति अत्तनो पच्चत्थिका । वज्जिपुत्तका दसवत्थुदीपका ।

परूपहारअज्जाणकङ्खापरवितारणादिवादाति एत्थ ये अरहतं पटिजानन्तानं अप्पत्ते पत्तसज्जीनं अधिमानिकानं कुहकानं वा अरहतं पटिजानन्तानं सुक्कविस्सट्ठिं दिस्वा मारकायिका देवता “अरहतो असुचिं उपसंहरन्ती”ति मज्जन्ति सेय्यथापि पुब्बसेलिया अपरसेलिया च, ते परूपहारवादा । येसं पन अरहतो इत्थिपुरिसादीनं नामगोत्तादीसु जाणप्पवत्तिया अभावेन अत्थि अरहतो अज्जाणं, तत्थेव सन्निट्ठानाभावेन अत्थि अरहतो कङ्खा, यस्मा चस्स तानि वत्थूनि परे वितारेन्ति पकासेन्ति आचिक्खन्ति, तस्मा अत्थि अरहतो परवितारणाति इमा तिस्रो लद्धियो सेय्यथापि एतरहि पुब्बसेलियानं, ते अज्जाणकङ्खापरवितारणवादा । निग्गहो पन नेसं कथावत्थुप्पकरणे वुत्तनयेनेव वेदितब्बो ।

चत्तारो मग्गा च फलानि चाति उक्कट्टनिद्वेसवसेन वुत्तं, चतस्सो पटिसम्भिदा तिस्रो विज्जा छ अभिज्जाति अयम्पि अधिगमसद्धम्मोयेव । च-कारो वा अवुत्तसम्पिण्डनत्थो दट्ठब्बो । केचि थेराति धम्मकथिका । आहंसूति पंसुकूलिकत्थेरा एवं आहंसु ।

कदा पनायं कथा उदपादीति? अयज्हेत्थ अनुपुब्बिकथा (अ० नि० अट्ठ० १.१.१३०) — इमस्मिं किर दीपे चण्डालतिस्समहाभये सक्को देवराजा महाउळुम्पं मापेत्वा भिक्खूनं आरोचापेसि “महन्तं भयं भविस्सति, न सम्मा देवो वस्सिस्सति, भिक्खू पच्चयेहि किलमन्ता परियत्तिं सन्धारेतुं न सक्खिस्सन्ति, परतीरं गन्त्वा अय्येहि जीवितं रक्खितुं वट्ठति । इमं महाउळुम्पं आरुह्य गच्छथ भन्ते, येसं एत्थ निसज्जट्ठानं नप्पहोति, ते कट्ठखण्डेपि उरं ठपेत्वा गच्छन्तु, सब्बेसं भयं न भविस्सती”ति । तदा समुदतीरं पत्वा सट्ठि भिक्खू कतिकं कत्वा “अम्हाकं एत्थ गमनकिच्चं नत्थि, मयं इधेव हुत्वा तेपिटकं रक्खिस्सामा”ति ततो निवत्तित्वा दक्खिणमलयजनपदं गन्त्वा कन्दमूलपण्णेहि जीविकं कप्पेन्ता वसिंसु, काये वहन्ते निसीदित्वा सज्झायं करोन्ति, अवहन्ते वालिकं उस्सारेत्वा परिवारेत्वा सीसानि एकट्ठाने कत्वा परियत्तिं सम्मसन्ति । इमिना नियामेन द्वादस संवच्छरानि साट्ठकथं तेपिटकं परिपुण्णं कत्वा धारयिंसु ।

भये वूपसन्ते सत्तसता भिक्खू अत्तनो गतट्ठाने साट्ठकथे तेपिटके एकक्खरम्पि एकव्यञ्जनम्पि अविनासेत्वा इममेव

दीपमागम्म कल्लगामजनपदे मण्डलारामविहारं पविसिंसु। थेरानं आगतपवत्तिं सुत्वा इमस्मिं दीपे ओहीना सट्ठि भिक्खू “थेरे पस्सिस्सामा”ति गन्त्वा थेरेहि सट्ठिं तेपिटकं सोधेन्ता एकक्खरम्मि एकव्यञ्जनम्मि असमेत्तं नाम न पस्सिंसु। तस्मिं ठाने थेरानं अयं कथा उदपादि “परियत्ति नु खो सासनस्स मूलं, उदाहु पटिपत्ती”ति। पंसुकूलिकत्थेरा “पटिपत्ति मूल”न्ति आहंसु, धम्मकथिका “परियत्ती”ति। अथ ने थेरा “तुम्हाकं द्विन्नम्मि जनानं वचनमत्तेनेव न सक्का विज्जातुं, जिनभासितं सुत्तं आहरथा”ति आहंसु। सुत्तं आहरितुं न भारोति —

“इमे च, सुभद्द, भिक्खू सम्मा विहरेय्युं, असुज्जो लोको अरहन्तेहि अस्सा”ति (दी० नि० २.२१४)।  
 “पटिपत्तिमूलकं, महाराज, सत्थुसासनं, पटिपत्तिसारकं, महाराज, सत्थुसासनं, पटिपत्ति तिट्ठन्ती तिट्ठती”ति (मि० प० ४.१.७) —

सुत्तं आहरिंसु।

इमं सुत्तं सुत्वा धम्मकथिका अत्तनो वादट्ठपनत्थाय इमं सुत्तं आहरिंसु —

“याव तिट्ठन्ति सुत्तन्ता, विनयो याव दिप्पति।  
 ताव दक्खन्ति आलोकं, सूरिये अब्भुट्ठिते यथा॥

“सुत्तन्तेसु असन्तेसु, पमुट्ठे विनयमिह च।  
 तमो भविस्सति लोके, सूरिये अत्थङ्गते यथा॥

“सुत्तन्ते रक्खिते सन्ते, पटिपत्ति होति रक्खिता।  
 पटिपत्तियं ठितो धीरो, योगक्खेमा न धंसती”ति॥

इमस्मिं सुत्ते आहटे पंसुकूलिकत्थेरा तुण्ही अहेसुं। धम्मकथिकत्थेरानयेव वचनं पुरतो अहोसि। यथा हि गवसतस्स गवसहस्सस्स वा अन्तरे पवेणिपालिकाय धेनुया असति सो वंसो सा पवेणी न घटीयति, एवमेव आरद्धविपस्सकानं भिक्खूनं सतेपि सहस्सेपि विज्जमाने परियत्तिया असति अरियमग्गपटिवेधो नाम न होति। यथा च निधिकुम्भिया जाननत्थाय पासाणपिट्ठे अक्खरेसु उपनिबद्धेसु याव अक्खरानि धरन्ति, ताव निधिकुम्भी नट्ठा नाम न होति, एवमेव परियत्तिया धरमानाय सासनं अन्तरहितं नाम न होतीति। तस्साधेय्योति तस्सायत्तो।

**४३९. सो पनाति** सो पातिमोक्खो। सेसमेत्थ उत्तानमेव। गरहितुकामता, उपसम्पन्नस्स सन्तिके सिक्खापदविवण्णनञ्चाति इमानि पनेत्थ द्वे अङ्गानि।

विलेखनसिक्खापदवण्णना निट्ठिता।

### ३. मोहनसिक्खापदवण्णना

**४४३. ततियं उत्तानमेव।** मोहारोपनं, मोहेतुकामता, वुत्तनयेन सुतभावो, मोहनन्ति इमानि पनेत्थ चत्तारि अङ्गानि।

मोहनसिक्खापदवण्णना निट्ठिता।

#### ४. पहारसिक्खापदवण्णना

४५२. चतुत्थे रत्तचित्तोति कायसंसग्गरागेन रत्तचित्तो । सचे पन मेथुनरागेन रत्तो पहारं देति, दुक्कटमेव । सेसमेत्थ उत्तानमेव । कुपितता, न मोक्खाधिप्पायता, उपसम्पन्नस्स पहारदानन्ति इमानि पनेत्थ तीणि अङ्गानि ।

पहारसिक्खापदवण्णना निट्ठिता ।

#### ५. तलसत्तिकसिक्खापदवण्णना

४५७. पञ्चमे न पहारितुकामताय दिन्नत्ता दुक्कटन्ति एत्थ पहारितुकामताय पहटे पुरिमसिक्खापदेन पाचित्तियं, उच्चारेतुकामताय केवलं उगिरणमत्ते कते इमिना पाचित्तियं । इमिना पन विरज्झित्वा पहारो दिन्नो, तस्मा दुक्कटं । किमिदं दुक्कटं पहारपच्चया, उदाहु उगिरणपच्चयाति? तत्थ केचि ताव वदन्ति “पहारपच्चया एव दुक्कटं, उगिरणपच्चया पाचित्तियन्ति सदुक्कटं पाचित्तियं युज्जति । पुरिमज्झि उगिरणं, पच्छा पहारो, न च पच्छा पहारं निस्साय पुरिमं उगिरणं अनापत्तिवत्थुकं भवितुमरहती”ति ।

मयं पनेत्थ एवं तक्कयाम “उगिरणस्स अत्तनो सभावेनेव असण्ठितत्ता तप्पच्चया पाचित्तियेन न भवितब्बं, असुद्धचित्तेन कतपयोगत्ता पन न सक्का एत्थ अनापत्तिया भवितुन्ति दुक्कटं वुत्तं । ‘न पहारितुकामताय दिन्नत्ता’ति इमिना च पहारपच्चया पुरिमसिक्खापदेन पाचित्तियासम्भवे कारणं वुत्तं, न पन पहारपच्चया दुक्कटसम्भवे । न हि अपहारितुकामताय पहारे दिन्ने पुरिमसिक्खापदेन पहारपच्चया पाचित्तियेन दुक्कटेन वा भवितुं युत्त”न्ति । “तिरच्छानादीनं असुचिकरणादिं दिस्वा कुज्झित्वापि उगिरन्तस्स मोक्खाधिप्पायो एवा”ति वदन्ति । सेसमेत्थ उत्तानमेव । कुपितता, न मोक्खाधिप्पायता, उपसम्पन्नस्स तलसत्तिउगिरणन्ति इमानि पनेत्थ तीणि अङ्गानि ।

तलसत्तिकसिक्खापदवण्णना निट्ठिता ।

#### ६. अमूलकसिक्खापदवण्णना

४५९. छट्ठं उत्तानत्थमेव । उपसम्पन्नता, सङ्गादिसेसस्स अमूलकता, अनुद्धंसना, तद्धणविजाननाति इमानि पनेत्थ चत्तारि अङ्गानि ।

अमूलकसिक्खापदवण्णना निट्ठिता ।

#### ७. सज्जिच्चसिक्खापदवण्णना

४६४. सत्तमम्पि उत्तानत्थमेव । उपसम्पन्नता, अफासुकामता, कुक्कुच्चुप्पादनन्ति इमानि पनेत्थ तीणि अङ्गानि ।

सज्जिच्चसिक्खापदवण्णना निट्ठिता ।

#### ८. उपस्सुतिसिक्खापदवण्णना

४७१. अट्टमे सुतिसमीपन्ति सदसमीपं । सुय्यतीति हि सुति, सदस्सेतं अधिवचनं । तस्स समीपं उपस्सुति, सदसमीपन्ति वुत्तं होति । गण्ठपदेसु च सुय्यतीति सुतीति सद्वो वुत्तो । यत्थ पन ठितेन सक्का होति सदं सोतुं, तत्थ तिट्ठन्तो सदसमीपे ठितो नाम होतीति आह “यत्थ ठत्वा”तिआदि । केचि पन “सुणाति एत्थाति सुति । यत्थ ठितो सुणाति, तस्स ठानस्सेतं नामं । तस्स समीपं उपस्सुती”ति वदन्ति, एवं पन गय्हमाने यस्मिं ठाने ठितो सुणाति, तस्स आसन्ने अज्जस्मिं पदेसे तिट्ठतीति आपज्जति । अट्ठकथायच्च उपस्सुति-सदस्सेव अत्थं दस्सेतुं “यत्थ ठत्वा सक्का होति, तेसं वचनं सोतुं”न्ति वुत्तं, न सुति-सदस्स । तस्मा पुब्बनयोवेत्थ पसत्थतरो । अथ वा उपेच्च सुय्यति एत्थाति उपस्सुति, ठानं । यं ठानं उपगतेन सक्का होति कथेन्तानं सदं सोतुं, तत्थाति एवमत्थो गहेतब्बो । मन्तेन्तन्ति भुम्मत्थे उपयोगवचनन्ति आह “मन्तयमाने”ति ।

४७३. एकपरिच्छेदानीति “सिया किरियं, सिया अकिरिय”न्ति इमिना नयेन एकपरिच्छेदानि । इमानि हि तीणि सिक्खापदानि कदाचि किरियतो समुद्दहन्ति, कदाचि अकिरियतो, न एकक्खण्येव किरियाकिरियतो समुद्दहन्ति । सेसमेत्थ उत्तानमेव । उपसम्पन्नता, चोदनाधिप्पायो, सवनन्ति इमानि पनेत्थ तीणि अङ्गानि ।

उपस्सुतिसिक्खापदवण्णना निट्ठिता ।

## ९. कम्मपटिबाहनसिक्खापदवण्णना

४७४. नवमं उत्तानत्थमेव । धम्मकम्मता, धम्मकम्मन्ति सज्जा, छन्दं दत्वा खिय्यनन्ति इमानि पनेत्थ तीणि अङ्गानि ।

कम्मपटिबाहनसिक्खापदवण्णना निट्ठिता ।

## १०. छन्दं अदत्वा गमनसिक्खापदवण्णना

४७९. दसमं उत्तानत्थमेव । विनिच्छयकथाय पवत्तमानता, धम्मकम्मता, धम्मकम्मसज्जिता, समानसीमायं ठितता, समानसंवासकता, कोपेतुकामताय हत्थपासविजहनन्ति इमानि पनेत्थ छ अङ्गानि ।

छन्दं अदत्वा गमनसिक्खापदवण्णना निट्ठिता ।

## ११. दुब्बलसिक्खापदवण्णना

४८४. एकादसमम्पि उत्तानत्थमेव । उपसम्पन्नता, धम्मेन लद्धसम्मुतिता, सङ्गेन सङ्घि विकप्पनुपगचीवरदानं, पच्छा खीयितुकामताय खिय्यनाति इमानि पनेत्थ चत्तारि अङ्गानि ।

दुब्बलसिक्खापदवण्णना निट्ठिता ।

४८९. द्वादसमे नत्थि किञ्चि वत्तब्बं ।

निट्ठितो सहधम्मिकवग्गो अट्ठमो ।



## ९. राजवग्गो

### १. अन्तेपुरसिक्खापदवण्णना

४९७-४९९. राजवग्गस्स पठमसिक्खापदे अट्ठकथायं सब्बं उत्तानत्थमेव । पाळियं पन अयमनुत्तानपदत्थो । **कतं वा करिस्सन्ति वाति** मेथुनवीतिक्कमनं कतं वा करिस्सन्ति वा । **इमेसन्ति** पदं विभत्तिविपरिणामं कत्वा उभयत्थ योजेतब्बं “इमेहि कतं इमे करिस्सन्ती”ति । **रतनन्ति** मणिरतनादीसु यंकिज्जि । **उभतोति** द्वीहि पक्खेहि । “उभतो सुजातो”ति एत्तके वुत्ते येहि केहिचि द्वीहि भागेहि सुजातता विज्जायेय्य, **सुजात-**सद्वो च “सुजातो चारुदस्सनो”ति आदीसु आरोहसम्पत्तिपरियायोति जातिवसेनेव सुजाततं विभावेतुं “**मातितो च पितितो चा**”ति वुत्तं । अनोरसपुत्तवसेनपि लोके मातुपितुसमज्जा दिस्सति, इध पन सा ओरसपुत्तवसेनेव इच्छिताति दस्सेतुं “**संसुद्धगहणिको**”ति वुत्तं । गब्भं गण्हाति धारेतीति गहणी, गब्भासयसज्जितो मातुकुच्छिप्पदेसो । संसुद्धा गहणी अस्साति **संसुद्धगहणिको**, संसुद्धा तस्स मातुकुच्छीति वुत्तं होति । “समवेपाकिनिया गहणिया”ति एत्थ पन यथाभुत्तस्स आहारस्स विपाचनवसेन गण्हनतो अछट्टुनतो कम्मजतेजोधातु “गहणी”ति वुच्चति ।

**याव सत्तमा पितामहयुगाति** एत्थ पितु पिता पितामहो, पितामहस्स युगं पितामहयुगं । “युगं”न्ति आयुष्पमाणं वुच्चति । अभिलापमत्तमेव चेतं, अत्थतो पन पितामहोयेव पितामहयुगं । पिता च माता च पितरो, पितूनं पितरो पितामहा, तेसं युगो पितामहयुगो, तस्मा याव सत्तमा पितामहयुगा, पितामहद्वन्दाति एवमेत्थ अत्थो दट्ठब्बो । एवज्जि पितामहगहणेनेव मातामहोपि गहितो होति । **युग-**सद्वो चेत्य एकसेसेन दट्ठब्बो युगो च युगो च युगोति । एवज्जि तत्थ तत्थ द्वन्दं गहितमेव होति, तस्मा ततो उद्धं सब्बेपि पुब्बपुरिसा पितामहयुगगहणेनेव गहिता । एवं याव सत्तमो पितामहयुगो, ताव संसुद्धगहणिको ।

**अक्खित्तोति** “अपनेथ एतं, किं इमिना”ति एवं अक्खित्तो अनवक्खित्तो । **अनुपकुट्टोति** न उपकुट्टो, न अक्कोसं वा निन्दं वा पत्तपुब्बो । केन कारणेनाति आह “**जातिवादेना**”ति । एत्थ च “उभतो...पे०... पितामहयुगा”ति एतेन तस्स योनिदोसाभावो दस्सितो संसुद्धगहणिकभावकित्तनतो, “अक्खित्तो”ति इमिना किरियापराधाभावो । किरियापराधेन हि सत्ता खेपं पापुणन्ति । “अनुपकुट्टो”ति इमिना अयुत्तसंसग्गाभावो । अयुत्तसंसग्गाज्जि पटिच्च सत्ता अक्कोसं लभन्ति । सेसमेत्थ उत्तानमेव । खत्तियता, अभिसित्तता, उभिन्नम्पि सयनिघरतो अनिक्खन्तता, अप्पटिसंविदितता, इन्दखीलातिक्कमोति इमानि पनेत्थ पञ्च अङ्गानि ।

अन्तेपुरसिक्खापदवण्णना निट्ठिता ।

### २. रतनसिक्खापदवण्णना

५०२. दुतिये **महालतं नामाति** पतिकुलं गच्छन्तिया किर तस्सा पिता महालतापिळन्धनं नाम कारापेसि । तस्मिं पिळन्धने चतस्सो वजिरनाळियो तत्थ तत्थ अप्पेतब्बट्ठाने अप्पनवसेन विनियोगं अगमंसु, मुत्तानं एकादस नाळियो, पवाळस्स द्वावीसति नाळियो, मणीनं तेत्तिस नाळियो । इति एतेहि च अज्जेहि च वेळुरियलोहितङ्कमसारगल्लादीहि सत्तवण्णेहि च रतनेहि निट्ठानं अगमासि । तं सीसे पटिमुक्कं याव पादपिट्ठिया भस्सति, पञ्चन्नं हत्थीनं बलं धारयमानाव इत्थी नं धारेतुं सक्कोति । तं सन्धायेतं वुत्तं ।

५०६. आवसथस्स पन सुप्पपातो वा मुसलपातो वा उपचारो नामाति योजेतब्बं । **आवसथो**ति चेत्थ अन्तोआरामे वा होतु अज्जत्थ वा, अत्तनो वसनट्ठानं वुच्चति । **छन्देनपि भयेनपीति** वड्ढकीआदीसु छन्देन, राजवल्लभेसु भयेन । **तमेव भिक्खुं आसङ्कन्तीति** विस्सरित्वा गमनकाले अत्तनो पच्छतो अज्जस्साभावा आसङ्कन्ति । **पतिरूपं** नाम रतनसम्मतं पंसुकूलगगहणं वा रतने निरुस्सुक्कगमनं वा । यदि हि तं रतनसम्मतं आमासं चे, “नत्थि एतस्स सामी”ति पंसुकूलं गहेस्सति । अनामासं चे, “नत्थि एतस्स सामी”ति पंसुकूलछिन्नपलिबोधो निरपेक्खो गमिस्सति । **समादपेत्वा**ति अज्जं समादपेत्वा, “उद्धिस्स अरिया तिट्ठन्ति, एसा अरियानयाचना”ति (जा० १.७.५९) वुत्तनयेन याचित्वाति अत्थो । सेसमेत्थ उत्तानमेव । अननुज्जातकरणं, परसन्तकता, विस्सासग्गाहपंसुकूलसज्जानं अभावो, उग्गहणं वा उग्गहापनं वाति इमानि पनेत्थ चत्तारि अङ्गानि ।

रतनसिक्खापदवण्णना निट्ठिता ।

### ३. विकालगामप्पविसनसिक्खापदवण्णना

५०८. ततिये **अरियमग्गस्सा**ति एत्थ सग्गमग्गोपि सङ्गहेतब्बो । अनिय्यानिकत्ता सग्गमोक्खमग्गानं तिरच्छानभूता हि कथा **तिरच्छानकथा** । **तिरच्छानभूतन्ति** तिरोकरणभूतं विबन्धनभूतं । **राजपटिसंयुत्तं** कथन्ति (दी० नि० अट्ठ० १.१७; म० नि० अट्ठ० २.२२३; सं० नि० अट्ठ० ३.५.१०८०; अ० नि० अट्ठ० ३.१०.६९-७०) राजानं आरब्ध “महासम्मतो मन्धाता धम्मासोको एवंमहानुभावो”तिआदिना नयेन पवत्तकथं । एत्थ च “असुको राजा अभिरूपो दस्सनीयो”तिआदिना नयेन गेहस्सितकथाव तिरच्छानकथा होति । “सोपि नाम एवंमहानुभावो खयं गतो”ति एवं पवत्ता पन अनिच्चतापटिसंयुत्ता कम्मट्ठानभावे तिट्ठति । **चोरेसुपि** “मूलदेवो एवंमहानुभावो, मेघमालो एवंमहानुभावो”ति तेसं कम्मं पटिच्च “अहो सूर”ति गेहस्सितकथाव तिरच्छानकथा । **युद्धेपि** भरतयुद्धादीसु “असुकेन असुको एवं मारितो एवं विद्धो”ति कामस्सादवसेनेव कथा तिरच्छानकथा । “तेपि नाम खयं गता”ति एवं पवत्ता पन सब्बत्थ कम्मट्ठानमेव होति ।

अपिच **अन्नादीसु** “एवं वण्णवन्तं गन्धवन्तं रसवन्तं फस्ससम्पन्नं खादिम्ह भुज्जिम्ह पिविम्ह परिभुज्जिम्ह”ति कामस्सादवसेन कथेतुं न वट्ठति, सात्थकं पन कत्वा “पुब्बे एवं वण्णादिसम्पन्नं अन्नं पानं वत्थं सयनं मालागन्धं सीलवन्तानं अदम्ह, चेतियपूजं अकरिमहा”ति कथेतुं वट्ठति । **जातिकथा**दीसुपि “अम्हाकं जातका सूर समत्था”ति वा “पुब्बे मयं एवं विचित्रेहि यानेहि विचरिमहा”ति वा अस्सादवसेन वत्तुं न वट्ठति, सात्थकं पन कत्वा “तेपि नो जातका खयं गता”ति वा “पुब्बे मयं एवरूपा उपाहना सङ्गस्स अदमहा”ति वा कथेतब्बं । **गामकथापि** सुनिविट्ठदुन्निविट्ठसुभिक्खदुब्भिक्खादिवसेन वा “असुकगामवासिनो सूर समत्था”ति वा एवं अस्सादवसेन न वट्ठति, सात्थकं पन कत्वा “सद्धा पसन्ना”ति वा “खयवयं गता”ति वा वत्तुं वट्ठति । **निगमनगरजनपदकथासुपि** एसेव नयो ।

**इत्थिकथापि** वण्णसण्ठानादीनि पटिच्च अस्सादवसेन न वट्ठति, “सद्धा पसन्ना, खयं गता”ति एवं वत्तुं वट्ठति । **सूरकथापि** “नन्दिमित्तो नाम योधो सूर अहोसी”ति अस्सादवसेन न वट्ठति, “सद्धो अहोसि, खयं गतो”ति एवमेव वट्ठति । **विसिखाकथापि** “असुका विसिखा सुनिविट्ठा दुन्निविट्ठा सूर समत्था”ति अस्सादवसेनेव न वट्ठति, “सद्धा पसन्ना, खयं गता”इच्चेव वट्ठति ।

**कुम्भट्टानकथा**ति कुट्टट्टानकथा उदकतित्थकथा वुच्चति, कुम्भदासीकथा वा । सापि “पासादिका नच्चित्तुं गायित्तुं छेका”ति अस्सादवसेन न वट्ठति, “सद्धा पसन्ना”तिआदिना नयेनेव वट्ठति । **पुब्बपेतकथा**ति अतीतजातिकथा । तत्थ

वत्तमानजातिकथासदिसोव विनिच्छयो ।

**नानत्तकथा**ति पुरिमपच्छिमकथाविमुत्ता अवसेसा नानासभावा निरत्थककथा । **लोकक्खायिका**ति “अयं लोको केन निम्मितो, असुकेन पजापतिना ब्रह्मना इस्सरेन वा निम्मितो, काको सेतो अट्ठीनं सेतत्ता, बका रत्ता लोहितस्स रत्तत्ता”ति एवमादिका लोकायतवितण्डसल्लापकथा । उप्पत्तिठितिसंहारादिवसेन लोकं अक्खायतीति **लोकक्खायिका** । **समुदक्खायिका** नाम कस्मा समुदो सागरो, सागरस्स रज्जो पुत्तेहि खतत्ता सागरो । खतो अम्हेहीति हत्थमुद्दाय निवेदितत्ता समुदोति एवमादिका निरत्थका समुदक्खायिककथा ।

इति भवो इति अभवोति यं वा तं वा निरत्थककारणं वत्ता पवत्तितकथा **इतिभवाभवकथा** । एत्थ च **भवो**ति सस्सतं, **अभवो**ति उच्छेदं । **भवो**ति वुद्धि, **अभवो**ति हानि । **भवो**ति कामसुखं, **अभवो**ति अत्तकिलमथो । इति इमाय छब्बिधाय इतिभवाभवकथाय सद्धिं बात्तिस तिरच्छानकथा नाम होति । अथ वा पाळियं सरूपतो अनागतापि अरज्जपब्बतनदीदीपकथा **इति**-सद्देन सङ्गहेत्वा छत्तिस तिरच्छानकथाति वुच्चति । **इति वा**ति हि एत्थ **इति**-सद्दो पकारत्थे, **वा**-सद्दो विकप्पत्थे । इदं वुत्तं होति — “एवंपकारं इतो अज्जं वा तादिसं निरत्थककथं कथेन्ती”ति । आदिअत्थे वा **इति**-सद्दो “इति वा इति एवरूपा नच्चगीतवादितविसूकदस्सना पटिविरतो”ति आदीसु (दी० नि० १.१०, १९४) विय, एवमादिं अज्जप्पि तादिसं कथं कथेन्तीति अत्थो ।

**५१२. अपरिक्खितस्स गामस्स उपचारो अदिन्नादाने वुत्तनयेनेव वेदितब्बो**ति इमिना दुतियलेडुपातो इध उपचारोति दस्सेति । सेसमेत्थ उत्तानमेव । सन्तं भिक्खुं अनापुच्छना, अनुज्जातकारणाभावो, विकाले गामप्पविसनन्ति इमानि पनेत्थ तीणि अङ्गानि ।

विकालगामप्पविसनसिक्खापदवण्णना निट्ठिता ।

#### ४. सूचिघरसिक्खापदवण्णना

**५१७. चतुत्थे तं अस्स अत्थी**ति पठमं भिन्दित्वा पच्छा देसेतब्बत्ता तं भेदनकं तस्स पाचित्तियस्स अत्थीति **भेदनकं**, पाचित्तियं । अस्सत्थिअत्थे अ-कारपच्चयो दट्ठब्बो । **वासिजटे**ति वासिदण्डके । सेसमेत्थ उत्तानमेव । सूचिघरता, अट्ठिमयादिता, अत्तनो अत्थाय करणं वा कारापेत्वा वा पटिलाभोति इमानि पनेत्थ तीणि अङ्गानि ।

सूचिघरसिक्खापदवण्णना निट्ठिता ।

#### ५. मज्जपीठसिक्खापदवण्णना

**५२२. पज्जमे छेदनकं वुत्तनयमेवा**ति छेदनमेव छेदनकं, तं तस्स अत्थीति **छेदनकन्ति** इममत्थं अतिदिस्सति । सेसमेत्थ उत्तानमेव । पमाणातिक्कन्तमज्जपीठता, अत्तनो अत्थाय करणं वा कारापेत्वा वा पटिलाभोति इमानि पनेत्थ द्वे अङ्गानि ।

मज्जपीठसिक्खापदवण्णना निट्ठिता ।

## ६. तूलोनद्धसिक्खापदवण्णना

५२६. छट्ठे तूलं पक्खिपित्वाति हेट्ठा चिमिलिकं पत्थरित्वा तस्स उपरि तूलं पक्खिपित्वाति अत्थो । पोटकितूलन्ति एरकतूलादि यंकिञ्चि तिणजातीनं तूलं । सेसमेत्थ उत्तानमेव । तूलोनद्धमञ्चपीठता, अत्तनो अत्थाय करणं वा कारापेत्वा वा पटिलाभोति इमानि पनेत्थ द्वे अङ्गानि । अत्तना कारापितस्स हि पटिलाभमत्तेनेव पाचित्तियं । तेनेव पदभाजने “पटिलाभेन उद्दालेत्वा पाचित्तियं देसेतब्ब”न्ति वुत्तं । केनचि पन “पटिलाभेन उद्दालेत्वा पाचित्तियं देसेतब्बन्ति एत्थ किञ्चापि पटिलाभमत्तेनेव पाचित्तियं विय दिस्सति, परिभोगेयेव आपत्ति दट्ठब्बा । ‘अञ्जेन कतं पटिलभित्वा परिभुज्जति, आपत्ति दुक्कटस्सा’ति वचनं एत्थ साधक”न्ति वुत्तं, तं तस्स मतिमत्तं । न हि “अञ्जेन कतं पटिलभित्वा परिभुज्जति, आपत्ति दुक्कटस्सा”ति इदं अत्तना कारापितं सन्धाय वुत्तं, करणकारापनपच्चया च इमिना सिक्खापदेन पाचित्तियं वुत्तं, न परिभोगपच्चया । “न, भिक्खवे, तूलोनद्धं मञ्चं वा पीठं वा परिभुज्जितब्बं, यो परिभुज्जेय्य, आपत्ति दुक्कटस्सा”ति हि खन्धके वुत्तत्ता अत्तना वा कतं होतु अञ्जेन वा, परिभुज्जन्तस्स परिभोगपच्चया दुक्कटमेव, न पाचित्तियं ।

तूलोनद्धसिक्खापदवण्णना निड्डिता ।

## ७. निसीदनसिक्खापदवण्णना

५३१. सत्तमे यं वत्तब्बं, तं निसीदनसन्धतसिक्खापदे वुत्तमेव । निसीदनस्स पमाणातिक्कन्तता, अत्तनो अत्थाय करणं वा कारापेत्वा वा पटिलाभोति इमानि पनेत्थ द्वे अङ्गानि ।

निसीदनसिक्खापदवण्णना निड्डिता ।

५३७-५४२. अट्टमनवमदसमेसु नत्थि वत्तब्बं, अङ्गानिपि सत्तमेव वुत्तनयेनेव वेदितब्बानि ।

निड्डितो राजवग्गो नवमो ।

इति समन्तपासादिकाय विनयट्ठकथाय सारत्थदीपनियं

खुद्दकवण्णना समत्ता ।

पाचित्तियकण्डं निड्डितं ।

## ६. पाटिदेसनीयकण्डं

### पाटिदेसनीयसिक्खापदवण्णना

५५२. पाटिदेसनीयेसु पठमे “गारय्हं आवुसोतिआदि पटिदेसेतब्बाकारदस्सन”न्ति वचनतो पाळियं आगतनयेनेव आपत्ति देसेतब्बा । असप्पायन्ति सग्गमोक्खानं अहितं अननुकूलं । सेसमेत्थ उत्तानमेव । परिपुण्णूपसम्पन्नता, अज्जातिकता, अन्तरघरे ठिताय हत्थतो सहत्था पटिग्गहणं, यावकालिकता, अज्झोहरणन्ति इमानि पनेत्थ पञ्च अङ्गानि ।

५५७-५६२. दुतियततियचतुत्थेसु नत्थि वत्तब्बं, अङ्गेसु पन दुतिये परिपुण्णूपसम्पन्नता, पञ्चभोजनता, अन्तरघरे ठिताय अनुज्जातप्पकारतो अज्जथा वोसासना, अनिवारणा, अज्झोहारोति इमानि पञ्च अङ्गानि ।

ततिये सेक्खसम्मत्ता, पुब्बे अनिमन्तितता, अगिलानता, घरूपचारोक्कमनं, ठपेत्वा निच्चभत्तादीनि अज्जं आमिसं गहेत्वा भुज्जनन्ति इमानि पञ्च अङ्गानि ।

चतुत्थे यथावुत्तआरज्जकसेनासनता, यावकालिकस्स अतत्थजातकता, अगिलानता, अगिलानावसेसकता, अप्पटिसंविदितता, अज्झारामे पटिग्गहणं, अज्झोहरणन्ति इमानि सत्त अङ्गानि ।

पाटिदेसनीयसिक्खापदवण्णना निट्ठिता ।

पाटिदेसनीयकण्डं निट्ठितं ।

## ७. सेखियकण्डं

### १. परिमण्डलवग्गवण्णना

सेखियेसु **सिक्खितसिक्खेना**ति चतूहि मग्गेहि तिस्सो सिक्खा सिक्खित्वा ठितेन, सब्बसो परिनिट्ठितकिच्चेनाति वुत्तं होति । **तादिना**ति अट्ठहि लोकधम्मोहि अकम्पियट्ठेन तादिना ।

५७६. **सिक्खा करणीया**ति “एवं निवासेस्सामी”ति आरामेपि अन्तरघरेपि सब्बत्थ सिक्खा कत्तब्बा । एत्थ च यस्मा वत्तक्खत्थके वुत्तवत्तानिपि सिक्खितब्बत्ता सेखियानेव होन्ति, तस्मा पाराजिकादीसु विय परिच्छेदो न कतो, चारित्तनयदस्सनत्थज्ज “यो पन भिक्खु ओलम्बेन्तो निवासेय्य, दुक्कट”न्ति एवं आपत्तिनामेन अवत्वा “सिक्खा करणीया”ति एवं सब्बसिक्खापदेसु पाळि आरोपिता । पदभाजने पन “आपत्ति दुक्कटस्सा”ति वुत्तत्ता सब्बत्थ अनादरियकरणे दुक्कटं वेदितब्बं । **वुत्तन्ति** महाअट्ठकथायं वुत्तं । यस्मा अट्ठङ्गुलमत्तं ओतारेत्वा निवत्थमेव निसिन्नस्स चतुरङ्गुलमत्तं होति, तस्मा उभोपेते अट्ठकथावादा एकपरिच्छेदा । **ते सब्बे**ति निवासनदोसा ।

**तं पना**ति तं अनादरियं । किञ्चापि कुरुन्दिवादं पच्छा वदन्तेन “परिमण्डलं निवासेतुं अजानन्तस्स अनापत्ती”ति अयमत्थो पतिट्ठापितो, तथापि निवासनवत्तं साधुकं उग्गहेतब्बमेव । सज्जिच्च अनुग्गण्हन्तस्स अनादरियं सिया । तेनेव **मातिकाट्ठकथायं** (कङ्का० अट्ठ० परिमण्डलसिक्खापदवण्णना) वुत्तं “अजानन्तस्साति परिमण्डलं निवासेतुं अजानन्तस्स अनापत्ति, अपिच निवासनवत्तं उग्गहेतब्ब”न्ति ।

**सचित्तकन्ति** वत्थुविजाननचित्तेन पण्णत्तिविजाननचित्तेन च सचित्तकं “अनादरियं पटिच्चा”ति वुत्तत्ता । “पाणातिपातादि विय निवासनदोसो लोकगरहितो न होतीति पण्णत्तिवज्ज”न्ति **फुस्सदेवत्थेरो** आह । **उपतिस्सत्थेरो** पन “यस्मा अनादरियवसेनेव आपज्जितब्बत्ता केवलं अकुसलमेव, तज्ज पकतिया वज्जं, सज्जिच्च वीतिक्कमनज्ज दोमनस्सितस्सेव होति, तस्मा लोकवज्जं अकुसलचित्तं दुक्खवेदन”न्ति आह । अनादरियं, अनापत्तिकारणाभावो, अपरिमण्डलनिवासनन्ति इमानि पनेत्थ तीणि अङ्गानि । यथा चेत्थ, एवं सब्बत्थ पुरिमानि द्वे तत्थ तत्थ वुत्तपटिपक्खकरणज्जाति तीणियेव होन्ति ।

५७७. दुतियादीसु अनेकप्पकारं गिहिपारुतन्ति सेतपटपारुतं परिब्बाजकपारुतं एकसाटकपारुतन्तिआदि अनेकप्पभेदं गिहिपारुतं । तस्सत्थो खन्धकेयेव आवि भविस्सति । विहारेपीति बुद्धुपट्टानादिकालं सन्धाय वुत्तं ।

५७८. “सुप्पटिच्छन्नो”ति वुत्तत्ता “ससीसं पारुतो सब्बथा सुप्पटिच्छन्नत्ता सुप्पटिच्छन्नो नाम होती”ति यस्स सिया, तं सन्धायाह “न ससीसं पारुतेना”तिआदि ।

५८२. एकस्मिं पन ठाने ठत्वाति एत्थ “गच्छन्तोपि परिस्सयाभावं ओलोकेतुं लभतियेव, तथा गामे पूज”न्ति तीसुपि गण्ठपदेसु वुत्तं ।

परिमण्डलवग्गवण्णना निट्ठिता ।

## २. उज्जग्घिकवग्गवण्णना

५८६. दुतियवग्गे हसनीयस्मिं वत्थुस्मिन्ति हासजनके कारणे ।

उज्जग्घिकवग्गवण्णना निट्ठिता ।

## ३. खम्भकतवग्गवण्णना

६०३. ततियवग्गे पत्ते सज्जा पत्तसज्जा, सा अस्स अत्थीति पत्तसज्जी, अत्तनो भाजने उपनिबन्धसज्जी हुत्वाति अत्थो । ब्यज्जनं पन अनादियित्वा अत्थमत्तमेव दस्सेतुं “पत्ते सज्जं कत्वा”ति वुत्तं ।

६०४. ओलोणीति एका ब्यज्जनविकति । “यो कोचि सुद्धो कज्जिकतक्कादिरसओ”ति केचि । साकसूपेय्य-ग्गहणेन या काचि सूपेय्यसाकेहि कता ब्यज्जनविकति वुत्ता । मंसरसादीनीति आदि-सद्देन अवसेसा सब्बापि ब्यज्जनविकति सङ्गहिताति दट्ठब्बं । तेनेव मातिकाटुकथायं (कङ्का० अट्ट० समसूपकपटिग्गहणसिक्खापदवण्णना) वुत्तं “ठपेत्वा पन सूपं अवसेसा सब्बापि सूपेय्या ब्यज्जनविकति रसरसो नाम होती”ति ।

६०५. समपुण्णन्ति अधिद्वानुपगस्स पत्तस्स अन्तोमुखवट्टिलेखं अनतिककामेत्वा रचितं । समभरितन्ति तस्सेव वेवचनं । फलाफलादीति आदि-सद्देन ओदनादिमि सङ्गण्हाति । हेट्ठा ओरोहतीति समन्ता ओकाससम्भावतो चालियमानं हेट्ठा भस्सति । मत्थके थूपीकतं पूवमेव वटंसकसदिसत्ता “पूववटंसक”न्ति वुत्तं । पुप्फवटंसकादीसुपि एसेव नयो ।

यस्मा “समतित्तिको पिण्डपातो पटिग्गहेतब्बो”ति वचनं पिण्डपातो सम्पुण्णो पटिग्गहेतब्बोति दीपेति, तस्मा अत्तनो हत्थगते पत्ते पिण्डपातो दिव्यमानो थूपीकतोपि चे होति, वट्टतीति दीपेति । “थूपीकतं पिण्डपातं पटिग्गण्हाति, आपत्ति दुक्कटस्सा”ति हि वचनं पठमं थूपीकतं पिण्डपातं पच्छा पटिग्गण्हतो आपत्तीति दीपेति । “पत्ते पटिग्गण्हतो च थूपीकतं होति, वट्टति अथूपीकतस्स पटिग्गहितत्ता, पयोगो पन नत्थि अज्जत्र पुब्बदेसा”ति केनचि वुत्तं, तं न सारतो पच्चेतब्बं । “न थूपीकतं पिण्डपातं पटिग्गण्हाती”ति वचनं पठमं थूपीकतस्सेव पच्छा पटिग्गण्हनं दीपेति । न हि हत्थगतेपि पत्ते दिव्यमानं थूपीकतं गण्हन्तो थूपीकतं पिण्डपातं पटिग्गण्हन्तो नाम न होति, न च तेन समतित्तिको पिण्डपातो पटिग्गहितोति सक्का विज्जातुं । “थूपीकत”न्ति च भावनपुंसकनिद्देसे गय्हमाने अयमत्थो सुट्ठुतरं पाकटोयेवाति ।

खम्भकतवग्गवण्णना निट्ठिता ।

#### ४. सक्कच्चवग्गवण्णना

६०८. चतुत्थवग्गे सपदानन्ति एत्थ दानं वुच्चति अवखण्डनं, अपेतं दानतो अपदानं, अनवखण्डनन्ति अत्थो । सह अपदानेन सपदानं, अवखण्डनविरहितं, अनुपटिपाटियाति वुत्तं होति । तेनाह “तत्थ तत्थ ओधिं अकत्वा अनुपटिपाटिया”ति ।

६११. यस्मिं समये “पाणो न हन्तब्बो”ति राजानो भेरिं चरापेन्ति, अयं माघातसमयो नाम । इध अनापत्तियं गिलानो न आगतो, तस्मा गिलानस्सपि आपत्ति । सूपोदनविज्जत्तिसिक्खापदे असज्जिच्च अस्सतियाति एत्थ “मुखे पक्खिपित्वा पुन विप्पटिसारी हुत्वा छट्ठेन्तस्स अरुचिया पविसन्ते ‘असज्जिच्चा’ति वुच्चति, विज्जत्तिम्पि अविज्जत्तिम्पि एतस्मिं ठाने ठितं सहसा गहेत्वा भुज्जन्ते ‘अस्सतिया’ति वुच्चती”ति तीसुपि गण्ठपदेसु वुत्तं ।

६१४-६१५. उज्झाने सज्जा उज्झानसज्जा, सा अस्स अत्थीति उज्झानसज्जी । “मयूरण्डं अतिमहन्त”न्ति वचनतो मयूरण्डप्पमाणो कबळो न वट्टति । केचि पन “मयूरण्डतो महन्तो न वट्टती”ति वदन्ति, तं न गहेतब्बं, “नातिमहन्त”न्ति च अतिमहन्तस्सेव पटिक्खित्ता खुद्दके आपत्ति न दिस्सति । “मयूरण्डं अतिमहन्तं, कुक्कुटण्डं अतिखुद्दकं, तेसं वेमज्झप्पमाणो”ति इमिना पन सारुप्पवसेन खुद्दकम्पि पटिक्खिपित्वा परिच्छेदो न दस्सितोति वेदितब्बं ।

सक्कच्चवग्गवण्णना निट्ठिता ।

#### ५. कबळवग्गवण्णना

६१८. पञ्चमवग्गे सब्बं हत्थन्ति एत्थ हत्थ-सद्दो तदेकदेसेसु अङ्गुलीसु दट्ठब्बो “हत्थमुद्दा”ति आदीसु विय, समुदाये पवत्तवोहारस्स अवयवेपि वत्तनतो एकङ्गुलिम्पि मुखे पक्खिपितुं न वट्टति ।

कबळवग्गवण्णना निट्ठिता ।

#### ६. सुरुसुरुवग्गवण्णना

६२७. छट्ठवग्गे सीतीकतोति सीतट्ठो, सीतपीळितोति वुत्तं होति । सिलकबुद्धोति परिहासवचनमेतं । सिलकज्झि कज्जि दिस्वा “बुद्धो अय”न्ति वोहरन्ति ।

६३४. विलीवच्छत्तन्ति वेणुविलीवेहि कतं छत्तं । तत्थजातकदण्डकेन कतन्ति तालपण्णं सह दण्डकेन छिन्दित्वा तमेव छत्तदण्डं करोन्ति गोपालकादयो विय, तं सन्धयेतं वुत्तं । छत्तपादुकाय वा ठितं होतीति एत्थ छत्तपादुका वुच्चति छत्ताधारो । यस्मिं छत्तं अपतमानं कत्वा ठपेन्ति, तादिसिकाय छत्तपादुकाय ठितं छत्तं “छत्त”न्ति अज्झाहरितब्बं । “छत्तं छत्तपादुकाय ठित”न्तिपि पठन्ति, तत्थापि अयमेवत्थो ।

६३७. चापोति मज्झे वड्ढा काचदण्डसदिसा धनुविकति । कोदण्डोति वट्टलदण्डा धनुविकति । पटिमुक्कन्ति पवेसितं लगितं ।

सुरुसुरुवग्गवण्णना निट्ठिता ।

### ७. पादुकवग्गवण्णना

६४७. सत्तमवग्गे पटिच्छन्नो हुत्वाति सो किर रत्तिभागे उय्यानं गन्त्वा अम्बं अभिरुहित्वा साखाय साखं अम्बं ओलोकेन्तो विचरि । तस्स तथा करोन्तस्सेव रत्ति विभायि । सो चिन्तेसि “सचे इदानि ओतरित्वा गमिस्सामि, दिस्वा मं चोरोति गहेस्सन्ति, रत्तिभागे गमिस्सामी”ति । अथेकं विटपं अभिरुहित्वा निलीनो अच्छि । तं सन्धायेतं वुत्तं । सो रुक्खतो ओतरन्तो एकं ओलम्बिनिसाखं गहेत्वा तेसं उभिन्नम्पि अन्तरे पतिट्ठासि । तं सन्धाय वुत्तं “तेसं द्विन्नम्पि अन्तरा रुक्खतो पतितो”ति । पाळिया अत्थं न जानन्तीति अत्तनो गहणस्स अत्थं न जानन्ति ।

जातकपाळियं (जा० १.४.३३) पन अयं गाथा —

“सब्बमिदं चरिमं कतं, उभो धम्मं न पस्सरे ।  
उभो पकतिया चुता, यो चायं मन्तेज्झापेति ।  
यो च मन्तं अधीयती”ति ॥ —

एवमागता । तस्सायमत्थो (जा० अट्ठ० ३.४.३३) — सब्बमिदं चरिमं कतन्ति यं अम्हेहि तीहि जनेहि कतं, सब्बमिदं किच्चं लामकं निम्मरियादं अधम्मिकं । एवं अत्तनो चोरभावं तेसञ्च मन्तेसु अगारवं गरहित्वा पुन इतरे द्वेयेव गरहन्तो “उभो धम्मं न पस्सरे”ति आदिमाह । तत्थ उभोति इमे द्वेपि जना गरुकारारहं पोराणकधम्मं न पस्सन्ति, ततोव धम्मपकतितो चुता । धम्मो हि पठमुप्पत्तिवसेन पकति नाम । वुत्तम्पि चेतं —

“धम्मो हवे पातुरहोसि पुब्बे,  
पच्छा अधम्मो उदपादि लोके”ति ॥ (जा० १.११.२८) ।

यो चायन्ति यो च अयं नीचे निसीदित्वा मन्ते अज्झापेति, यो च उच्चे निसीदित्वा अधीयतीति ।

सालीनन्ति अयं गाथापि —

“सालीनं ओदनं भुज्जे, सुचिं मंसूपसेचनं ।  
तस्मा एतं न सेवामि, धम्मं इसीहि सेवित”न्ति ॥ (जा० १.४.३४) —

एवं जातके आगता । तत्थ सुचिन्ति पण्डरं परिसुद्धं । मंसूपसेचनन्ति नानप्पकाराय मंसविकतिया सित्तं भुज्जे, भुज्जामीति अत्थो । सेसं पाकटमेव ।

धिरत्थूति धि अत्थु, निन्दा भवतूति अत्थो, गरहाम तं मयन्ति वुत्तं होति । लद्धलाभोति धनलाभं यसलाभञ्च सन्धाय वदति । विनिपातनहेतुनाति विनिपातनस्स हेतुभावेन । वुत्ति नाम होतीति यथावुत्तो दुविधोपि लाभो अपायसंवत्तनिकताय सम्पराये विनिपातनहेतुभावेन पवत्तनतो सम्पति अधम्मचरणेन पवत्तनतो च वुत्ति नाम होतीति अत्थो । एवरूपा या वुत्तीति एवरूपा धनलाभयसलाभसङ्घाता या वुत्ति । अधम्मचरणेन वाति वा-सद्दो सम्पिण्डनत्थो । त्वन्ति उपयोगत्थे



पच्चत्तवचनं, तं इच्चेव वा पाठो । अस्माति पासाणाधिवचनमेतं ।

पादुकवग्गवण्णना निट्ठिता ।

सेसं उत्तानमेव ।

सेखियकण्डं निट्ठितं ।

अधिकरणसमथेसु यं वत्तब्बं, तं अट्ठकथायं आगतट्ठानेयेव दस्सयिस्साम ।

इति समन्तपासादिकाय विनयट्ठकथाय सारत्थदीपनियं

भिक्षुविभङ्गवण्णना निट्ठिता ।

महाविभङ्गो निट्ठितो ।

॥ नमो तस्स भगवतो अरहतो सम्मासम्बुद्धस्स ॥

भिक्षुनीविभङ्गवण्णना

## १. पाराजिककण्डं (भिक्षुनीविभङ्गवण्णना)

### १. पठमपाराजिकसिक्खापदवण्णना

६५६. भिक्षुनीविभङ्गे योति यो भिक्षुनीनं विभङ्गो । मिगारनत्ताति मज्झपदलोपेनेतं वुत्तन्ति आह “मिगारमातुया पन नत्ता होती”ति । मिगारमाताति विसाखायेतं अधिवचनं । नवकम्माधिट्ठायिकन्ति नवकम्मसंविधायिकं । ब्यञ्जनानं पटिविज्झितब्बो आकारो नातिगम्भीरो, यथासुतं धारणमेव तत्थ करणीयन्ति सतिया ब्यापारो अधिको, पञ्जा तत्थ गुणीभूताति वुत्तं “सतिपुब्बङ्गमाय पञ्जाया”ति । सति पुब्बङ्गमा एतिस्साति सतिपुब्बङ्गमा । पुब्बङ्गमता चेत्थ पधानभावो “मनोपुब्बङ्गमा”ति आदीसु विय । अत्थग्गहणे पन पञ्जाय ब्यापारो अधिको पटिविज्झितब्बस्स अत्थस्स अतिगम्भीरत्ताति आह “पञ्जापुब्बङ्गमाय सतिया”ति । आलसियविरहिताति कोसज्जरहिता । यथा अज्जा कुसीता निसिन्नट्ठाने निसिन्नाव होन्ति, ठितट्ठाने ठिताव, एवं अहुत्वा विप्फारिकेन चित्तेन सब्बकिच्चं निप्फादेति ।

सब्बा भिक्षुनियो सत्थुलद्धूपसम्पदा सङ्गतो लद्धूपसम्पदाति दुविधा । गरुधम्मपअग्गहणेन हि लद्धूपसम्पदा महापजापतिगोतमी सत्थुसन्तिकाव लद्धूपसम्पदत्ता सत्थुलद्धूपसम्पदा नाम । सेसा सब्बापि सङ्गतो लद्धूपसम्पदा । तापि एकतोउपसम्पन्ना उभतोउपसम्पन्नाति दुविधा । तत्थ या ता महापजापतिगोतमिया सद्धिं निक्खन्ता पञ्चसता साकियानियो, ता एकतोउपसम्पन्ना भिक्षुसङ्गतो एव लद्धूपसम्पदत्ता, इतरा उभतोउपसम्पन्ना उभतोसङ्गे उपसम्पन्नत्ता । एहिभिक्षुनीभावेन उपसम्पन्ना पन भिक्षुनियो न सन्ति तासं तथा उपसम्पदाय अभावतो । यदि एवं “एहि भिक्षुनी”ति इध कस्मा वुत्तन्ति? देसनाय सोतपतितभावतो । अयज्हि सोतपतितता नाम कत्थचि लब्भमानस्सपि अग्गहणेन होति, यथा अभिधम्मे मनोधातुनिद्देसे (ध० स० १६०-१६१) लब्भमानम्पि झानङ्गं पञ्चविज्जाणसोते पतिताय न

उद्धटं कथंचि देसनाय असम्भवतो, यथा तत्थेव वत्थुनिद्देसे (ध० स० १८४ आदयो) हृदयवत्थु। कथंचि अलम्भमानस्सपि गहणवसेन यथाठितकप्पीनिद्देसे। यथाह —

“कतमो च पुग्गलो ठितकप्पी? अयञ्च पुग्गलो सोतापत्तिफलसच्छिकिरियाय पटिपन्नो अस्स, कप्पस्स च उड्डय्हनवेला अस्स, नेव ताव कप्पो उड्डय्ह्येय्य, यावायं पुग्गलो न सोतापत्तिफलं सच्छिकरेय्या”ति (पु० प० १७)।

एवमिधापि अलम्भमानगहणवसेन वेदितब्बं। परिकप्पवचनञ्हेतं “सचे भगवा भिक्खुनीभावयोग्यं कञ्चि मातुगामं ‘एहि भिक्खुनी’ति वदेय्य, एवं भिक्खुनीभावो सिया”ति।

कस्मा पन भगवा एवं न कथेसीति? तथा कताधिकारानं अभावतो। ये पन “अनासन्नासन्निहितभावतो”ति कारणं वत्वा “भिक्खू एव हि सत्थु आसन्नचारिनो सदा सन्निहिता च होन्ति, तस्मा ते एव ‘एहिभिक्खू’ति वत्तब्बतं अरहन्ति, न भिक्खुनियो”ति वदन्ति, तं तेसं मतिमत्तं सत्थु आसन्नदूरभावस्स भब्बाभब्बभावसिद्धत्ता। वुत्तञ्हेतं भगवता —

“सङ्घाटिकण्णे चेपि मे, भिक्खवे, भिक्खु गहेत्वा पिट्ठितो पिट्ठितो अनुबन्धो अस्स पादे पादं निक्खिपन्तो, सो च होति अभिज्झालु कामेसु तिब्बसारागो ब्यापन्नचित्तो पदुट्ठमनसङ्कप्पो मुट्ठस्सति असम्पजानो असमाहितो विब्भन्तचित्तो पाकतिन्द्रियो, अथ खो सो आरकाव मय्हं, अहञ्च तस्स। तं किस्स हेतु? धम्मज्झि सो, भिक्खवे, भिक्खु न पस्सति, धम्मं अपस्सन्तो न मं पस्सति। योजनसते चेपि सो, भिक्खवे, भिक्खु विहरेय्य, सो च होति अनभिज्झालु कामेसु न तिब्बसारागो अब्यापन्नचित्तो अप्पदुट्ठमनसङ्कप्पो उपट्ठितस्सति सम्पजानो समाहितो एकगगचित्तो संवुतिन्द्रियो, अथ खो सो सन्तिकेव मय्हं, अहञ्च तस्स। तं किस्स हेतु? धम्मज्झि सो, भिक्खवे, भिक्खु पस्सति, धम्मं पस्सन्तो मं पस्सती”ति (इतिवु० ९२)।

तस्मा अकारणं देसतो सत्थु आसन्नानासन्नता। अकताधिकारताय पन भिक्खुनीनं एहिभिक्खुनूपसम्पदाय अयोग्यता वेदितब्बा।

यदि एवं यं तं थेरीगाथासु भद्दाय कुण्डलकेसाय वुत्तं —

“निहच्च जाणुं वन्दित्वा, सम्मुखा अज्जलिं अकं।  
एहि भद्देति मं अवच, सा मे आसूपसम्पदा”ति॥ (थेरीगा० १०९)।

तथा अपदानेपि —

“आयाचितो तदा आह, एहि भद्देति नायको।  
तदाहं उपसम्पन्ना, परित्तं तोयमद्वस”न्ति॥ (अप० थेरी २.३.४४)।

तं कथन्ति? नयिदं एहिभिक्खुनीभावेन उपसम्पदं सन्धाय वुत्तं, उपसम्पदाय पन हेतुभावतो “या सत्थु आणत्ति, सा मे आसूपसम्पदा”ति वुत्ता। तथा हि वुत्तं **अट्ठकथायं** (थेरीगा० अट्ठ० १११) “एहि भद्दे भिक्खुनूपस्सयं गन्त्वा भिक्खुनीनं सन्तिके पब्बज उपसम्पज्जस्सूति मं अवच आणापेसि, सा सत्थु आणा मय्हं उपसम्पदाय कारणत्ता उपसम्पदा आसि अहोसी”ति। **अपदानगाथायम्पि** एवमेव अत्थो गहेतब्बो। तस्मा भिक्खुनीनं एहिभिक्खुनूपसम्पदा नत्थियेवाति निट्ठमेत्थ

गन्तव्यं । यथा चेतं सोतपतितवसेन “एहि भिक्खुनी”ति वुत्तं, एवं “तीहि सरणगमनेहि उपसम्पन्नाति भिक्खुनी”ति इदम्पि सोतपतितवसेनेव वुत्तन्ति दट्ठव्वं सरणगमनूपसम्पदायपि भिक्खुनीनं असम्भवतो ।

६५९. भिक्खुविभङ्गे “कायसंसगं सादियेय्या”ति अवत्वा “समापज्जेय्या”ति वुत्तत्ता “**भिक्खु आपत्तिया न कारेतव्वो**”ति वुत्तं । तव्वहुलनयेनाति किरियासमुट्ठानस्सेव बहुलभावतो । दिस्सति हि तव्वहुलनयेन तव्वोहारो यथा “ब्राह्मणगामो”ति । ब्राह्मणगामेपि हि अन्तमसो रजकादीनि पञ्च कुलानि सन्ति । साति किरियासमुट्ठानता ।

६६२. तथेवाति कायसंसगारागेन अवस्सुतोयेवाति अत्थो । सेसमेत्थ उत्तानमेव ।

पठमपाराजिकसिक्खापदवण्णना निड्ढिता ।

## २. दुतियपाराजिकसिक्खापदवण्णना

६६६. दुतिये “किस्स पन त्वं अय्ये जानं पाराजिकं धम्मं अज्झापन्न”न्ति वचनतो “उद्दिट्ठा खो अय्यायो अट्ठ पाराजिका धम्मा”ति आदिवचनतो च भिक्खुनीविभङ्गं पत्वा साधारणानि सिक्खापदानि भिक्खूनां उप्पन्नवत्थुस्मिंयेव “या पन भिक्खुनी छन्दसो मेथुनं धम्मं पटिसेवेय्य, अन्तमसो तिरच्छानगतेनपि, पाराजिका होति असंवासा”ति आदिना नयेन सविसेसम्पि अविसेसम्पि मातिकं ठपेत्वा अनुक्कमेन पदभाजनं आपत्तिभेदं तिकच्छेदं अनापत्तिवारञ्च अनवसेसं वत्वा वित्थारेसि । सङ्गीतिकारकेहि पन असाधारणपञ्चत्तियोयेव इध वित्थारिताति वेदितव्वा ।

अथ उपरिमेसु द्वीसु अपञ्चत्तेसु अट्ठन्नं पाराजिकानं अञ्जतरन्ति इदं वचनं न युज्जतीति आह “**इदञ्च पाराजिकं पच्छा पञ्जत्त**”न्ति आदि । यदि एवं इमस्मिं ओकासे कस्मा ठपितन्ति आह “**पुरिमेन पन सद्धिं युगळत्ता**”ति आदि, पुरिमेन सद्धिं एकसम्बन्धभावतो इध वुत्तन्ति अधिप्पायो । “अट्ठन्नं पाराजिकानं अञ्जतर”न्ति वचनतो च वज्जपटिच्छादिकं या पटिच्छादेति, सापि वज्जपटिच्छादिकायेवाति दट्ठव्वं । किञ्चापि वज्जपटिच्छादनं पेमवसेन होति, तथापि सिक्खापदवीतिकमचित्तं दोमनस्सितमेव होतीति कत्वा “**दुक्खवेदन**”न्ति वुत्तं । सेसमेत्थ उत्तानमेव ।

दुतियपाराजिकसिक्खापदवण्णना निड्ढिता ।

६६८. ततियं उत्तानत्थमेव ।

## ४. चतुत्थपाराजिकसिक्खापदवण्णना

६७५. चतुत्थे लोकस्सादमित्तसन्थववसेनाति लोकस्सादसङ्घातस्स मित्तसन्थवस्स वसेन । वुत्तमेवत्थं परियायन्तरेन विभावेतुं “**कायसंसगारागेना**”ति वुत्तं ।

तिस्सित्थियो मेथुनं तं न सेवेति (परि० अट्ठ० ४८१) या तिस्सो इत्थियो वुत्ता, तासुपि यं तं मेथुनं नाम, तं न सेवति । तयो पुरिसेति तयो पुरिसेपि उपगन्त्वा मेथुनं न सेवति । तयो च अनरियपण्डकेति उभतोव्यञ्जनसङ्घाते तयो अनरिये, तयो च पण्डकेति इमेपि छ जने उपगन्त्वा मेथुनं न सेवति । न चाचरे मेथुनं व्यञ्जनस्मिन्ति अनुलोमपाराजिकवसेनपि अत्तनो निमित्ते मेथुनं नाचरति । छेज्जं सिया मेथुनधम्मपच्चयाति सिया मेथुनधम्मपच्चया

पाराजिकन्ति अयं पज्जो अट्ठवत्थुकं व सन्धाय वुत्तो । तस्सा हि मेथुनधम्मस्स पुब्बभागकायसंसग्गं आपज्जितुं वायमन्तिया मेथुनधम्मपच्चया छेज्जं होति । छेदोयेव छेज्जं ।

मेथुनधम्मस्स पुब्बभागत्ताति इमिना मेथुनधम्मस्स पुब्बभागभूतो कायसंसग्गोयेव तत्थ मेथुनधम्म-सद्धेन वुत्तो, न द्वयंद्वयसमापत्तीति दीपेति । वण्णावण्णोति द्वीहि सुक्कविस्सट्ठि वुत्ता । गमनुप्पादनन्ति सज्जरित्तं । सब्बपदेसूति “सङ्घाटिकण्णगगहणं सादियेय्या”ति आदीसु । सेसमेत्थ उत्तानमेव । कायसंसग्गरागो, सउस्साहता, अट्ठमस्स वत्थुस्स पूरणन्ति इमानि पनेत्थ तीणि अङ्गानि ।

चतुत्थपाराजिकसिक्खापदवण्णना निट्ठिता ।

भिक्षुनीविभङ्गे पाराजिककण्डवण्णना निट्ठिता ।

पाराजिककण्डं निट्ठितं ।

## २. सङ्घादिसेसकण्डं (भिक्षुनीविभङ्गवण्णना)

### १. पठमसङ्घादिसेससिक्खापदवण्णना

६७९. सङ्घादिसेसकण्डस्स पठमसिक्खापदे द्वीसु जनेसूति अट्ठकारकेसु द्वीसु जनेसु । यो कोचीति तेसुयेव द्वीसु यो कोचि, अज्जो वा तेहि आणत्तो । दुतियस्स आरोचेतीति एत्थापि द्वीसु जनेसु यस्स कस्सचि दुतियस्स कथं यो कोचि आरोचेतीति एवमत्थो गहेतब्बोति आह “दुतियस्स आरोचेतीति एत्थापि एसेव नयो”ति । गतिगतन्ति चिरकालपवत्तं ।

आपत्तीति आपज्जनं । सह वत्थुज्झाचाराति वत्थुवीतिकमेन सह । सहयोगे करणवचनप्पसङ्गे इदं निस्सक्कवचनं । यन्ति यं धम्मं । निस्सारेतीति आपन्नं भिक्षुनिसङ्गम्हा निस्सारेति । हेतुम्हि चायं कत्तुवोहारो । निस्सारणहेतुभूतो हि धम्मो निस्सारणीयोति वुत्तो । गीवायेव होति, न पाराजिकं अनाणत्तिया गहितत्ता । यथा दासदासीवापीआदीनि सम्पटिच्छित्तुं न वट्ठति, एवं तेसं अत्थाय अट्ठकरणम्पि न वट्ठतीति आह “अयं अकप्पियअट्ठो नाम, न वट्ठती”ति ।

एत्थ च सचे अधिकरणट्ठानं गन्त्वा “अम्हाकं एसो दासो, दासी, वापी, खेत्तं, आरामो, आरामवत्थु, गावो, अजा, कुक्कुटा”ति आदिना वोहरति, अकप्पियं । “अयं अम्हाकं आरामिको, अयं वापी इत्थन्नामेन सङ्घस्स भण्डधोवनत्थाय दिन्ना, इतो खेत्ततो आरामतो उप्पज्जनकचतुपच्चया इतो गावितो महिसितो अजातो उप्पज्जनकगोरसा इत्थन्नामेन सङ्घस्स दिन्नाति पुच्छिते वा अपुच्छिते वा वत्तुं वट्ठती”ति वदन्ति । सेसमेत्थ उत्तानमेव । अनाकट्ठिताय अट्ठकरणं, अट्ठपरियोसानन्ति इमानि पनेत्थ द्वे अङ्गानि ।

पठमसङ्घादिसेससिक्खापदवण्णना निट्ठिता ।

### २. दुतियसङ्घादिसेससिक्खापदवण्णना

६८३. दुतिये मल्लगणभटिपुत्तगणादिकन्तिआदीसु मल्लगणो नाम नारायनभक्तिको तत्थ तत्थ पानीयट्ठपनपोक्खरणीखणनादिपुञ्जकम्मकारको गणो, भटिपुत्तगणो नाम कुमारभक्तिकगणो। धम्मगणोति सासनभक्तिगणो अनेकप्पकारपुञ्जकम्मकारकगणो वुच्चति। गन्धिकसेणीति अनेकप्पकारसुगन्धिविकतिकारको गणो। दुस्सिकसेणीति पेसकारकगणो। कप्पगतिकन्ति कप्पियभावं गतं।

वुट्ठापेन्तियाति उपसम्पादेन्तिया। “चोरिं वुत्तनयेन अनापुच्छा पब्बाजेन्तिया दुक्कटं”न्ति वदन्ति। पण्णात्तिं अजानन्ता अरियापि वुट्ठापेन्तीति वा कम्मवाचापरियोसाने आपत्तिकखणे विपाकाब्बाकतसमङ्गितावसेन वा “तिचिच्च”न्ति वुत्तन्ति वेदितब्बं। सेसमेत्थ उत्तानमेव। चोरिता, चोरिसज्जा, अज्जत्र अनुज्जातकारणा वुट्ठापनन्ति इमानि पनेत्थ तीणि अङ्गानि।

दुतियसङ्गादिसेससिक्खापदवण्णना निट्ठिता।

### ३. ततियसङ्गादिसेससिक्खापदवण्णना

६९२. ततिये परिकखेपं अतिक्कामेन्तियाति सकगामतो अज्जस्स गामस्स परिकखेपं अतिक्कामेन्तिया। “गामन्तरं गच्छेय्या”ति हि वचनतो अज्जस्स गामस्स परिकखेपं अतिक्कामेन्तिया एव आपत्ति, न सकगामस्स। अज्जो हि गामो गामन्तरं। अपरिक्खित्तस्स गामस्स उपचारन्ति एत्थ उपचार-सद्देन घरूपचारतो पठमलेड्डुपातसङ्घातं परिकखेपारहट्ठानं गहितं, न ततो दुतियलेड्डुपातसङ्घातो उपचारोति आह “परिकखेपारहट्ठान”न्ति। तेनेव पाळियं “उपचारं अतिक्कामेन्तिया”ति वुत्तं। अज्जथा यथा विकालगामप्पविसनसिक्खापदे “परिक्खित्तस्स गामस्स परिकखेपं अतिक्कमन्तस्स, अपरिक्खित्तस्स गामस्स उपचारं ओक्कमन्तस्सा”ति (पाचि० ५१३) वुत्तं, एवमिधापि “परिक्खित्तस्स गामस्स परिकखेपं अतिक्कामेन्तिया अपरिक्खित्तस्स गामस्स उपचारं ओक्कमन्तिया”ति वदेय्य। सङ्खेपतो वुत्तमत्थं विभजित्वा दस्सेन्तो “अपिचेत्था”तिआदिमाह। विहारस्स चतुगामसाधारणत्ताति इमिना “विहारतो एकं गामं गन्तुं वट्ठती”ति एत्थ कारणमाह। विहारस्स चतुगामसाधारणत्तायेव हि चतूसु गामेसु यंकिज्जि एकं गामं गन्तुं वट्ठति।

यत्थाति यस्सं नदियं। “पठमं पादं उत्तारेन्तिया आपत्ति थुल्लच्चयस्स, दुतियं पादं उत्तारेन्तिया आपत्ति सङ्गादिसेसस्सा”ति वचनतो नदिं ओतरित्वा पदसा उत्तरन्तिया एव आपत्तीति आह “सेतुना गच्छति, अनापत्ती”तिआदि। परतीरमेव अक्कमन्तिया अनापत्तीति नदिं अनोतरित्वा याननावादीसु अज्जतरेन गन्त्वा परतीरमेव अक्कमन्तिया अनापत्ति। उभयतीरेसु विचरन्ति, वट्ठतीति इदं असतिपि नदीपारगमने उपरि वक्खमानस्स विनिच्छयस्स फलमत्तदस्सनत्थं वुत्तन्ति वेदितब्बं। ओरिमतीरमेव आगच्छति, आपत्तीति परतीरं गन्तुकामताय ओतिण्णत्ता वुत्तं। तमेव तीरन्ति तमेव ओरिमतीरं। अनापत्तीति परतीरं गन्तुकामताय अभावतो अनापत्ति।

तादिसे अरज्जेति “बहिइन्दखीला सब्बमेतं अरज्ज”न्ति (विभ० ५२९) एवं वुत्तलक्खणे अरज्जे। अथ तादिसस्सेव अरज्जस्स गहितभावो कथं विज्जायतीति आह “तेनेवा”तिआदि। इमिना हि अट्ठकथावचनेन ईदिसेपि गामसमीपे दस्सनूपचारे विजहिते सतिपि सवनूपचारे आपत्ति होतीति विज्जायति। मग्गमूळहा उच्चासदं करोन्तीति आह “मग्गमूळहसद्देन विया”ति। सद्दायन्तियाति सदं करोन्तिया। पुरिमायोति पुरेतरं गच्छन्तियो। अज्जं मग्गं गण्हातीति मग्गमूळहत्ता, न ओहातुं, तस्मा द्विन्नप्पि अनापत्ति। सेसमेत्थ उत्तानमेव। अनन्तरायेन एकभावो, गामन्तरगमनादीसु अज्जतरतापज्जनं, आपदाय अभावोति इमानि पनेत्थ तीणि अङ्गानि।

ततियसङ्गादिसेससिक्खापदवण्णना निट्ठिता ।

#### ४. चतुत्थसङ्गादिसेससिक्खापदवण्णना

६९४. चतुत्थे कारकगणस्साति उक्खेपनीयकम्मकारकगणस्स । तेचत्तालीसप्पभेदं वत्तं खन्धके आवि भविस्सति । नेत्थारवत्तेति नित्थरणहेतुम्हि वत्ते । सेसं उत्तानमेव । धम्मेन कम्मेन उक्खित्ता, अज्जत्र अनुज्जातकारणा ओसारणन्ति इमानि पनेत्थ द्वे अङ्गानि ।

चतुत्थसङ्गादिसेससिक्खापदवण्णना निट्ठिता ।

#### ५. पञ्चमसङ्गादिसेससिक्खापदवण्णना

७०१. पञ्चमे एतं न वुत्तन्ति “भिक्षुनिया अवस्सुतभावो दट्ठब्बो”ति एतं नियमनं न वुत्तं । तन्ति तं नियमेत्वा अवचनं । पाळिया समेतीति “एकतो अवस्सुते”ति अविसेसेत्वा वुत्तपाळिया “अनवस्सुतोति जानन्ती पटिग्गहाती”ति इमाय च पाळिया समेति । यदि हि पुग्गलस्स अवस्सुतभावो नप्पमाणं, किं “अनवस्सुतोति जानन्ती”ति इमिना वचनेन, “अनापत्ति उभतोअनवस्सुता होन्ति, अनवस्सुता पटिग्गहाती”ति एतकमेव वत्तब्बं सिया । “उभतोअनवस्सुता होन्ति, अनवस्सुतोति जानन्ती पटिग्गहाती”ति इमस्स च अनापत्तिवारस्स अयमत्थो । उभो चे अनवस्सुता, सब्बथापि अनापत्ति । अथ भिक्षुनी अनवस्सुता समाना अवस्सुतम्पि “अनवस्सुतो”ति सज्जाय तस्स हत्थतो पटिग्गहाति, एवम्पि अनापत्ति । अथ सयं अनवस्सुतापि अज्जं अनवस्सुतं वा अवस्सुतं वा “अवस्सुतो”ति जानाति, दुक्कटमेव । वुत्तज्जेतं अनन्तरसिक्खापदे “किस्स त्वं अय्ये न पटिग्गहासीति । अवस्सुता अय्येति । त्वं पन अय्ये अवस्सुताति । नाहं अय्ये अवस्सुता”ति । सेसमेत्थ उत्तानमेव । उदकदन्तपोनतो अज्जं अज्झोहरणीयं, उभतोअवस्सुतता, सहत्था गहणं, अज्झोहरणन्ति इमानि पनेत्थ चत्तारि अङ्गानि ।

पञ्चमसङ्गादिसेससिक्खापदवण्णना निट्ठिता ।

#### ६. छट्ठसङ्गादिसेससिक्खापदवण्णना

७०५. छट्ठे परिवारगाथाय अयमत्थो । न देति न पटिग्गहातीति (परि० अट्ठ० ४८१) न उय्योजिका देति, नापि उय्योजिता तस्सा हत्थतो गणहाति । पटिग्गहो तेन न विज्जतीति तेनेव कारणेन उय्योजिकाय हत्थतो उय्योजिताय पटिग्गहो न विज्जति । आपज्जति गरुक्कन्ति एवं सन्तेपि अवस्सुतस्स हत्थतो पिण्डग्गहणे उय्योजेन्ती सङ्गादिसेसापत्तिं आपज्जति । तज्ज परिभोगपच्चयाति तज्ज पन आपत्तिं आपज्जमाना तस्सा उय्योजिताय परिभोगपच्चया आपज्जति । तस्सा हि भोजनपरियोसाने उय्योजिकाय सङ्गादिसेसो होति । सेसमेत्थ उत्तानमेव । मनुस्सपुरिसता, अज्जत्र अनुज्जातकारणा खादनीयं भोजनीयं गहेत्वा भुज्जाति उय्योजना, तेन वचनेन गहेत्वा इतरिस्सा भोजनपरियोसानन्ति इमानि पनेत्थ तीणि अङ्गानि ।

छट्ठसङ्गादिसेससिक्खापदवण्णना निट्ठिता ।

#### ७. सत्तमसङ्गादिसेससिक्खापदवण्णना

७०९. सत्तमे किन्नुमाव समणियोति किं नु इमा एव समणियो । तासाहन्ति तासं अहं । सेसं उत्तानमेव ।

सत्तमसङ्गादिसेससिक्खापदवण्णना निट्ठिता ।

७१५. अट्ठमं उत्तानत्थमेव ।

### ९. नवमसङ्गादिसेससिक्खापदवण्णना

७२१. नवमे वज्जप्पटिच्छादिकाति खुद्धानुखुद्दकवज्जस्स पटिच्छादिका । समनुभासनकम्मकाले चेत्थ द्वे तित्थो एकतो समनुभासितब्बा ।

नवमसङ्गादिसेससिक्खापदवण्णना निट्ठिता ।

७२७. दसमं उत्तानत्थमेव ।

भिक्षुनीविभङ्गे सङ्गादिसेसवण्णना निट्ठिता ।

सङ्गादिसेसकण्डं निट्ठितं ।

## ३. निस्सगियकण्डं (भिक्षुनीविभङ्गवण्णना)

७३३. निस्सगियेसु पठमं उत्तानमेव ।

७४०. दुतिये “अय्याय दम्मीति एवं पटिलद्धन्ति निस्सट्ठपटिलद्धं । तेनेव मातिकाट्ठकथायम्पि “निस्सट्ठं पटिलभित्वापि यथादानेयेव उपनेतब्बं”न्ति वुत्तं । यथादानेयेव उपनेतब्बन्ति यथा दायकेन दिन्नं, तथा उपनेतब्बं, अकालचीवरपक्खेयेव ठपेतब्बन्ति वुत्तं होति । एत्थ च भाजापिताय लद्धचीवरमेव निस्सगियं होति, तं विनयकम्मं कत्वापि अत्तना न लभति । सेसमेत्थ उत्तानमेव । अकालचीवरता, तथासज्जिता, कालचीवरन्ति अधिद्वाय लेसेन भाजापनं, पटिलाभोति इमानि पनेत्थ चत्तारि अङ्गानि ।

७४३. ततिये मेतन्ति मे एतं । सकसज्जाय गहितत्ता पाचित्तियं दुक्कटज्ज वुत्तं । इतरथा भण्डग्घेन कारेतब्बं । उपसम्पन्नता, परिवत्तितचीवरस्स विकप्पनुपगता, सकसज्जाय अच्छिन्दनं वा अच्छिन्दापनं वाति इमानि पनेत्थ तीणि अङ्गानि ।

७४८-७५२. चतुत्थे आहटसप्पिं दत्त्वाति अत्तनो दत्त्वा । यमकं पचितब्बन्ति सप्पिज्ज तेलज्ज एकतो कत्वा पचितब्बं । लेसेन गहेतुकामता, अज्जस्स विज्जापनं, पटिलाभोति इमानि पनेत्थ तीणि अङ्गानि ।

७५३. पञ्चमे साति थुल्लनन्दा । अयन्ति अयं सिक्खमाना । चेतापेत्वाति जानापेत्वा इच्चेव अत्थोति इध वुत्तं, मातिकाट्ठकथायं (कट्ठा० अट्ठ० अज्जचेतापनसिक्खापदवण्णना) पन “अज्जं चेतापेत्वाति अत्तनो कप्पियभण्डेन इदं नाम आहराति अज्जं परिवत्तापेत्वा”ति वुत्तं, तस्मा “चेतापेत्वा”ति इमस्स परिवत्तापेत्वातिपि अत्थो दट्ठब्बो । अज्जं

चेतापेय्याति “एवं मे इदं दत्त्वा अज्जम्पि आहरिस्सती”ति मज्जमाना “न मे इमिना अत्थो, इदं नाम मे आहरा”ति ततो अज्जं चेतापेय्ये ।

७५८. छट्ठे धम्मकिच्चन्ति पुज्जकम्मं । पावारिकस्साति दुस्सवाणिजकस्स । याय चेतापितं, तस्सायेव निस्सगियं निस्सट्ठपटिलाभो च, तस्मा ताय भिक्खुनिया निस्सट्ठं पटिलभित्वा यथादाने उपनेतब्बं, न अत्तना गहेतब्बं । अज्जस्सत्थायाति चीवरादीसु अज्जतरस्सत्थाय । अज्जुद्दिसिकेनाति पुरिमस्सेवत्थदीपनं । परिक्खारेनाति कप्पियभण्डेन ।

७६४. सत्तमे सयं याचितकेनाति सयं याचितकेनापीति अत्थो । तेनेव पाळियं “तेन च परिक्खारेन सयम्पि याचित्वा”ति वुत्तं, ततोयेव मातिकाट्टकथायं “सज्जाचिकेनाति सयं याचितकेनापी”ति अत्थो वुत्तो ।

७६८-७७३. अट्टमनवमदसमानि उत्तानत्थानेव ।

७८४. एकादसमे यस्मा पवारितट्ठाने विज्जति नाम न पटिसेधेतब्बा, तस्मा भगवा धम्मनिमन्तनवसेन पवारितट्ठाने “वदेय्यासि येनत्थो”ति वुत्ताय “चतुक्कंसपरमं विज्जापेतब्ब”न्ति परिच्छेदं दस्सेतीति वेदितब्बं । तेनेव मातिकाट्टकथायं (कङ्का० अट्ठ० गरुपावुरणसिक्खापदवण्णना) “चेतापेतब्बन्ति ठपेत्वा सहधम्मिके च जातकपवारिते च अज्जेन किस्मिञ्चिदेव गुणे परितुट्ठेन वदेय्यासि येनत्थोति वुत्ताय विज्जापेतब्ब”न्ति वुत्तं ।

७८८. द्वादसमं उत्तानत्थमेव ।

भिक्खुनीविभङ्गे निस्सगियपाचित्तियसिक्खापदवण्णना निट्ठिता ।

निस्सगियकण्डं निट्ठितं ।

## ४. पाचित्तियकण्डं (भिक्खुनीविभङ्गवण्णना)

### १. लसुणवग्गवण्णना

७९३-७९७. पाचित्तियेसु लसुणवग्गस्स पठमे जातिं सरतीति जातिस्सरो । सभावेनेवाति सूपसम्पाकादिं विनाव । बदरसाळवं नाम बदरफलानि सुक्खापेत्वा चुण्णेत्वा कत्तब्बा खादनीयविकति । सेसमेत्थ उत्तानमेव । आमकलसुणज्चेव अज्झोहरणज्जाति इमानि पनेत्थ द्वे अङ्गानि ।

७९८-८०२. दुतियततियचतुत्थानि उत्तानत्थानेव ।

८१२. पज्जमे द्विन्नं पब्बानं उपरीति एत्थ द्विन्नं अङ्गुलीनं सह पवेसने एकेकाय अङ्गुलिया एकेकं पब्बं कत्वा द्विन्नं पब्बानं उपरि । एकङ्गुलिपवेसने द्विन्नं पब्बानं उपरि न वट्ठतीति वेदितब्बं । महापच्चरियम्पि अयमेव नयो दस्सितो । उदकसुद्धिपच्चयेन पन सतिपि फस्ससादियने यथावुत्तपरिच्छेदे अनापत्ति ।



८१५-८१७. छट्ठे आसुम्भित्वाति पातेत्वा । दधिमत्थूति दधिमण्डं दधिमि पसन्नोदकं । भुज्जन्तस्स भिक्खुनो हत्थपासे ठानं, पानीयस्स वा विधूपनस्स वा गहणन्ति इमानि पनेत्थ द्वे अङ्गानि ।

८२२. सत्तमे “पटिग्गण्हाति, आपत्ति दुक्कटस्सा”ति इदं पुब्बपयोगदुक्कटस्स निदस्सनमत्तन्ति आह “न केवलं पटिग्गहणेयेव होती”तिआदि । पमाणन्ति पाचित्तियापत्तिया पमाणं । इमेहियेव द्वीहि पाचित्तियं होति, नाज्जेहि भज्जनादीहीति अत्थो । वुत्तमेवत्थं वित्थारतो दस्सेतुं “तस्मा”तिआदिमाह । तं पुब्बापरविरुद्धन्ति पुनपि वुत्तन्ति वुत्तवादं सन्धायाह । अज्जाय विज्जत्तिया लद्धम्पि हि अनाणत्तिया विज्जत्तिया इमिस्सा अविज्जत्तिया लद्धपक्खं भजति, तस्मा हेट्ठा अविज्जत्तिया लद्धे करणकारापनेसु विसेसं अवत्वा इध विसेसवचनं पुब्बापरविरुद्धं । यदि चेत्थ करणे पाचित्तियं, कारापनेपि पाचित्तियेनेव भवितब्बं । अथ कारापने दुक्कटं, करणेपि दुक्कटेनेव भवितब्बं । न हि करणे वा कारापने वा विसेसो अत्थि, तस्मा अज्जाय विज्जत्तिया लद्धं सयं भज्जनादीनि कत्वापि कारापेत्वापि भुज्जन्तिया दुक्कटमेवाति इदमेत्थ सन्निट्ठानं । अविसेसेन वुत्तन्ति करणकारापनानं सामज्जतो वुत्तं । सेसमेत्थ उत्तानमेव । सत्तन्नं धज्जानं अज्जतरस्स विज्जापनं वा विज्जापापनं वा, पटिलाभो, भज्जनादीनि कत्वा वा कारेत्वा वा अज्झोहरणन्ति इमानि पनेत्थ तीणि अङ्गानि ।

८२४. अट्ठमे निब्बिट्ठोति पतिट्ठापितो । केणीति रज्जो दातब्बस्स आयस्सेतं अधिवचनं । ठानन्तरन्ति गामजनपदादिठानन्तरं । सेसमेत्थ उत्तानमेव । उच्चारदिभावो, अनवलोकनं, वळज्जनट्ठानं, तिरोकुट्टपाकारता, छट्ठुनं वा छट्ठापनं वाति इमानि पनेत्थ पञ्च अङ्गानि ।

८३०. नवमे सब्बेसन्ति भिक्खुस्स भिक्खुनिया च । इध खेत्तपालका आरामादिगोपका च सामिका एव ।

८३६. दसमे एकपयोगेनाति एकदिसावलोकनपयोगेन । तेसंयेवाति येसं नच्चं पस्सति । किज्जापि सयं नच्चनादीसु पाचित्तियं पाळियं न वुत्तं, तथापि अट्ठकथापमाणेन गहेतब्बन्ति दस्सेतुं “सब्बअट्ठकथासु वुत्त”न्ति आह । “आरामे ठत्वाति न केवलं ठत्वा, ततो ततो गन्त्वापि सब्बिरियापथेहि लभति, ‘आरामे ठिता’ति पन आरामपरियापन्नभावदस्सनत्थं वुत्तं । इतरथा निसिन्नापि न लभेय्या”ति तीसुपि गण्ठपदेसु वुत्तं । सेसमेत्थ उत्तानमेव । नच्चादीनं अज्जतरता, अज्जत्र अनुज्जातकारणा गमनं, दस्सनं वा सवनं वाति इमानि पनेत्थ तीणि अङ्गानि ।

लसुणवग्गवण्णना निट्ठिता ।

## २. अन्धकारवग्गवण्णना

८४१. अन्धकारवग्गस्स पठमे दाने वा पूजाय वाति दाननिमित्तं वा पूजानिमित्तं वा । मन्तेतीति कथेति । रत्तन्धकारता, पुरिसस्स हत्थपासे ठानं वा सल्लपनं वा, सहायाभावो, रहोपेक्खताति इमानि पनेत्थ चत्तारि अङ्गानि ।

८४२-८४६. दुतियततियचतुत्थानि उत्तानत्थानेव ।

८५६-८५७. पञ्चमे अनोवस्सकं अतिक्कामेन्तियाति छन्नस्स अन्तो निसीदित्वा पक्कमन्ति सन्धाय वुत्तं । “उपचारो द्वादसहत्थो”ति वदन्ति । पल्लङ्कस्स अनोकासेति ऊरुबद्धासनस्स अनोकासे अप्पहोन्ते । पुरेभत्तता, अन्तरघरे निसज्जा, आसनस्स पल्लङ्कोकासता, अज्जत्र अनुज्जातकारणा अनापुच्छनं, वुत्तपरिच्छेदातिक्कमोति इमानि पनेत्थ पञ्च

अङ्गानि ।

८५९-८६४. छट्सत्तमादीनि उत्तानत्थानेव ।

अन्धकारवग्गवण्णना निट्ठिता ।

### ३. नग्गवग्गवण्णना

८८३-८८७. नग्गवग्गस्स पठमदुतियानि उत्तानत्थानेव ।

८९३. ततिये विसिब्बेत्वाति दुस्सिब्बितं पुन सिब्बनत्थाय विसिब्बेत्वा विजटेत्वा । अज्जत्र चतूहपञ्चाहाति विसिब्बितदिवसतो पञ्च दिवसे अतिक्कमित्वा । निवासनपावुरणूपगचीवरता, उपसम्पन्नाय सन्तकता, सिब्बनत्थाय विसिब्बनं वा विसिब्बापनं वा, अज्जत्र अनुज्जातकारणा पञ्चाहातिक्कमो, धुरनिक्खेपोति इमानि पनेत्थ पञ्च अङ्गानि ।

८९८. चतुत्थे पञ्चन्नं चीवरानन्ति तिचीवरं उदकसाटिका सङ्गच्छिकाति इमेसं पञ्चन्नं चीवरानं । पञ्चन्नं चीवरानं अज्जतरता, पञ्चाहातिक्कमो, अनुज्जातकारणाभावो, अपरिवत्तनन्ति इमानि पनेत्थ चत्तारि अङ्गानि ।

९०२. पञ्चमं उत्तानत्थमेव ।

९०७. छट्ठे चीवरलाभन्ति लभितब्बचीवरं । विकप्पनुपगपच्छिमता, सङ्गस्स परिणतभावो, विना आनिसंसदस्सनेन अन्तरायकरणन्ति इमानि पनेत्थ तीणि अङ्गानि ।

९११. सत्तमं उत्तानत्थमेव ।

९१६. अट्ठमे कुम्भथूणं नाम कुम्भसद्दो, तेन चरन्ति कीळन्ति, तं वा सिप्पं एतेसन्ति कुम्भथूणिका । तेनाह “घटकेन कीळनका”ति । दीघनिकायट्ठकथायं (दी० नि० अट्ठ० १.१३) पन “कुम्भथूणं नाम चतुरस्सअम्बणकताळं”न्ति वुत्तं । चतुरस्सअम्बणकताळं नाम रुक्खसारदन्तादीसु येन केनचि चतुरस्सअम्बणं कत्वा चतूसु पस्सेसु चम्मेन ओनन्धित्वा कतवादितभण्डं । बिम्बिसकन्तिपि तस्सेव वेवचनं, तं वादेन्ति, तं वा सिप्पं एतेसन्ति कुम्भथूणिका । तेनाह “बिम्बिसकवादकातिपि वदन्ती”ति । समणचीवरता, ठपेत्वा सहधम्मिके मातापितरो च अज्जेसं दानं, अतावकालिकताति इमानि पनेत्थ तीणि अङ्गानि ।

९२०. नवमं उत्तानत्थमेव ।

९२७. दसमे धम्मिकं कथिनुद्धारन्ति सब्बासं भिक्खुनीनं अकालचीवरं दातुकामेन उपासकेन यत्तको अत्थारमूलको आनिसंसो, ततो अधिकं वा समकं वा दत्वा याचितकेन समग्गेन भिक्खुनिसङ्घेन यं कथिनं जत्तिदुतियेन कम्मेन अन्तरा उद्धरीयति, तस्स सो उद्धारो धम्मिकोति वुच्चति, एवरूपं कथिनुद्धारन्ति अत्थो । सेसं उत्तानत्थमेव ।

नग्गवग्गवण्णना निट्ठिता ।

१३२. तुवट्टवग्गे सब्बं उत्तानमेव ।

#### ५. चित्तागारवग्गवण्णना

१७८. चित्तागारवग्गस्स पठमे कीळनउपवन्ति अन्तोणगरे ठितं सन्धाय वुत्तं, कीळनुय्यानन्ति बहिनगरे ठितं सन्धाय । पाटेक्का आपत्तियोति गीवाय परिवट्टनप्पयोगगणनाय आपत्तियो, न उम्मीलनगणनाय । “अज्झारामे राजागारादीनि करोन्ति, तानि पस्सन्तिया अनापत्ती”ति वचनतो “अन्तोआरामे तत्थ तत्थ गन्त्वा नच्चादीनि पस्सितुं लभती”तिपि सिद्धं ।

१८२. दुतियादीनि उत्तानत्थानेव ।

१०१५. नवमे हत्थिआदीसु सिप्प-सद्धो पच्चेकं योजेतब्बो, तथा आथब्बणादीसु मन्त-सद्धो । तत्थ आथब्बणमन्तो नाम आथब्बणवेदविहितो परूपघातकरो मन्तो, खीलनमन्तो नाम दारुसारखीलं मन्तेत्वा पथवियं पवेसेत्वा मारणमन्तो, अगदप्पयोगो विसयोजनं । नागमण्डलन्ति सप्पानं पवेसनिवारणत्थं मण्डलबद्धमन्तो ।

१०१८. दसमं उत्तानत्थमेव ।

चित्तागारवग्गवण्णना निद्धिता ।

१०२१. आरामवग्गे सब्बं उत्तानत्थमेव ।

१०६७. गब्भिनिवग्गेपि सब्बं सुविज्जेय्यमेव ।

#### ८. कुमारिभूतवग्गवण्णना

१११९. कुमारिभूतवग्गस्स पठमे सब्बपठमा द्वे महासिक्खमानाति गब्भिनिवग्गे सब्बपठमं वुत्ता द्वे सिक्खमाना । सिक्खमाना इच्चेव वत्तब्बाति सम्मुतिकम्मादीसु एवं वत्तब्बा । गिहिगताति वा कुमारिभूताति वा न वत्तब्बाति सचे वदन्ति, कम्मं कुप्पतीति अधिप्पायो । इतो परं नवमपरियोसानं उत्तानत्थमेव ।

११६३. दसमे अपुब्बसमुट्ठानसीसन्ति पठमपाराजिकसमुट्ठानादीसु तेरससु समुट्ठानेसु अननुज्जातसमुट्ठानं सन्धाय वुत्तं । तज्झि इतो पुब्बे तादिसस्स समुट्ठानसीसस्स अनागतत्ता “अपुब्बसमुट्ठानसीस”न्ति वुत्तं ।

११६६. एकादसमादीनि उत्तानत्थानेव ।

कुमारिभूतवग्गवण्णना निद्धिता ।

#### ९. छत्तुपाहनवग्गवण्णना

१२१४. छत्तुपाहनवग्गस्स एकादसमे उपचारं सन्धायाति समन्ता द्वादसहत्थुपचारं सन्धाय । सेसं सब्बत्थ उत्तानमेव ।

छत्तुपाहनवग्गवण्णना निट्ठिता ।

गिरग्गसमज्जादीनि अचित्तकानि लोकवज्जानीति वुत्तत्ता नच्चन्ति वा वण्णकन्ति वा अजानित्वाव पस्सन्तिया वा नहायन्तिया वा आपत्तिसम्भवतो वत्थुअजाननचित्तेन **अचित्तकानि**, नच्चन्ति वा वण्णकन्ति वा जानित्वा पस्सन्तिया वा नहायन्तिया वा अकुसलेनेव आपज्जनतो **लोकवज्जानीति** वेदितब्बानि । चोरीवुट्ठापनादीनि **चोरीति** आदिना वत्थुं जानित्वा करणे एव आपत्तिसम्भवतो **सचित्तकानि**, उपसम्पदादीनं एकन्तअकुसलचित्तेनेव अकत्तब्बत्ता **पण्णत्तिवज्जानि** । “इध सचित्तकाचित्तकता पण्णत्तिजाननाजाननताय अग्गहेत्वा वत्थुजाननाजाननताय गहेतब्बा”ति तीसुपि **गण्ठपदेसु** वुत्तं । सेसमेत्थ उत्तानत्थमेव ।

भिक्षुनीविभङ्गे खुद्दकवण्णना निट्ठिता ।

पाचित्तियकण्डं निट्ठितं ।

## ५. पाटिदेसनीयकण्डं (भिक्षुनीविभङ्गवण्णना)

पाटिदेसनीयसिक्खापदवण्णना

१२२८. पाटिदेसनीया नाम ये अट्ठ धम्मा सङ्खेपेनेव सङ्गहं आरुळ्हाति सम्बन्धो । **पाळिविनिमुत्तकेसूति** पाळियं अनागतेसु सप्पिआदीसु ।

पाटिदेसनीयसिक्खापदवण्णना निट्ठिता ।

पाटिदेसनीयकण्डं निट्ठितं ।

ये पन पञ्चसत्तति सेखिया धम्मा उट्ठिट्ठा, ये च तेसं अनन्तरा सत्ताधिकरणव्हाया धम्मा उट्ठिट्ठाति सम्बन्धो । तत्थ **तेसन्ति** तेसं सेखियानं । **सत्ताधिकरणव्हायाति** सत्ताधिकरणसमथसङ्घाता । तं अत्थविनिच्छयं तादिसंयेव यस्मा विदू वदन्तीति अत्थो ।

यथा निट्ठिताति सम्बन्धो । **सब्बासवपहं मग्गन्ति** सब्बासवविधातकं अरहत्तमग्गं **पत्त्वा** ससन्ताने उप्पादेत्वा । **पस्सन्तु निब्बुतिन्ति** मग्गजाणलोचनेन निब्बानं सच्छिकरोन्तु, पप्पोन्तूति वा पाठो । तत्थ **निब्बुतिन्ति** खन्धपरिनिब्बानं गहेतब्बं ।

इति समन्तपासादिकाय विनयट्ठकथाय सारत्थदीपनियं ।

भिक्षुनीविभङ्गवण्णना निट्ठिता ।

उभतोविभङ्गट्ठकथावण्णना निट्ठिता ।

पाचित्तियवण्णना निट्ठिता ।

॥ नमो तस्स भगवतो अरहतो सम्मासम्बुद्धस्स ॥

## महावग्ग-टीका

### १. महाखन्धकं

#### बोधिकथावण्णना

इदानी उभतोविभङ्गानन्तरं सङ्गहमारोपितस्स महावग्गचूळवग्गसङ्गहितस्स खन्धकस्स अत्थसंवण्णनं आरभितुकामो “उभिन्नं पातिमोक्खान”न्तिआदिमाह । तत्थ उभिन्नं पातिमोक्खानन्ति उभिन्नं पातिमोक्खविभङ्गानं । पातिमोक्खगहणेन हेत्थ तेसं विभङ्गो अभेदेन गहितो । यं खन्धकं सङ्गायिसूति सम्बन्धो । खन्धानं समूहो खन्धको, खन्धानं वा पकासनतो दीपनतो खन्धको । “खन्धा”ति चेत्थ पब्बज्जुपसम्पदादिविनयकम्मसङ्घाता चारित्तवारित्तसिक्खापदसङ्घाता च पज्जत्तियो अधिप्पेता । पब्बज्जादीनि हि भगवता पज्जत्तत्ता “पज्जत्तियो”ति वुच्चन्ति । पज्जत्तियञ्च खन्धसद्दो दिस्सति “दारुक्खन्धो अगिक्खन्धो”तिआदीसु विय । अपिच भागरासट्टतापेत्थ युज्जतियेव तासं पज्जत्तीनं भागतो रासितो च विभत्तत्ता । खन्धकोविदाति पज्जत्तिभागरासट्टवसेन खन्धट्टे कोविदा ।

पदभाजनीये येसं पदानं अत्था येहि अट्टकथानयेहि पकासिताति योजेतब्बं । ते चे पुन वदेय्यामाति ते चे अट्टकथानये पुनपि वदेय्याम । अथ वा पदभाजनीये येसं पदानं ये अत्था हेट्ठा पकासिता, ते चे अत्थे पुन वदेय्यामाति योजेतब्बं । इमस्मिं पक्खे हि-सद्दो पदपूरणे दट्टब्बो । परियोसानन्ति संवण्णनापरियोसानं । उत्ताना चेव ये अत्थाति ये अत्था पुब्बे अपकासितापि उत्ताना अगम्भीरा ।

१. विसेसकारणं नत्थीति “येन समयेन आयस्मतो सारिपुत्तत्थेरस्स सिक्खापदपज्जत्तियाचनहेतुभूतो परिवितक्को उदपादि, तेन समयेना”तिआदिना वुत्तकारणं विय इध विसेसकारणं नत्थि । अयमभिलापोति “तेन समयेना”ति अयमभिलापो । किं पनेतस्स वचने पयोजनन्ति यदि विसेसकारणं नत्थि, एतस्स वचने किं पयोजनन्ति अधिप्पायो । निदानदस्सनं पयोजनन्ति योजेतब्बं । तमेव विभावेतुं “या हि भगवता”तिआदि वुत्तं ।

महावेला विय महावेला, विपुलवालुकपुज्जताय महन्तो वेलातटो वियाति अत्थो । तेनाह “महन्ते वालिकरासिम्हीति अत्थो”ति । उरु मरु सिकता वालुका वण्णु वालिकाति इमे सद्दा समानत्था, ब्यज्जनमेव नानं । तेनाह “उरूति वालिका वुच्चती”ति ।

इतो पट्टाय च —

यस्मा सुत्तन्तपाळीनं, अत्थो सङ्खेपवण्णितो ।

तस्मा मयं करिस्साम, तासं अत्थस्स दीपनं ॥

नज्जाति (उदा० अट्ट० १) नदति सन्दतीति नदी, तस्सा नज्जा, नदिया निन्नगायाति अत्थो । नेरज्जरायाति “नेलज्जलाया”ति वत्तब्बे ल-कारस्स र-कारं कत्वा “नेरज्जराया”ति वुत्तं, कद्दमसेवालपणकादिदोसरहितसलिलायाति

अत्थो । केचि “नीलंजलायाति वत्तब्बे नेरञ्जरायाति वुत्त”न्ति वदन्ति, नाममेव वा एतं तस्सा नदियाति वेदितब्बं । तस्सा नदिया तीरे यत्थ भगवा विहासि, तं दस्सेतुं “**बोधिरुक्खमूले**”ति वुत्तं । “बोधि वुच्चति चतूसु मग्गेसु जाण”न्ति (चूळव० खग्गविसाणसुत्तनिद्देस १२१) एत्थ मग्गजाणं बोधीति वुत्तं, “पप्पोति बोधिं वरभूरिमेधसो”ति (दी० नि० ३.२१७) एत्थ सब्बञ्जुतञ्जाणं । तदुभयमपि बोधिं भगवा एत्थ पत्तोति रुक्खोपि “बोधिरुक्खो”त्वेव नामं लभि । अथ वा सत्त बोज्झङ्गे बुज्झतीति भगवा **बोधि** । तेन बुज्झन्तेन सन्निस्सितत्ता सो रुक्खो “बोधिरुक्खो”ति नामं लभि । अट्टकथायं पन एकदेसेनेव अत्थं दस्सेतुं “**बोधि वुच्चति चतूसु मग्गेसु जाण**”न्तिआदि वुत्तं । **मूले**ति समीपे । **पठमाभिसम्बुद्धो**ति अनुनासिकलोपेनायं निद्देसोति आह “**पठमं अभिसम्बुद्धो**”ति । **पठमन्ति** च भावनपुंसकनिद्देसो, तस्मा अभिसम्बुद्धो हुत्वा सब्बपठमं बोधिरुक्खमूले विहरतीति एवमेत्थ सम्बन्धो वेदितब्बो ।

**अथ खो भगवा**ति एत्थ **अथा**ति तस्मिं समयेति एवमत्थो गहेतब्बो अनेकत्थत्ता निपातानं, यस्मिं समये अभिसम्बुद्धो हुत्वा बोधिरुक्खमूले विहरति, तस्मिं समयेति अत्थो । तेनेव **उदानपाळियं** (उदा० २) “तेन खो पन समयेन भगवा सत्ताहं एकपल्लङ्केन निसिन्नो होति विमुत्तिसुखपटिसंवेदी”ति वुत्तं । **अथा**ति वा पच्छाति इमस्मिं अत्थे निपातो, तस्मा अभिसम्बोधितो पच्छाति एवमत्थो गहेतब्बो । **खो**ति पदपूरणे निपातो । सत्त अहानि **सत्ताहं** । अच्चन्तसंयोगे चेतं उपयोगवचनं । यस्मा भगवा तं सत्ताहं निरन्तरताय अच्चन्तमेव फलसमापत्तिसुखेन विहासि, तस्मा “सत्ताह”न्ति अच्चन्तसंयोगवसेन उपयोगवचनं वुत्तं । **एकपल्लङ्केना**ति विसाखपुण्णमाय अनत्थङ्गतेयेव सूरिये अपराजितपल्लङ्कवसेन वजिरासने निसिन्नकालतो पट्टाय सकिम्पि अनुद्वहत्वा यथाभुजितेन एकेनेव पल्लङ्केन ।

**विमुत्तिसुखपटिसंवेदी**ति एत्थ तदङ्गविक्रम्भनसमुच्छेदपटिप्पस्सद्विनिस्सरणविमुत्तीसु पञ्चसु पटिप्पस्सद्विविमुत्तिसङ्घाता भगवतो फलविमुत्ति अधिप्पेताति आह “**विमुत्तिसुखं फलसमापत्तिसुखं पटिसंवेदयमानो**”ति । **विमुत्ती**ति च उपविकलेसेहि पटिप्पस्सद्विवसेन चित्तस्स विमुत्तभावो, चित्तमेव वा तथा विमुत्तं वेदितब्बं । ताय विमुत्तिया जातं, सम्पयुत्तं वा सुखं विमुत्तिसुखं । “यायं, भन्ते, उपेक्खा सन्ते सुखे वुत्ता भगवता”ति (म० नि० २.८८) वचनतो उपेक्खापि चेत्य सुखमिच्चेव वेदितब्बा । तथा हि वुत्तं **सम्मोहविनोदनियं** (विभ० अट्ट० २३२) “उपेक्खा पन सन्तत्ता, सुखमिच्चेव भासिता”ति । भगवा हि चतुत्थज्झानिकं अरहत्तफलसमापत्तिं समापज्जति, न इतरं । अथ वा “तेसं वूपसमो सुखो”तिआदीसु (दी० नि० २.२२१, २७२) यथा सङ्खारदुक्खवूपसमो “सुखो”ति वुच्चति, एवं सकलकिलेसदुक्खवूपसमभावतो अगगफले लब्धमाना पटिप्पस्सद्विविमुत्ति एव इध “सुख”न्ति वेदितब्बा ।

**अथा**ति अधिकारत्थे निपातो, **खो**ति पदपूरणे । तेसु अधिकारत्थेन “अथा”ति इमिना विमुत्तिसुखपटिसंवेदनतो अञ्जं अधिकारं दस्सेति । को पनेसोति? पटिच्चसमउप्पादमनसिकारो । **रत्तिया**ति अवयवसम्बन्धे सामिवचनं । **पठमन्ति** अच्चन्तसंयोगत्थे उपयोगवचनं । भगवा हि तस्सा रत्तिया सकलमपि पठमं यामं तेनेव मनसिकारेन युत्तो अहोसीति ।

**पच्चयाकारन्ति** अविज्जादिपच्चयधम्मं । **पटिच्चा**ति पटिमुखं गन्त्वा, कारणसामग्गिं अपटिक्खिपित्वाति अत्थो । पटिमुखगमनञ्च पच्चयस्स कारणसामग्गिया अङ्गभावेन फलस्स उप्पादनमेव । **अपटिक्खिपित्वा**ति पन विना ताय कारणसामग्गिया अङ्गभावं अगन्त्वा सयमेव न उप्पादेतीति अत्थो । एतेन कारणबहुता दस्सिता । अविज्जादिआकेकहेतुसीसेन हि हेतुसमूहो निद्विद्वो । **सहिते**ति समुदिते, अविनिब्भुत्तेति अत्थो । अविज्जादिको हि पच्चयधम्मो सहितेयेव अञ्जमञ्जं अविनिब्भोगवृत्तिधम्मे उप्पादेति । इमिना पच्चयुप्पन्नधम्मबहुता दस्सिता । उभयेनपि “एकं न एकतो”तिआदिनयो (विभ० अट्ट० २२६ सङ्खारपदनिद्देस; विसुद्धि० २.६१७) दीपितो होति । एकतो हि कारणतो न

इध किञ्चि एकं फलमत्थि, न अनेकं, नापि अनेकेहि कारणेहि एकं, अनेकेहि पन कारणेहि अनेकमेव होति । तथा हि अनेकेहि उतुपथवीबीजसलिलसङ्घातेहि कारणेहि अनेकमेव रूपगन्धरसादिअङ्कुरसङ्घातं फलमुप्पज्जमानं दिस्सति । यं पनेतं “अविज्जापच्चया सङ्गारा, सङ्गारपच्चया विज्जाण”न्ति एकेकहेतुफलदीपनं कतं, तत्थ पयोजनं न विज्जति ।

भगवा हि कत्थचि पधानत्ता कत्थचि पाकटत्ता कत्थचि असाधारणत्ता देसनाविलासस्स च वेनेय्यानञ्च अनुरूपतो एकमेव हेतुं वा फलं वा दीपेति । “फस्सपच्चया वेदना”ति हि एकमेव हेतुं फलञ्चाह । फस्सो हि वेदनाय पधानहेतु यथाफस्सं वेदनाववत्थानतो । वेदना च फस्सस्स पधानफलं यथावेदनं फस्सववत्थानतो । “सेम्हसमुट्ठाना आबाधा”ति (महानि० ५) पाकटत्ता एकं हेतुं आह । पाकटो हि एत्थ सेम्हो, न कम्मादयो । “ये केचि, भिक्खवे, अकुसला धम्मा, सब्बेते अयोनिमोमनसिकारमूलका”ति असाधारणत्ता एकं हेतुं आह । असाधारणो हि अयोनिमोमनसिकारो अकुसलानं, साधारणानि वत्थारम्मणादीनीति । तस्मा अविज्जा तावेत्थ विज्जमानेसुपि अज्जेसु वत्थारम्मणसहजातधम्मादीसु सङ्गारकारणेषु “अस्सादानुपस्सिनो तण्हा पवड्ढती”ति (सं० नि० २.५२) च “अविज्जासमुदया आसवसमुदयो”ति (म० नि० १.१०४) च वचनतो अज्जेसम्पि तण्हादीनं सङ्गारहेतून् हेतूति पधानत्ता, “अविद्वा, भिक्खवे, अविज्जागतो पुज्जाभिसङ्गारम्पि अभिसङ्गारोती”ति पाकटत्ता असाधारणत्ता च सङ्गारानं हेतुभावेन दीपिताति वेदितब्बा । एवं सब्बत्थ एकेकहेतुफलदीपने यथासम्भवं नयो नेतब्बो । तेनाहु पोराणा —

“एकं न एकतो इध, नानेकमनेकतोपि नो एकं ।

फलमत्थि अत्थि पन एक-हेतुफलदीपने अत्थो”ति ॥

पच्चेतुमरहतीति **पटिच्चो** । यो हि नं पच्चेति अभिसमेति, तस्स अच्चन्तमेव दुक्खवूपसमाय संवत्तति । सम्मा सह च उप्पादेतीति **समुप्पादो** । पच्चयधम्मो हि अत्तनो फलं उप्पादेन्तो सम्पुण्णमेव उप्पादेति, न विकलं । ये च धम्मे उप्पादेति, ते सब्बे सहेव उप्पादेति, न एकेकं । इति पटिच्चो च सो समुप्पादो चाति **पटिच्चसमुप्पादो**ति एवम्पेत्य अत्थो दट्ठब्बो । **वित्थारोति** पटिच्चसमुप्पादपदवण्णनापपञ्चो । मयम्पि तं अतिपपञ्चभया इध न दस्सयिस्साम, एवं परतो वक्खमानम्पि वित्थारं । **अनुलोमपटिलोमन्ति** भावनपुंसकनिद्देशो “विसमं चन्दिमसूरिया परिवत्तन्ती”ति आदीसु (अ० नि० ४.७०) विय । **स्वेवाति** सो एव पच्चयाकारो । **पुरिमनयेन वा वुत्तोति** “अविज्जापच्चया सङ्गारा”ति आदिना नयेन वुत्तो पच्चयाकारो । **पवत्तियाति** संसारप्पवत्तिया । **मनसि अकासीति** यो यो पच्चयधम्मो यस्स यस्स पच्चयुप्पन्नधम्मस्स यथा यथा हेतुपच्चयादिना पच्चयभावेन पच्चयो होति, तं सब्बं अविपरीतं अपरिहापेत्वा अनवसेसतो पच्चवेक्खणवसेन चित्ते अकासीति अत्थो ।

**अविज्जापच्चयाति** आदीसु (विभ० अट्ठ० २२५; विसुद्धि० २.५८६-५८७; उदा० अट्ठ० १) अविन्दियं कायदुच्चरितादिं विन्दतीति **अविज्जा**, विन्दियं कायसुचरितादिं न विन्दतीति अविज्जा, धम्मानं अविपरीतसभावं अविदितं करोतीति अविज्जा, अन्तविरहिते संसारे भवादीसु सत्ते जवापेतीति अविज्जा, अविज्जमानेसु जवति, विज्जमानेसु न जवतीति अविज्जा, विज्जापटिपक्खाति वा अविज्जा । सा “दुक्खे अज्जाण”न्ति आदिना चतुब्बिधा वेदितब्बा । पटिच्च नं न विना फलं एति उप्पज्जति चेव पवत्तति चाति **पच्चयो**, उपकारट्ठो वा पच्चयो । अविज्जा च सा पच्चयो चाति अविज्जापच्चयो, तस्मा **अविज्जापच्चया** । सङ्गारोन्तीति **सङ्गारा**, लोकिया कुसलाकुसलचेतना । ते पुज्जापुज्जानेज्जाभिसङ्गारवसेन ति विधा वेदितब्बा । विजानातीति **विज्जाणं**, तं लोकियविपाकविज्जाणवसेन बात्तिसविधं । नमतीति **नामं**, वेदनादिक्खन्धत्तयं । रूप्पतीति **रूपं**, भूतरूपं चक्खादिउपादारूपञ्च । आयतन्ति, आयतञ्च संसारदुक्खं

नयतीति **आयतनं** । फुसतीति **फस्सो** । वेदयतीति **वेदना** । इदम्पि द्वयं द्वारवसेन छब्बिधं, विपाकवसेन गहणे बात्तिसविधं । तस्सति परितस्सतीति **तण्हा**, सा कामतण्हादिवसेन सङ्खेपतो तिविधा, वित्थारतो अट्टसतविधा च । उपादियतीति **उपादानं**, तं कामुपादानादिवसेन चतुब्बिधं ।

भवति भावयति चाति **भवो**, सो कम्मोपपत्तिभेदतो दुविधो । जननं **जाति** । जीरणं **जरा** । मरन्ति तेनाति **मरणं** । सोचनं **सोको** । परिदेवनं **परिदेवो** । दुक्खयतीति **दुक्खं** । उप्पादट्ठितिवसेन द्वेधा खनतीति वा **दुक्खं** । दुम्भनस्स भावो **दोमनस्सं** । भुसो आयासो **उपायासो** । **सम्भवन्तीति** निब्बत्तन्ति । न केवलञ्च सोकादीहेव, अथ खो सब्बपदेहि “सम्भवन्ती”ति पदस्स योजना कातब्बा । एवञ्हि अविज्जापच्चया सङ्खारा सम्भवन्तीति पच्चयपच्चयुप्पन्नवत्थानं दस्सितं होति । तेनेवाह “अविज्जापच्चया सङ्खारा सम्भवन्तीति इमिना नयेन सब्बपदेसु अत्थो वेदितब्बो”ति । एवमेतस्स...पे०... समुदयो होतीति एत्थ पन अयमत्थो । एवन्ति निद्विद्वनयनिदस्सनं । तेन अविज्जादीहेव कारणेहि, न इस्सरनिम्मानादीहीति दस्सेति । एतस्साति यथावुत्तस्स । **केवलस्साति** असम्मिस्सस्स, सकलस्स वा । **दुक्खक्खन्धस्साति** दुक्खसमूहस्स, न सत्तस्स नापि सुभसुखादीनं । **समुदयो** होतीति निब्बत्ति सम्भवति ।

अच्चन्तमेव सङ्खारेहि विरज्जति एतेनाति **विरागो**, अरियमग्गोति आह “**विरागसङ्खातेन मग्गेना**”ति । असेसं निरोधा **असेसनिरोधा**, असेसेत्वा निस्सेसेत्वा निरोधा समुच्छिन्दना अनुसयप्पहानवसेन अग्गमग्गेन अविज्जाय अच्चन्तसमुग्घाततोति अत्थो । यदिपि हेट्ठिमग्गेहिपि पहीयमाना अविज्जा अच्चन्तसमुग्घातवसेनेव पहीयति, तथापि न अनवसेसतो पहीयति । अपायगमनीया हि अविज्जा पठमग्गेन पहीयति, तथा सकिदेव इमस्मिं लोके सब्बत्थ च अनरियभूमियं उपपत्तिया पच्चयभूता अविज्जा यथाक्कमं दुतियततियमग्गेहि पहीयति, न इतराति, अरहत्तमग्गेनेव पन सा अनवसेसं पहीयतीति । **अनुप्पादनरोधो** होतीति सब्बेसं सङ्खारानं अनवसेसं अनुप्पादनरोधो होति । हेट्ठिमेन हि मग्गत्तयेन केचि सङ्खारा निरुज्झन्ति, केचि न निरुज्झन्ति अविज्जाय सावसेसनिरोधा, अग्गमग्गेन पनस्सा अनवसेसनिरोधा न केचि सङ्खारा न निरुज्झन्तीति । **एवं निरुद्धानन्ति** एवं अनुप्पादनरोधेन निरुद्धानं । **केवल-**सद्धो निरवसेसवाचको च होति “केवला अङ्गमग्घा”तिआदीसु । असम्मिस्सवाचको च “केवला सालयो”तिआदीसु । तस्मा उभयथापि अत्थं वदति “**सकलस्स, सुद्धस्स वा**”ति । तत्थ **सकलस्साति** अनवसेसस्स सब्बभवादिगतस्स । **सत्तविरहितस्साति** परपरिकप्पितजीवरहितस्स ।

अपिचेत्थ किञ्चापि “अविज्जानिरोधा सङ्खारनिरोधो, सङ्खारनिरोधा विज्जाणनिरोधो”ति एत्तावतापि सकलस्स दुक्खक्खन्धस्स अनवसेसतो निरोधो वुत्तो होति, तथापि यथा अनुलोमे यस्स यस्स पच्चयधम्मस्स अत्थिताय यो यो पच्चयुप्पन्नधम्मो न निरुज्झति पवत्तति एवाति इमस्स अत्थस्स दस्सनत्थं “अविज्जापच्चया सङ्खारा...पे०... समुदयो होती”ति वुत्तं । एवं तप्पटिपक्खतो तस्स तस्स पच्चयस्स अभावे सो सो पच्चयुप्पन्नधम्मो निरुज्झति न पवत्ततीति दस्सनत्थं इध “अविज्जानिरोधा सङ्खारनिरोधो, सङ्खारनिरोधा विज्जाणनिरोधो, विज्जाणनिरोधा नामरूपनिरोधो...पे०... दुक्खक्खन्धस्स निरोधो होती”ति वुत्तं, न पन अनुलोमे विय कालत्तयपरियापन्नस्स दुक्खक्खन्धस्स निरोधदस्सनत्थं । अनागतस्सेव हि अरियमग्गभावनाय असति उप्पज्जनारहस्स दुक्खक्खन्धस्स अरियमग्गभावनाय निरोधो इच्छितोति अयम्पि विसेसो वेदितब्बो ।

**यदा हवेति** एत्थ **हवेति** व्यत्तन्ति इमस्मिं अत्थे निपातो । केचि पन “हवेति आहवे युद्धे”ति अत्थं वदन्ति, “योधेथ मारं पज्जावुधेना”ति (ध० प० ४०) हि वचनतो किलेसमारेन युज्जनसमयेति तेसं अधिप्पायो ।



आरम्भणूपनिज्झानलक्खणेनाति आरम्भणूपनिज्झानसभावेन । लक्खणूपनिज्झानलक्खणेनाति एत्थापि एसेव नयो । तत्थ आरम्भणूपनिज्झानं नाम अट्ठ समापत्तियो कसिणारम्भणस्स उपनिज्झायनतो । लक्खणूपनिज्झानं नाम विपस्सनामग्गफलानि । विपस्सना हि तीणि लक्खणानि उपनिज्झायतीति लक्खणूपनिज्झानं, मग्गो विपस्सनाय आगतकिच्चं साधेतीति लक्खणूपनिज्झानं, फलं तथलक्खणं निरोधसच्चं उपनिज्झायतीति लक्खणूपनिज्झानं । नो कल्लो पज्जोति अयुत्तो पज्जो, दुप्पज्जो एसोति अत्थो । आदिसद्देन —

“फुसतीति अहं न वदामि । फुसतीति चाहं वदेय्यं, तत्रस्स कल्लो पज्जो ‘को नु खो, भन्ते, फुसती’ति? एवञ्चाहं न वदामि, एवं मं अवदन्तं यो एवं पुच्छेय्य ‘किंपच्चया नु खो, भन्ते, फस्सो’ति, एस कल्लो पज्जो । तत्र कल्लं वेय्याकरणं ‘सळायतनपच्चया फस्सो, फस्सपच्चया वेदना’ति । को नु खो, भन्ते, वेदयतीति? नो कल्लो पज्जोति भगवा अवोच, वेदयतीति अहं न वदामि, वेदयतीति चाहं वदेय्यं, तत्रस्स कल्लो पज्जो ‘को नु खो, भन्ते, वेदयती’ति? एवञ्चाहं न वदामि । एवं मं अवदन्तं यो एवं पुच्छेय्य ‘किंपच्चया नु खो, भन्ते, वेदना’ति, एस कल्लो पज्जो । तत्र कल्लं वेय्याकरणं ‘फस्सपच्चया वेदना, वेदनापच्चया तण्हा’”ति (सं० नि० २.१२) —

एवमादिं पाळिसेसं सङ्गहति ।

आदिना च नयेनाति एत्थ आदि-सद्देन पन “कतमा नु खो, भन्ते, जाति, कस्स च पनायं जातीति । ‘नो कल्लो पज्जो’ति भगवा अवोचा”ति एवमादिं सङ्गहति । ननु चेत्थ “कतमं नु खो, भन्ते, जरामरण”न्ति (सं० नि० २.३५) इदं सुपुच्छितन्ति? किञ्चापि सुपुच्छितं, यथा पन सतसहस्सग्घनके सुवण्णथालके वड्डितस्स सुभोजनस्स मत्थके आमलकमत्ते गूथपिण्डे ठपिते सब्बं भोजनं दुब्भोजनं होति छट्ठेत्तब्बं, एवमेव “कस्स च पनिदं जरामरण”न्ति इमिना सत्तूपलद्धिवादपदेन गूथपिण्डेन तं भोजनं दुब्भोजनं विय अयम्पि सब्बो दुप्पज्जो जातोति ।

सोळस कङ्कति “अहोसिं नु खो अहं अतीतमद्धानं, न नु खो अहोसिं, किं नु खो अहोसिं, कथं नु खो अहोसिं, किं हुत्वा किं अहोसिं नु खो अहं अतीतमद्धानं, भविस्सामि नु खो अहं अनागतमद्धानं, न नु खो भविस्सामि, किं नु खो भविस्सामि, कथं नु खो भविस्सामि, किं हुत्वा किं भविस्सामि नु खो अहं अनागतमद्धानं, अहं नु खोस्मि, नो नु खोस्मि, किं नु खोस्मि, कथं नु खोस्मि, अयं नु खो सत्तो कुतो आगतो, सो कुहिं गामी भविस्सती”ति (सं० नि० २.२०; म० नि० १.१८) एवमागता अतीतानागतपच्चुप्पन्नविसया सोळसविधा कङ्कति ।

तत्थ (म० नि० अट्ठ० १.१८; सं० नि० अट्ठ० २.२.२०) अहोसिं नु खो, न नु खोति सस्सताकारञ्च अधिच्चसमुप्पत्तिआकारञ्च निस्साय अतीते अत्तनो विज्जमानतञ्च अविज्जमानतञ्च कङ्कति, किं कारणन्ति न वत्तब्बं । उम्मत्तको विय हि बालपुथुज्जनो यथा तथा वा पवत्तति । अपिच अयोनिमनसिकारोयेवेत्थ कारणं । एवं अयोनिमनसिकारस्स पन किं कारणन्ति? स्वेव पुथुज्जनभावो अरियानं अदस्सनादीनि वा । ननु च पुथुज्जनोपि योनिसो मनसि करोतीति । को वा एवमाह “न मनसि करोती”ति । न पन तत्थ पुथुज्जनभावो कारणं, सद्धम्मसवनकल्याणमित्तादीनि तत्थ कारणानि । न हि मच्छमंसादीनि अत्तनो पकतिया सुगन्धानि, अभिसङ्खारपच्चया पन सुगन्धानिपि होन्ति ।

किं नु खो अहोसिन्ति जातिलिङ्गुपपत्तियो निस्साय “खत्तियो नु खो अहोसिं, ब्राह्मणवेस्ससुद्दहट्ठपब्बजितदेवमनुस्सानं अज्जतरो”ति कङ्कति ।

**कथं नु खो**ति सण्ठानाकारं निस्साय “दीघो नु खो अहोसिं, रस्सओदातकण्हप्पमाणिकअप्पमाणिकादीनं अज्जतरो”ति कङ्कति । केचि पन “इस्सरनिम्मानादिं निस्साय ‘केन नु खो कारणेन अहोसिं’न्ति हेतुतो कङ्कती”ति वदन्ति ।

**किं हुत्वा किं अहोसिन्ति** जातिआदीनि निस्साय “खत्तियो हुत्वा नु खो ब्राह्मणो अहोसिं...पे०... देवो हुत्वा मनुस्सो”ति अत्तनो परम्परं कङ्कति । सब्बत्थेव पन अब्बानन्ति कालाधिवचनमेतं, तज्ज भुम्मत्थे उपयोगवचनं दट्ठब्बं ।

**भविस्सामि नु खो, न नु खो**ति सस्सताकारज्ज उच्छेदाकारज्ज निस्साय अनागते अत्तनो विज्जमानतज्ज अविज्जमानतज्ज कङ्कति । सेसमेत्थ वुत्तनयमेव ।

**अहं नु खोस्मी**ति अत्तनो अत्थिभावं कङ्कति । युत्तं पनेतन्ति? युत्तं अयुत्तन्ति का एत्थ चिन्ता । अपिचेत्थ इदं वत्थुम्पि उदाहरन्ति, चूळमाताय किर पुत्तो मुण्डो, महामाताय पुत्तो अमुण्डो । तं सुत्तं मुण्डेसुं । सो उट्ठाय “अहं नु खो चूळमाताय पुत्तो”ति चिन्तेसि । एवं “अहं नु खोस्मी”ति कङ्कति होति ।

**नो नु खोस्मी**ति अत्तनो नत्थिभावं कङ्कति । तत्रापि इदं वत्थु — एको किर मच्छे गण्हन्तो उदके चिरट्टानेन सीतिभूतं अत्तनो ऊरुं “मच्छो”ति चिन्तेत्वा पहरि । अपरो सुसानपस्से खेत्तं रक्खन्तो भीतो सङ्कुटितो सयि । सो पटिबुज्झित्वा अत्तनो जण्णुकानि “द्वे यक्खा”ति चिन्तेत्वा पहरि, एवं “नो नु खोस्मी”ति कङ्कति ।

**किं नु खोस्मी**ति खत्तियोव समानो अत्तनो खत्तियभावं कङ्कति कण्णो विय सूतपुत्तसज्जी । एस नयो सेसेसु । देवो पन समानो देवभावं अजानन्तो नाम नत्थि । सोपि पन “अहं रूपी नु खो अरूपी नु खो”तिआदिना नयेन कङ्कति । खत्तियादयो कस्मा न जानन्तीति चे? अप्पच्चक्खा तेसं तत्थ तत्थ कुले उप्पत्ति । गहट्ठापि च पातलिकादयो पब्बजितसज्जिनो । पब्बजितापि “कुप्पं नु खो मे कम्म”न्तिआदिना नयेन गहट्ठसज्जिनो । मनुस्सापि च एकच्चे राजानो विय अत्तनि देवसज्जिनो होन्ति ।

**कथं नु खोस्मी**ति वुत्तनयमेव । केवलज्हेत्थ अब्भन्तरे जीवो नाम अत्थीति गहेत्वा तस्स सण्ठानाकारं निस्साय “दीघो नु खोस्मि, रस्सचतुरस्सछळंसअट्ठंससोळसंसादीनं अज्जतरप्पकारो”ति कङ्कन्तो “कथं नु खोस्मी”ति कङ्कतीति वेदितब्बो । सरीरसण्ठानं पन पच्चुप्पन्नं अजानन्तो नाम नत्थि ।

**कुतो आगतो, सो कुहिं गामी भविस्सती**ति अत्तभावस्स आगतिगतिट्ठानं कङ्कति ।

**वपयन्ती**ति विअपयन्ति, इकारलोपेनायं निद्देसो । व्यपयन्तीति वुत्तं होति । तेनाह “वपयन्ति अपगच्छन्ती”ति । अपगमनज्ज अनुप्पत्तिनिरोधवसेनाति आह “निरुज्जन्ती”ति ।

३. कदा पनस्स बोधिपक्खियधम्मा चतुसच्चधम्मा वा पातुभवन्ति उप्पज्जन्ति पकासन्तीति? विपस्सनामग्गजाणेसु पवत्तमानेसु । तत्थ **विपस्सनाजाणे** ताव विपस्सनाजाणसम्पयुत्ता सतिआदयो विपस्सनाजाणज्ज यथारहं अत्तनो अत्तनो विसयेसु तदङ्गप्पहानवसेन सुभसज्जादिके पजहन्ता कायानुपस्सनादिवसेन विसुं विसुं उप्पज्जन्ति । **मग्गक्खणे** पन ते निब्बानमालम्बित्वा समुच्छेदवसेन पटिपक्खे पजहन्ता चतूसुपि अरियसच्चेसु असम्मोहपटिवेधसाधनवसेन सकिदेव उप्पज्जन्ति । एवं तावेत्थ बोधिपक्खियधम्मानं उप्पज्जनट्ठेन पातुभावो वेदितब्बो । अरियसच्चधम्मानं पन लोकियानं **विपस्सनाक्खणे** विपस्सनाय आरम्भणकरणवसेन लोकुत्तरानं तदधिमुत्ततावसेन **मग्गक्खणे** निरोधसच्चस्स

आरम्भणाभिसमयवसेन सब्बेसम्पि किच्चाभिसमयवसेन पाकटभावतो पकासनट्टेन पातुभावो वेदितब्बो ।

इति भगवा सतिपि सब्बाकारेन सब्बधम्मानं अत्तनो जाणस्स पाकटभावे पटिच्चसमुप्पादमुखेन विपस्सनाभिनिवेसस्स कतत्ता निपुणगम्भीरसुदुद्दसताय पच्चयाकारस्स तं पच्चवेक्खित्वा उप्पन्नबलवसोमनस्सो पटिपक्खसमुच्छेदविभावनेन सद्धिं अत्तनो तदभिसमयानुभावदीपकमेवेत्थ उदानं उदानेसि ।

“कामा ते पठमा सेना”तिआदिना नयेन वुत्तप्पकारं मारसेनन्ति —

“कामा ते पठमा सेना, दुतिया अरति वुच्चति ।  
ततिया खुप्पिपासा ते, चतुत्थी तण्हा पवुच्चति ॥

“पञ्चमी थिनमिद्धं ते, छट्ठा भीरू पवुच्चति ।  
सत्तमी विचिकिच्छा ते, मक्खो थम्भो च अट्टमा ॥

“लाभो सिलोको सक्कारो, मिच्छालब्धो च यो यसो ।  
यो चत्तानं समुक्कंसे, परे च अवजानति ॥

“एसा नमुचि ते सेना, कण्हस्साभिप्पहारिनी ।  
न नं असूरो जिनाति, जेत्वा च लभते सुखं”न्ति ॥ (सु० नि० ४३८-४४१; महानि० २८) —

इमिना नयेन वुत्तप्पकारं मारसेनं ।

तत्थ (सु० नि० अट्ठ० २.४३९-४४१; महानि० अट्ठ० २८) यस्मा आदितोव अगारियभूते सत्ते वत्थुकामेसु किलेसकामा मोहयन्ति, ते अभिभुय्य अनगारियभावं उपगतानं पन्तेसु वा सेनासनेसु अज्जतरज्जतरेसु वा अधिकुसलेसु धम्मेसु अरति उप्पज्जति । वुत्तप्पि चेत्तं “पब्बजितेन खो, आवुसो, अभिरति दुक्करा”ति (सं० नि० ४.३३१) । ततो ते परपटिबद्धजीविकता **खुप्पिपासा** बाधति, तां बाधितानं परियेसन **तण्हा** चित्तं किलमयति, अथ नेसं किलन्तचित्तानं **थिनमिद्धं** ओक्कमति, ततो विसेसमनधिगच्छन्तानं दुरभिसम्भवेसु अरज्जवनपत्थेसु सेनासनेसु विहरतं उत्राससज्जिता **भीरू** जायति, तेसं उस्सङ्कितपरिसङ्कितानं दीघरत्तं विवेकरसमनस्सादयमानानं विहरतं “न सिया नु खो एस मग्गो”ति पटिपत्तियं **विचिकिच्छा** उप्पज्जति, तं विनोदेत्वा विहरतं अप्पमत्तकेन विसेसाधिगमेन **मानमक्खथम्भा** जायन्ति, तेपि विनोदेत्वा विहरतं ततो अधिकतरं विसेसाधिगमं निस्साय **लाभसक्कारसिलोका** उप्पज्जन्ति, लाभादिमुच्छिता धम्मपतिरूपकानि पकासेन्ता **मिच्छायसं** अधिगन्त्वा तत्थ ठिता जातिआदीहि **अत्तानं उक्कंसेन्ति परं वम्भेन्ति**, तस्मा कामादीनं पठमसेनादिभावो वेदितब्बो ।

एवमेत्तं दसविधं सेनं उद्दिसित्वा यस्मा सा कण्हधम्मसमन्नागतत्ता कण्हस्स नमुचिनो उपकाराय संवत्तति, तस्मा नं “तव सेना”ति निद्दिसन्तेन “एसा नमुचि ते सेना, कण्हस्साभिप्पहारिनी”ति वुत्तं । तत्थ **अभिप्पहारिनी**ति समणब्राह्मणानं घातनी निप्पोथनी, अन्तरायकरीति अत्थो । **न नं असूरो जिनाति, जेत्वा च लभते सुखं**ति एवं तव सेनं असूरो काये च जीविते च सापेक्खो पुरिसो न जिनाति, सूरु पन जिनाति, जेत्वा च मग्गसुखं फलसुखञ्च अधिगच्छतीति अत्थो । **सोपि ब्राह्मणो**ति सोपि खीणासवब्राह्मणो ।

इदानीं “तेन खो पन समयेन भगवा सत्ताहं एकपल्लङ्केन निसिन्नो होति विमुत्तिसुखपटिसंवेदी। अथ खो भगवा तस्स सत्ताहस्स अच्चयेन तम्हा समाधिम्हा वुट्ठहित्वा रत्तिया पठमं यामं पटिच्चसमुप्पादं अनुलोमं साधुकं मनसाकासि। रत्तिया मज्झिमं यामं पटिच्चसमुप्पादं पटिलोमं साधुकं मनसाकासि। रत्तिया पच्छिमं यामं पटिच्चसमुप्पादं अनुलोमपटिलोमं साधुकं मनसाकासी”ति एवं वुत्ताय उदानपाळिया (उदा० १) इमिस्सा च खन्धकपाळिया अविरोधं दस्सेतुं “उदाने पना”तिआदि आरब्धं। एत्थ तस्स वसेनाति तस्स पच्चयाकारपजाननस्स पच्चयक्खयाधिगमस्स च वसेन। **एकेकमेव कोट्टासन्ति** अनुलोमपटिलोमेसु एकेकमेव कोट्टासं। **पाटिपदरत्तिया एवं मनसाकासी**ति रत्तिया तीसुपि यामेसु अनुलोमपटिलोमंयेव मनसाकासि। भगवा किर ठपेत्वा रतनघरसत्ताहं सेसेसु छसु सत्ताहेसु अन्तरन्तरा धम्मं पच्चवेक्खित्वा येभुय्येन विमुत्तिसुखपटिसंवेदी विहासि, रतनघरसत्ताहे पन अभिधम्मपविचयवसेनेव विहासि। तस्मा अन्तरन्तरा धम्मपच्चवेक्खणवसेन उप्पादितमनसिकारेसु पाटिपदरत्तिया उप्पादितं मनसिकारं सन्धाय इमिस्सं खन्धकपाळियं एवं वुत्तन्ति अधिप्पायो।

बोधिकथावण्णना निड्ढिता।

### अजपालकथावण्णना

४. तस्स सत्ताहस्स अच्चयेनाति पल्लङ्कसत्ताहस्स अपगमनेन। तम्हा समाधिम्हा वुट्ठहित्वाति ततो अरहत्तफलसमापत्तिसमाधितो यथाकालपरिच्छेदं वुट्ठहित्वा। **अज्जेपि बुद्धत्तकराति** विसाखपुण्णमितो पट्टाय रत्तिन्दिवं एवं निच्चसमाहितभावहेतुभूतानं बुद्धगुणानं उपरि अज्जेपि बुद्धत्तसाधका। “अयं बुद्धो”ति बुद्धभावस्स परेसं विभावना धम्मा किं नु खो सन्तीति योजना। **एकच्चां देवतानन्ति** या अधिगतमग्गा सच्छिकतनिरोधा एकपदेसेन बुद्धगुणे जानन्ति, ता ठपेत्वा तदञ्जासं देवतानं। **अनिमिसेही**ति धम्मपीतिविष्कारवसेन पसादविभावनिच्चलदलताय निमेषरहितेहि। **रतनचङ्कमेति** देवताहि मापिते रतनमयचङ्कमे। “रतनभूतानं सत्तन्नं पकरणानं तत्थ च अनुत्तरस्स धम्मरतनस्स सम्मसनेन तं ठानं रतनघरचेतियं नाम जात”न्तिपि वदन्ति। तेनेव **अट्टसालिनियं** (ध० स० अट्ठ० निदानकथा) “रतनघरं नाम न रतनमयं गेहं, सत्तन्नं पन पकरणानं सम्मसितट्टानं रतनघरन्ति वेदितब्ब”न्ति वुत्तं।

कस्मा पनायं अजपालनिग्रोधो नाम जातोति आह “तस्स किरा”तिआदि। केचि पन “यस्मा तत्थ वेदे सज्झायितुं असमत्था महल्लकब्राह्मणा पाकारपरिक्खेपयुत्तानि निवेसनानि कत्वा सब्बे वसिंसु, तस्मास्स ‘अजपालनिग्रोधो’ति नामं जात”न्ति वदन्ति। तत्रायं वचनत्थो — न जपन्तीति अजपा, मन्तानं अनज्झायकाति अत्थो। अजपा लन्ति आदियन्ति निवासं एत्थाति **अजपालो**ति। अपरे पन वदन्ति “यस्मा मज्झन्हिके समये अन्तो पविट्ठे अजे अत्तनो छायाय पालेति रक्खति, तस्मा ‘अजपालो’तिस्स नामं रुळ्ळ”न्ति। सब्बथापि नाममेतं तस्स रुक्खस्स।

**विमुत्तिसुखं पटिसंवेदेन्तो**ति धम्मं विचिनन्तोयेव अन्तरन्तरा विमुत्तिसुखञ्च पटिसंवेदेन्तो। “धम्मं विचिनन्तो विमुत्तिसुखञ्च पटिसंवेदेन्तो”ति एवं वा एत्थ पाठो गहेतब्बो। उदानट्टकथायम्पि (उदा० अट्ठ० ४) हि अयमेव पाठो। धम्मं विचिनन्तो चेत्थ एवं अभिधम्मे नयमगं सम्मसि पठमं धम्मसङ्गणीपकरणं नाम, ततो विभङ्गप्पकरणं, धातुकथापकरणं, पुगगलपञ्चत्तिप्पकरणं, कथावत्थुं नाम, यमकं नाम, ततो महापकरणं पट्टानं नामाति। तत्थस्स सण्हसुखुमट्टानम्हि चित्ते ओतिण्णे पीति उप्पज्जि, पीतिया उप्पन्नाय लोहितं पसीदि, लोहिते पसन्ने छवि पसीदि, छविया पसन्नाय पुरत्थिमकायतो कूटागारादिप्पमाणा रस्मियो उट्ठहित्वा आकासे पक्खन्दं छदन्तनागकुलं विय पाचीनदिसाय अनन्तानि चक्कवाळानि पक्खन्दा। पच्छिमकायतो उट्ठहित्वा पच्छिमदिसाय, दक्खिणंसकूटतो उट्ठहित्वा दक्खिणदिसाय, वामंसकूटतो उट्ठहित्वा

उत्तरदिसाय अनन्तानि चक्कवाळानि पक्खन्दा । पादतलेहि पवाळङ्कुरवण्णा रस्मियो निक्खमित्वा महापथविं विनिब्बिज्झ उदकं द्विधा भिन्दित्वा वातक्खन्धं पदालेत्वा अजटाकासं पक्खन्दा । सीसतो संपरिवत्तियमानं मणिदामं विय नीलवण्णरस्मिवट्ठि उट्ठित्वा छ देवलोके विनिविज्झित्वा नव ब्रह्मलोके अतिकक्कम्म अजटाकासं पक्खन्दा । तस्मिं दिवसे अपरिमाणेसु चक्कवाळेसु अपरिमाणा सत्ता सब्बे सुवण्णवण्णाव अहेसुं । तं दिवसञ्च पन भगवतो सरीरा निक्खन्ता यावज्जदिवसापि किर ता रस्मियो अनन्तलोकधातुयो गच्छन्तियेव । न केवलञ्च इमस्मियेव सत्ताहे धम्मं विचिनन्तस्स सरीरतो रस्मियो निक्खमिंसु, अथ खो रतनघरसत्ताहेपि पट्टानं सम्मसन्तस्स एवमेव सरीरतो रस्मियो निक्खन्ता एवाति वेदितब्बं ।

वृत्तज्हेतं अट्टसालिनिंयं (ध० स० अट्ठ० निदानकथा) —

“इमेसु च एकवीसतिया दिवसेसु एकदिवसेपि सत्थु सरीरतो रस्मियो न निक्खन्ता, चतुत्थे पन सत्ताहे पच्छिमुत्तराय दिसाय रतनघरे निसीदि । तत्थ धम्मसङ्गणिं सम्मसन्तस्सपि सरीरतो रस्मियो न निक्खन्ता । विभङ्गप्पकरणं, धातुकथं, पुग्गलपञ्जत्तिं, कथावत्थुप्पकरणं, यमकप्पकरणं सम्मसन्तस्सपि रस्मियो न निक्खन्ता । यदा पन महापकरणं ओरुह् ‘हेतुपच्चयो आरम्भणपच्चयो... पे०... अविगतपच्चयो’ति सम्मसनं आरभि, अथस्स चतुवीसतिसमन्तपट्टानं सम्मसन्तस्स एकन्ततो सब्बञ्जुतञ्जाणं महापकरणे ओकासं लभि । यथा हि तिमिरपिङ्गलमहामच्छो चतुरासीतियोजनसहस्सगम्भीरे महासमुद्देयेव ओकासं लभति, एवमेव सब्बञ्जुतञ्जाणं एकन्ततो महापकरणेयेव ओकासं लभि ।

“सत्थु एवं लद्धोकासेन सब्बञ्जुतञ्जाणेन यथासुखं सण्हसुखुमधम्मं सम्मसन्तस्स सरीरतो नीलपीतलोहितोदातमज्जिट्टपभस्सरवसेन छब्बण्णरस्मियो निक्खमिंसु । केसमस्सूहि चेव अक्खीनञ्च नीलट्टानेहि नीलरस्मियो निक्खमिंसु, यासं वसेन गगनतलं अज्जनचुण्णसमोकिण्णं विय उमापुप्फनीलुप्पलदलसञ्छन्नं विय वीतिपतन्तमणितालवण्टं विय सम्पसारितमेचकपटं विय च अहोसि । छवितो चेव अक्खीनञ्च पीतट्टानेहि पीतरस्मियो निक्खमिंसु, यासं वसेन दिसाभागा सुवण्णरसनिसिञ्चमाना विय सुवण्णपटपसारिता विय कुङ्कुमचुण्णकणिकारपुप्फसम्परिकिण्णा विय च विरोचिंसु । मंसलोहितेहि चेव अक्खीनञ्च रत्तट्टानेहि लोहितरस्मियो निक्खमिंसु, यासं वसेन दिसाभागा चीनपिट्टचुण्णरज्जिता विय सुपक्कलाखारसनिसिञ्चमाना विय रत्तकम्बलपरिक्खित्ता विय जयसुमनपारिबद्धकबन्धुजीवककुसुमसम्परिकिण्णा विय च विरोचिंसु । अट्ठीहि चेव दन्तेहि च अक्खीनञ्च सेतट्टानेहि ओदातरस्मियो निक्खमिंसु, यासं वसेन दिसाभागा रजतकुटेहि आसिञ्चमानखीरधारासम्परिकिण्णा विय पसारितरजतपटविताना विय वीतिपतन्तरजततालवण्टा विय कुन्दकुमुदसिन्धुवारसुमनमल्लिकादिकुसुमसञ्छन्ना विय च विरोचिंसु । मज्जिट्टपभस्सरा पन तम्हा तम्हा सरीरप्पदेसा निक्खमिंसु । इति ता छब्बण्णरस्मियो निक्खमित्वा घनमहापथविं गण्हिंसु ।

“चतुनहुताधिकद्वियोजनसतसहस्सबहला महापथवी निद्धन्तसुवण्णपिण्डि विय अहोसि । पथविं भिन्दित्वा हेट्टा उदकं गण्हिंसु । पथवीसन्धारकं अट्टनहुताधिकचतुयोजनसतसहस्सबहलं उदकं सुवण्णकलसेहि आसिञ्चमानविलीनसुवण्णं विय अहोसि । उदकं विनिविज्झित्वा वातं अगगहेसुं । छन्नवुताधिकनवयोजनसतसहस्सबहलो वातो समुस्सितसुवण्णक्खन्धो विय अहोसि । वातं विनिविज्झित्वा हेट्टा अजटाकासं पक्खन्दिंसु । उपरिभागेन उगगन्त्वापि चतुमहाराजिके गण्हिंसु । ते विनिविज्झित्वा तावतिंसे, ततो

यामे, ततो तुसिते, ततो निम्मानरती, ततो परनिम्मितवसवती, ततो नव ब्रह्मलोके, ततो वेहप्फले, ततो पञ्च सुद्धावासे विनिविज्झित्वा चत्तारो आरुपे गण्हिंसु। चत्तारो च आरुपे विनिविज्झित्वा अजटाकासं पक्खन्दिंसु।

“तिरियभागेहि अनन्ता लोकधातुयो पक्खन्दिंसु, एतके ठाने चन्दम्हि चन्दप्पभा नत्थि, सूरिये सूरियप्पभा नत्थि, तारकरूपेसु तारकरूपप्पभा नत्थि, देवतानं उय्यानविमानकप्परुक्खेसु सरीरे आभरणेसूति सब्बत्थ पभा नत्थि। तिसहस्सिमहासहस्सिलोकधातुया आलोकफरणसमत्थो महाब्रह्मापि सूरियुगगमने खज्जोपनको विय अहोसि, चन्दसूरियतारकरूपदेवतुय्यानविमानकप्परुक्खानं परिच्छेदमत्तकमेव पज्जायित्थ। एतकं ठानं बुद्धरस्मीहियेव अज्झोत्थटं अहोसि। अयञ्च नेव बुद्धानं अधिद्धानिद्धि, न भावनामयिद्धि। सण्हसुखुमधम्मं पन सम्मसतो लोकनाथस्स लोहितं पसीदि, वत्थुरूपं पसीदि, छविवण्णो पसीदि। चित्तसमुद्धाना वण्णधातु समन्ता असीतिहत्थमत्ते पदेसे निच्चला अट्ठासी”ति।

एवं निसिन्नेति तम्हा समाधिम्हा वुट्ठित्वा निसिन्ने। एको ब्राह्मणोति नामगोत्तवसेन अनभिज्जातो अपाकटो एको ब्राह्मणो। “हुं हुं”न्ति करोन्तो विचरतीति सब्बं अचोक्खजातिकं पस्सित्वा जिगुच्छन्तो “हुं हुं”न्ति करोन्तो विचरति। एतदवोचाति (उदा० अट्ठ० ४) एतं इदानीं वत्तब्बं “कित्तावता नु खो”तिआदिवचनं अवोच। तत्थ कित्तावताति कित्तकेन पमाणेन। नु-ति संसयत्थे निपातो, खो-ति पदपूरणे। भो-ति ब्राह्मणानं जातिसमुदागतं आलपनं। तथा हि वुत्तं “भोवादि नाम सो होति, सचे होति सकिञ्चनो”ति (ध० प० ३९६; सु० नि० ६२५)। गोतमाति भगवन्तं गोत्तेन आलपति। कथं पनायं ब्राह्मणो सम्पति समागतो भगवतो गोत्तं जानातीति? नायं सम्पति समागतो, छब्बस्सानि पधानकरणकाले उपट्ठहन्तेहि पञ्चवगियेहि सद्धिं चरमानो अपरभागे तं वत्तं छट्ठेत्वा उरुवेलायं सेननिगमे एको अदुतियो हुत्वा पिण्डाय चरमानोपि तेन ब्राह्मणेन दिट्ठपुब्बो चेव सल्लपितपुब्बो च, तेन सो पुब्बे पञ्चवगियेहि गय्हमानं भगवतो गोत्तं अनुस्सरन्तो “भो गोतमा”ति भगवन्तं गोत्तेन आलपति। यतो पट्ठाय वा भगवा महाभिनिक्खमनं निक्खन्तो अनोमानदीतीरे पब्बजि, ततो पभुति “समणो गोतमो”ति चन्दो विय सूरियो विय पाकटो पज्जातो होति, न च तस्स गोत्तजानने कारणं गवेसितब्बं। ब्राह्मणकरणाति ब्राह्मणं करोन्तीति ब्राह्मणकरणा, ब्राह्मणभावकराति अत्थो। एत्थ च “कित्तावता”ति एतेन येहि धम्मोहि ब्राह्मणो होति, तेसं धम्मनं परिमाणं पुच्छति। “कतमे”ति पन इमिना तेसं सरूपं पुच्छति।

उदानं उदानेसीति “यो ब्राह्मणो”तिआदिकं उदानं उदानेसि, न पन तस्स ब्राह्मणस्स धम्मं देसेसि। कस्मा? धम्मदेसनाय अभाजनभावतो। तथा हि तस्स ब्राह्मणस्स इमं गाथं सुत्वा न सच्चाभिसमयो अहोसि। यथा च इमस्स, एवं उपकस्स आजीवकस्स बुद्धगुणप्पकासनं सुत्वा। धम्मचक्कप्पवत्तनतो हि पुब्बभागे भगवता भासितं परेसं सुणन्तानम्पि तपुस्सभल्लिकानं सरणदानं विय वासनाभागियमेव जातं, न असेक्खभागियं वा निब्बेधभागियं वा। एसा हि धम्मताति। वेदेहि वा अन्तन्ति एत्थ अन्तं नाम सब्बसङ्खारपरियोसानं निब्बानं। इमे उस्सदा नत्थीति सब्बसो इमे पहीनत्ता न सन्ति।

अजपालकथावण्णना निट्ठिता।

### मुचलिन्दकथावण्णना

५. मुचलिन्दमूलेति (उदा० अट्ठ० ११) एत्थ मुचलिन्दो वुच्चति नीपरुक्खो, यो “निचुलो”तिपि वुच्चति, तस्स समीपेति अत्थो। केचि पन “मुचलोति तस्स रुक्खस्स नामं, वनजेट्टकताय पन मुचलिन्दोति वुत्त”न्ति वदन्ति। उदपादीति सकलचक्कवाळगब्भं पूरेन्तो महामेघो उदपादि। एवरूपो किर मेघो द्वीसुयेव कालेसु वस्सति चक्कवत्तिम्हि वा उप्पन्ने बुद्धे

वा, इध बुद्धुप्पादकाले उदपादि । **पोक्खरणिग्या निब्बत्तो**ति पोक्खरणिग्या हेट्ठा नागभवनं अत्थि, तत्थ निब्बत्तो । **सकभवना**ति अत्तनो नागभवनतो । **एवं भोगेहि परिक्खिपित्वा**ति सत्त वारे अत्तनो सरीरभोगेहि भगवतो कायं परिवारेत्वा । **उपरिमुद्धनि महन्तं फणं विहच्चा**ति भगवतो मुद्धप्पदेसस्स उपरि अत्तनो महन्तं फणं पसारेत्वा । “**फणं करित्वा**”तिपि पाठो, सोयेवत्थो ।

तस्स किर नागराजस्स एतदहोसि “**भगवा च मय्हं भवनसमीपे रुक्खमूले निसिन्नो**, अयञ्च सत्ताहवद्दलिका वत्तति, वासागारमस्स लद्धं वट्ठती”ति । सो सत्तरतनमयं पासादं निम्मिनितुं सक्कोन्तोपि “**एवं कते कायसारो गहितो न भविस्सति**, दसबलस्स कायवेय्यावच्चं करिस्सामी”ति महन्तं अत्तभावं कत्वा सत्थारं सत्तक्खत्तुं भोगेहि परिक्खिपित्वा उपरि फणं धारेसि । “**तस्स परिक्खेपब्भन्तरं लोहपासादे भण्डागारगब्भप्पमाणं अहोसी**”ति इध वुत्तं । **मज्झिमदुक्कथायं** (म० नि० अट्ठ० १.२८४) पन —

“**परिक्खेपस्स अन्तो ओकासो हेट्ठा लोहपासादप्पमाणो अहोसि**, ‘**इच्छितिच्छित्तेन इरियापथेन सत्था विहरिस्सती**’ति नागराजस्स अज्झासयो अहोसि, तस्मा एवं महन्तं ओकासं परिक्खिपि, मज्झे रतनपल्लङ्को पञ्चत्तो होति, उपरि सुवण्णतारकविचित्तं समोसरितगन्धदामकुसुमचेलवितानं अहोसि, चतूसु कोणेषु गन्धतेलेन दीपा जलिता, चतूसु दिसासु विवरित्वा चन्दनकरण्डका ठपिता”ति —

वुत्तं । **इच्छितिच्छित्तेन इरियापथेन विहरिस्सती**ति च नागराजस्स अज्झासयमत्तमेतं, भगवा पन यथानिसिन्नोव सत्ताहं वीतिनामेसि ।

**किञ्चापि...पे०... चिन्तेतुं युत्तन्ति** एत्थ केचि वदन्ति “उण्हग्गहणं भोगपरिक्खेपस्स विपुलभावकरणे कारणकित्तनं । खुद्दके हि तस्मिं भगवन्तं नागराजस्स सरीरसम्भूता उस्मा बाधेय्य, विपुलभावकरणेन पन तादिसं मा उण्हं बाधयित्था”ति । सउपसग्गपदस्स अत्थो उपसग्गेन विनापि विज्जायतीति आह “**विद्धन्ति उब्बिद्ध**”न्ति, सा चस्स उब्बिद्धता उपक्विलेसविगमेन दूरभावेन उपट्ठानन्ति आह “**मेघविगमेन दूरीभूत**”न्ति । इन्दनीलमणि विय दिब्बति जोततीति **देवो**, आकासो । **विदित्वा**ति “इदानि विगतवलाहको आकासो, नत्थि भगवतो सीतादिउपद्वो”ति जत्वा । **विनिवेठेत्वा**ति अपनेत्वा । **अत्तनो रूपन्ति** अत्तनो नागरूपं । **पटिसंहरित्वा**ति अन्तरधापेत्वा । **माणवकवण्णन्ति** कुमारकरूपं ।

**एतमत्थं विदित्वा**ति “विवेकसुखपटिसंवेदिनो यत्थ कत्थचि सुखमेव होती”ति एतं अत्थं सब्बाकारेन जानित्वा । **इमं उदानन्ति** इमं विवेकसुखानुभावदीपकं उदानं उदानेसि । **सुतधम्मस्सा**ति विस्सुतधम्मस्स । तेनाह “**पकासितधम्मस्सा**”ति । **अकुप्पनभावो**ति अकुप्पनसभावो ।

मुचलिन्दकथावण्णना निट्ठिता ।

### राजायतनकथावण्णना

**६. ओसधहरीतकं उपनेसी**ति न केवलं ओसधहरीतकमेव, दन्तकट्टम्पि उपनेसि । **पच्चग्घे**ति एत्थ पुरिमं अत्थविकप्पं केचि न इच्छन्ति, तेनेव **आचरियधम्मपालत्थेरेन** वुत्तं “पच्चग्घेति अभिनवे । पच्चेकं महग्घताय पच्चग्घेति केचि, तं न सुन्दरं । न हि बुद्धा भगवन्तो महग्घं पटिग्गहन्ति परिभुज्जन्ति वा”ति ।

राजायतनकथावण्णना निट्ठिता ।

### ब्रह्मयाचनकथावण्णना

७. आचिण्णसमाचिण्णोति आचरितो चेव आचरन्तेहि च सम्मदेव आचरितोति अत्थो । एतेन अयं परिवितक्को सब्बबुद्धानं पठमाभिसम्बोधिं उप्पज्जतेवाति अयमेत्थ धम्मताति दस्सेति । गम्भीरोपि धम्मो पटिपक्खविधमनेन सुपाकटो भवेय्य, पटिपक्खविधमनं पन सम्मापटिपत्तिपटिबद्धं, सा सद्धम्मसवनाधीना, तं सत्थरि धम्मे च पसादायत्तं । सो विसेसतो लोके सम्भावनीयस्स गरुकातब्बस्स अभिपत्थनाहेतुकोति परम्पराय सत्तानं धम्मसम्पटिपत्तिया ब्रह्मनो याचनानिमित्तन्ति तं दस्सेन्तो “ब्रह्मना याचिते देसेतुकामताया”ति आदिमाह ।

अधिगतोति पटिविद्धो, सयम्भूजाणेन “इदं दुक्ख”न्ति आदिना यथाभूतं अवबुद्धोति अत्थो । धम्मोति चतुसच्चधम्मो तब्बिनिमुत्तस्स पटिविज्झितब्बधम्मस्स अभावतो । गम्भीरोति महासमुद्धो विय मकसत्तुण्डसूचिया अज्जत्र समुपचितपरिपक्कजाणसम्भारेहि अज्जेसं जाणेन अलब्भनेय्यपटिद्धो । गम्भीरत्ताव दुदसो दुक्खेन दट्ठब्बो, न सक्का सुखेन दट्ठुं । यो हि अलब्भनेय्यपटिद्धो, सो ओगाहितुं असक्कुणेय्यताय सरूपतो च विसेसतो च सुखेन पस्सितुं न सक्का, अथ खो किच्चेन केनचि कदाचिदेव दट्ठब्बो । दुदसत्ताव दुरनुबोधो दुक्खेन अवबुज्झितब्बो, न सक्का सुखेन अवबुज्झितुं । यज्झि दट्ठुमेव न सक्का, तस्स ओगाहेत्वा अनुबुज्झने कथा एव नत्थि अवबोधस्स दुक्करभावतो । इमस्मिं ठाने “तं किं मज्जथ, भिक्खवे, कतमं नु खो दुक्करतरं वा दुराभिसम्भवतरं वा”ति (सं० नि० ५.१११५) सुत्तपदं वत्तब्बं ।

सन्तोति अनुपसन्तसभावानं किलेसानं सङ्खारानञ्च अभावतो वूपसन्तसब्बपरिळाहताय सन्तो निब्बुतो, सन्तारम्मणताय वा सन्तो । एत्थ च निरोधसच्चं सन्तं आरम्मणन्ति सन्तारम्मणं, मगगसच्चं सन्तं सन्तारम्मणञ्चाति सन्तारम्मणं । पधानभावं नीतोति पणीतो । अथ वा पणीतोति अतित्तिकरणट्टेन अतप्पको सादुरसभोजनं विय । सन्तपणीतभावेनेव चेत्य असेचनकताय अतप्पकता दट्ठब्बा । इदज्झि द्वयं लोकुत्तरमेव सन्थाय वुत्तं । अतक्कावचरोति उत्तमजाणविसयत्ता तक्केन अवचरितब्बो ओगाहितब्बो न होति, जाणेनेव अवचरितब्बो । ततो एव निपुणजाणगोचरताय सण्हसुखुमसभावत्ता च निपुणो सण्हो । पण्डितवेदनीयोति बालानं अविसयत्ता सम्मापटिपदं पटिपन्नेहि पण्डितेहि एव वेदितब्बो ।

अल्लीयन्ति अभिरमितब्बट्टेन सेवियन्तीति आलया, पञ्च कामगुणाति आह “सत्ता पञ्चकामगुणे अल्लीयन्ति, तस्मा ते आलयाति वुच्चन्ती”ति । तत्थ पञ्चकामगुणे अल्लीयन्तीति पञ्चकामगुणे सेवन्तीति अत्थो । तेति पञ्च कामगुणा । रमन्तीति रतिं विन्दन्ति कीळन्ति लळन्ति । आलीयन्ति अभिरमणवसेन सेवन्तीति आलया, अट्ठसत्तं तण्हाविचरितानि, तेहि आलयेहि रमन्तीति आलयरामाति एवमेत्थ अत्थो दट्ठब्बो । इमे हि सत्ता यथा कामगुणे, एवं रागप्पि अस्सादेन्ति अभिनन्दन्तियेव । यथेव हि सुसज्जितपुष्पफलभरितरुक्खादिसम्पन्नं उय्यानं पविट्ठो राजा ताय ताय सम्पत्तिया रमति, सम्मुदितो आमोदितपमोदितो होति, न उक्कण्ठति, सायम्पि निक्खमितुं न इच्छति, एवमिमेहि कामालयतण्हालयेहि सत्ता रमन्ति, संसारवट्टे सम्मोदिता अनुक्कण्ठिता वसन्ति । तेन नेसं भगवा दुविधम्पि आलयं उय्यानभूमिं विय दस्सेन्तो “आलयरामा”ति आदिमाह । रताति निरता । सुट्ठु मुदिताति अतिविय मुदिता अनुक्कण्ठनतो ।

ठानं सन्थायाति ठानसद्वं सन्थाय । अत्थतो पन ठानन्ति च पटिच्चसमुप्पादो एव अधिप्पेतो । तिट्ठति एत्थ फलं तदायत्तवुत्तितायाति ठानं, सङ्खारादीनं पच्चयभूता अविज्जादयो । इमेसं सङ्खारादीनं पच्चयाति इदप्पच्चया, अविज्जादयोव ।



इदप्पच्चया एव **इदप्पच्चयता** यथा देवो एव देवता । इदप्पच्चयानं वा अविज्जादीनं अत्तनो फलं पटिच्च पच्चयभावो उप्पादनसमत्थता **इदप्पच्चयता** । तेन समत्थपच्चयलक्खणो पटिच्चसमुप्पादो दस्सितो होति । पटिच्च समुप्पज्जति फलं एतस्माति **पटिच्चसमुप्पादो** । पदद्वयेनपि धम्मनं पच्चयद्वो एव विभावितो । सङ्खारादिपच्चयानञ्चि अविज्जादीनं एतं अधिवचनं इदप्पच्चयतापटिच्चसमुप्पादोति । **सब्बसङ्खारसमथो**तिआदि सब्बं अत्थतो निब्बानमेव । यस्मा हि तं आगम्म पटिच्च अरियमग्गस्स आरम्मणपच्चयभावहेतु सब्बसङ्खारविप्फन्दितानि सम्मन्ति वूपसम्मन्ति, तस्मा “सब्बसङ्खारसमथो”ति वुच्चति । सब्बसङ्खतविसंयुत्ते हि निब्बाने सङ्खारवूपसमपरियायो जायागतोयेवाति । इदं पनेत्थ निब्बचनं — सब्बे सङ्खारा सम्मन्ति एत्थाति **सब्बसङ्खारसमथो**ति ।

यस्मा च तं आगम्म सब्बे उपधयो पटिनिस्सट्ठा समुच्छेदवसेन परिच्चत्ता होन्ति, अट्टसतप्पभेदा सब्बापि तण्हा खीयन्ति, सब्बे किलेसरागा विरज्जन्ति, जरामरणादिभेदं सब्बं वट्टदुक्खं निरुज्झति, तस्मा “**सब्बूपधिपटिनिस्सग्गो तण्हाक्खयो विरागो निरोधो**”ति वुच्चति, या पनेसा तण्हा तेन तेन भवेन भवन्तरं भवनिक्खन्तिभावेन विनति संसिब्बति, फलेन वा सद्धिं कम्मं विनति संसिब्बतीति कत्वा वानन्ति वुच्चति, ततो निक्खन्तं वानतोति **निब्बानं** । **किलमथो**ति कायकिलमथो । विहेसापि कायविहेसायेव, चित्ते पन उभयम्पेतं बुद्धानं नत्थि बोधिमूलेयेव समुच्छिन्नत्ता । एत्थ च चिरनिसज्जाचिरभासनेहि पिट्ठिआगिलायनतालुगलसोसादिवसेन कायकिलमथो चेव कायविहेसा च वेदितब्बा, सा च खो देसनाय अत्थं अजानन्तानञ्च अप्पटिपज्जन्तानञ्च वसेन । जानन्तानं पन पटिपज्जन्तानञ्च देसनाय कायपरिस्समोपि सत्थु अपरिस्समोव, तेनाह भगवा “न च मं धम्माधिकरणं विहेसेती”ति । तेनेव वुत्तं “**या अजानन्तानं देसना नाम, सो मम किलमथो अस्सा**”ति ।

**अपिस्सूति** सम्पिण्डनत्थे निपातो । सो न केवलं एतदहोसि, इमापि गाथा पटिभंसूति दीपेति । **भगवन्तन्ति** पटिसद्वयोगेन सामिअत्थे उपयोगवचनन्ति आह “**भगवतो**”ति । वुद्धिप्पत्ता अच्छरिया वा **अनच्छरिया** । वुद्धिअत्थोपि हि अ-कारो होति यथा “असेक्खा धम्मा”ति । कप्पानं चत्तारि असङ्ख्येय्यानि सतसहस्सञ्च सदेवकस्स लोकस्स धम्मसंविभागकरणत्थमेव पारमियो पूरेत्वा इदानि समधिगतधम्मरज्जस्स तत्थ अप्पोस्सुक्कतापत्तिदीपनत्ता गाथात्थस्स अनुअच्छरियता तस्स वुद्धिप्पत्ति च वेदितब्बा । अत्थद्वारेन हि गाथानं अनच्छरियता । **गोचरा अहेसुन्ति** उपट्ठहंसु, उपट्ठानञ्च वितक्कयितब्बताति आह “**परिवितक्कयितब्बभावं पापुणिसू**”ति ।

**किच्छेनाति** न दुक्खप्पटिपदाय । बुद्धानञ्चि चत्तारोपि मग्गा सुखप्पटिपदाव होन्ति । पारमीपूरणकाले पन सरागसदोससमोहस्सेव सतो आगतागतानं याचकानं अलङ्कतप्पटियत्तं सीसं कन्तित्वा गललोहितं नीहरित्वा सुअज्जितानि अक्खीनि उप्पाटेत्वा कुलवंसप्पदीपं पुत्तं मनापचारिनिं भरियन्ति एवमादीनि देन्तस्स अज्जानि च खन्तिवादिसदिसेसु अत्तभावेसु छेज्जभेज्जादीनि पापुणन्तस्स आगमनीयपटिपदं सन्धायेतं वुत्तं । ह-इति वा व्यत्तन्ति एतस्मिं अत्थे निपातो । एकंसत्थेति केचि । ह व्यत्तं एकंसेन वा **अलं** निप्पयोजनं एवं किच्छेन अधिगतं धम्मं देसेतुन्ति योजना । **हलन्ति** वा अलन्ति इमिना समानत्थं पदं “हलन्ति वदामी”तिआदीसु विय । “पकासित”न्तिपि पठन्ति, देसितन्ति अत्थो । एवं किच्छेन अधिगतस्स धम्मस्स अलं देसितं परियत्तं देसितं, को अत्थो देसितेनाति वुत्तं होति । **रागदोसपरेतेहीति** रागदोसफुट्ठेहि, फुट्ठविसेन विय सप्पेन रागेन दोसेन च सम्फुट्ठेहि अभिभूतेहीति अत्थो । अथ वा **रागदोसपरेतेहीति** रागदोसानुगतोहि, रागेन च दोसेन च अनुबन्धेहीति अत्थो ।

**पटिसोतगामिन्ति** (दी० नि० अट्ठ० २.६५; म० नि० अट्ठ० १.२८१; सं० नि० अट्ठ० १.१.१७२) निच्चगाहादीनं

पटिसोतं अनिच्चं दुक्खमनत्ता असुभन्ति एवं गतं पवत्तं चतुसच्चधम्मन्ति अत्थो । रागरत्ताति कामरागेन भवरागेन दिट्ठिरागेन च रत्ता । न दक्खन्तीति अनिच्चं दुक्खमनत्ता असुभन्ति इमिना सभावेन न पस्सिस्सन्ति, ते अपस्सन्ते को सक्खिस्सति अनिच्चन्तिआदिना सभावेन याथावतो धम्मं जानापेतुन्ति अधिप्पायो । रागदोसपरेततापि नेसं सम्मुळ्हाभावेनेवाति आह “तमोखन्धेन आवुटा”ति, अविज्जारासिना अज्झोत्थटाति अत्थो ।

अप्पोस्सुक्कताय चित्तं नमतीति कस्मा पनस्स एवं चित्तं नमि, ननु एस “मुत्तोहं मोचेस्सामि, तिण्णोहं तारेस्सामि,

किं मे अज्जातवेसेन, धम्मं सच्छिकतेनिध ।

सब्बज्जुतं पापुणित्वा, तारयिस्सं सदेवक”न्ति ॥ (बु० वं० २.५५) —

पत्थनं कत्वा पारमियो पूरेत्वा सब्बज्जुतं पत्तोति? सच्चमेव, तदेव पच्चवेक्खणानुभावेन पनस्स एवं चित्तं नमि । तस्स हि सब्बज्जुतं पत्वा सत्तानं किलेसगहनतं धम्मस्स च गम्भीरतं पच्चवेक्खन्तस्स सत्तानं किलेसगहनता च धम्मगम्भीरता च सब्बाकारेण पाकटा जाता । अथस्स “इमे सत्ता कज्जियपुण्णलाबु विय तक्कभरितचाटि विय वसातेलपीतपिलोतिका विय अज्जनमक्खितहत्थो विय च किलेसभरिता अतिसंकलिट्ठा रागरत्ता दोसदुट्ठा मोहमुळ्हा, ते किं नाम पटिविज्झिस्सन्ती”ति चिन्तयतो किलेसगहनपच्चवेक्खणानुभावेनपि एवं चित्तं नमि ।

“अयं धम्मो पथवीसन्धारकउदकक्खन्धो विय गम्भीरो, पब्बतेन पटिच्छादेत्वा ठपितो सासपो विय दुद्दसो, सतधा भिन्नस्स वालस्स कोटि विय अणु । मया हि इमं धम्मं पटिविज्झितुं वायमन्तेन अदिन्नं दानं नाम नत्थि, अरक्खितं सीलं नाम नत्थि, अपरिपूरिता काचि पारमी नाम नत्थि, तस्स मे निरुस्साहं विय मारबलं विधमन्तस्सपि पथवी न कम्पित्थ, पठमयामे पुब्बेनिवासं अनुस्सरन्तस्सपि न कम्पित्थ, मज्झिमयामे दिब्बचक्खुं विसोधेन्तस्सपि न कम्पित्थ, पच्छिमयामे पन पटिच्चसमुप्पादं पटिविज्झन्तस्सेव मे दससहस्सिलोकधातु कम्पित्थ । इति मादिसेनपि तिक्खजाणेन किच्छेनेवायं धम्मो पटिविद्धो, तं लोकियमहाजना कथं पटिविज्झिस्सन्ती”ति धम्मगम्भीरताय पच्चवेक्खणानुभावेनपि एवं चित्तं नमीति वेदितब्बं ।

अपिच ब्रह्मना याचिते देसेतुकामतायपिस्स एवं चित्तं नमि । जानाति हि भगवा “मम अप्पोस्सुक्कताय चित्ते नममाने महाब्रह्मा धम्मदेसनं याचिस्सति, इमे च सत्ता ब्रह्मगरुका, ते ‘सत्था किर धम्मं न देसेतुकामो अहोसि, अथ नं महाब्रह्मा याचित्वा देसापेति, सन्तो वत भो धम्मो पणीतो’ति मज्जमाना सुस्सूसिस्सन्ती”ति । इदमिस्स कारणं पटिच्च अप्पोस्सुक्कताय चित्तं नमि, नो धम्मदेसनायाति वेदितब्बं ।

८. सहम्पतिस्साति सो किर कस्सपस्स भगवतो सासने सहको नाम थेरो पठमज्झानं निब्बत्तेत्वा पठमज्झानभूमियं कप्पायुकब्रह्मा हुत्वा निब्बत्तो, तत्र नं सहम्पति ब्रह्माति सज्जानन्ति । तं सन्धायाह “ब्रह्मनो सहम्पतिस्सा”ति । नस्सति वताति सो किर इमं सद्दं तथा निच्छारेति, यथा दससहस्सिलोकधातुब्रह्मानो सुत्वा सब्बे सन्निपत्तिंसु ।

अप्परजक्खजातिकाति पज्जामये अक्खिम्हि अप्पं परित्तं रागदोसमोहरजं एतेसं एवंसभावाति अप्परजक्खजातिका । अप्पं रागादिरजं येसं ते सभावा अप्परजक्खजातिकाति एवमेत्थ अत्थो दट्ठब्बो । अस्सवनताति “सयं अभिज्जा”तिआदीसु विय करणत्थे पच्चत्तवचनं, अस्सवनतायाति अत्थो । भविस्सन्तीति पुरिमबुद्धेसु दसपुज्जकिरियवसेन कताधिकारा परिपाकगतपदुमानि विय सूरियरस्मिसम्फस्सं धम्मदेसनंयेव आकङ्खमाना चतुप्पदिकगाथावसाने अरियभूमिं ओक्कमनारहा न एको, न द्वे, अनेकसतसहस्सा धम्मस्स अज्जातारो भविस्सन्तीति दस्सेति ।

**पातुरहोसीति** पातुभवि । **समलेहि चिन्तितोति** समलेहि पूरणकस्सपादीहि छहि सत्थारेहि चिन्तितो । ते हि पुरेतं उप्पज्जित्वा सकलजम्बुदीपे कण्टके पत्थरमाना विय विसं सिञ्चमाना विय च समलं मिच्छादिद्विधम्मं देसयिंसु । ते किर बुद्धकोलाहलानुस्सवेन सञ्जातकुतूहला लोकं वञ्चेत्वा कोहञ्जे ठत्वा सब्बञ्जुतं पटिजानन्ता यं किञ्चि अधम्मंयेव धम्मोति दीपेसुं । **अपापुरेतन्ति** विवर एतं । **अमतस्स द्वारन्ति** अमतस्स निब्बानस्स द्वारभूतं अरियमगं । इदं वुत्तं होति — एतं कस्सपस्स भगवतो सासनन्तरधानतो पभुति पिहितं निब्बाननगरस्स महाद्वारं अरियमगं सद्धम्मदेसनाहत्थेन अपापुर विवर उग्घाटेहीति । **सुणन्तु धम्मं विमलेनानुबुद्धन्ति** इमे सत्ता रागादिमलानं अभावतो विमलेन सम्मासम्बुद्धेन अनुबुद्धं चतुसच्चधम्मं सुणन्तु ताव भगवाति याचति ।

सेलपब्बतो उच्चो होति थिरो च, न पंसुपब्बतो मिस्सकपब्बतो वाति आह “**सेले यथा पब्बतमुद्धनिट्ठितो**”ति । तस्सत्थो “सेलमये एकग्घने पब्बतमुद्धनि यथाठितोव । न हि तत्थ ठितस्स दस्सनत्थं गीवुक्खिपनपसारणादिकिच्चं अत्थी”ति । **तथूपमन्ति** तप्पटिभागं सेलपब्बतूपमं । **धम्ममयं पासादन्ति** लोकुत्तरधम्ममाह । सो हि सब्बसो पसादावहो सब्बधम्मे अतिक्कम्म अब्भुगतट्ठेन पासादसदिसो च, पञ्जापरियायो वा इध धम्म-सद्दो । पञ्जा हि अब्भुगतट्ठेन पासादोति अभिधम्मे निद्विद्धा । तथा चाह —

“पञ्जापासादमारुह, असोको सोकिनिं पजं ।  
पब्बतट्ठोव भूमट्ठे, धीरो बाले अवेक्खती”ति ॥ (ध० प० २८) ।

अयं पनेत्थ सङ्खेपत्थो — यथा सेलपब्बतमुद्धनि यथाठितोव चक्खुमा पुरिसो समन्ततो जनतं पस्सेय्य, तथा त्वम्पि सुमेध सुन्दरपञ्च सब्बञ्जुतञ्जाणेन समन्तचक्खु भगवा धम्ममयं पञ्जामयं पासादमारुह सयं अपेतसोको सोकावतिण्णं जातिजराभिभूतं जनतं अवेक्खस्सु उपधारय उपपरिक्खाति । अयं पनेत्थ अधिष्ठायो — यथा हि पब्बतपादे समन्ता महन्तं खेतं कत्वा तत्थ केदारपाळीसु कुटिकायो कत्वा रत्तिं अग्निं जालेय्युं, चतुरङ्गसमन्नागतञ्च अन्धकारं अस्स, अथ तस्स पब्बतस्स मत्थके ठत्वा चक्खुमतो पुरिसस्स भूमिं ओलोकयतो नेव खेतं, न केदारपाळियो, न कुटियो, न तत्थ सयितमनुस्सा पञ्जायेय्युं अनुज्जलभावतो, कुटिकासु पन अग्निजालामत्तमेव पञ्जायेय्य उज्जलभावतो, एवं धम्मपासादं आरुह सत्तनिकायं ओलोकयतो तथागतस्स ये ते अकतकल्याणा सत्ता, ते एकविहारे दक्खिणजाणुपस्से निसिन्नापि बुद्धचक्खुस्स आपाथं नागच्छन्ति जाणगिना अनुज्जलभावतो अनुळारभावतो च, रत्तिं खित्ता सरा विय होन्ति । ये पन कतकल्याणा वेनेय्यपुग्गला, ते एवस्स दूरेपि ठिता आपाथमागच्छन्ति परिपक्वजाणगिताय समुज्जलभावतो उळारसन्तानताय च, सो अग्नि विय हिमवन्तपब्बतो विय च । वुत्तम्पि चेतं —

“दूरे सन्तो पकासेन्ति, हिमवन्तोव पब्बतो ।  
असन्तेत्थ न दिस्सन्ति, रत्तिं खित्ता यथा सरा”ति ॥ (ध० प० ३०४) ।

**उट्ठेहीति** भगवतो धम्मदेसनत्थं चारिकचरणं याचन्तो भणति । **उट्ठेहीति** वा धम्मदेसनाय अप्पोस्सुक्कतासङ्घातसङ्कोचापत्तितो किलासुभावतो उट्ठह । **वीराति** आदीसु भगवा सातिसयचतुब्बिधसम्मप्यधानवीरियवन्तताय **वीरो**, देवपुत्तमच्चुकिलेसाभिसङ्खारानं विजितत्ता **विजितसङ्गामो**, जातिकन्तारादितो वेनेय्यसत्थं वाहनसमत्थताय निब्बानसङ्घातं खेमप्पदेसं सम्पापनसमत्थताय **सत्थवाहो**, कामच्छन्दइणस्स अभावतो **अणणोति** वेदितब्बो । यो हि परेसं इणं गहेत्वा विनासेति, सो तेहि “इणं देही”ति तज्जमानोपि फरुसं वुच्चमानोपि वम्भमानोपि वधियमानोपि किञ्चि पटिप्पहरितुं न सक्कोति, सब्बं तितिक्खति । तितिक्खकारणजिहस्स

तं इणं होति, एवमेव यो यम्हि कामच्छन्देन रज्जति, तण्हागहणेन तं वत्थुं गण्हाति, सो तेन फरुसं वुच्चमानोपि वम्भमानोपि वधियमानोपि किञ्चि पटिप्पहरितुं न सक्कोति, सब्बं तितिकखति । तितिकखकारणञ्हिस्स सो कामच्छन्दो होति घरसामिकेहि विहेठियमानानं इत्थीनं विय । कस्मा? इणसदिसत्ता कामच्छन्दस्स ।

९. अज्झेसनन्ति गरुड्ढानीयं पयिरुपासित्वा गरुतरं पयोजनं उद्धिस्स अभिपत्थना अज्झेसना, सापि अत्थतो याचना एव । बुद्धचक्खुनाति इन्द्रियपरोपरियत्तजाणेन च आसयानुसयजाणेन च । इमेसञ्चि द्विन्नं जाणानं बुद्धचक्खूति नामं, सब्बञ्जुतज्जाणस्स समन्तचक्खूति । हेड्डिमानं तिण्णं मग्गजाणानं धम्मचक्खूति । अप्परजक्खेतिआदीसु येसं वुत्तनयेनेव पज्जाचक्खुम्हि रागादिरजं अप्पं, ते अप्परजक्खा । येसं तं महन्तं, ते महारजक्खा । येसं सद्धादीनि इन्द्रियानि तिकखानि, ते तिकिखिन्द्रिया । येसं तानि मुदूनि, ते मुदिन्द्रिया । येसं तेयेव सद्धादयो आकारा सुन्दरा, ते स्वाकारा । ये कथितकारणं सल्लक्खेन्ति, सुखेन सक्का होन्ति विज्जापेतुं, ते सुविज्जापया । ये परलोकञ्चेव वज्जञ्च भयतो पस्सन्ति, ते परलोकवज्जभयदस्साविनो नाम ।

उप्पलानि एत्थ सन्तीति उप्पलिनी, गच्छोपि जलासयोपि, इध पन जलासयो अधिप्पेतो, तस्मा उप्पलिनीयन्ति उप्पलवनेति एवमत्थो गहेतब्बो । इतो परेसुपि एसेव नयो । अन्तोनिमुग्गपोसीनीति यानि उदकस्स अन्तो निमुग्गानेव हुत्वा पुस्सन्ति वड्डन्ति, तानि अन्तोनिमुग्गपोसीनि । उदकं अच्चुग्गम्म तिट्ठन्तीति उदकं अतिककमित्वा तिट्ठन्ति । तत्थ यानि अच्चुग्गम्म ठितानि सूरियरस्मिसम्फस्सं आगमयमानानि, तानि अज्ज पुप्फनकानि । यानि समोदकं ठितानि, तानि स्वे पुप्फनकानि । यानि उदका अनुगगतानि अन्तोनिमुग्गपोसीनि, तानि ततियदिवसे पुप्फनकानि । उदका पन अनुगगतानि अज्जानिपि सरोगउप्पलादीनि नाम अत्थि, यानि नेव पुप्फिस्सन्ति मच्छकच्छपभक्खानेव भविस्सन्ति, तानि पाळिं नारुळ्हानि, आहरित्वा पन दीपेतब्बानीति अट्ठकथायं पकासितानि । यथेव हि तानि चतुब्बिधानि पुप्फानि, एवमेव उग्घटितञ्जू विपज्चितञ्जू नेय्यो पदपरमोति चत्तारो पुग्गला ।

तत्थ यस्स पुग्गलस्स सह उदाहटवेलाय धम्माभिसमयो होति, अयं “चत्तारो सतिपट्ठाना”तिआदिना नयेन सङ्घित्तेन मातिकाय ठपियमानाय देसनानुसारेण जाणं पेसेत्वा अरहत्तं गण्हितुं समत्थो पुग्गलो उग्घटितञ्जूति वुच्चति । यस्स पुग्गलस्स सङ्घित्तेन भासितस्स वित्थारेण अत्थे विभजियमाने धम्माभिसमयो होति, अयं वुच्चति पुग्गलो विपज्चितञ्जू । यस्स पुग्गलस्स उद्देसतो परिपुच्छतो योनिसो मनसिकरोतो कल्याणमित्ते सेवतो भजतो पयिरुपासतो अनुपुब्बेन धम्माभिसमयो होति, अयं वुच्चति पुग्गलो नेय्यो । यस्स पुग्गलस्स बहुम्पि सुणतो बहुम्पि भणतो बहुम्पि धारयतो बहुम्पि वाचयतो न ताय जातिया धम्माभिसमयो होति, तेन अत्तभावेन मग्गं वा फलं वा अन्तमसो ज्ञानं वा विपस्सनं वा निब्बत्तेतुं न सक्कोति, अयं वुच्चति पुग्गलो पदपरमो । तत्थ भगवा उप्पलवनादिसदिसं दससहस्सिलोकधातुं ओलोकेन्तो अज्ज पुप्फनकानि विय उग्घटितञ्जू, स्वे पुप्फनकानि विय विपज्चितञ्जू, ततियदिवसे पुप्फनकानि विय नेय्ये, मच्छकच्छपभक्खपुप्फानि विय पदपरमे च अद्दस, पस्सन्तो च “एत्तका अप्परजक्खा, एत्तका महारजक्खा, तत्रापि एत्तका उग्घटितञ्जू”ति एवं सब्बाकारतोव अद्दस ।

तत्थ तिण्णं पुग्गलानं इमस्मिञ्जेव अत्तभावे भगवतो धम्मदेसना अत्थं साधेति । पदपरमानं अनागतत्थाय वासना होति । अथ भगवा इमेसं चतुन्नं पुग्गलानं अत्थावहं धम्मदेसनं विदित्वा देसेतुकम्यतं उप्पादेत्वा पुन सब्बेपि तीसु भवेसु सत्ते भब्बाभववसेन द्वे कोट्ठासे अकासि । ये सन्धाय वुत्तं “ये ते सत्ता कम्मावरणेन समन्नागता विपाकावरणेन समन्नागता किलेसावरणेन समन्नागता अस्सद्धा अच्छन्दिका दुप्पज्जा अभब्बा नियामं ओक्कमितुं कुसलेसु धम्मेसु

सम्मत्तं, इमे ते सत्ता अभब्बा । कतमे ते सत्ता भब्बा? ये ते सत्ता न कम्मावरणेन...पे०... इमे ते सत्ता भब्बा”ति (विभ० ८२६-८२७) । तत्थ सब्बेपि अभब्बपुग्गले पहाय भब्बपुग्गलेयेव जाणेन परिग्गहेत्वा “एत्तका रागचरिता, एत्तका दोस, मोह, वितक्क, सद्भा, बुद्धिचरिता”ति छ कोट्ठासे अकासि, एवं कत्वा धम्मं देसेस्सामीति चिन्तेसि । एत्थ च अप्परजक्खादिभब्बादिवसेन आवज्जेन्तस्स भगवतो ते सत्ता पुज्जपुज्जाव हुत्वा उपट्ठहन्ति, न एकेकाति दट्ठब्बं ।

**पच्चभासीति** पतिअभासि । **अपारुताति** विवटा । **अमतस्स** द्वाराति अरियमग्गो । सो हि अमतसङ्घातस्स निब्बानस्स द्वारं, सो मया विवरित्वा ठपितो महाकरुणूपनिस्सयेन सयम्भूजाणेन अधिगतत्ताति दस्सेति । “अपारुतं तेसं अमतस्स द्वार”न्ति केचि पठन्ति । **पमुज्चन्तु** सद्धन्ति सब्बे अत्तनो सद्धं मुज्चन्तु विस्सज्जेन्तु पवेदेन्तु, मया देसिते धम्मे मयि च अत्तनो सद्धहनाकारं उट्ठापेन्तूति अत्थो । पच्छिमपदद्वये अयमत्थो — अहज्झि अत्तनो पगुणं सुप्पवत्तितम्पि इमं पणीतं उत्तमं धम्मं कायवाचाकिलमथसज्जी हुत्वा न भासिं, न भासिस्सामीति चिन्तेसि, इदानीं पन सब्बो जनो सद्भाभाजनं उपनेतु, पूरेस्सामि नेसं सङ्कप्पन्ति । **अन्तरधायीति** सत्थारं गन्धमालादीहि पूजेत्वा अन्तरहितो, सकट्टानमेव गतोति अत्थो । सत्थुसन्तिकज्झि उपगतानं देवानं ब्रह्मानज्ज तस्स पुरतो अन्तरधानं नाम सकट्टानगमनमेव ।

ब्रह्मयाचनकथावण्णना निट्ठिता ।

### पच्चवगियकथावण्णना

**१०. एतदहोसीति** एतं अहोसि, “कस्स नु खो अहं पठमं धम्मं देसेय्य”न्ति अयं धम्मदेसनापटिसंयुत्तो वितक्को उदपादीति अत्थो । **आळारोति** तस्स नामं । दीघपिङ्गलो किरेस । सो हि तुङ्गसरीरताय दीघो, पिङ्गलचक्खुताय पिङ्गलो, तेनस्स “आळारो”ति नामं अहोसि । **कालामोति** गोत्तं । **पण्डितोति** (म० नि० अट्ठ० १.२८४) पण्डिच्चेन समन्नागतो, समापत्तिपटिलाभसंसिद्धेन अधिगमबाहुसच्चसङ्घातेन पण्डितभावेन समन्नागतोति अत्थो । **व्यत्तोति** वेय्यत्तियेन समन्नागतो, समापत्तिपटिलाभपच्चयेन पारिहारिकपज्जासङ्घातेन व्यत्तभावेन समन्नागतोति अत्थो । **मेधावीति** ठानुप्पत्तिया पज्जाय समन्नागतो । अथ वा **मेधावीति** तिहेतुकपटिसन्धिपज्जासङ्घाताय तंतंइतिकत्तब्बतापज्जासङ्घाताय च मेधाय समन्नागतोति एवमेत्थ अत्थो दट्ठब्बो । **अप्परजक्खजातिकोति** समापत्तिया विक्खम्भितत्ता निक्किलेसजातिको विसुद्धसत्तो । **आजानिस्सतीति** सल्लक्खेस्सति पटिविज्झिस्सति ।

**भगवतोपि खो जाणं उदपादीति** भगवतोपि सब्बज्जुतज्जाणं उप्पज्जि । भगवा किर देवताय कथितेनेव निट्ठं अगन्त्वा सयम्पि सब्बज्जुतज्जाणेन ओलोकेन्तो इतो सत्तमदिवसमत्थके कालं कत्वा आकिज्जज्जायतने निब्बत्तोति अट्ठस । तं सन्धायाह “भगवतोपि खो जाणं उदपादी”ति । **महाजानियोति** सत्तदिवसम्भन्तरे पत्तब्बमग्गफलतो परिहीनत्ता महती जानि परिहानि अस्साति महाजानियो । अक्खणे निब्बत्तत्था इध धम्मदेसनट्ठानं आगमनपादापि नत्थि, अथाहं तत्थ गच्छेय्यं, गन्त्वा देसियमानं धम्मम्पिस्स सोतुं सोतपसादोपि नत्थि, एवं महाजानियो जातोति दस्सेति । किं पन भगवता तं अत्तनो बुद्धानुभावेन धम्मं जापेतुं न सक्काति? आम न सक्का, न हि परतोघोसमन्तरेन सावकानं धम्माभिसमयो सम्भवति, अज्जथा इतरपच्चयरहितस्सपि धम्माभिसमयेन भवितब्बं, न च तं अत्थि । वुत्तज्हेतं — “द्वेमे, भिक्खवे, पच्चया सम्मादिट्ठिया उप्पादाय परतो च घोसो अज्झत्तज्ज योनिसोमनसिकारो”ति (अ० नि० २.१२७) ।

**उदकोति** तस्स नामं, रामस्स पन पुत्तताय **रामपुत्तो** । **अभिदोसकालकतोति** अट्ठरत्ते कालकतो । **भगवतोपि खो जाणं उदपादीति** इधापि किर भगवा देवताय कथितवचनेन सन्निट्ठानं अकत्वा सब्बज्जुतज्जाणेन ओलोकेन्तो “हिय्यो

अद्वरते कालं कत्वा उदको रामपुत्तो नेवसज्जानासज्जायतने निब्बत्तो”ति अद्वस, तस्मा एवं वुत्तं । सेसं पुरिमसदिसमेव ।

**बहूपकारा**ति बहुउपकारा । **पधानपहितत्तं उपट्ठहिंसूति** पधानत्थाय पेसितत्तभावं वसनट्टाने परिवेणसम्मज्जनेन पत्तचीवरं गहेत्वा अनुबन्धनेन मुखोदकदन्तकट्टदानादिना च उपट्ठहिंसु । के पनेते पञ्चवगिया नाम? ये ते —

रामो धजो लक्खणो चापि मन्ती ।

कोण्डज्जो च भोजो सुयामो सुदत्तो ।

एते तदा अट्ठ अहेसुं ब्राह्मणा ।

छळङ्गवा मन्तं वियाकरिंसूति ॥ (म० नि० अट्ठ० १.२८४; जा० अट्ठ० १.निदानकथा; अप० अट्ठ०

१.अविदूरेनिदानकथा) ।

बोधिसत्तस्स जातकाले सुपिनपटिग्गाहका चेव लक्खणपटिग्गाहका च अट्ठ ब्राह्मणा । तेसु तयो द्वेधा ब्याकरिंसु “इमेहि लक्खणेहि समन्नागतो अगारं अज्झावसमानो राजा होहिति चक्कवत्ती, पब्बजमानो बुद्धो”ति । पञ्च ब्राह्मणा एकंसब्याकरणा अहेसुं “इमेहि लक्खणेहि समन्नागतो अगारे न तिट्ठति, बुद्धोव होती”ति । तेसु पुरिमा तयो यथामन्तपदं गता । एते हि लक्खणमन्तसङ्घातवेदवचनानुरूपं पटिपन्ना द्वे गतियो भवन्ति अनज्जाति वुत्तनियामेन निच्छिन्तुं असक्कोन्ता वुत्तमेव पटिपज्जिंसु, न महापुरिसस्स बुद्धभावप्पत्तिं पच्चासीसिंसु । इमे पन कोण्डज्जादयो पञ्च “एकंसतो बुद्धो भविस्सती”ति जातनिच्छयत्ता मन्तपदं अतिक्कन्ता । ते अत्तना लद्धं तुट्ठिदानं जातकानं विस्सज्जेत्वा “अयं महापुरिसो अगारे न अज्झावसिस्सति, एकन्तेन बुद्धो भविस्सती”ति निब्बेमतिका बोधिसत्तं उट्ठिस्स समणपब्बज्जं पब्बजिता, तेसं पुत्तातिपि वदन्ति, तं अट्ठकथायं पटिक्खितं । एते किर दहरकालेव बहू मन्ते जानिंसु, तस्मा ने ब्राह्मणा आचरियट्टाने ठपयिंसु । ते “पच्छा अम्हेहि पुत्तदारजटं छिन्दित्वा न सक्का भविस्सति पब्बजितु”न्ति दहरकालेयेव पब्बजित्वा रमणीयानि सेनासनानि परिभुज्जन्ता विचरिंसु । कालेन कालं पन “किं भो महापुरिसो महाभिनिक्खमनं निक्खन्तो”ति पुच्छन्ति । मनुस्सा “कुहिं तुम्हे महापुरिसं पस्सिस्सथ, तीसु पासादेसु विविधनाटकमज्झे देवो विय सम्पत्तिं अनुभोती”ति वदन्ति । ते सुत्वा “न ताव महापुरिसस्स जाणं परिपाकं गच्छती”ति अप्पोस्सुक्का विहरिंसुयेव ।

कस्मा पनेत्थ भगवा “बहुकारा खो मे पञ्चवगिया”ति आह । किं उपकारकानंयेव एस धम्मं देसेति, अनुपकारकानं न देसेतीति? नो न देसेति । परिचयवसेन हेस आळारज्जेव कालामं उदकज्ज रामपुत्तं ओलोकेसि । एतस्मिं पन बुद्धक्खेत्ते ठपेत्वा अज्जासिकोण्डज्जं अज्जो पठमं धम्मं सच्छिकातुं समत्थो नाम नत्थि । कस्मा? तथाविधउपनिस्सयत्ता । पुब्बे किर पुज्जकरणकाले द्वे भातरो अहेसुं । ते च एकतो सस्सं अकंसु । तत्थ जेट्ठस्स “एकस्मिं सस्से नव वारे अगगसस्सदानं मया दातब्ब”न्ति अहोसि । सो वप्पकाले बीजगं नाम दत्त्वा गब्भकाले कनिट्ठेन सद्धिं मन्तेसि “गब्भकाले गब्भं फालेत्वा दस्सामी”ति । कनिट्ठो “तरुणसस्सं नासेतुकामोसी”ति आह । जेट्ठो कनिट्ठस्स अननुवत्तनभावं जत्वा खेत्तं विभजित्वा अत्तनो कोट्टासतो गब्भं फालेत्वा खीरं नीहरित्वा सप्पिफाणितेन योजेत्वा अदासि, पुथुककाले पुथुकं कारेत्वा अदासि, लायने लायनगं, वेणिकरणे वेणगं, वेणियो पुरिसभारवसेन बन्धित्वा कलापकरणे कलापगं, खले कलापानं ठपनदिवसे खलगं, मट्ठित्वा वीहीनं रासिकरणदिवसे खलभण्डगं, कोट्टागारे धज्जस्स पक्खिपनदिवसे कोट्टगन्ति एवं एकस्मिं सस्से नव वारे अगगदानं अदासि । कनिट्ठो पन खलतो धज्जं उद्धरित्वा गहणदिवसे अदासि । तेसु जेट्ठो अज्जासिकोण्डज्जत्थेरो जातो, कनिट्ठो सुभट्टपरिब्बाजको । इति एकस्मिं सस्से नवन्नं अगगदानानं दिन्नत्ता ठपेत्वा थेरं अज्जो पठमं धम्मं सच्छिकातुं

समत्थो नाम नत्थि । “नवन्नं अगगदानानं दिन्नत्ता”ति इदञ्च तस्स रत्तञ्जूनं अगगभावत्थाय कताभिनीहारानुरूपं पवत्तितसावकपारमिया चिण्णन्ते पवत्तितत्ता वुत्तं । तिण्णम्पि हि बोधिसत्तानं तंतंपारमिया सिखाप्पत्तकाले पवत्तितं पुञ्जं अपुञ्जं वा गरुतरविपाकमेव होति, धम्मस्स च सब्बपठमं सच्छिकिरियाय विना कथं रत्तञ्जूनं अगगभावसिद्धीति? “बहुकारा खो मे पञ्चवगिया”ति इदं पन उपकारानुस्सरणमत्तकेनेव वुत्तं ।

**इसिपतने मिगदायेति** तस्मिं किर पदेसे अनुप्पन्ने बुद्धे पच्चेकसम्बुद्धा गन्धमादनपब्बते सत्ताहं निरोधसमापत्तिया वीतिनामेत्वा निरोधा वुद्धाय नागलतादन्तकट्टं खादित्वा अनोतत्तदहे मुखं धोवित्वा पत्तचीवरमादाय आकासेन आगन्त्वा निपतन्ति । तत्थ चीवरं पारुपित्वा नगरे पिण्डाय चरित्वा कतभत्तकिच्चा गमनकालेपि ततोयेव उप्पतित्वा गच्छन्ति । इति इसयो एत्थ निपतन्ति उप्पतन्ति चाति तं ठानं “इसिपतन”न्ति सङ्खं गतं, मिगानं पन अभयत्थाय दिन्नत्ता “मिगदायो”ति वुच्चति । तेन वुत्तं “इसिपतने मिगदाये”ति । अज्जे बुद्धा पठमं धम्मदेसनत्थाय गच्छन्ता आकासेन गन्त्वा तत्थेव ओतरन्ति, अम्हाकं पन भगवा उपकस्स आजीवकस्स उपनिस्सयं दिस्वा “उपको इमं अद्धानं पटिपन्नो, सो मं दिस्वा सल्लपित्वा गमिस्सति, अथ पुन निब्बिन्नो आगम्म अरहत्तं सच्छिकरिस्सती”ति जत्वा अट्टारसयोजनं मगं पदसाव अगमासि । तेन वुत्तं “येन बाराणसी, तेन चारिकं पक्कामी”ति ।

**११. अन्तरा च गयं अन्तरा च बोधिन्ति** गयाय च बोधिस्स च विवरे तिगावुत्तन्तरे ठाने । बोधिमण्डतो हि गया तीणि गावुतानि, बाराणसी अट्टारस योजनानि । उपको बोधिमण्डस्स च गयाय च अन्तरे भगवन्तं अद्दस । अन्तरा-सद्देन पन युत्तत्ता उपयोगवचनं कतं । ईदिसेसु च ठानेसु अक्खरचिन्तका “अन्तरा गामञ्च नदिञ्च याती”ति एवं एकमेव अन्तरा-सद्दं पयुज्जन्ति, सो दुतियपदेनपि योजेतब्बो होति, अयोजियमाने उपयोगवचनं न पापुणाति सामिवचनस्स पसङ्गे अन्तरा-सद्दयोगेन उपयोगवचनस्स इच्छितत्ता । इध पन योजेत्वा एव वुत्तो । **अद्धानमग्गन्ति** अद्धानसङ्घातं मगं, दीघमग्गन्ति अत्थो । अद्धानगमनसमयस्स विभङ्गे “अद्दयोजनं गच्छिस्सामीति भुज्जितब्ब”न्ति आदिवचनतो (पाचि० २१८) अद्दयोजनम्पि अद्धानमग्गो होति । बोधिमण्डतो पन गया तिगावुत्तं । **विप्पसन्नानीति** सुट्ठु पसन्नानि । **इन्द्रियानीति** मनच्छट्ठानि इन्द्रियानि । **परिसुद्धोति** निद्दोसो । **परियोदातोति** तस्सेव वेवचनं । निरुपक्किलेसतायेव हि एस “परियोदातो”ति वुत्तो, न सेतभावेन । एतस्स परियोदाततं दिस्वाव इन्द्रियानं विप्पसन्नतं अज्जासि, नयग्गाहीपज्जा किरेसा तस्स आजीवकस्स ।

**सब्बाभिभूति** सब्बं तेभूमकधम्मं अभिभवित्वा ठितो । **सब्बविदूति** सब्बं चतुभूमकधम्मं अवेदिं अज्जासिं सब्बसो जेय्यावरणस्स पहीनत्ता । **सब्बेसु धम्मेसु अनूपलित्तोति** सब्बेसु तेभूमकधम्मेसु रज्जनदुस्सनमुहनादिना किलेसलेपेन अलित्तो । **सब्बज्जहोति** सब्बं तेभूमकधम्मं जहित्वा ठितो । अप्पहातब्बम्पि हि कुसलाब्बाकतं तप्पटिबद्धकिलेसप्पहानेन पहीनत्ता न होतीति जहितमेव होति । **तण्हक्खये विमुत्तोति** तण्हक्खये निब्बाने आरम्मणकरणवसेन विमुत्तो । **सयं अभिज्जायाति** सब्बं चतुभूमकधम्मं अत्तनाव जानित्वा । **कमुद्दिसेय्यन्ति** कं अज्जं “अयं मे आचरियो”ति उद्दिसेय्यं ।

**न मे आचरियो अत्थीति** लोकुत्तरधम्मे मद्दं आचरियो नाम नत्थि । किञ्चापि हि लोकियधम्मानम्पि यादिसो लोकनाथस्स अधिगमो, न तादिसो अधिगमो पररूपदेसो अत्थि, लोकुत्तरधम्मे पनस्स लेसोपि नत्थि । **नत्थि मे पटिपुग्गलोति** मद्दं सीलादीहि गुणेहि पटिनिधिभूतो पुग्गलो नाम नत्थि । **सम्मासम्बुद्धोति** हेतुना नयेन चत्तारि सच्चानि सयं बुद्धो । **सीतिभूतोति** सब्बकिलेसगिनिब्बापनेन सीतिभूतो, किलेसानं येव निब्बुत्तत्ता **निब्बुतो** ।

**कासिनं पुरन्ति** कासिरट्ठे नगरं । **आहञ्छन्ति** आहनिस्सामि । **अमतदुन्दुभिन्ति** वेनेय्यानं अमताधिगमाय उग्घोसनादिं

कत्वा सत्थु धम्मदेसना “अमतदुन्दुभी”ति वुत्ता, धम्मचक्कपटिलाभाय तं अमतभेरिं पहरिस्सामीति गच्छामीति वुत्तं होति ।

**अरहसि अनन्तजिनो**ति अनन्तजिनोपि भवितुं युत्तोति अत्थो । अनन्तजाणो जितकिलेसोति **अनन्तजिनो** । **हुपेय्यपावुसो**ति आवुसो एवम्पि नाम भवेय्य, एवंविधे नाम रूपरतने ईदिसेन जाणेन भवितव्वन्ति अधिप्पायो । अयज्झिस्स पब्बज्जाय पच्चयो जातो । कताधिकारो हेस । तथा हि भगवा तेन समागमनत्थं पदसाव तं मगं पटिपज्जि । **पक्कामी**ति वङ्कहारजनपदं नाम अगमासि ।

तत्थेकं मिगलुद्धकगामकं निस्साय वासं कप्पेसि, जेट्ठकलुद्धको तं उपट्ठासि । तस्मिञ्च जनपदे चण्डा मक्खिका होन्ति । अथ नं एकाय चाटिया वसापेसुं । मिगलुद्धको दूरं मिगवं गच्छन्तो “अम्हाकं अरहन्ते मा पमज्जी”ति चापं नाम धीतरं आणापेत्वा अगमासि सद्धिं पुत्तभातुकेहि । सा चस्स धीता दस्सनीया होति कोट्टाससम्पन्ना । दुतियदिवसे उपको घरं आगतो तं दारिकं सव्वं उपचारं कत्वा परिविसितुं उपगतं दिस्वा रागेन अभिभूतो भुज्जितुम्पि असक्कोन्तो भाजनेन भत्तं आदाय वसनट्ठानं गन्त्वा भत्तं एकमन्तं निक्खिपित्वा “सचे चापं लभामि, जीवामि । नो चे, मरामी”ति निराहारो सयि । सत्तमे दिवसे मागविको आगन्त्वा धीतरं उपकस्स पवत्तिं पुच्छि । सा “एकदिवसमेव आगन्त्वा पुन नागतपुब्बो”ति आह ।

मागविको आगतवेसेनेव नं उपसङ्कमित्वा पुच्छिस्सामीति तद्धुण्येव गन्त्वा “किं, भन्ते, अफासुक”न्ति पादे परामसन्तो पुच्छि । उपको नित्थुनन्तो परिवत्तितियेव । सो “वद भन्ते, यं मया सक्का कातुं, सव्वं करिस्सामी”ति आह । उपको “सचे चापं लभामि, जीवामि, नो चे, मय्हमेव मरणं सेय्यो”ति आह । जानासि किर, भन्ते, किञ्चि सिप्पन्ति? न जानामीति । न, भन्ते, किञ्चि सिप्पं अजानन्तेन सक्का घरावासं अधिट्ठातुन्ति । सो आह “नाहं किञ्चि सिप्पं जानामि, अपिच तुम्हाकं मंसहारको भविस्सामि, मंसञ्च विक्किणिस्सामी”ति । मागविको “अम्हाकम्पि एतदेव रुच्चती”ति उत्तरसाटकं दत्वा घरं आनेत्वा धीतरं अदासि । तेसं संवासमन्वाय पुत्तो विजायि, “सुभदो”तिस्स नाम अकंसु । चापा तस्स रोदनकाले “मंसहारकस्स पुत्त मिगलुद्धकस्स पुत्त मा रोदि मा रोदी”तिआदीनि वदमाना पुत्ततोसनगीतेन उपकं उप्पण्डेसि । “भद्वे त्वं मं अनाथोति मज्जसि, अत्थि मे अनन्तजिनो नाम सहायो, तस्साहं सन्तिकं गमिस्सामी”ति आह । चापा “एवमयं अट्ठीयती”ति जत्वा पुनप्पुनं कथेसि । सो एकदिवसं अनारोचेत्वाव मज्झिमदेसाभिमुखो पक्कामि ।

भगवा च तेन समयेन सावत्थियं विहरति जेतवने, अथ खो भगवा पटिकच्चेव भिक्खू आणापेसि “यो, भिक्खवे, अनन्तजिनोति पुच्छमानो आगच्छति, तस्स मं दस्सेय्याथा”ति । उपकोपि खो “कुहिं अनन्तजिनो वसती”ति पुच्छन्तो अनुपुब्बेन सावत्थिं आगन्त्वा विहारमज्झे ठत्वा “कुहिं अनन्तजिनो”ति पुच्छि । तं भिक्खू भगवतो सन्तिकं नयिंसु । सो च भगवन्तं दिस्वा “सज्जानाथ मं भगवा”ति आह । आम उपक सज्जानामि, कुहिं पन त्वं वसित्थाति । वङ्कहारजनपदे, भन्तेति । उपक महल्लकोसि जातो, पब्बजितुं सक्खिस्ससीति । पब्बजिस्सामि, भन्तेति । भगवा पब्बाजेत्वा तस्स कम्मट्ठानं अदासि । सो कम्मट्ठाने कम्मं करोन्तो अनागामिफले पतिट्ठाय कालं कत्वा अविहेसु निब्बत्तो, निब्बत्तिक्खणेयेव च अरहत्तं पापुणि । अविहे निब्बत्तमत्ता हि सत्त जना अरहत्तं पापुणिंसु, तेसं सो अज्जतरो । वुत्तज्हेतं —

“अविहं उपपन्नासे, विमुत्ता सत्त भिक्खवो ।  
रागदोसपरिक्खीणा, तिण्णा लोके विसत्तिकं ॥

“उपको पलगण्डो च, पुक्कुसाति च ते तयो ।



भद्वियो खण्डदेवो च, बाहुरग्नि च सङ्गियो ।

ते हित्वा मानुसं देहं, दिब्बयोगं उपच्चगु”न्ति ॥ (सं० नि० १.५०, १०५) ।

**१२. सण्ठपेसुन्ति** “नेव अभिवादेतब्बो”ति आदिना कतिकं अकंसु । **बाहुल्लिको**ति चीवरबाहुल्लादीनं अत्थाय पटिपन्नो । **पधानविब्भन्तो**ति पधानतो पुब्बे अनुद्धितदुक्करचरणतो विब्भन्तो भट्ठो परिहीनो । **आवत्तो बाहुल्लायाति** चीवरादिबहुभावत्थाय आवत्तो । **अपिच खो आसनं ठपेतब्बन्ति** अपिच खो पनस्स उच्चकुले निब्बत्तस्स आसनमत्तं ठपेतब्बन्ति वदिंसु । **असण्ठहन्ताति** बुद्धानुभावेन बुद्धतेजेन अभिभूता अत्तनो कतिकाय ठातुं असक्कोन्ता । **नामेन च आवुसोवादेन च समुदाचरन्तीति** “गोतमा”ति च “आवुसो”ति च वदन्ति, “आवुसो गोतम, मयं उरुवेलायं पधानकाले तुय्हं पत्तचीवरं गहेत्वा विचरिम्ह, मुखोदकं दन्तकट्ठं अदम्ह, वुत्थपरिवेणं सम्मज्जिम्ह, पच्छा ते को वत्तपटिपत्तिं अकासि, कच्चि अम्हेसु पक्कन्तेसु न चिन्तयित्था”ति एवरूपं कथं कथेन्तीति अत्थो ।

**न चिरस्सेवाति** अचिरेनेव । **कुलपुत्ताति** दुविधा कुलपुत्ता जातिकुलपुत्ता आचारकुलपुत्ता च, एते पन उभयथापि कुलपुत्तायेव । **अगारस्माति** घरा । अगाराय हितं अगारियं, कसिगोरक्खादि कुटुम्बपोसनकम्मं वुच्चति । नत्थि एत्थ अगारियन्ति **अनगारियं** । पब्बज्जायेतं अधिवचनं । **पब्बजन्तीति** उपगच्छन्ति उपसङ्गमन्ति । **तदनुत्तरन्ति** तं अनुत्तरं । **ब्रह्मचरियपरियोसानन्ति** मग्गब्रह्मचरियस्स परियोसानं, अरहत्तफलन्ति वुत्तं होति । तस्स हि अत्थाय कुलपुत्ता पब्बजन्ति । **दिट्ठेव धम्मेति** तस्मिंयेव अत्तभावे । **सयं अभिज्जा सच्छिकत्वाति** अत्तनोयेव पज्जाय पच्चक्खं कत्वा, अपरप्पच्चयं कत्वाति अत्थो । **उपसम्पज्ज विहरिस्सथाति** पापुणित्वा सम्पादेत्वा विहरिस्सथ ।

**इरियायाति** दुक्करइरियाय । **पटिपदायाति** दुक्करपटिपत्तिया । **दुक्करकारिकायाति** पसतपसतमुग्गयूसादिआहरणादिना दुक्करकरणेन । **उत्तरि मनुस्सधम्माति** मनुस्सधम्मतो उपरि । अलं अरियं कातुन्ति अलमरियो, अरियभावाय समत्थोति वुत्तं होति, जाणदस्सनमेव जाणदस्सनविसेसो, अलमरियो च सो जाणदस्सनविसेसो चाति **अलमरियजाणदस्सनविसेसो** । **जाणदस्सनन्ति** च दिब्बचक्खुपि विपस्सनापि मग्गोपि फलम्पि पच्चवेक्खणजाणम्पि सब्बज्जुतज्जाणम्पि वुच्चति । “अप्पमत्तो समानो जाणदस्सनं आराधेती”ति (म० नि० १.३११) हि एत्थ दिब्बचक्खु जाणदस्सनं नाम । “जाणदस्सनाय चित्तं अभिनीहरति अभिनिन्नामेती”ति (दी० नि० १.२३५) एत्थ विपस्सनाजाणं । “अभब्बा ते जाणदस्सनाय अनुत्तराय सम्बोधाया”ति (अ० नि० ४.१९६) एत्थ मग्गो । “अयमज्जो उत्तरिमनुस्सधम्मा अलमरियजाणदस्सनविसेसो अधिगतो फासुविहारो”ति (म० नि० १.३२८) एत्थ फलं । “जाणज्च पन मे दस्सनं उदपादि ‘अकुप्पा मे चेतोविमुत्ति, अयमन्तिमा जाति, नत्थि दानि पुनब्भवो”ति (सं० नि० ५.१०८१; महाव० १६) एत्थ पच्चवेक्खणजाणं । “जाणज्च पन मे दस्सनं उदपादि ‘सत्ताहकालकतो आळारो कालामो”ति (म० नि० १.२८४; २.३४०; महाव० १०) एत्थ सब्बज्जुतज्जाणं । इध पन सब्बज्जुतज्जाणपदद्वानो अरियमग्गो सब्बज्जुतज्जाणमेव वा अधिप्पेतं ।

**अभिजानाथ मे नोति** अभिजानाथ नु मे । **एवरूपं पभावितमेतन्ति** एत्थ एवरूपं वाक्यभेदन्ति अत्थो, अपि नु अहं उरुवेलायं पधाने तुम्हाकं सङ्गणहनत्थं अनुक्कण्ठनत्थं रत्तिं वा दिवा वा आगन्त्वा “आवुसो, मयं यत्थ कत्थचि गमिस्सामाति मा वितक्कयित्थ, मय्हं ओभासो वा कम्मट्ठाननिमित्तं वा पज्जायती”ति एवरूपं कच्चि वचनभेदं अकासिन्ति अधिप्पायो । ते एकपदेनेव सति लभित्वा उप्पन्नगारवा “अद्धा एस बुद्धो जातो”ति सद्वित्त्वा “नो हेतं भन्ते”ति आहंसु । **असक्खि खो भगवा पञ्चवगिये भिक्खू सज्जापेतुन्ति** भगवा पञ्चवगिये भिक्खू “बुद्धो अह”न्ति

जानापेतुं असक्खि । अज्जा चित्तं उपट्ठापेसुन्ति अज्जाय अरहत्तप्पत्तिया चित्तं उपट्ठपेसुं अभिनीहरिंसु ।

### धम्मचक्कप्पवत्तनसुत्तवण्णना

१३. द्वेमे, भिक्खवे, अन्ताति द्वे इमे, भिक्खवे, कोट्टासा, द्वे भागाति अत्थो । भागवचनो हेत्थ अन्त-सद्वो “पुब्बन्ते जाणं अपरन्ते जाण”न्ति आदीसु (ध० स० १०६३) विय । इमस्स पन पदस्स उच्चारणसमकालं पवत्तनिग्घोसो बुद्धानुभावेन हेट्ठा अवीचिं उपरि भवग्गं पत्वा दससहस्सिलोकधातुं फरित्वा अट्ठासि । तस्मिंयेव समये परिपक्ककुसलमूला सच्चाभिसम्बोधाय कताधिकारा अट्ठारसकोटिसङ्गा ब्रह्मानो समागच्छिंसु । पच्छिमदिसाय सूरियो अत्थमेति, पाचीनदिसाय आसाळहनक्खत्तेन युत्तो पुण्णचन्दो उग्गच्छति । तस्मिं समये भगवा धम्मचक्कप्पवत्तनसुत्तं आरभन्तो “द्वेमे, भिक्खवे, अन्ता”न्ति आदिमाह ।

तत्थ पब्बजितेनाति गिहिबन्धनं छेत्वा पब्बज्जुपगतेन । न सेवितब्बाति न वळज्जेतब्बा नानुयुज्जितब्बा । यो चायं कामेसु कामसुखल्लिकानुयोगोति यो च अयं वत्थुकामेसु किलेसकामसुखस्स अनुयोगो, किलेसकामसंयुत्तस्स सुखस्स अनुगतोति अत्थो । हीनोति लामको । गम्मोति गामवासीनं सन्तको तेहि सेवितब्बताय । पोथुज्जनिकोति पुथुज्जनेन अन्धबालजनेन आचिण्णो । अनरियोति न अरियो न विसुद्धो न उत्तमो, न वा अरियानं सन्तको । अनत्थसंहितोति न अत्थसंहितो, हितसुखावहकारणं अनिस्सितोति अत्थो । अत्तकिलमथानुयोगोति अत्तनो किलमथस्स अनुयोगो, दुक्खकरणं दुक्खुप्पादनन्ति अत्थो । दुक्खोति कण्टकापस्सयसेय्यादीहि अत्तबाधनेहि दुक्खावहो । मज्झिमा पटिपदाति अरियमग्गं सन्धाय वुत्तं । मग्गो हि कामसुखल्लिकानुयोगो एको अन्तो, अत्तकिलमथानुयोगो एको अन्तो, एते द्वे अन्ते न उपेति न उपगच्छति, विमुत्तो एतेहि अन्तेहि, तस्मा “मज्झिमा पटिपदा”ति वुच्चति । एतेसं मज्झे भवत्ता मज्झिमा, वट्टदुक्खनिस्सरणत्थिकेहि पटिपज्जितब्बतो च पटिपदाति, तथा लोभो एको अन्तो, दोसो एको अन्तो । सस्सतं एकं अन्तं, उच्छेदो एको अन्तोति पुरिमनयेनेव वित्थारेतब्बं ।

चक्खुकरणीति आदीहि तमेव पटिपदं थोमेति । पज्जाचक्खुं करोतीति चक्खुकरणी । सा हि चतुन्नं सच्चानं दस्सनाय संवत्तति परिज्जाभिसमयादिभेदस्स दस्सनस्स पवत्तनट्ठेनाति “चक्खुकरणी”ति वुच्चति । तयिदं सतिपि पटिपदाय अनज्जत्ते अवयववसेन सिज्झमानो अत्थो समुदायेन कतो नाम होतीति उपचारवसेन वुत्तन्ति दट्ठब्बं । दुतियपदं तस्सेव वेवचनं । उपसमायाति किलेसुपसमत्थाय । अभिज्जायाति चतुन्नं सच्चानं अभिजाननत्थाय । सम्बोधायाति तेसंयेव सम्बुज्जनत्थाय । निब्बानायाति निब्बानसच्छिकिरियाय । अथ वा निब्बानायाति अनुपादिसेसनिब्बानाय । “उपसमाया”ति हि इमिना सउपादिसेसनिब्बानं गहितं ।

इदानीं तं मज्झिमप्पटिपदं सरूपतो दस्सेतुकामो “कतमा च सा”ति पुच्छित्वा “अयमेवा”ति आदिना नयेन विस्सज्जेसि । तत्थ अयमेवाति अवधारणवचनं अज्जस्स निब्बानगामिमग्गस्स अत्थिभावपटिसेधनत्थं । सत्तापटिक्खेपो हि इध पटिसेधनं अलब्भमानत्ता अज्जस्स मग्गस्स । अरियोति किलेसानं आरकत्ता अरियो निरुत्तिनयेन । अरिपहानाय संवत्ततीतिपि अरियो अरयो पापधम्मा यन्ति अपगच्छन्ति एतेनाति कत्वा । अरियेन भगवता देसितत्ता अरियस्स अयन्तिपि अरियो, अरियभावप्पटिलाभाय संवत्ततीतिपि अरियो । एत्थ पन अरियकरो अरियोतिपि उत्तरपदलोपेन अरिय-सद्वसिद्धि वेदितब्बा । अट्ठहि अङ्गेहि उपेतत्ता अट्ठङ्गिको । मग्गङ्गसमुदाये हि मग्गवोहारो, समुदायो च समुदायीहि समन्नागतो नाम होति । अयं पनेत्थ वचनत्थो — अत्तनो अवयवभूतानि अट्ठङ्गानि एतस्स सन्तीति अट्ठङ्गिकोति । परमत्थतो पन अङ्गानियेव मग्गो पञ्चङ्गिकतूरियादीनि विय, न च अङ्गविनिमुत्तो छळङ्गो वेदो विय । किलेसे मारेन्तो गच्छतीति मग्गो निरुत्तिनयेन,

निब्बानं मग्गतिं गवेसतीति वा **मग्गो** । अरियमग्गो हि निब्बानं आरम्भणं करोन्तो गवेसन्तो वियं होति । निब्बानत्थिकेहि मग्गीयतीति वा **मग्गो** विवट्ठपनिस्सयपुज्जकरणतो पट्टाय तदत्थपटिपत्तितो । गम्माति वा तेहि पटिपज्जीयतीति **मग्गो** । एत्थ पन आदिअन्तविपरियायेन सद्दिसिद्धिं वेदितब्बा ।

**सेय्यथिदन्ति** निपातो, तस्स कतमो सो इति चेति अत्थो, कतमानि वा तानि अट्ठङ्गानीति । सव्वलिङ्गविभत्तिवचनसाधारणो हि अयं निपातो । एकमेकम्पि अङ्गं मग्गोयेव । यथाह “सम्मादिट्ठि मग्गो चेव हेतु चा”ति (ध० स० १०३९) । पोराणापि भणन्ति “दस्सनमग्गो सम्मादिट्ठि, अभिनिरोपनमग्गो सम्मासङ्कप्पो... पे०... अविक्खेपमग्गो सम्मासमाधी”ति । ननु च अङ्गानि समुदितानि मग्गो अन्तमसो सत्तङ्गविकलस्स अरियमग्गस्स अभावतोति? सच्चमेतं सच्चसम्पटिवेधे, मग्गप्पच्चयताय पन यथासकं किच्चकरणेन पच्चेकम्पि तानि मग्गोयेव, अज्जथा समुदितानम्पि तेसं मग्गकिच्चं न सम्भवेय्याति । सम्मादिट्ठिआदीसु सम्मा पस्सतीति **सम्मादिट्ठि**, सम्मा सङ्कप्पेति सम्पयुत्तधम्मे निब्बानसङ्घाते आरम्भणे अभिनिरोपेतीति **सम्मासङ्कप्पो**, सम्मा वदति एतायाति **सम्मावाचा**, सम्मा करोति एतेनाति सम्माकम्मं, तदेव **सम्माकम्मन्तो**, सम्मा आजीवति एतेनाति **सम्माआजीवो**, सम्मा वायमति उस्सहतीति **सम्मावायामो**, सम्मा सरति अनुस्सरतीति **सम्मासति**, सम्मा समाधियति चित्तं एतेनाति **सम्मासमाधी**ति एवं निब्बचनं वेदितब्बं । इदानीं **अयं खो सा भिक्खवे**ति तमेव पटिपदं निगमेन्तो आह । तस्सत्थो — य्वायं चत्तारोपि लोकुत्तरमग्गे एकतो कत्वा कथितो अट्ठङ्गिको मग्गो, अयं खो सा भिक्खवे... पे०... निब्बानाय संवत्ततीति ।

१४. एवं मज्झिमपटिपदं सरूपतो दस्सेत्वा इदानीं चत्तारि अरियसच्चानि दस्सेतुं “**इदं खो पन, भिक्खवे**”तिआदिमाह । तत्थ (विसुद्धि० २.५३०) **दुक्खन्ति** एत्थ **दु-**इति अयं सद्दो कुच्छिते दिस्सति । कुच्छितज्झि पुत्तं “दुपुत्तो”ति वदन्ति, **खं-**सद्दो पन तुच्छे । तुच्छज्झि आकासं “**खं**”न्ति वुच्चति । इदञ्च पठमसच्चं कुच्छितं अनेकउपद्ववाधिद्वानतो, तुच्छं बालजनपरिकप्पितधुवसुभसुखत्तभावविरहिततो, तस्मा कुच्छितत्ता तुच्छत्ता च “**दुक्खं**”न्ति वुच्चति । यस्मा पनेतं बुद्धादयो अरिया पटिविज्झन्ति, तस्मा “**अरियसच्चं**”न्ति वुच्चति । अरियपटिविज्झितव्वज्झि सच्चं पुरिमपदे उत्तरपदलोपेन “**अरियसच्चं**”न्ति वुत्तं । अरियस्स तथागतस्स सच्चन्तिपि अरियसच्चं । तथागतेन हि सयं अधिगतत्ता पवेदितत्ता ततो एव च अज्जेहि अधिगमनीयत्ता तं तस्स होतीति । अथ वा एतस्स अभिसम्बुद्धत्ता अरियभावसिद्धितो अरियसाधकं सच्चन्तिपि **अरियसच्चं** पुब्बे विय उत्तरपदलोपेन । अवितथभावेन वा अरणीयत्ता अधिगन्तव्वत्ता अरियं सच्चन्तिपि **अरियसच्चं** । सच्चत्थं पन चतुन्नम्पि सच्चानं परतो एकज्झं दस्सयिस्साम ।

इदानीं तं दुक्खं अरियसच्चं सरूपतो दस्सेतुं “**जातिपि दुक्खा**”तिआदिमाह । तत्रायं **जाति-**सद्दो अनेकत्थो । तथा हेस “एकम्पि जातिं द्वेपि जातियो”ति (दी० नि० १.३१; म० नि० १.१४८) एत्थ भवे आगतो । “अत्थि, विसाखे, निगण्ठा नाम समणजाती”ति (अ० नि० ३.७१) एत्थ निकाये । “जाति द्वीहि खन्धेहि सङ्गहिता”ति (धातु० ७१) एत्थ सङ्गतलक्खणे । “यं मातुकुच्छिस्मिं पठमं चित्तं उप्पन्नं पठमं विज्जाणं पातुभूतं, तदुपादाय सावस्स जाती”ति (महाव० १२४) एत्थ पटिसन्धियं । “सम्पतिजातो, आनन्द, बोधिसत्तो”ति (दी० नि० २.३१; म० नि० ३.२०७) एत्थ पसूतियं । “अक्खित्तो अनुपकुट्ठो जातिवादेना”ति (दी० नि० १.३०३) एत्थ कुले । स्वायमिध गम्भसेय्यकानं पटिसन्धितो पट्टाय याव मातुकुच्छिम्हा निक्खमनं, ताव पवत्तेसु खन्धेसु, इतरेसं पटिसन्धिक्खणेस्वेवाति दट्ठव्वो । अयम्पि च परियायकथाव, निप्परियायतो पन तत्थ तत्थ निब्बत्तमानानं सत्तानं ये खन्धा पातुभवन्ति, तेसं पठमपातुभावो जाति नाम ।

कस्मा पनेसा दुक्खाति चे? अनेकेसं दुक्खानं वत्थुभावतो । अनेकानि हि दुक्खानि । सेय्यथिदं — दुक्खदुक्खं

विपरिणामदुःखं सङ्खारदुःखं पटिच्छन्नदुःखं अप्पटिच्छन्नदुःखं परियायदुःखं निप्परियायदुःखन्ति । तत्थ कायिकचेतसिका दुःखा वेदना सभावतो च नामतो च दुःखत्ता **दुःखदुःखन्ति** वुच्चति । सुखा वेदना विपरिणामदुःखवुप्पत्तिहेतुतो **विपरिणामदुःखं** । उपेक्खा वेदना चेव सेसा च तेभूमका सङ्खारा उदयव्ययपीळितत्ता **सङ्खारदुःखं** । कण्णसूलदन्तसूलरागजपरिळाहदोसजपरिळाहादिकायिकचेतसिका आबाधा पुच्छित्वा जानितब्बतो उपक्कमस्स च अपाकटभावतो **पटिच्छन्नदुःखं** । द्वत्तिसकम्मकारणादिसमुद्धानो आबाधो अपुच्छित्वाव जानितब्बतो उपक्कमस्स च पाकटभावतो **अप्पटिच्छन्नदुःखं** । ठपेत्वा दुःखदुःखं सेसदुःखं सच्चविभङ्गे आगतं जातिआदि सब्बम्पि तस्स तस्स दुःखस्स वत्थुभावतो **परियायदुःखं** । दुःखदुःखं पन **निप्परियायदुःखन्ति** वुच्चति । तत्रायं जाति यं तं **बालपण्डितसुत्तादीसु** (म० नि० ३.२४६ आदयो) भगवतापि उपमावसेन पकासितं आपायिकं दुःखं, यच्च सुगतियम्पि मनुस्सलोके गम्भोक्कन्तिमूलकादिभेदं दुःखं उप्पज्जति, तस्स वत्थुभावतो दुःखा । तेनाहु पोराणा —

“जायेथ नो चे नरकेसु सत्तो ।  
तत्थग्गिदाहादिकमप्पसय्हं ।  
लभेथ दुःखं न कुहिं पतिट्ठं ।  
इच्चाह दुःखाति मुनीध जातिं ॥

“दुःखं तिरच्छेसु कसापतोद-  
दण्डाभिघातादिभवं अनेकं ।  
यं तं कथं तत्थ भवेय्य जातिं ।  
विना तहिं जाति ततोपि दुःखा ॥

“पेतेसु दुःखं पन खुप्पिपासा-  
वातातपादिप्पभवं विचित्तं ।  
यस्मा अजातस्स न तत्थ अत्थि ।  
तस्मापि दुःखं मुनि जातिमाह ॥

“तिब्बन्धकारे च असय्ह सीते ।  
लोकन्तरे यं असुरेसु दुःखं ।  
न तं भवे तत्थ न चस्स जाति ।  
यतो अयं जाति ततोपि दुःखा ॥

“यज्जापि गूथनरके विय मातु गब्भे ।  
सत्तो वसं चिरमतो बहि निक्खमज्ज ।  
पप्पोति दुःखमतिघोरमिदम्पि नत्थि ।  
जातिं विना इतिपि जाति अयज्झि दुःखा ॥

“किं भासितेन बहुना ननु यं कुहिज्जि ।  
अत्थीध किज्जिदपि दुःखमिदं कदाचि ।

नेवत्थि जातिविरहेन यतो महेसि ।

दुक्खाति सब्बपठमं इममाह जातिं'न्ति ॥ (विसुद्धिं २.५४१; विभं अट्ठं १९१; महानिं अट्ठं ५; पटिं मं अट्ठं १.१.३२-३३) ।

**जरापि दुक्खाति** एत्थ पन दुविधा जरा सङ्खतलक्खणञ्च खण्डिच्चादिसम्मतो सन्ततियं एकभवपरियापन्नक्खन्धपुराणभावो च, सा इध अधिप्पेता । सा पनेसा जरा सङ्खारदुक्खभावतो चेव दुक्खवत्थुतो च दुक्खा । यज्झि  
अङ्गपच्चङ्गसिथिलभावइन्द्रियविकारविरूपतायोब्बनविनासवीरियाविसादसतिमतिविप्पवासपरपरिभवादिअनेकपच्चयं कायिकचेतसिकं दुक्खमुप्पज्जति, जरा तस्स वत्थु । तेनाहु पोराणा —

“अङ्गानं सिथिलीभावा, इन्द्रियानं विकारतो ।  
योब्बनस्स विनासेन, बलस्स उपघाततो ॥

“विप्पवासा सतादीनं, पुत्तदारेहि अत्तनो ।  
अप्पसादनीयतो चेव, भिय्यो बालत्तपत्तिया ॥

“पप्पोति दुक्खं यं मच्चो, कायिकं मानसं तथा ।  
सब्बमेतं जराहेतु, यस्मा तस्मा जरा दुखा'ति ॥ (विसुद्धिं २.५४२; विभं अट्ठं १९२; महानिं अट्ठं ५; पटिं मं अट्ठं १.१.३२-३३) ।

**ब्याधिपि दुक्खोति** इदं पदं विभङ्गे दुक्खसच्चनिद्देसपाळियं न आगतं, तेनेव **विसुद्धिमग्गेपि** दुक्खसच्चनिद्देसे तं न उद्धटं, **धम्मचक्कपवत्तन**सुत्तन्तपाळियंयेव पन उपलब्धति, तस्मा तत्थेविमस्स वचने अज्जत्थ च अवचने कारणं वीमंसितब्बं ।

**मरणमि दुक्खन्ति** एत्थापि दुविधं मरणं सङ्खतलक्खणञ्च । यं सन्धाय वुत्तं “जरामरणं द्वीहि खन्धेहि सङ्गहितं”न्ति (धातुं ७१) । एकभवपरियापन्नजीवितन्द्रियप्पबन्धविच्छेदो च । यं सन्धाय वुत्तं “निच्चं मरणतो भय”न्ति (सुं निं ५८१; जां १.११.८८), तं इध अधिप्पेतं । जातिपच्चयमरणं उपक्कममरणं सरसमरणं आयुक्खयमरणं पुज्जक्खयमरणन्तिपि तस्सेव नामं । तयिदं दुक्खस्स वत्थुभावतो दुक्खन्ति वेदितब्बं । तेनाहु पोराणा —

“पापस्स पापकम्मादि-निमित्तमनुपस्सतो ।  
भद्दस्सापसहन्तस्स, वियोगं पियवत्थुकं ।  
मीयमानस्स यं दुक्खं, मानसं अविसेसतो ॥

“सब्बेसज्जापि यं सन्धि-बन्धनच्छेदनादिकं ।  
वितुज्जमानमम्मानं, होति दुक्खं सरीरजं ॥

“असय्हमप्पटिकारं, दुक्खस्सेतस्सिदं यतो ।  
मरणं वत्थु तेनेतं, दुक्खमिच्चेव भासितं”न्ति ॥ (विसुद्धिं २.५४३; विभं अट्ठं १९३; महानिं अट्ठं ५;

पटि० म० अट्ठ० १.१.३२-३३)।

इमस्मिञ्च ठाने “सोकपरिदेवदुक्खदोमनस्सुपायासापि दुक्खा”ति विभङ्गे दुक्खसच्चनिद्देसे आगतं, इध पन तं नत्थि, तत्थापि कारणं परियेसितब्बं।

**अप्पियेहि सम्पयोगो दुक्खोति** एत्थ अप्पियसम्पयोगो नाम अमनापेहि सत्तसङ्खारेहि समोधानं। सोपि दुक्खवत्थुतो दुक्खो। तेनाहु पोराणा —

“दिस्वाव अप्पिये दुक्खं, पठमं होति चेतसि।

तदुपक्कमसम्भूत-मथ काये यतो इध ॥

“ततो दुक्खद्वयस्सापि, वत्थुतो सो महेसिना।

दुक्खो वुत्तोति विज्जेय्यो, अप्पियेहि समागमो”ति ॥

**पियेहि विप्पयोगो दुक्खोति** एत्थ पन पियविप्पयोगो नाम मनापेहि सत्तसङ्खारेहि विनाभावो। सोपि सोकदुक्खस्स वत्थुतो दुक्खो। तेनाहु पोराणा —

“जातिधनादिवियोगा।

सोकसरसमप्पिता वितुज्जन्ति।

बाला यतो ततोयं।

दुक्खोति मतो पियविप्पयोगो”ति ॥

**यम्पिच्छं न लभतीति** एत्थ “अहो वत मयं न जातिधम्मा अस्सामा”ति आदीसु अलब्भनेय्यवत्थूसु इच्छाव “यम्पिच्छं न लभति, तम्पि दुक्ख”न्ति वुत्ता, सापि दुक्खवत्थुतो दुक्खा। तेनाहु पोराणा —

“तं तं पत्थयमानानं, तस्स तस्स अलाभतो।

यं विघातमयं दुक्खं, सत्तानं इध जायति ॥

“अलब्भनेय्यवत्थूनं, पत्थना तस्स कारणं।

यस्मा तस्मा जिनो दुक्खं, इच्छितालाभमब्रवी”ति ॥

**संखित्तेन पञ्चुपादानक्खन्धा दुक्खाति** एत्थ पन यस्मा इन्धनमिव पावको, लक्खमिव पहरणानि, गोरूपं विय डंसमकसादयो, खेत्तमिव लायका, गामं विय गामघातका, उपादानक्खन्धपञ्चकमेव जातिआदयो नानप्पकारेहि विबाधेन्ता तिणलतादीनि विय भूमियं, पुण्फफलपल्लवानि विय रुक्खेसु उपादानक्खन्धेसुयेव निब्बत्तन्ति, उपादानक्खन्धानञ्च आदिदुक्खं जाति, मज्झेदुक्खं जरा, परियोसानदुक्खं मरणं, मनोरथविघातप्पत्तानञ्च इच्छाविघातदुक्खं इच्छितालाभोति एवं नानप्पकारतो उपपरिक्खियमाना उपादानक्खन्धाव दुक्खाति यदेतं एकमेकं दस्सेत्वा वुच्चमानं अनेकेहिपि कप्पेहि न सक्का अनवसेसतो वत्तुं, तस्मा तं सब्बम्पि दुक्खं एकजलबिन्दुमिह सकलसमुद्दजलरसं विय येसु केसुचि पञ्चुपादानक्खन्धेसु सङ्घिपित्वा दस्सेतुं “संखित्तेन पञ्चुपादानक्खन्धा दुक्खा”ति भगवा अवोच। तेनाहु पोराणा —

“जातिष्पभुतिकं दुक्खं, यं वुत्तमिध तादिना ।  
अवुत्तं यच्च तं सब्बं, विना एते न विज्जति ॥

“यस्मा तस्मा उपादान-क्खन्धा सङ्खेपतो इमे ।  
दुक्खाति वुत्ता दुक्खन्त-देसकेन महेसिना”ति ॥

एवं सरूपतो दुक्खसच्चं दस्सेत्वा इदानीं समुदयसच्चं दस्सेतुं “इदं खो पन, भिक्खवे, दुक्खसमुदय”न्ति आदिमाह । तत्थ सं-इति अयं सद्दो “समागमो समेत”न्ति आदीसु संयोगं दीपेति, उ-इति अयं “उप्पन्नं उदित”न्ति आदीसु उप्पत्तिं । अय-सद्दो पन कारणं दीपेति । इदञ्चापि दुतियसच्चं अवसेसपच्चयसमायोगे सति दुक्खस्सुप्पत्तिकारणन्ति दुक्खस्स संयोगे उप्पत्तिकारणत्ता “दुक्खसमुदय”न्ति वुच्चति । यायं तण्हाति या अयं तण्हा । पो नोब्भविक्काति पुनब्भवकरणं पुनब्भवो उत्तरपदलोपेन, पुनब्भवो सीलमेतिस्साति पो नोब्भविक्का । नन्दीरागेन सहगताति नन्दीरागसहगता । इदं वुत्तं होति “नन्दनतो रज्जनतो च नन्दीरागभावं सब्बासु अवत्थासु अप्पच्चक्खाय वुत्तिया नन्दीरागसहगता”ति । तत्रतत्राभिनन्दिनीति यत्र यत्र अत्तभावो निब्बत्तति, तत्रतत्राभिनन्दिनी ।

सेय्यथिदन्ति निपातो, तस्स सा कतमाति चेति अयमत्थो । रूपतण्हादिभेदेन छब्बिधायेव तण्हा पवत्तिआकारभेदतो कामतण्हादिवसेन तिविधा वुत्ता । रूपतण्हायेव हि यदा चक्खुस्स आपाथमागतं रूपारम्भणं कामस्सादवसेन अस्सादयमाना पवत्तति, तदा कामतण्हा नाम होति । यदा तदेवारम्भणं धुवं सस्सतन्ति पवत्ताय सस्सतदिट्ठिया सङ्घि पवत्तति, तदा भवतण्हा नाम होति । सस्सतदिट्ठिसहगतो हि रागो “भवतण्हा”ति वुच्चति । यदा पन तदेवारम्भणं उच्छिज्जति विनस्सतीति पवत्ताय उच्छेददिट्ठिया सङ्घि पवत्तति, तदा विभवतण्हा नाम होति । उच्छेददिट्ठिसहगतो हि रागो “विभवतण्हा”ति वुच्चति । एस नयो सद्दतण्हादीसुपि ।

कस्मा पनेत्थ तण्हाव समुदयसच्चं वुत्ताति? विसेसहेतुभावतो । अविज्जा हि भवेसु आदीनवं पटिच्छादेन्ती दिट्ठिआदिउपादानञ्च तत्थ तत्थ अभिनिविसमानं तण्हं अभिवट्ठेति, दोसादयोपि कम्मस्स कारणं होन्ति, तण्हा पन तंतंभवयोनितिविज्जाणट्ठितिसत्ताआवाससत्तनिकायकुलभोगिस्सरियादिविचित्तं अभिपत्थेन्ती कम्मविचित्तताय उपनिस्सयतं कम्मस्स च सहायभावं उपगच्छन्ती भवादिविचित्तं नियमेति, तस्मा दुक्खस्स विसेसहेतुभावतो अज्जेसुपि अविज्जाउपादानकम्मादीसु सुत्ते अभिधम्मे च अवसेसकिलेसाकुसलमूलादीसु वुत्तेसु दुक्खहेतूसु विज्जमानेसु तण्हाव “समुदयसच्च”न्ति वुत्ताति वेदितब्बं ।

इदानीं दुक्खनिरोधं अरियसच्चं दस्सेतुं “इदं खो पन, भिक्खवे, दुक्खनिरोध”न्ति आदिमाह । तत्थ यस्मा नि-सद्दो अभावं, रोध-सद्दो च चारकं दीपेति, तस्मा अभावो एत्थ संसारचारकसङ्घातस्स दुक्खरोधस्स सब्बगतिमुज्जत्ता, समधिगते वा तस्मिं संसारचारकसङ्घातस्स दुक्खरोधस्स अभावो होति तप्पटिपक्खत्तातिपि “दुक्खनिरोध”न्ति वुच्चति । दुक्खस्स वा अनुप्पादनरोधपच्चयत्ता दुक्खनिरोधं । दुक्खनिरोधं दस्सेन्तेन चेत्य “यो तस्सायेव तण्हाया”ति आदिना नयेन समुदयनिरोधो वुत्तो, सो कस्मा वुत्तोति चे? समुदयनिरोधेन दुक्खनिरोधो । ब्याधिनिमित्तवूपसमेन ब्याधिवूपसमो विय हि हेतुनिरोधेन फलनिरोधो, तस्मा समुदयनिरोधेनेव दुक्खं निरुज्झति, न अज्जथा । तेनाह —

“यथापि मूले अनुपद्वे दळ्हे ।  
छिन्नोपि रुक्खो पुनरेव रूहति ।

एवम्पि तण्हानुसये अनूहते ।

निब्बत्तती दुक्खमिदं पुनप्पुन'न्ति ॥ (ध० प० ३३८) ।

इति यस्मा समुदयनिरोधेनेव दुक्खं निरुज्झति, तस्मा भगवा दुक्खनिरोधं दस्सेन्तो समुदयनिरोधेन देसेसि । सीहसमानवुत्तिनो हि तथागता । ते दुक्खं निरोधेन्ता दुक्खनिरोधञ्च देसेन्ता हेतुमिहि पटिपज्जन्ति, न फले । यथा हि सीहो येनत्तनि सरो खित्तो, तत्थेव अत्तनो बलं दस्सेति, न सरे, तथा बुद्धानं कारणे पटिपत्ति, न फले । तित्थिया पन सुवानवुत्तिनो । ते दुक्खं निरोधेन्ता दुक्खनिरोधञ्च देसेन्ता अत्तकिलमथानुयोगदेसनादीहि फले पटिपज्जन्ति, न हेतुमिहि । यथा हि सुनखा केनचि लेडुप्पहारे दिन्ने भुस्सन्ता लेडुं खादन्ति, न पहारदायके उड्डहन्ति, एवं अज्जतित्थिया दुक्खं निरोधेतुकामा कायखेदमनुयुज्जन्ति, न किलेसनिरोधनं, एवं ताव दुक्खनिरोधस्स समुदयनिरोधवसेन देसनाय पयोजनं वेदितब्बं ।

अयं पनेत्थ अत्थो । तस्सायेव तण्हायाति तस्सा “पोनोब्भविका”ति वत्त्वा कामतण्हादिवसेन विभत्ततण्हाय । विरागो वुच्चति मग्गो । “विरागा विमुच्चती”ति (म० नि० १.२४५; सं० नि० ३.१२, ५९) हि वुत्तं । विरागेन निरोधो विरागनिरोधो, अनुसयसमुग्धाततो असेसो विरागनिरोधो असेसविरागनिरोधो । अथ वा विरागोति पहानं वुच्चति, तस्मा अनुसयसमुग्धाततो असेसो विरागो असेसो निरोधोति एवम्पेत्य योजना दट्टब्बा, अत्थतो पन सब्बानेव एतानि निब्बानस्स वेवचनानि । परमत्थतो हि दुक्खनिरोधो अरियसच्चन्ति निब्बानं वुच्चति । यस्मा पन तं आगम्म तण्हा विरज्जति चेव निरुज्झति च, तस्मा “विरागो”ति च “निरोधो”ति च वुच्चति । यस्मा च तदेव आगम्म तस्सा चागादयो होन्ति, कामगुणालयादीसु चेत्य एकोपि आलयो नत्थि, तस्मा चागो पटिनिस्सग्गो मुत्ति अनालयोति वुच्चति ।

इदानीं दुक्खनिरोधगामिनिपटिपदाअरियसच्चं दस्सेतुं “इदं खो पन, भिक्खवे, दुक्खनिरोधगामिनी”ति आदिमाह । यस्मा पनेतं अरियसच्चं दुक्खनिरोधं गच्छति आरम्भणवसएन तदभिमुखभूतत्ता, पटिपदा च होति दुक्खनिरोधप्पत्तिया, तस्मा “दुक्खनिरोधगामिनी पटिपदा”ति वुच्चति । सेसमेत्थ वुत्तनयमेव । को पन नेसं दुक्खादीनं सच्चट्ठोति? यो पज्जाचक्खुना उपपरिक्खियमानानं मायाव विपरीतो, मरीचिव विसंवादको, तित्थियानं अत्ता विय अनुपलब्धसभावो च न होति, अथ खो बाधनप्पभवसन्तिनित्थ्यानप्पकारेन तच्छाविपरीतभूतभावेन अरियजाणस्स गोचरो होतियेव, एस अगिलक्खणं विय लोकपकति विय च तच्छाविपरीतभूतभावो सच्चट्ठोति वेदितब्बो । एत्थ च अगिलक्खणं नाम उण्हत्तं । तज्झि कत्थचि कट्ठादिउपादानभेदे विसंवादकं विपरीतं अभूतं वा कदाचिपि न होति, “जातिधम्मा जराधम्मा, अथो मरणधम्मिनो”ति (अ० नि० ५.५७) एवं वुत्तजातिआदिका लोकपकतीति वेदितब्बा । “एकच्चानं तिरिच्छानानं तिरियं दीघता, मनुस्सादीनं उड्डं दीघता, बुद्धिनिट्ठप्पत्तानं पुन अवड्डनन्ति एवमादिका च लोकपकती”ति वदन्ति ।

अपिच —

नाबाधकं यतो दुक्खं, दुक्खा अज्जं न बाधकं ।

बाधकत्तनियामेन, ततो सच्चमिदं मतं ॥

तं विना नाज्जतो दुक्खं, न होति न च तं ततो ।

दुक्खहेतुनियामेन, इति सच्चं विसत्तिका ॥



नाज्जा निब्बानतो सन्ति, सन्तं न च न तं यतो ।  
सन्तभावनियामेन, ततो सच्चमिदं मतं ॥

मग्गा अज्जं न निय्यानं, अनिय्यानो न चापि सो ।  
तच्छनिय्यानभावत्ता, इति सो सच्चसम्मतो ॥

इति तच्छाविपल्लास-भूतभावं चतूसुपि ।  
दुक्खादीस्वविसेसेन, सच्चद्वं आहु पण्डिताति ॥ (विभ० अट्ठ० १८९) ।

**१५. पुब्बे अननुस्सुतेसूति** इतो पुब्बे “इदं दुक्खं”न्तिआदिना न अनुस्सुतेसु अस्सुतपुब्बेसु चतुसच्चधम्मेषु ।  
**चक्खुन्ति**आदीनि जाणवेवचनानेव । जाणमेव हेत्थ पच्चक्खतो दस्सनद्वेन चक्खु वियाति **चक्खु**, जाणद्वेन **जाणं**, पकारतो जाननद्वेन **पज्जा**, पटिविज्जनद्वेन **विज्जा**, सच्चप्पटिच्छादकस्स मोहन्धकारस्स विधमनतो ओभासनद्वेन **आलोको**ति वुत्तं ।  
तं पनेतं चतूसु सच्चेसु लोकियलोकुत्तरमिस्सकं निद्विट्ठन्ति वेदितब्बं ।

**१६. यावकीवज्जाति** यत्तकं कालं । **तिपरिवट्टन्ति** सच्चजाणकिच्चजाणकतजाणसङ्घातानं तिण्णं परिवट्टानं वसेन तिपरिवट्टं । सच्चजाणादिवसेन हि तयो परिवट्टा एतस्साति तिपरिवट्टन्ति वुच्चति जाणदस्सनं । एत्थ च “इदं दुक्खं अरियसच्चं, इदं दुक्खसमुदयं”न्ति एवं चतूसु सच्चेसु यथाभूतजाणं **सच्चजाणं** नाम । तेसुयेव “परिज्जेय्यं पहातब्बं सच्छिकातब्बं भावेतब्बं”न्ति एवं कत्तब्बकिच्चजाननजाणं **किच्चजाणं** नाम । “परिज्जातं पहीनं सच्छिकतं भावितं”न्ति एवं तस्स कतभावजाननजाणं **कतजाणं** नाम । **द्वादसाकारन्ति** तेसंयेव एकेकस्मिं सच्चे तिण्णं तिण्णं आकारानं वसेन द्वादसाकारं । **जाणदस्सनन्ति** एतेसं तिपरिवट्टानं द्वादसन्नं आकारानं वसेन उप्पन्नजाणसङ्घातं दस्सनं ।

**अनुत्तरं सम्मासम्बोधिन्ति** उत्तरविरहितं सब्बसेट्ठं सम्मा सामञ्च बोधिं । अथ वा पसत्थं सुन्दरञ्च बोधिं । **बोधीति** च भगवतो अरहत्तमग्गो इधाधिप्पेतो । सावकानं अरहत्तमग्गो अनुत्तरा बोधि होति, न होतीति? न होति । कस्मा?  
असब्बगुणदायकत्ता । तेसज्हि कस्सचि अरहत्तमग्गो अरहत्तफलमेव देति, कस्सचि तिस्सो विज्जा, कस्सचि छ अभिज्जा, कस्सचि चतस्सो पटिसम्भिदा, कस्सचि सावकपारमीजाणं । पच्चेकबुद्धानमि पच्चेकबोधिजाणमेव देति, बुद्धानं पन सब्बगुणसम्पत्तिं देति अभिसेको विय रज्जो सब्बलोकिससरियभावं । तस्मा अज्जस्स कस्सचिपि अनुत्तरा बोधि न होतीति ।  
**अभिसम्बुद्धोति पच्चज्जासिन्ति** अभिसम्बुद्धो अहं पत्तो पटिविज्जित्वा ठितोति एवं पटिजानिं । **जाणञ्च पन मे दस्सनं उदपादीति** अधिगतगुणानं याथावतो दस्सनसमत्थं पच्चवेक्खणजाणञ्च पन मे उदपादि । **अकुप्पा मे विमुत्तीति** अयं मय्हं अरहत्तफलविमुत्ति अकुप्पा पटिपक्खेहि न कोपेतब्बाति एवं जाणं उदपादि । तत्थ द्वीहाकारेहि अकुप्पता वेदितब्बा मग्गसङ्घातकारणतो च आरम्मणतो च । सा हि चतूहि मग्गेहि समुच्छिन्नकिलेसानं पुन अनिवत्तनताय **कारणतोपि** अकुप्पा, अकुप्पधम्मं निब्बानं आरम्मणं कत्वा पवत्तताय **आरम्मणतोपि** अकुप्पा अनाकुप्पारम्मणानं लोकियसमापत्तीनं तदभावतो । **अन्तिमाति** पच्छिमा । **नत्थि दानि पुनब्भवोति** इदानि पुन अज्जो भवो नाम नत्थीति ।

**इमस्मिञ्च पन वेय्याकरणस्मिन्ति** इमस्मिं निग्गाथके सुत्ते । निग्गाथकज्हि सुत्तं पुच्छाविस्सज्जनसहितं “वेय्याकरणं”न्ति वुच्चति । **भज्जमानेति** भणियमाने, देसियमानेति अत्थो । **विरजन्ति** अपायगमनीयरागरजादीनं विगमेन विरजं । **वीतमलन्ति** अनवसेसदिट्ठिविचिकिच्छामलापगमेन वीतमलं । पठममग्गवज्झकिलेसरजाभावेन वा **विरजं**, पञ्चविधदुस्सील्यमलापगमेन **वीतमलं** । **धम्मचक्खुन्ति ब्रह्मायुसुत्ते** (म० नि० २.३८३ आदयो) हेट्ठिमा तयो मग्गा वुत्ता,

**चूळराहुलोवादे** (म० नि० ३.४१६ आदयो) आसवक्खयो, इध पन सोतापत्तिमग्गो अधिप्पेतो। चतुसच्चसङ्घातेसु धम्मेषु तेसं दस्सनट्ठेन चक्खूति **धम्मचक्खु**, हेट्ठिमेसु वा तीसु मग्गधम्मेषु एकं सोतापत्तिमग्गसङ्घातं चक्खूति **धम्मचक्खु**, समथविपस्सनाधम्मनिब्बत्तताय सीलादितिविधधम्मक्खन्धभूतताय वा धम्ममयं चक्खूतिपि **धम्मचक्खु**, तस्स उप्पत्तिआकारदस्सनत्थं “**यं किञ्चि समुदयधम्मं, सब्बं तं निरोधधम्मं**”न्ति आह। ननु च मग्गजाणं असङ्खतधम्मारम्माणं, न सङ्खतधम्मारम्माणन्ति? सच्चमेतं, यस्मा तं निरोधं आरम्माणं कत्वा किच्चवसेन सब्बसङ्खतं असम्मोहप्पटिवेधवसेन पटिविज्झन्तं उप्पज्जति, तस्मा तथा वुत्तं।

**१७. धम्मचक्के**ति पटिवेधजाणज्येव देसनाजाणज्य पवत्तनट्ठेन चक्कन्ति धम्मचक्कं। बोधिपल्लङ्के निसिन्नस्स हि चतूसु सच्चेषु उप्पन्नं द्वादसाकारं पटिवेधजाणम्पि, इसिपतने निसिन्नस्स द्वादसाकाराय सच्चदेसनाय पवत्तकं देसनाजाणम्पि धम्मचक्कं नाम। उभयम्पि हेतं दसबलस्स उरे पवत्तजाणमेव। तदुभयं इमाय देसनाय पकासेन्तेन भगवता धम्मचक्कं पवत्तितं नाम। तं पनेतं धम्मचक्कं याव अज्जासिकोण्डज्जत्थेरो अट्टारसहि ब्रह्मकोटीहि सद्धिं सोतापत्तिफले पतिट्ठाति, ताव भगवा **पवत्तेति** नाम पवत्तनकिच्चस्स अनिट्ठितत्ता। पतिट्ठिते **पवत्तितं** नाम कस्सपसम्मासम्बुद्धस्स सासनन्तरधानतो पट्टाय याव बुद्धुप्पादो, एत्तकं कालं अप्पवत्तपुब्बस्स पवत्तितत्ता। तं सन्धाय “पवत्तिते च पन भगवता धम्मचक्के भुम्मा देवा सद्दमनुस्सावेसु”न्तिआदि वुत्तं। तत्थ **भुम्मा**ति भूमट्ठकदेवता। **सद्दमनुस्सावेसु**न्ति एकप्पहारेनेव साधुकारं दत्वा “एतं भगवता”तिआदीनि वदन्ता अनुस्सावयिंसु। **ओभासो**ति सब्बज्जुतज्जाणानुभावेन पवत्तो चित्तपच्चयउतुसमुट्ठानो ओभासो। सो हि तदा देवानं देवानुभावं अतिक्कमित्वा विरोचित्थ। **अज्जासि वत भो कोण्डज्जो**ति इमस्सपि उदानस्स उदाहरणघोसो दससहस्सिलोकधातुं फरित्वा अट्टासि। भगवतो हि धम्मचक्कप्पवत्तनस्स आरम्भे विय परिसमापनेपि अतिविय उल्लारतमं पीतिसोमनस्सं उदपादि।

**१८. दिट्ठो** अरियसच्चधम्मो एतेनाति **दिट्ठधम्मो**। एस नयो सेसपदेसुपि। एत्थ च दस्सनं नाम जाणदस्सनतो अज्जम्पि अत्थीति तंनिवत्तनत्थं “**पत्तधम्मो**”ति वुत्तं। पत्ति च जाणसम्पत्तितो अज्जापि विज्जतीति ततो विसेसनत्थं “**विदितधम्मो**”ति वुत्तं। सा पनेसा विदितधम्मता एकदेसतोपि होतीति निष्पदेसतो विदितभावं दस्सेतुं “**परियोगाळहधम्मो**”ति वुत्तं। तेनस्स सच्चाभिसम्बोधिंयेव दीपेति। मग्गजाणज्हि एकाभिसमयवसेन परिज्जादिकिच्चं साधेन्तं निष्पदेसेन चतुसच्चधम्मं समन्ततो ओगाळहं नाम होति। सप्पटिभयकन्तारसदिसा सोळसवत्थुका अट्ठवत्थुका च तिण्णा विचिकिच्छा अनेनाति **तिण्णविचिकिच्छो**। पवत्तिआदीसु “एवं नुखो न नुखो”ति एवं पवत्तिका विगता समुच्छिन्ना कथंकथा अस्साति **विगतकथंकथो**। **वेसारज्जप्पत्तो**ति सारज्जकरानं पापधम्मानं पहीनत्ता तप्पटिपक्खेसु च सीलादीसु गुणेसु सुप्पतिट्ठितत्ता विसारदभावं वेय्यत्तियं पत्तो अधिगतो। स्वायं वेसारज्जप्पत्तिसुप्पतिट्ठितभावो कत्थाति आह “**सत्थुसासने**”ति। अत्तना पच्चक्खतो अधिगतत्ता न परं पच्चेति, परस्स सद्भाय एत्थ नप्पवत्तति, न तस्स परो पच्चेतब्बो अत्थीति **अपरप्पच्चयो**।

**लभेय्याहन्ति** लभेय्यं अहं, आयाचनवचनमेतं। **एही**ति आयाचितानं पब्बज्जूपसम्पदानं अनुमतभावप्पकासनवचनं, तस्मा एहि सम्पटिच्छाहि यथायाचितं पब्बज्जूपसम्पदविसेसन्ति अत्थो। **इति**-सद्दो तस्स एहिभिक्षूपसम्पदापटिलाभनिमित्तवचनपरियोसानदस्सनो। तदवसानो हि तस्स भिक्षुभावो। तेनेवाह “**एहि भिक्षूति भगवतो वचनेन अभिनिष्फन्ना साव तस्स आयस्मतो एहिभिक्षूपसम्पदा अहोसी**”ति। **चर** ब्रह्मचरियन्ति उपरिमग्गतयसङ्घातं ब्रह्मचरियं समधिगच्छ। किमत्थं? **सम्मा दुक्खस्स अन्तकिरियाय**। इधापि “अवोचा”ति सम्बन्धितब्बं। “नव कोटिसहस्सानी”तिआदिना (विसुद्धि० १.२०; पटि० म० अट्ठ० १.१.३७) वुत्तप्पभेदानं अनेकसहस्सानं

संवरविनयानं समादित्वा वत्तनेन उपरिभूता अगगभूता सम्पदाति उपसम्पदा ।

१९. नीहारभत्तोति नीहटभत्तो, गामतो भिक्खं नीहरित्वा भिक्खूहि दिन्नभत्तोति अत्थो । भगवा हि दहरकुमारके विय ते भिक्खू परिहरन्तो पाटिपददिवसतो पट्टाय पिण्डपातत्थायपि गामं अपविसित्वा अन्तोविहारेयेव वसि ।

धम्मचक्कप्पवत्तनसुत्तवण्णना निट्ठिता ।

### अनत्तलक्खणसुत्तवण्णना

२०. आमन्तेसीति आसाळ्हीपुण्णमदिवसे धम्मचक्कप्पवत्तनतो पट्टाय अनुक्कमेन सोतापत्तिफले पतिट्ठिते अज्जासिकोण्डज्जप्पमुखे पञ्चवग्गिये “इदानीं तेसं आसवक्खयाय धम्मं देसेस्सामी”ति पञ्चमिया पक्खस्स आमन्तेसि । अनत्ताति अवसवत्तनट्ठेन असामिकट्ठेन सुज्जतट्ठेन अत्तपटिक्खेपट्ठेनाति एवं चतूहि कारणेहि अनत्ता । तत्थ “उप्पन्नं रूपं ठितिं मा पापुणातु, ठानप्पत्तं मा जीरतु, जरप्पत्तं मा भिज्जतु, उदयब्बयेहि मा किलमयतू”ति न एत्थ कस्सचि वसीभावो अत्थि, स्वायमस्स अवसवत्तनट्ठो । सामिभूतस्स कस्सचि अभावो असामिकट्ठो । निवासीकारकवेदकअधिट्टायकविरहेन ततो सुज्जता सुज्जतट्ठो । परपरिकप्पितअत्तसभावाभावो एव अत्तपटिक्खेपट्ठो । इदानीं अनत्ततयेव विभावेतुं “रूपञ्च हिदं भिक्खवे”ति आदिमाह । तत्थ अत्ता अभविस्साति कारको वेदको सयंवसीति एवंभूतो अत्ता अभविस्साति अधिप्पायो । एवञ्चि सति रूपस्स आबाधाय संवत्तनं अयुज्जमानकं सिया । कामज्जेत्थ “यस्मा च खो, भिक्खवे, रूपं अनत्ता, तस्मा रूपं आबाधाय संवत्तती”ति रूपस्स अनत्तताय दुक्खता विभाविता विय दिस्सति, तथापि “यस्मा रूपं आबाधाय संवत्तति, तस्मा अनत्ता”ति पाकटाय साबाधताय रूपस्स अत्तसाराभावो विभावितो, ततो एव च “न च लब्धमि रूपे ‘एवं मे रूपं होतु, एवं मे रूपं मा अहोसी’ति” रूपे कस्सचि अनिस्सरता तस्स च अवसवत्तनाकारो दस्सितो । वेदनादीसुपि एसेव नयो ।

२१. तं किंमज्जथ भिक्खवेति इदं कस्मा आरद्धं? एत्तकेन ठानेन अनत्तलक्खणमेव कथितं, न अनिच्चदुक्खलक्खणानि, इदानीं तानि दस्सेत्वा समोधानेत्वा तीणिपि लक्खणानि दस्सेतुं इदमारद्धन्ति वेदितब्बं । अनिच्चं भन्तेति भन्ते यस्मा हुत्वा न होति, तस्मा अनिच्चं । यस्मा पुब्बे असन्तं पच्चयसमवायेन हुत्वा उप्पज्जित्वा पुन भङ्गुपगमनेन न होति, तस्मा न निच्चन्ति अनिच्चं, अद्भुवन्ति अधिप्पायो । अथ वा उप्पादवयवन्तताय तावकालिकताय विपरिणामकोटिया निच्चप्पटिक्खेपतोति इमेहिपि कारणेहि अनिच्चं । एत्थ खणे खणे उप्पज्जनवसेन निरुज्जनवसेन च पवत्तनतो उप्पादवयवन्तता । तङ्कणिकताय तावकालिकता । विपरिणामवन्तताय विपरिणामकोटि । रूपञ्चि उप्पादादिविकारापज्जनेन विपरिणामन्तं विनासं पापुणाति । निच्चसभावाभावो एव निच्चपटिक्खेपो । अनिच्चा हि धम्मा, तेनेव अत्तनो अनिच्चभावेन अत्थतो निच्चतं पटिक्खिपन्ति नाम ।

दुक्खं भन्तेति भन्ते पटिपीळनाकारेन दुक्खं । उप्पादजराभङ्गवसेन हि रूपस्स निरन्तरं बाधति, पटिपीळनाकारेनस्स दुक्खता । अथ वा सन्तापट्ठेन दुक्खमट्ठेन दुक्खवत्थुकट्ठेन सुखपटिक्खेपट्ठेन चाति चतूहि कारणेहि दुक्खं । एत्थ च सन्तापो नाम दुक्खदुक्खतादिवसेन सन्तापनं परिदहनं । ततो एवस्स दुस्सहताय दुक्खमता । तिस्सन्नं दुक्खतानं संसारदुक्खस्स च अधिट्टानताय दुक्खवत्थुकता । सुखसभावाभावो एव सुखपटिक्खेपो । विपरिणामधम्मन्ति जराय मरणेन च विपरिणामसभावं । कल्लं नूति युत्तं नु । तन्ति एवं अनिच्चं दुक्खं विपरिणामधम्मं रूपं । एतं ममाति तण्हागाहो ममङ्कारभावतो । एसोहमस्मीति मानगाहो अहङ्कारभावतो । एसो मे अत्ताति दिट्ठिगाहो अत्तभावविपल्लासगाहो ।

तण्हागाहो चेत्थ अट्टसततण्हाविचरितवसेन, मानगाहो नवविधमानवसेन, दिट्ठिगाहो द्वासट्ठिदिट्ठिवसेन वेदितब्बो । इमेसं तिण्णं तण्हामानदिट्ठिगाहानं वसेन युत्तं नु तं समनुपस्सितुन्ति वुत्तं होति ।

इति भगवा अनिच्चदुक्खवसेन अनत्तलक्खणंयेव दस्सेसि । भगवा हि कत्थचि अनिच्चवसेन अनत्ततं दस्सेति, कत्थचि दुक्खवसेन, कत्थचि उभयवसेन । तथा हि “चक्खु अत्ताति यो वदेय्य, तं न उपपज्जति, चक्खुस्स उप्पादोपि वयोपि पज्जायति । यस्स खो पन उप्पादोपि वयोपि पज्जायति, ‘अत्ता मे उपपज्जति चेव वेति चा’ति इच्चस्स एवमागतं होति, तस्मा तं न उपपज्जति । ‘चक्खु अत्ता’ति यो वदेय्य, इति चक्खु अनत्ता’ति इमस्मिञ्च छक्खसुत्ते (म० नि० ३.४२२) अनिच्चवसेन अनत्ततं दस्सेसि । “रूपञ्च हिदं, भिक्खवे, अत्ता अभविस्स...पे०... एवं मे रूपं मा अहोसी”ति इमस्मिंयेव अनत्तलक्खणसुत्ते दुक्खवसेन अनत्ततं दस्सेसि । “रूपं, भिक्खवे, अनिच्चं, यदनिच्चं तं दुक्खं, यं दुक्खं तदनत्ता, यदनत्ता, तं ‘नेतं मम, नेसोहमस्मि, न मे सो अत्ता’ति एवमेतं यथाभूतं सम्मपपज्जाय दट्ठब्ब”न्ति इमस्मिं अरहन्तसुत्ते (सं० नि० ३.७६-७७) उभयवसेन अनत्ततं दस्सेसि । कस्मा? अनिच्चं दुक्खञ्च पाकटं, अनत्ता अपाकटं । परिभोगभाजनादीसु हि भिन्नेसु “अहो अनिच्च”न्ति वदन्ति, “अहो अनत्ता”ति पन वत्ता नाम नत्थि । सरीरे गण्डपिळकासु वा उट्ठितासु कण्टकेन वा विद्धा “अहो दुक्ख”न्ति वदन्ति, “अहो अनत्ता”ति पन वत्ता नाम नत्थि । कस्मा? इदञ्चि अनत्तलक्खणं नाम अविभूतं दुद्धसं दुप्पज्जापनं । तथा हि सरभङ्गादयोपि सत्थारो नाद्वसंसु, कुतो पज्जापना, तेन नं भगवा अनिच्चवसेन वा दुक्खवसेन वा उभयवसेन वा दस्सेसि । तयिदं इमस्मिम्पि तेपरिवट्टे अनिच्चदुक्खवसेनेव दस्सितं । वेदनादीसुपि एसेव नयो ।

२२. तस्मातिहाति तस्मा इच्चेव वुत्तं । ति-कार ह-कारा निपाता, यस्मा इमे पञ्चक्खन्था अनिच्चा दुक्खा अनत्ता, तस्माति अत्थो । यं किञ्चीति अनवसेसपरियादानमेतं । यन्ति हि सामज्जेन अनियमदस्सनं, किञ्चीति पकारतो भेदं आमसित्वा अनियमदस्सनं । उभयेनपि अतीतं वा...पे०... सन्तिके वा अप्पं वा बहुं वा यादिसं वा तादिसं वा नपुंसकनिद्देशारहं सब्बं ब्यापेत्वा सङ्गणहाति, तस्मा अनवसेसपरियादानमेतं “यं किञ्ची”ति । एवञ्च सति अज्जेसुपि नपुंसकनिद्देशारहेसु पसङ्गं दिस्वा तत्थ अधिप्पेतत्थं अधिच्च पवत्तनतो अतिप्पसङ्गस्स नियमनत्थं “रूप”न्ति वुत्तं । एवं पदद्वयेनपि रूपस्स असेसपरिगगहो कतो होति । अथस्स अतीतादिविभागं आरभति “अतीतानागतपच्चुप्पन्न”न्ति आदिना । तज्झि किञ्चि अतीतं किञ्चि अनागतादिभेदन्ति । एस नयो वेदनादीसुपि ।

तत्थ रूपं ताव अद्भासन्ततिसमयखणवसेन चतुथा अतीतं नाम होति, तथा अनागतपच्चुप्पन्नं । तत्थ अद्भावसेन ताव एकस्स एकस्मिं भवे पटिसन्धितो पुब्बे अतीतं, चतितो उद्धमनागतं, उभिन्नमन्तरे पच्चुप्पन्नं । सन्ततिवसेन सभागेकउतुसमुद्धानएकाहारसमउद्धानञ्च पुब्बापरियवसेन वत्तमानम्पि पच्चुप्पन्नं, ततो पुब्बे विसभागउतुआहारसमुद्धानं अतीतं, पच्छा अनागतं । चित्तजं एकवीथि एकजवन एकसमापत्तिसमुद्धानं पच्चुप्पन्नं, ततो पुब्बे अतीतं, पच्छा अनागतं । कम्मसमुद्धानस्स पाटियेक्कं सन्ततिवसेन अतीतादिभेदो नत्थि । तेसंयेव पन उतुआहारचित्तसमुद्धानां उपत्थम्भकवसेन तस्स अतीतादिभावो वेदितब्बो । समयवसेन एकमुहुत्तपुब्बण्हसायन्हरत्तिदिवादीसु समयेसु सन्तानवसेन पवत्तमानं तंतंसमयवन्तं रूपं पच्चुप्पन्नं नाम, ततो पुब्बे अतीतं, पच्छा अनागतं । खणवसेन उप्पादादिकखणत्तयपरियापन्नं पच्चुप्पन्नं, ततो पुब्बे अतीतं, पच्छा अनागतं, इदमेवेत्थ निप्परियायं, सेसा परियायकथा ।

अज्झत्तं वा बहिद्धा वाति चक्खादिपञ्चविधं रूपं अत्तभावं अधिकिच्च पवत्तत्ता अज्झत्तं, सेसं ततो बाहिरत्ता बहिद्धा । अपिच नियकज्झत्तम्पि इध अज्झत्तं, परपुग्गलिकम्पि च बहिद्धाति वेदितब्बं । ओळारिकं वा सुखुमं वाति

चक्खादीनि नव, आपोधातुवज्जा तिस्रो धातुयो चाति द्वादसविधं रूपं घट्टनवसेन गहेतब्बतो ओळारिकं, सेसं ततो विपरीतत्ता सुखुमं। **हीनं वा पणीतं वाति** एत्थ हीनपणीतभावो परियायतो निप्परियायतो च। तत्थ अकनिट्ठानं रूपतो सुदस्सीनं रूपं हीनं, तदेव सुदस्सानं रूपतो पणीतं। एवं याव नरकसत्तानं रूपं, ताव परियायतो हीनपणीतता वेदितब्बा। निप्परियायतो पन यं आरम्मणं कत्वा अकुसलविपाकविज्जाणं उप्पज्जति, तं हीनं अनिट्ठभावतो। यं पन आरम्मणं कत्वा कुसलविपाकविज्जाणं उप्पज्जति, तं पणीतं इट्ठभावतो। यथा हि अकुसलविपाको सयं अनिट्ठो अनिट्ठे एव उप्पज्जति, न इट्ठे, एवं कुसलविपाकोपि सयं इट्ठो इट्ठेयव उप्पज्जति, न अनिट्ठे। **यं दूरे सन्तिके वाति** यं सुखुमं, तदेव दुप्पटिविज्झसभावत्ता दूरे, इतरं सुप्पटिविज्झसभावत्ता सन्तिके। अपिचेत्थ ओकासतोपि उपादायुपादाय दूरसन्तिकता वेदितब्बा। **तं सब्बन्ति** तं अतीतादीहि पदेहि विसुं निट्ठिदं सब्बं रूपं। **सम्मप्पज्जाय दट्ठब्बन्ति** सहविपस्सनाय मग्गपज्जाय दट्ठब्बं।

**या काचि वेदनाति** आदीसु पन सन्ततिवसेन च खणवसेन च वेदनाय अतीतानागतपच्चुप्पन्नभावो वेदितब्बो। तत्थ (विसुद्धि० २.४९७ आदयो) **सन्ततिवसेन** एकवीथि एकजवन एकसमापत्तिपरियापन्ना एकविधविसयसमायोगप्पत्ता च दिवसम्पि बुद्धरूपं पस्सन्तस्स धम्मं सुणन्तस्स पवत्तसद्भादिसहितवेदना पच्चुप्पन्ना, ततो पुब्बे अतीता, पच्छा अनागता। **खणवसेन** खणत्तयपरियापन्ना पच्चुप्पन्ना, ततो पुब्बे अतीता, पच्छा अनागता। अज्झत्तबहिद्भाभेदो नियकज्झत्तवसेन वेदितब्बो। ओळारिकसुखुमभेदो “अकुसला वेदना ओळारिका, कुसलाब्याकता वेदना सुखुमा”ति आदिना नयेन **विभङ्गे** (विभ० ११) वुत्तेन जातिसभावपुग्गललोकियलोकुत्तरवसेन वेदितब्बो। **जातिवसेन** ताव अकुसलवेदना सावज्जकिरियहेतुतो किलेससन्तापसभावतो च अवूपसन्तवुत्तीति कुसलवेदनाय ओळारिका, सब्यापारतो सउस्साहतो सविपाकतो किलेससन्तापसभावतो सावज्जतो च विपाकाब्याकताय ओळारिका, सविपाकतो किलेससन्तापसभावतो सब्यापज्जतो सावज्जतो च किरियाब्याकताय ओळारिका, कुसलाब्याकता पन वुत्तविपरियायतो अकुसलाय सुखुमा। द्वेपि कुसलाकुसलवेदना सब्यापारतो सउस्साहतो सविपाकतो च यथायोगं दुविधायपि अब्याकताय ओळारिका, वुत्तविपरियायेन दुविधापि अब्याकता ताहि सुखुमा। एवं ताव जातिवसेन ओळारिकसुखुमता वेदितब्बा।

**सभाववसेन** पन दुक्खवेदना निरस्सादतो सविप्फारतो उब्बेजनीयतो अभिभवनतो च इतराहि द्वीहि ओळारिका, इतरा पन द्वे साततो सन्ततो पणीततो मनापतो मज्झत्ततो च यथायोगं दुक्खाय सुखुमा। उभो पन सुखदुक्खा सविप्फारतो खोभकरणतो पाकटतो च अदुक्खमसुखाय ओळारिका, सा वुत्तविपरियायेन तदुभयतो सुखुमा। एवं सभाववसेन ओळारिकसुखुमता वेदितब्बा। **पुग्गलवसेन** पन असमापन्नस्स वेदना नानारम्मणविक्षिप्तभावतो समापन्नस्स वेदनाय ओळारिका, विपरियायेन इतरा सुखुमा। एवं पुग्गलवसेन ओळारिकसुखुमता वेदितब्बा। **लोकियलोकुत्तरवसेन** पन सासवा वेदना लोकिया। सा आसवुप्पत्तिहेतुतो ओघनियतो योगनियतो गन्थनियतो नीवरणियतो उपादानियतो संकिलेसिकतो पुथुज्जनसाधारणतो च अनासवाय ओळारिका, सा विपरियायेन सासवाय सुखुमा। एवं लोकियलोकुत्तरवसेन ओळारिकसुखुमता वेदितब्बा।

तत्थ जातिआदिवसेन सम्भेदो परिहरितब्बो। अकुसलविपाककायविज्जाणसम्पयुत्ता हि वेदना जातिवसेन अब्याकतत्ता सुखुमापि समाना सभावादिवसेन ओळारिका होति। वुत्तज्हेतं “अब्याकता वेदना सुखुमा, दुक्खा वेदना ओळारिका। असमापन्नस्स वेदना ओळारिका, सासवा वेदना ओळारिका”ति (विभ० ११)। यथा च दुक्खवेदना, एवं सुखादयोपि जातिवसेन ओळारिका, सभावादिवसेन सुखुमा होन्ति। तस्मा यथा जातिआदिवसेन सम्भेदो न होति, तथा वेदनानं ओळारिकसुखुमता वेदितब्बा। सेय्यथिदं — अब्याकता जातिवसेन कुसलाकुसलाहि सुखुमा। न तत्थ “कतमा

अव्याकता, किं दुखा, किं सुखा, किं समापन्नस्स, किं असमापन्नस्स, किं सासवा, किं अनासवा”ति एवं सभावादिभेदो परामसितब्बो । एस नयो सब्बत्थ ।

अपिच “तं तं वा पन वेदनं उपादायुपादाय वेदना ओळारिका सुखुमा दट्ठब्बा”ति वचनतो अकुसलादीसुपि लोभसहगताय दोससहगतवेदना अग्गि विय अत्तनो निस्सयदहनतो ओळारिका, लोभसहगता सुखुमा । दोससहगतापि नियता ओळारिका, अनियता सुखुमा । नियतापि कप्पट्टितिका ओळारिका, इतरा सुखुमा । कप्पट्टितिकासुपि असङ्खारिका ओळारिका, इतरा सुखुमा । लोभसहगता पन दिट्ठिसम्पयुत्ता ओळारिका, इतरा सुखुमा । सापि नियता कप्पट्टितिका असङ्खारिका ओळारिका, इतरा सुखुमा, अविसेसेन अकुसला बहुविपाका ओळारिका, अप्पविपाका सुखुमा । कुसला पन अप्पविपाका ओळारिका, बहुविपाका सुखुमा ।

अपिच कामावचरकुसला ओळारिका, रूपावचरा सुखुमा, ततो अरूपावचरा, ततो लोकोत्तरा । कामावचरा च दानमया ओळारिका, सीलमया सुखुमा, ततो भावनामया । भावनामयापि दुहेतुका ओळारिका, तिहेतुका सुखुमा । तिहेतुकापि ससङ्खारिका ओळारिका, असङ्खारिका सुखुमा । रूपावचरा पठमज्झानिका ओळारिका...पे०... पञ्चमज्झानिका सुखुमाव । अरूपावचरा आकासानञ्चायतनसम्पयुत्ता ओळारिका...पे०... नेवसञ्जानासञ्चायतनसम्पयुत्ता सुखुमाव । लोकोत्तरा च सोतापत्तिमगगसम्पयुत्ता ओळारिका...पे०... अरहत्तमगगसम्पयुत्ता सुखुमाव । एस नयो तंतंभूमिविपाककिरियवेदनासु दुखादिसमापन्नादिसासवादिवसेन वुत्तवेदनासु च ।

**ओकासवसेन** चापि निरये दुखा ओळारिका, तिरच्छानयोनियं सुखुमा...पे०... परनिम्मितवसवत्ती सुखुमाव । यथा च दुखा, एवं सुखापि सब्बत्थ यथानुरूपं योजेतब्बा । **वत्थुवसेन** चापि हीनवत्थुका या काचि वेदना ओळारिका, पणीतवत्थुका सुखुमा । हीनपणीतभेदे या ओळारिका, सा हीना । या च सुखुमा, सा पणीताति वेदितब्बा । दूरपदं पन अकुसला वेदना कुसलाव्याकताहि वेदनाहि दूरे, सन्तिकपदं अकुसला वेदना अकुसलाय वेदनाय सन्तिकेतिआदिना नयेन विभत्तं । तस्मा अकुसला वेदना विसभागतो असंसदुतो असरिक्खतो च कुसलाव्याकताहि दूरे, तथा कुसलाव्याकता अकुसलाय । एस नयो सब्बवारेसु । अकुसला पन वेदना सभागतो च संसदुतो च सरिक्खतो च अकुसलाय सन्तिकेति । तंतंवेदनासम्पयुत्तानं पन सञ्जादीनम्पि एवमेव वेदितब्बं ।

**२३. सुतवाति** आगमाधिगमसङ्घातेन बाहुसच्चेन समन्नागतत्ता सुतवा । **निब्बिन्दतीति** उक्कण्ठति । एत्थ च **निब्बिदाति** वुट्ठानगामिनीविपस्सना अधिप्पेता । **निब्बिन्दं विरज्जतीति** एत्थ विरागवसेन चत्तारो मग्गा कथिता । **विरागा विमुच्चतीति** विरागेन मग्गेनेव हेतुभूतेन पटिप्पस्सद्विविमुत्तिवसेन विमुच्चति । इमिना चत्तारि सामञ्जफलानि कथितानि । **विमुत्तस्मिं विमुत्तमिति जाणं होतीति** इमिना पन पच्चवेक्खणजाणं कथितं । **खीणा जातीति** आदीहि तस्स भूमि । तेन हि जाणेन अरियसावको पच्चवेक्खन्तो “खीणा जाती”ति आदीनि पजानाति । कतमा पनस्स जाति खीणा, कथञ्च नं पजानातीति? न तावस्स अतीता जाति खीणा पुब्बेव खीणत्ता, न अनागता अनागते वायामाभावतो, न पच्चुप्पन्ना । या पन मग्गस्स अभावितत्ता उप्पज्जेय्य एकचतुपञ्चवोकारभवेसु एकचतुपञ्चक्खन्धप्पभेदा जाति, सा मग्गस्स भावितत्ता अनुप्पादधम्मतं आपज्जनेन खीणा, तं सो मग्गभावनाय पहीनकिलेसे पच्चवेक्खित्वा किलेसाभावे विज्जमानम्पि कम्मं आयतिं अप्पटिसन्धिकं होतीति जानन्तो पजानाति ।

**वुसितन्ति** वुत्थं परिवुत्थं, कतं चरितं निट्ठितन्ति अत्थो । **ब्रह्मचरियन्ति** मग्गब्रह्मचरियं । पुथुज्जनकल्याणकेन हि सद्धिं सत्त सेक्खा मग्गब्रह्मचरियं वसन्ति नाम, खीणासवो वुत्थवासो, तस्मा अरियसावको अत्तनो ब्रह्मचरियवासं

पच्चवेकखन्तो “वुसितं ब्रह्मचरिय”न्ति पजानाति । कतं करणीयन्ति चतूसु सच्चेषु चतूहि मग्गेहि परिज्जापहानसच्छिकिरियाभावनावसेन सोळसविधम्पि किच्चं निट्ठापितन्ति अत्थो । पुथुज्जनकल्याणकादयो हि तं किच्चं करोन्ति, खीणासवो कतकरणीयो । तस्मा अरियसावको अत्तनो करणीयं पच्चवेकखन्तो “कतं करणीय”न्ति पजानाति । नापरं इत्थत्तायाति इदानी पुन इत्थभावाय एवंसोळसकिच्चभावाय, किलेसकख्याय वा मग्गभावनाकिच्चं मे नत्थीति पजानाति । अथ वा इत्थत्तायाति इत्थभावा इमस्मा एवंपकारा इदानी वत्तमानकखन्धसन्ताना अपरं खन्धसन्तानं मय्हं नत्थि, इमे पन पच्चकखन्धा परिज्जाता तिट्ठन्ति छिन्नमूलका रुक्खा विय । ते चरिमकविज्जाणनिरोधेन अनुपादानो विय जातवेदो निब्बायिस्सन्तीति पजानाति ।

२४. अत्तमना ते भिक्खू भगवतो भासितं अभिनन्दन्ति ते भिक्खू सकमना तुट्ठमना, पीतिसोमनस्सेहि वा समत्तमना हुत्वा करवीकरुतमज्जुना कण्णसुखेन पण्डितजनहृदयानं अमताभिसेकसदिसेन ब्रह्मस्सरेन भासतो भगवतो वचनं सुकथितं सुलपितं “एवमेतं भगवा, एवमेतं सुगता”ति मत्थकेन सम्पटिच्छन्ता अनुमोदिसु चेव सम्पटिच्छिसु चाति अत्थो । अयज्झि अभिनन्द-सद्वो “अभिनन्दति अभिवदती”ति आदीसु (सं० नि० ३.५; ४.११४, ११८) तण्हायपि आगतो । “अन्नमेवाभिनन्दन्ति, उभये देवमानुसा”ति आदीसु (सं० नि० १.४३) उपगमनेपि ।

“चिरप्पवासिं पुरिसं, दूरतो सोत्थिमागतं ।

जातिमत्ता सुहज्जा च, अभिनन्दन्ति आगत”न्ति ॥ (ध० प० २१९; वि० व० ८६१) —

आदीसु सम्पटिच्छनेपि । “अभिनन्दित्वा अनुमोदित्वा”ति आदीसु (म० नि० १.२०५) अनुमोदनेपि । स्वायमिध अनुमोदनसम्पटिच्छनेसु युज्जति । तेन वुत्तं “अनुमोदिसु चेव सम्पटिच्छिसु चा”ति । अनुपादाय आसवेहि चित्तानि विमुच्चिसूति अनुपादनिरोधेन निरुज्झमानेहि आसवेहि अनुपादाय अगगहेत्वा कज्जि धम्मं “अहं ममा”ति अनादित्वा चित्तानि विमुच्चिसु । छ अरहन्तोति भगवता सद्धिं छ जना अरहन्तो । अज्जेसं पन देवब्रह्मानम्पि अरहत्तप्पत्तिसम्भवतो इदं मनुस्सअरहन्तेयेव सन्धाय वुत्तन्ति आह “छ मनुस्सा अरहन्तो होन्ती”ति ।

अनत्तलक्खणसुत्तवण्णना निट्ठिता ।

पच्चवगियकथा निट्ठिता ।

यसस्स पब्बज्जाकथावण्णना

२५. इदानी यसस्स पब्बज्जं दस्सेतुं “तेन खो पन समयेना”ति आदि आरब्धं । तत्रायं अनुत्तानपदवण्णना — हेमन्तिकोति आदीसु (दी० नि० अट्ठ० २.४२; अ० नि० अट्ठ० २.३.३९) यत्थ सुखं होति हेमन्तकाले वसितुं, अयं हेमन्तिको । इतरेसुपि एसेव नयो । अयं पनेत्थ वचनत्थो — हेमन्ते वासो हेमन्तं उत्तरपदलोपेन, हेमन्तं अरहतीति हेमन्तिको । इतरेसुपि एसेव नयो । तत्थ वस्सिको पासादो नातिउच्चो होति नातिनीचो, द्वारवातपानानिपिस्स नातिबहूनि नातितनूनि, भूमत्थरणपच्चत्थरणखज्जभोज्जानिपेत्थ मिस्सकानेव वट्टन्ति । हेमन्तिके थम्भापि भित्तियोपि नीचा होन्ति, द्वारवातपानानि तनुकानि सुखुमछिद्धानि, उण्हप्पवेसनत्थाय भित्तिनिय्यूहानि हरियन्ति, भूमत्थरणपच्चत्थरणनिवासनपारुपनानि पनेत्थ उण्हविकिरियानि कम्बलादीनि वट्टन्ति, खज्जभोज्जं सिनिद्धं कटुकसन्निस्सितज्ज । गिम्हिके थम्भापि भित्तियोपि उच्चा होन्ति, द्वारवातपानानि पनेत्थ बहूनि विपुलजातानि होन्ति,

भूमत्थरणानि सीतविकिरियानि दुकूलमयानि वट्टन्ति, खज्जभोज्जानि मधुरससीतविकिरियानि, वातपानसमीपेसु चेत्य नवा चाटियो ठपेत्वा उदकस्स पूरेत्वा नीलुप्पलादीहि सञ्छादेन्ति, तेसु तेसु पदेसेसु उदकयन्तानि करोन्ति, येहि देवे वस्सन्ते विय उदकधारा निक्खमन्ति ।

**निप्पुरिसेहीति** पुरिसविरहितेहि । न केवलञ्चेत्थ तूरियानेव निप्पुरिसानि, सब्बट्टानानिपि निप्पुरिसानेव । दोवारिकापि इत्थियोव, नहापनादिपरिकम्मकरापि इत्थियोव । पिता किर “तथारूपं इस्सरियसुखसम्पत्तिं अनुभवमानस्स पुरिसं दिस्वा परिसङ्का उप्पज्जति, सा मे पुत्तस्स मा अहोसी”ति सब्बकिच्चेसु इत्थियोव ठपापेसि । **पञ्चहि कामगुणेहीति** रूपसद्दादीहि पञ्चहि कामकोट्टासेहि । **समप्पितस्साति** सम्मा अप्पितस्स, उपेतस्साति अत्थो । **समङ्गीभूतस्साति** तस्सेव वेवचनं । **परिचारयमानस्साति** परितो चारयमानस्स, तस्मिं तस्मिं कामगुणे इन्द्रियानि चारयमानस्साति अत्थो । **आळम्बरन्ति** पणवं । **विकेसिकन्ति** मुत्तकेसं, विप्पकिण्णकेसन्ति अत्थो । **विक्खेळिकन्ति** विस्सन्दमानलालं । **विप्पलपन्तियोति** विरुद्धं पलपन्तियो वा रुदन्तियो वा । **सुसानं मज्जेति** आमकसुसानं विय अदस सकं परिजनन्ति सम्बन्धो । **उदानं उदानेसीति** संवेगवसेन उदानं उदानेसि, संवेगवसप्पवत्तं वाचं निच्छारेसीति अत्थो ।

**२६. इदं खो यसाति** भगवा निब्बानं सन्धायाह । तज्हि तण्हादीहि किलेसेहि अनुपदुत्तं अनुपस्सट्ठञ्च । **अनुपुब्बिं कथन्ति** (दी० नि० अट्ठ० २.७५; म० नि० अट्ठ० २.६९) दानानन्तरं सीलं, सीलानन्तरं सगं, सगानन्तरं मगन्ति एवमनुपटिपाटिकथं । तत्थ **दानकथा** नाम “इदं दानं नाम सुखानं निदानं, सम्पत्तीनं मूलं, भोगानं पतिट्ठा, विसमगतस्स ताणं लेणं गति परायणं, इधलोकपरलोकेसु दानसदिसो अवस्सयो पतिट्ठा आरम्मणं ताणं लेणं गति परायणं नत्थि । इदज्हि अवस्सयट्ठेन रतनमयसीहासनसदिसं, पतिट्ठानट्ठेन महापथवीसदिसं, आरम्मणट्ठेन आलम्बनरज्जुसदिसं, इदज्हि दुक्खनित्थरणट्ठेन नावा, समस्सासनट्ठेन सङ्गामसूरो, भयपरित्ताणट्ठेन सुसङ्खतनगरं, मच्छेरमलादीहि अनुपलित्तट्ठेन पदुमं, तेसं निदहनट्ठेन अग्नि, दुरासदट्ठेन आसीविसो, असन्तासनट्ठेन सीहो, बलवन्तट्ठेन हत्थी, अभिमङ्गलसम्मतट्ठेन सेतउसभो, खेमन्तभूमिसम्पापनट्ठेन वलाहको अस्सराराजा । दानं नामेतं मया गतमग्गो, मय्हेवेसो वंसो, मया दस पारमियो पूरेन्तेन वेलाममहायज्जा महागोविन्दमहायज्जा महासुदस्सनमहायज्जा वेस्सन्तरमहायज्जाति अनेके महायज्जा पवत्तिता, ससभूतेन जलिते अग्निक्खन्धे अत्तानं निव्यातेन्तेन सम्पत्तयाचकानं चित्तं गहितं । दानज्हि लोके सक्कसम्पत्तिं देति, मारसम्पत्तिं ब्रह्मसम्पत्तिं चक्कवत्तिसम्पत्तिं सावकपारमिजाणं पच्चेकबोधिजाणं अभिसम्बोधिजाणं देती”ति एवमादिना दानगुणप्पटिसंयुत्तकथा ।

यस्मा पन दानं ददन्तो सीलं समादातुं सक्कोति, तस्मा तदनन्तरं सीलकथं कथेसि । दानज्हि नाम दक्खिण्येसु हितज्झासयेन पूजनज्झासयेन वा अत्तनो सन्तकस्स परेसं परिच्चजनं, तस्मा दायको सत्तेसु एकन्तहितज्झासयो पुरिसपुग्गलो, परेसं वा सन्तकं हरतीति अट्ठानमेतं । तस्मा दानं ददन्तो सीलं समादातुं सक्कोतीति दानानन्तरं सीलं वुत्तं । अपिच **दानकथा** ताव पचुरजनेसुपि पवत्तिया सब्बसाधारणत्ता सुकरत्ता सीले पतिट्ठानस्स उपायभावतो च आदितो कथिता । परिच्चागसीलो हि पुग्गलो परिग्गहवत्थूसु निस्सङ्गभावतो सुखेनेव सीलानि समादियति, तत्थ च सुप्पतिट्ठितो होति । सीलेन दायकपटिग्गाहकविसुद्धितो परानुग्गहं वत्वा परपीळानिवत्तिवचनतो किरियधम्मं वत्वा अकिरियधम्मवचनतो भोगयससम्पत्तिहेतुं वत्वा भवसम्पत्तिहेतुवचनतो च दानकथानन्तरं सीलकथा कथिता ।

**सीलकथा** नाम “सीलं नामेतं अवस्सयो पतिट्ठा आरम्मणं ताणं लेणं गति परायणं । सीलं नामेतं मम वंसो, अहं सङ्खपालनागराजकाले भूरिदत्तनागराजकाले चम्पेय्यनागराजकाले सीलवराजकाले मातुपोसकहत्थिराजकाले



छदन्तहत्थिराजकालेति अनन्तेसु अत्तभावेसु सीलं परिपूरेशिं । इधलोकपरलोकसम्पत्तीनज्झि सीलसदिसो अवस्सयो सीलसदिसा पतिट्ठा आरम्मणं ताणं लेणं गति परायणं नत्थि, सीलालङ्कारसदिसो अलङ्कारो नत्थि, सीलपुप्फसदिसं पुप्फं नत्थि, सीलगन्धसदिसो गन्धो नत्थि । सीलालङ्कारेण हि अलङ्कृतं सीलकुसुमपिठन्धनं सीलगन्धानुलित्तं सदेवकोपि लोको ओलोकेन्तो तित्तिं न गच्छती”ति एवमादिसीलगुणपटिसंयुत्तकथा ।

इदं पन सीलं निस्साय अयं सग्गो लब्धतीति दस्सनत्थं सीलानन्तरं सग्गकथं कथेशि । **सग्गकथा** नाम “अयं सग्गो नाम इट्ठो कन्तो मनापो, निच्चमेत्थ कीळा, निच्चं सम्पत्तियो लब्धन्ति, चातुमहाराजिका देवा नवुतिवस्ससतसहस्सानि दिब्बसुखं दिब्बसम्पत्तिं पटिलभन्ति, तावतिसा तिस्सो च वस्सकोटियो सट्ठि च वस्ससतसहस्सानी”ति एवमादिसग्गगुणपटिसंयुत्तकथा । सग्गसम्पत्तिं कथयन्तानज्झि बुद्धानं मुखं नप्पहोति । वुत्तम्पि चेत्तं “अनेकपरियायेन खो अहं, भिक्खवे, सग्गकथं कथेय्य”न्तिआदि ।

एवं सग्गकथाय पलोभेत्वा पुन हत्थिं अलङ्करित्वा तस्स सोण्डं छिन्दन्तो विय अयम्पि सग्गो अनिच्चो अद्भुवो, न एत्थ छन्दरागो कातब्बोति दस्सनत्थं “अप्पस्सादा कामा बहुदुक्खा बहुपायासा, आदीनवो एत्थ भिय्यो”तिआदिना (म० नि० १.१७७; पाचि० ४१७) नयेन कामानं आदीनवं ओकारं संकिलेसं कथेशि । तत्थ **आदीनवो**ति दोसो, अनिच्चतादिना अप्पस्सादतादिना च दूसितभावोति अत्थो । अथ वा आदीनं वाति पवत्ततीति **आदीनवो**, परमकपणता । तथा च कामा यथाभूतं पच्चवेक्खन्तानं पच्चुपतिट्ठन्ति । **ओकारो**ति लामकभावो निहीनभावो असेट्ठेहि सेवितब्बता सेट्ठेहि न सेवितब्बता च । **संकिलेसो**ति तेहि सत्तानं संकिलिस्सनं, विबाधेतब्बता उपतापेतब्बताति अत्थो ।

एवं कामादीनवेन तज्जेत्वा **नेक्खम्मे आनिसंसं पकासेसि** । यत्तका च कामेसु आदीनवा, पटिपक्खतो तत्तकाव नेक्खम्मे आनिसंसा । अपिच “नेक्खम्मं नामेतं असम्बाधं असंकिलिट्ठं, निक्खन्तं कामेहि, निक्खन्तं कामसज्जाय, निक्खन्तं कामवितक्केहि, निक्खन्तं कामपरिळाहेहि, निक्खन्तं व्यापारतो”तिआदिना नयेन नेक्खम्मे आनिसंसं पकासेसि, पब्बज्जाय झानादीसु च गुणे विभावेसि वण्णेसि । एत्थ च सग्गं कथेत्वा स्वायं सग्गो रागादीहि उपक्विलिट्ठो, सब्बथापि अनुपक्विलिट्ठो अरियमग्गोति दस्सनत्थं सग्गानन्तरं मग्गो कथेतब्बो । मग्गञ्च कथेन्तेन तदधिगमुपायसन्दस्सनत्थं सग्गपरियापन्नापि पगेव इतरे सब्बेपि कामा नाम बह्वादीनवा अनिच्चा अद्भुवा विपरिणामधम्माति कामानं आदीनवो, हीना गम्मा पोथुज्जनिका अनरिया अनत्थसज्झिताति तेसं ओकारो लामकभावो, सब्बेपि भवा किलेसानं वत्थुभूताति तत्थ संकिलेसो, सब्बसंकिलेसविप्पमुत्तं निब्बानन्ति नेक्खम्मे आनिसंसो च कथेतब्बोति कामेसु आदीनवो ओकारो संकिलेसो नेक्खम्मे च आनिसंसो पकासितोति दट्ठब्बं ।

**कल्लचित्तन्ति** कम्मनियचित्तं, हेट्ठा पवत्तितदेसनाय अस्सद्दियादीनं चित्तदोसानं विगतत्ता उपरिदेसनाय भाजनभावूपगमनेन कम्मक्खमचित्तन्ति अत्थो । अस्सद्दियादयो वा यस्मा चित्तस्स रोगभूता तदा तस्स विगता, तस्मा कल्लचित्तं अरोगचित्तन्ति अत्थो । दिट्ठिमानादिकिलेसविगमेन **मुदुचित्तं**, कामच्छन्दादिविगमेन **विनीवरणचित्तं**, सम्मापटिपत्तियं उळारपीतिपामोज्जयोगेन **उदग्गचित्तं** । तत्थ सद्भासम्पत्तिया पसन्नचित्तं यदा भगवा अज्जासीति सम्बन्धो । अथ वा **कल्लचित्तन्ति** कामच्छन्दविगमेन अरोगचित्तं । **मुदुचित्तन्ति** व्यापादविगमेन मेत्तावसेन अकठिनचित्तं । **विनीवरणचित्तन्ति** उद्धच्चकुक्कुच्चविगमेन विक्खेपस्स विगतत्ता तेन अपिहितचित्तं । **उदग्गचित्तन्ति** थिनमिद्धविगमेन सम्पग्गहवसेन अलीनचित्तं । **पसन्नचित्तन्ति** विचिकिच्छाविगमेन सम्मापटिपत्तियं अधिमुत्तचित्तन्ति एवम्पेत्य अत्थो वेदितब्बो । **सामुक्कंसिका**ति सामं उक्कंसिका, अत्तनायेव उद्धरित्वा गहिता, सयम्भूजाणेन दिट्ठा असाधारणा अज्जेसन्ति

अत्थो । का च पन साति? अरियसच्चदेसना । तेनेवाह “दुक्खं समुदयं निरोधं मग्ग”न्ति ।

सेय्यथापीति आदिना उपमावसेन तस्स किलेसप्पहानं अरियमग्गुप्पादञ्च दस्सेति । अपगतकाळकन्ति विगतकाळकं । सम्मदेवाति सुट्ठु एव । रजनन्ति नीलपीतादिरङ्गजातं । पटिग्गणहेय्याति गणहेय्य, पभस्सरं भवेय्य । तस्मिंयेव आसनेति तस्संयेव निसज्जायं । एतेनस्स लहुविपस्सकता तिकखपञ्जता सुखपटिपदखिप्पाभिञ्जता च दस्सिता होति । विरजन्ति आदि वुत्तनयमेव । तत्रिदं उपमासंसन्दनं — वत्थं विय चित्तं, वत्थस्स आगन्तुकमलेहि किलिडुभावो विय चित्तस्स रागादिमलेहि संकिलिडुभावो, धोवनसिला विय अनुपुब्बिकथा, उदकं विय सद्धा, उदकेन तेमेत्वा तेमेत्वा ऊसगोमयछारिकखारकेहि काळकपदेसे सम्मद्वित्वा वत्थस्स धोवनपयोगो विय सद्धासिनेहेन तेमेत्वा तेमेत्वा सतिसमाधिपञ्चाहि दोसे सिथिले कत्वा सीलसुतादिविधिना चित्तस्स सोधने वीरियारम्भो, तेन पयोगेन वत्थे काळकापगमो विय वीरियारम्भेन किलेसविकखम्भनं, रङ्गजातं विय अरियमग्गो, तेन सुट्ठुस्स वत्थस्स पभस्सरभावो विय विकखम्भितकिलेसस्स चित्तस्स मग्गेन परियोदपनन्ति ।

२७. अस्सदूतेति आरुळ्हअस्से दूते । इद्धाभिसङ्खारन्ति इद्धिकिरियं । अभिसङ्खरेसीति अभिसङ्खरि, अकासीति अत्थो । किमत्थन्ति चे? उभिनं पटिलभितब्बविसेसन्तरायनिसेधनत्थं । यदि हि सो पुत्तं पस्सेय्य, पुत्तस्सपि अरहत्तप्पत्ति सेट्ठिस्सपि धम्मचक्खुपटिलाभो न सिया । अदिट्ठसच्चोपि हि “देहि ते मातुया जीवित”न्ति याचन्तो कथञ्चि नाम विकखेपं पटिबाहित्वा भगवतो धम्मदेसनानुसारेण जाणं पेसेत्वा धम्मचक्खुं पटिलभेय्य, यसो च एवं तेन याचियमानो कथं तं विकखेपं पटिबाहित्वा अरहत्ते पतिट्ठहेय्य ।

एतदवोचाति भगवतो धम्मदेसनं अब्भनुमोदमानो एतं “अभिवक्कन्तं भन्ते”ति आदिवचनं अवोच । अभिवक्कन्त-सद्दो चायमिध अब्भनुमोदने, तस्मा साधु साधु भन्तेति वुत्तं होति ।

“भये कोधे पसंसायं, तुरिते कोतूहलच्छरे ।

हासे सोके पसादे च, करे आमेडितं बुधो”ति ॥ —

इमिनाव लक्खणेन इध पसादवसेन पसंसावसेन चायं द्विक्खत्तुं वुत्तोति वेदितब्बो । सेय्यथापीति आदिना चतूहि उपमाहि भगवतो देसनं थोमेति । तत्थ निक्कुज्जितन्ति अधोमुखठपितं, हेट्टामुखजातं वा । उक्कुज्जेय्याति उपरिमुखं करेय्य । पटिच्छन्ति तिणपण्णादिछादितं । विवरेय्याति उग्घाटेय्य । मूळहस्साति दिसामूळहस्स । मग्गं आचिकखेय्याति हत्थे गहेत्वा “एस मग्गो”ति वदेय्य । अन्धकारेति काळपक्खचातुद्दसी अट्ठरत्ति घनवनसण्डमेघपटलेहि चतुरङ्गतमे ।

एवं देसनं थोमेत्वा इमाय देसनाय रतनत्तये पसन्नचित्तो पसन्नाकारं करोन्तो “एसाह”न्ति आदिमाह । तत्थ एसाहन्ति एसो अहं । उपासकं मं भगवा धारेतूति मं भगवा “उपासको अय”न्ति एवं धारेतु, जानातूति अत्थो । अज्जतग्गेति एत्थायं अग्ग-सद्दो आदिअत्थे, तस्मा अज्जतग्गेति अज्जतं आदिं कत्वाति एवमत्थो वेदितब्बो । अज्जतन्ति अज्जभावं । “अज्जदग्गे”ति वा पाठो, द-कारो पदसन्धिकरो, अज्ज अग्गं कत्वाति अत्थो । पाणुपेतन्ति पाणेहि उपेतं । याव मे जीवितं पवत्तति, ताव उपेतं, अनज्जसत्थुकं तीहि सरणगमनेहि सरणं गतं उपासकं कप्पियकारकं मं भगवा धारेतु जानातु । अहञ्चि सचेपि मे तिखिणेन असिना सीसं छिन्देय्य, नेव बुद्धं “न बुद्धो”ति वा, धम्मं “न धम्मो”ति वा, सङ्घं “न सङ्घो”ति वा वदेय्यन्ति एवं अत्तसन्निय्यातनेन सरणं अगमासि । एवं “अभिवक्कन्त”न्ति आदीनं अनुत्तानपदत्थो वेदितब्बो, वित्थारो पन हेट्टा वेरज्जकण्डवण्णनायं आगतोयेवाति इध न दस्सितो ।

२८. भूमिं पच्चवेक्खन्तस्साति अत्तना दिट्ठमत्थं पच्चवेक्खन्तस्स । इद्धाभिसङ्खारं पटिप्पस्सम्भेसीति यथा तं सेट्ठि गहपति तत्थ निसिन्नोव यसं कुलपुत्तं पस्सति, तथा अधिद्धासीति अत्थो । अधिवासेतूति सम्पटिच्छतु । अज्जतनायाति यं मे तुम्हेसु सक्कारं करोतो अज्ज भविस्सति पुज्जञ्च पीतिपामोज्जञ्च, तदत्थाय । अधिवासेसि भगवा तुण्हीभावेनाति भगवा कायङ्गं वा वाचङ्गं वा अचोपेत्वा अब्भन्तरेयेव खन्तिं करोन्तो तुण्हीभावेन अधिवासेसि, सेट्ठिस्स अनुगहत्थं मनसाव सम्पटिच्छीति वुत्तं होति । “एहि भिक्खू”ति भगवा अवोचाति तस्स किर इद्धिमयपत्तचीवरस्स उपनिस्सयं ओलोकेन्तो अनेकासु जातीसु चीवरादिअट्ठपरिक्खारदानं दिस्वा “एहि भिक्खू”ति अवोच । सो तावदेव भण्डु कासाववसनो अट्ठहि भिक्खुपरिक्खारेहि सरीरे पटिमुक्केहेव वस्ससट्ठिकत्थेरो विय भगवन्तं नमस्समानोव निसीदि । यो हि चीवरादिके अट्ठ परिक्खारे पत्तचीवरमेव वा सोतापन्नादिअरियस्स पुथुज्जनस्सेव वा सीलसम्पन्नस्स दत्वा “इदं परिक्खारदानं अनागते एहिभिक्खुभावाय पच्चयो होतू”ति पत्थनं पट्ठपेति, तस्स तं सति अधिकारसम्पत्तियं बुद्धानं सम्मुखीभावे इद्धिमयपरिक्खारलाभाय संवत्ततीति वेदितब्बं ।

२९. पणीतेनाति उत्तमेन । सहत्थाति सहत्थेन । सन्तप्पेत्वाति सुट्ठु तप्पेत्वा, परिपुण्णं सुहितं यावदत्थं कत्वा । सम्पवारेत्वाति सुट्ठु पवारेत्वा, अलं अलन्ति हत्थसज्जाय पटिक्खिपापेत्वा । भुत्ताविन्ति भुत्तवन्तं । ओनीतपत्तपाणिन्ति पत्ततो ओनीतपाणिं, अपनीतहत्थन्ति वुत्तं होति । “ओनित्तपत्तपाणि”न्तिपि पाठो, तस्सत्थो — ओनित्तं नानाभूतं विनाभूतं पत्तं पाणितो अस्साति ओनित्तपत्तपाणि, तं ओनित्तपत्तपाणिं, हत्थे च पत्तञ्च धोवित्वा एकमन्तं पत्तं निक्खिपित्वा निसिन्नन्ति अत्थो । एकमन्तं निसीदिसूति भगवन्तं एवंभूतं जत्वा एकस्मिं ओकासे निसीदिसूति अत्थो । धम्मिया कथायातिआदीसु तङ्कणानुरूपाय धम्मिया कथाय दिट्ठधम्मिकसम्परायिकअत्थं सन्दस्सेत्वा कुसले च धम्मे समादपेत्वा तत्थ च नं समुत्तेजेत्वा सउस्साहं कत्वा ताय च सउस्साहताय अज्जेहि च विज्जमानगुणेहि सम्पहंसेत्वा धम्मरतनवस्सं वस्सित्वा उट्ठायासना पक्कामि ।

यसस्स पब्बज्जाकथावण्णना निट्ठिता ।

चतुगिहिसहायपब्बज्जाकथावण्णना

३०. इदानी तस्स सहायानं पब्बज्जं दस्सेन्तो “अस्सोसुं खो”तिआदिमाह । तत्रायं अनुत्तानपदवण्णना — सेट्ठिनो च अनुसेट्ठिनो च येसं कुलानं तानि सेट्ठानुसेट्ठीनि कुलानि, तेसं सेट्ठानुसेट्ठीनं कुलानं, पवेणिवसेन आगतेहि सेट्ठीहि च अनुसेट्ठीहि च समन्नागतानं कुलानन्ति अत्थो । विमलोतिआदीनि तेसं पुत्तानं नामानि । केसमस्सुं ओहारेत्वाति केसञ्च मस्सुञ्च ओरोपेत्वा । कासायानि वत्थानीति कसायरसपीतानि ब्रह्मचरियं चरन्तानं अनुच्छविकानि वत्थानि । ओरकोति ऊनको लामको । सेसमेत्थ वुत्तनयमेव ।

चतुगिहिसहायपब्बज्जाकथावण्णना निट्ठिता ।

पज्जासगिहिसहायपब्बज्जाकथावण्णना

३१. पज्जासमत्तानं गिहिसहायानं पब्बज्जायपि यं वत्तब्बं, तं वुत्तमेव । इमेसं पन सब्बेसं पुब्बयोगो वत्तब्बोति तं दस्सेतुं “यसआदीनं कुलपुत्तानं अयं पुब्बयोगो”तिआदिमाह । तत्थ वग्गबन्धनेनाति गणबन्धनेन, एकीभूताति वुत्तं होति । अनाथसरीरानीति अनाथानि मतकळेवरानि । पटिजग्गन्ताति बहि नीहरित्वा झापेन्ता ।

पञ्जासगिहिसहायपब्बज्जाकथावण्णना निट्ठिता ।

### मारकथावण्णना

३२. इदानीं सरणगमनूपसम्पदं दस्सेतुं “अथ खो भगवा”ति आदि आरब्धं । तत्रायं अनुपुब्बपदवण्णना (सं० नि० अट्ठ० १.१.१४१) — मुत्ताहन्ति मुत्तो अहं । चारिकन्ति अनुपुब्बगमनचारिकं, गामनिगमराजधानीसु अनुक्कमेन गमनसङ्घातं चारिकन्ति अत्थो । चरथाति दिवसं योजनपरमं गच्छन्ता चरथ । मा एकेन द्वे अगमित्थाति एकेन मग्गेन द्वीसु गतेसु एकस्मिं धम्मं देसेन्ते एकेन तुण्हीभूतेन ठातब्बं होति, तस्मा एवमाह । आदिकल्याणन्ति आदिमिह कल्याणं सुन्दरं भद्दकं, तथा मज्झपरियोसानेसु । आदिमज्झपरियोसानञ्च नामेतं सासनस्स च देसनाय च वसेन दुब्बिधं । तत्थ सासनस्स सीलं आदि, समथविपस्सनामग्गा मज्झं, फलनिब्बानानि परियोसानं । सीलसमाधयो वा आदि, विपस्सनामग्गा मज्झं, फलनिब्बानानि परियोसानं । सीलसमाधिविपस्सना वा आदि, मग्गो मज्झं, फलनिब्बानानि परियोसानं । देसनाय पन चतुप्पदिकगाथाय ताव पठमपादो आदि, दुतियततिया मज्झं, चतुत्थो परियोसानं । पञ्चपदछप्पदानं पठमपादो आदि, अवसानपादो परियोसानं, सेसा मज्झं । एकानुसन्धिकस्स सुत्तस्स निदानं आदि, इदमवोचाति परियोसानं, सेसं मज्झं । अनेकानुसन्धिकस्स सुत्तस्स मज्झे बहुकम्पि अनुसन्धि मज्झमेव, निदानं आदि, इदमवोचाति परियोसानं । सात्थन्ति सात्थकं कत्वा देसेथ । सब्यञ्जनन्ति ब्यञ्जनेहि चेव पदेहि च परिपूरं कत्वा देसेथ । केवलपरिपुण्णन्ति सकलपरिपुण्णं । परिसुद्धन्ति निरुपक्विकलेसं । ब्रह्मचरियन्ति सिक्खत्तयसङ्गहं सासनब्रह्मचरियं । पकासेथाति आवि करोथ ।

अप्परजक्खजातिकाति पञ्जाचक्खुमिह अप्पकिलेसरजसभावा, दुकूलसाणिया पटिच्छन्ना विय चतुप्पदिकगाथापरियोसाने अरहत्तं पत्तुं समत्था सत्ता सन्तीति अत्थो । परिहायन्तीति अलाभपरिहानिया धम्मतो परिहायन्ति । तेनेवाह “अनधिगतं नाधिगच्छन्ता विसेसाधिगमतो परिहायन्ती”ति । सेनानिगमोति सेनाय निगमो । पठमकप्पिकानं किर तस्मिं ठाने सेनानिवेसो अहोसि, तस्मा सो पदेसो “सेनानिगमो”ति वुच्चति । “सेनानिगामो”तिपि पाठो, सेनानि नाम सुजाताय पिता, तस्स गामोति अत्थो । तेनुपसङ्कमिस्सामीति नाहं तुम्हे उय्योजेत्वा परिवेणादीनि कारेत्वा उपट्ठाकादीहि परिचरियमानो विहरिस्सामि, तिण्णं पन जटिलानं अड्डुट्ठानि पाटिहारियसहस्सानि दस्सेत्वा धम्ममेव देसेतुं उपसङ्कमिस्सामि ।

३३. मारो पापिमाति अत्तनो विसयं अतिक्कमित्तुं पटिपन्ने सत्ते मारेतीति मारो, परे पापे नियोजेति, सयं वा पापे नियुत्तोति पापिमा । अज्जानिपिस्स कण्हो अधिपति वसवत्ती अन्तको नमुचि पमत्तबन्धूतिआदीनि बहूनि नामानि, इध पन नामद्वयमेव गहितं । उपसङ्कमीति “अयं समणो गोतमो महायुद्धं विचारेन्तो विय ‘मा एकेन द्वे अगमित्थ, धम्मं देसेथा’ति सट्ठि जने उय्योजेति, इमस्मिं पन एकस्मिम्पि धम्मं देसेन्ते मय्हं चित्तस्स सातं नत्थि, एवं बहूसु देसेन्तेसु कुतो भविस्सति, पटिबाहामि न”न्ति चिन्तेत्वा उपसङ्कमि ।

सब्बपासेहीति सब्बेहि किलेसपासेहि । ये दिब्बा ये च मानुसाति ये दिब्बकामगुणसङ्घाता मानुसककामगुणसङ्घाता च किलेसपासा नाम अत्थि, सब्बेहि तेहि त्वं बद्धोति वदति । महाबन्धनबद्धोति महता किलेसबन्धनेन बद्धो, महति वा बन्धने बद्धो, किलेसबन्धनस्स ठानभूते भवचारके बद्धोति अत्थो । न मे समण मोक्खसीति समण त्वं मम विसयतो न मुच्चिस्ससि । “न मे समण मोक्खसी”ति च इदं मारो “मुत्ताहं, भिक्खवे, सब्बपासेही”ति भगवतो वचनं असद्वहन्तो वदति, सद्वहन्तोपि वा “एवमयं परेसं सत्तानं मोक्खाय उस्साहं न करेय्या”ति सन्तज्जेन्तो कोहज्जे ठत्वा वदति ।

निहतोति त्वं मया निहतो, निब्बिसेवनभावं गमितो पराजितोति अत्थो । अन्तलिक्खे चरन्ते पञ्चाभिज्जेपि बन्धतीति अन्तलिक्खचरो । रागपासो हि अन्तलिक्खचरेसुपि किच्चसाधनतो “अन्तलिक्खचरो”ति वुच्चति, तेनेव नं मारोपि अन्तलिक्खचरोति मज्जति । मनसि जातोति मानसो, मनसम्पयुत्तोति अत्थो । सेसमेत्थ उत्तानत्थमेव ।

मारकथावण्णना निड्डिता ।

### पब्बज्जूपसम्पदाकथावण्णना

३४. “अनुजानामि भिक्खवे”ति आदिकाय पन पाळिया यो पब्बज्जूपसम्पदाविनिच्छयो वत्तब्बो, तं वित्थारतो दस्सेतुं “पब्बज्जापेक्खं कुलपुत्तं पब्बाजेत्तेना”ति आदिमाह । तत्थ ये पुग्गला पटिक्खित्ताति सम्बन्धो । सयं पब्बाजेत्तब्बोति केसच्छेदनादीनि सयं करोन्तेन पब्बाजेत्तब्बो । केसच्छेदनं कासायच्छादनं सरणदानन्ति हि इमानि तीणि करोन्तो “पब्बाजेती”ति वुच्चति । एतेसु एकं द्वे वापि करोन्तो तथा वोहरीयतियेव, तस्मा एतं पब्बाजेहीति केसच्छेदनं कासायच्छादनञ्च सन्धाय वुत्तं । उपज्झायं उद्दिस्स पब्बाजेतीति एत्थापि एसेव नयो । खण्डसीमं नेत्वाति भण्डुकम्मरोचनपरिहरणत्थं वुत्तं । तेन सभिक्खुके विहारे अज्जम्पि “एतस्स केसे छिन्दा”ति वत्तुं न वट्टति । पब्बाजेत्वाति केसच्छेदनं सन्धाय वदति । भिक्खुतो अज्जो पब्बाजेतुं न लभतीति सरणदानं सन्धाय वुत्तं । तेनेवाह “सामणेरो पना”ति आदि । भब्बरूपोति भब्बसभावो । तमेवत्थं परियायन्तरेन विभावेति “सहेतुको”ति । जातोति पाकटो । यसस्सीति परिवारसम्पत्तिया समन्नागतो ।

वण्णसण्ठानगन्धासयोकासवसेन असुचिजेगुच्छपटिकूलभावं पाकटं करोन्तेनाति सम्बन्धो । तत्थ केसा नामेते वण्णतोपि पटिकूला, सण्ठानतोपि गन्धतोपि आसयतोपि ओकासतोपि पटिकूला । मनुज्जेपि (विसुद्धि० १.१८३; विभ० अट्ठ० ३५६; सारत्थ० टी० पाराजिककण्ड २.१६२) हि यागुपत्ते वा भत्तपत्ते वा केसवण्णं किञ्चि दिस्वा “केसमिस्सकमिदं, हरथ न”न्ति जिगुच्छन्ति, एवं केसा वण्णतो पटिकूला । रत्तिं भुज्जन्तापि केससण्ठानं अक्कवाकं वा मक्कचिवाकं वा छुपित्वा तथेव जिगुच्छन्ति, एवं सण्ठानतो पटिकूला । तेलमक्खनपुप्फधूमादिसङ्कारविरहितानञ्च केसानं गन्धो परमजेगुच्छो होति, ततो जेगुच्छतरो अग्गिम्हि पक्खित्तानं । केसा हि वण्णसण्ठानतो अप्पटिकूलापि सियुं, गन्धेन पन पटिकूलायेव । यथा हि दहरस्स कुमारकस्स वच्चं वण्णतो हलिद्विवण्णं, सण्ठानतोपि हलिद्विपिण्डिसण्ठानं । सङ्कारट्टाने छट्ठितञ्च उद्धुमातककाळसुनखसरीरं वण्णतो तालपक्कवण्णं, सण्ठानतो वट्टेत्वा विस्सट्टमुदिङ्गसण्ठानं, दाठापिस्स सुमनमकुळसदिसा, तं उभयम्पि वण्णसण्ठानतो सिया अप्पटिकूलं, गन्धेन पन पटिकूलमेव, एवं केसापि सियुं वण्णसण्ठानतो अप्पटिकूला, गन्धेन पन पटिकूलायेवाति । यथा पन असुचिद्वाने गामनिस्सन्देन जातानि सूपेय्यपण्णानि नागरिकमनुस्सानं जेगुच्छानि होन्ति अपरिभोगानि, एवं केसापि पुब्बलोहितमुत्तकरीसपित्तसेम्हादिनिस्सन्देन जातत्ता परमजेगुच्छाति एवं आसयतो पटिकूला । इमे च केसा नाम गूथरासिम्हि उट्ठितकण्णकं विय एकतिसकोट्टासरासिम्हि जाता, ते सुसानसङ्कारट्टानादीसु जातसाकं विय परिखादीसु जातकमलकुवलादिपुप्फं विय च असुचिद्वाने जातत्ता परमजेगुच्छाति एवं ओकासतो पटिकूलाति आदिना नयेन तचपञ्चकस्स वण्णादिवसेन पटिकूलभावं पकासेन्तेनाति अत्थो ।

निज्जीवनिस्सत्तभावं वा पाकटं करोन्तेनाति इमे केसा नाम सीसकटाहपलिवेठनचम्मे जाता । तत्थ यथा वम्मिकमत्थके जातेसु कुन्थतिणेसु न वम्मिकमत्थको जानाति “मयि कुन्थतिणानि जातानी”ति, नापि कुन्थतिणानि जानन्ति “मयं वम्मिकमत्थके जातानी”ति, एवमेव न सीसकटाहपलिवेठनचम्मं जानाति “मयि केसा जाता”ति, नापि

केसा जानन्ति “मयं सीसकटाहपलिवेठनचम्मे जाता”ति । अञ्जमञ्जं आभोगपच्चवेक्खणरहिता एते धम्मा । इति केसा नाम इमस्मिं सरीरे पाटियेक्को कोट्टासो अचेतनो अब्याकतो सुञ्जो निस्सत्तो थद्धो पथवीधातूतिआदिना नयेन निज्जीवनिस्सत्तभावं पकासेन्तेन । पुब्बेति पुरिमबुद्धानं सन्तिके । **मद्वितसङ्खारो**ति नामरूपववत्थानेन चैव पच्चयपरिग्गहवसेन च जाणेन परिमद्वितसङ्खारो । **भावितभावनो**ति कलापसम्मसनादिना सब्बसो कुसलभावनाय पूरणेन भावितभावनो ।

**अदिन्नं न वट्ठतीति** एत्थ पब्बज्जा न रुहतीति वदन्ति । **अनुज्जातउपसम्पदा**ति जत्तिचतुत्थकम्मेन अनुज्जातउपसम्पदा । **ठानकरणसम्पदन्ति** एत्थ उरादीनि ठानानि, संवुतादीनि करणानीति वेदितब्बानि । अनुनासिकन्तं कत्वा दानकाले अन्तरा विच्छेदं अकत्वा दातब्बानीति दस्सेतुं “**एकसम्बन्धानी**”ति वुत्तं । **विच्छिन्दित्वा**ति म-कारन्तं कत्वा दानसमये विच्छेदं कत्वा । **सब्बमस्स कप्पियाकप्पियं आचिक्खितब्बन्ति** दससिक्खापदविनिमुत्तं परामासापरामासादिभेदं कप्पियाकप्पियं आचिक्खितब्बं । **आभिसमाचारिकेसु विनेतब्बो**ति इमिना सेखियउपज्झायवत्तादिआभिसमाचारिकसीलमनेन पूरेतब्बं, तत्थ च कत्तब्बस्स अकरणे अकत्तब्बस्स च करणे दण्डकम्मारहो होतीति दीपेति ।

पब्बज्जूपसम्पदाकथावण्णना निट्ठिता ।

### दुतियमारकथावण्णना

**३५. अथ खो भगवा वस्संवुट्ठो**तिआदिकाय पन पाळिया अयं अपुब्बपदवण्णना । **योनिमनसिकारा**ति उपायमनसिकारेण, अनिच्चादीसु अनिच्चादितो मनसिकरणेनाति अत्थो । **योनिमनो सम्मप्यधाना**ति उपायवीरियेन, अनुप्पन्नाकुसलानुप्पादनादिविधिना पवत्तवीरियेनाति अत्थो । **विमुत्ती**ति उक्कट्टनिद्देसेन अरहत्तफलविमुत्ति वुत्ता । **अज्झभासी**ति “अयं अत्तना वीरियं कत्वा अरहत्तं पत्वापि न तुस्सति, इदानी अज्जेसम्पि ‘पापुणाथा’ति उस्साहं करोति, पटिबाहेस्सामि न”न्ति चिन्तेत्वा अभासि । **मारपासेना**ति किलेसपासेन । सेसमेत्थ वुत्तनयमेव ।

दुतियमारकथावण्णना निट्ठिता ।

### भद्वगियकथावण्णना

**३६. तिसंभद्वगियवत्थुमिह यथाभिरन्तं विहरित्वा**ति यथाअज्झासयं विहरित्वा । बुद्धानज्झि एकस्मिं ठाने वसन्तानं छायूदकादीनं विपत्तिं वा अफासुकसेनासनं वा मनुस्सानं अस्सद्वादिभावं वा आगम्म अनभिरति नाम नत्थि, तेसं सम्पत्तिया “इध फासुं विहरामा”ति अभिरमित्वा चिरविहारोपि नत्थि । यत्थ पन तथागते विहरन्ते सत्ता सरणेसु वा तीसु पतिट्ठहन्ति, सीलानि वा समादियन्ति, पब्बजन्ति वा, सोतापत्तिमग्गादीनं वा परेसं उपनिस्सयो होति, तत्थ बुद्धा सत्ते तासु सम्पत्तीसु पतिट्ठापनअज्झासयेन वसन्ति, तासं अभावे पक्कमन्ति । तेन वुत्तं “**यथाअज्झासयं विहरित्वा**”ति । **अज्झोगाहेत्वा**ति पविसित्वा । **तिसमत्ता**ति तिसपमाणा । सेसमेत्थ वुत्तनयमेव ।

भद्वगियकथावण्णना निट्ठिता ।

### उरुवेलपाटिहारियकथावण्णना

३७-३८. उरुवेलकस्सपवत्थुम्हि जटिलोति जटाधरो । जटा अस्स अत्थीति हि जटिलो । नेतीति नायको, सामं विनेति अत्तनो लब्धिं सिक्खापेतीति विनायको । सचे ते कस्सप अगस्सुति कस्सप सचे तुय्हं भारियं अफासुकं किञ्चि नत्थि । अग्यागारेति अगिसालायं । उभिन्नं सजोतिभूतानन्ति उभोसु सजोतिभूतेसु पज्जलितेसु । यत्र हि नामाति यो नाम ।

३९. अज्जण्होति अज्ज एकदिवसं । अगिसालम्हीति अग्यागारे । सुमनमनसोति सुन्दरचित्तसङ्घातमनो । तेजोधातूसु कुसलोति तेजोसिणसमापत्तीसु कुसलो । उदिच्छरेति उल्लोकेसुं, परिवारेसुन्ति वा अत्थो । पत्तम्हि ओदहित्वाति पत्ते पक्खिपित्वा । ध्रुवभत्तेनाति निच्चभत्तेन ।

४०. अभिक्कन्ताय रत्तियाति एत्थ अभिक्कन्त-सद्दो खये वत्तति, तेन परिकखीणायरत्तियाति अत्थो । एते हि चत्तारो महाराजानो मज्झिमयामसमनन्तरे आगता । नियामो किरिसे देवतानं, यदिदं बुद्धानं वा बुद्धसावकानं वा उपट्ठानं आगच्छन्ता मज्झिमयामसमनन्तरे आगच्छन्ति । अभिक्कन्तवण्णाति अभिरूपछविवण्णा, इट्ठवण्णा मनापवण्णाति वुत्तं होति । देवता हि मनुस्सलोकं आगच्छमाना पकतिवण्णं पकतिइद्दिं जहित्वा ओळारिकं अत्तभावं कत्वा अतिरेकवण्णवत्थालङ्कारकायादीहि ओभासं मुञ्चमानादिवसेन च दिब्बं इद्धानुभावञ्च निम्मिनित्वा नटसमज्जादीनि गच्छन्ता मनुस्सा विय अभिसङ्खतेन कायेन आगच्छन्ति । तत्थ कामावचरा अनभिसङ्खतेनपि आगन्तुं सक्कोन्ति ओळारिकरूपत्ता । तथा हि ते कबळीकाराहारभक्खा, रूपावचरा पन अनभिसङ्खतेन कायेन आगन्तुं न सक्कोन्ति सुखुमतररूपत्ता । तेसज्हि अतिसुखुमोव अत्तभावो, न तेन इरियापथकप्पनं होति । तस्मा ब्रह्मलोकेपि ब्रह्मानो येभ्य्येन निम्मितरूपेनेव पवत्तन्ति । मूलपटिसन्धिरूपज्हि नेसं अतिविय सुखुममहारूपं, केवलं तं चित्तुप्पादस्स निस्सयाधिट्ठानभूतं सण्ठानवन्तं हुत्वा तिट्ठति ।

केवलकप्पन्ति एत्थ केवल-सद्दस्स अनवसेसत्तं अत्थो, कप्प-सद्दस्स समन्तभावो, तस्मा केवलकप्पं वनसण्डन्ति अनवसेसं समन्ततो वनसण्डन्ति अत्थो । अनवसेसं फरितुं समत्थस्सपि हि ओभासस्स केनचि कारणेन एकदेसफरणम्पि सिया, अयं पन सब्बसो फरतीति दस्सेतुं समन्तत्थो कप्प-सद्दो गहितो । अथ वा ईसं असमत्थं केवलकप्पं । भगवतो पभाय अनोभासितमेव हि पदेसं देवता अत्तनो पभाय ओभासेन्ति । न हि भगवतो पभा कायचि पभाय अभिभूयति, सूरियादीनम्पि पन पभं सा अभिभूयति तिट्ठतीति । ओभासेत्वाति वत्थालङ्कारसरीरसमुट्ठिताय आभाय फरित्वा, चन्दो विय सूरियो विय च एकोभासं एकपज्जोतं करित्वाति अत्थो । देवतानज्हि सरीराभा दसद्वादसयोजनमत्तट्ठानं ततो भिय्योपि फरित्वा तिट्ठति, तथा वत्थाभरणादीसु समुट्ठिता पभा । चतुद्दिसाति चतूसु दिसासु । यत्र हि नामाति यं नाम ।

४३. अङ्गमगधाति उभो अङ्गमगधरट्ठवासिनो । इद्धिपाटिहारियन्ति इद्धिभूतं पाटिहारियं, न आदेसनानुसासनीपाटिहारियन्ति अत्थो । तिविधज्हि पाटिहारियं इद्धिपाटिहारियं आदेसनापाटिहारियं अनुसासनीपाटिहारियन्ति । तत्थ “इध भिक्खु एकोपि हुत्वा बहुधा होति, बहुधापि हुत्वा एको होति आविभावं तिरोभाव”न्ति आदिनयप्पवत्तं (दी० नि० १.२३८-२३९; म० नि० १.१४७; सं० नि० २.७०; ५.८३४) इद्धिविधमेव इद्धिपाटिहारियं । “इध भिक्खु परसत्तानं परपुगलानं चित्तम्पि आदिसति, चेतसिकम्पि आदिसति, वितक्कितम्पि आदिसति, विचारितम्पि आदिसति ‘एवम्पि ते मनो, इत्थम्पि ते मनो’”ति आदिनयप्पवत्तं (पटि० म० ३.३०) परस्स चित्तं जत्वा कथनं आदेसनापाटिहारियं । “इध भिक्खु एवमनुसासति ‘एवं वितक्केथ, मा एवं वितक्कयित्थ, एवं मनसि करोथ, मा एवं मानसा करित्थ, इदं पजहथ, इदं उपसम्पज्ज विहरथा’”ति (पटि० म० ३.३०) एवमादिनयप्पवत्ता सावकानं

बुद्धानञ्च सब्बकालं देसेतब्बधम्मदेसना अनुसासनीपाटिहारियं ।

तत्थ (उदा० अट्ठ० १) पाटिहारियपदस्स वचनत्थं पटिपक्खहरणतो रागादिकिलेसापनयनतो **पाटिहारियन्ति** वदन्ति । भगवतो पन पटिपक्खा रागादयो न सन्ति ये हरितब्बा, पुथुज्जनानमि विगतूपक्विकलेसे अट्ठगुणसमन्नागते चित्ते हतपटिपक्खे इद्धिविधं वत्तति, तस्मा तत्थ पवत्तवोहारेण च न सक्का इध पाटिहारियन्ति वत्तुं । सचे पन महाकारुणिकस्स भगवतो वेनेय्यगता च किलेसा पटिपक्खा, तेसं हरणतो **पाटिहारियन्ति** वुत्तं, एवं सति युत्तमेतं । अथ वा भगवतो च सासनस्स च पटिपक्खा तित्थिया, तेसं हरणतो **पाटिहारियं** । ते हि दिट्ठिहरणवसेन दिट्ठिप्पकासने असमत्थभावेन च इद्धिआदेसनानुसासनीहि हरिता अपनीता होन्तीति । **पटीति** वा अयं सद्धो पच्छाति एतस्स अत्थं बोधेति “तस्मिं पटिपविट्ठमि, अञ्जो आगच्छि ब्राह्मणो”तिआदीसु (चूळनि० वत्थुगाथा ४) विय, तस्मा समाहिते चित्ते विगतूपक्विकलेसेन कतकिच्चेन पच्छा हरितब्बं पवत्तेतब्बन्ति पटिहारियं, अत्तनो वा उपक्विकलेसेसु चतुत्थज्झानमग्गेहि हरितेसु पच्छा हरणं पटिहारियं, इद्धिआदेसनानुसासनियो च विगतूपक्विकलेसेन कतकिच्चेन सत्तहितत्थं पुन पवत्तेतब्बा, हरितेसु च अत्तनो उपक्विकलेसेसु परसत्तानं उपक्विकलेसहरणानि होन्तीति पटिहारियानि भवन्ति, पटिहारियमेव **पाटिहारियं** । पटिहारिये वा इद्धिआदेसनानुसासनीसमुदाये भवं एकेकं **पाटिहारियन्ति** वुच्चति । पटिहारियं वा चतुत्थज्झानं मग्गो च पटिपक्खहरणतो, तत्थ जातं निमित्तभूते, ततो वा आगतन्ति **पाटिहारियं** । **स्वातनायाति** स्वे दातब्बस्स अत्थाय ।

**४४. पंसुकूलं उप्पन्नं होतीति** परियेसमानस्स पटिलाभवसेन उप्पन्नं होति । विचित्तपाटिहारियदस्सनत्थाव सा परियेसना । यस्मा पाणिना फुट्टमत्ते सा पोक्खरणी निम्मिता अहोसि, तस्मा वुत्तं “**पाणिना पोक्खरणिं खणित्वा**”ति ।

**४६-४९. जटिलाति** तापसा । ते हि जटाधारिताय इध “जटिला”ति वुत्ता । **अन्तरट्ठकासु हिमपातसमयेति** हेमन्तस्स उतुनो अब्भन्तरभूते माघमासस्स अवसाने चतस्सो, फग्गुणमासस्स आदिमि चतस्सोति एवं उभिन्नमन्तरे अट्ठरत्तीसु हिमपतनकाले । **नेरञ्जराय उम्मुज्जन्तीति** केचि तस्मिं तित्थसम्मते उदके पठमं निमुग्गसकलसरीरा ततो उम्मुज्जन्ता वुट्ठहन्ति उप्पिलवन्ति । **निमुज्जन्तीति** ससीसं उदके ओसीदन्ति । **उम्मुज्जननिमुज्जनमि करोन्तीति** पुनप्पुनं उम्मुज्जननिमुज्जनानिपि करोन्ति । तत्थ हि केचि “एकुम्मुज्जनेनेव पापसुद्धि होती”ति एवंदिट्ठिका, ते उम्मुज्जनमेव कत्वा गच्छन्ति । उम्मुज्जनं पन निमुज्जनमन्तरेण नत्थीति अविनाभावतो निमुज्जनमि ते करोन्तियेव । येपि “एकनिमुज्जनेनेव पापसुद्धि होती”ति एवंदिट्ठिका, तेपि एकवारमेव निमुज्जित्वा वुत्तनयेनेव अविनाभावतो उम्मुज्जनमि कत्वा पक्कमन्ति । अपरे “पुनप्पुनं उम्मुज्जननिमुज्जनानि कत्वा नहाते पापसुद्धि होती”ति एवंदिट्ठिका, ते कालेन कालं उम्मुज्जननिमुज्जनानि करोन्ति । ते सब्बेपि सन्धाय वुत्तं “उम्मुज्जन्तिपि निमुज्जन्तिपि उम्मुज्जननिमुज्जनमि करोन्ती”ति । एत्थ च किञ्चापि निमुज्जनपुब्बकं उम्मुज्जनं, निमुज्जनमेव पन करोन्ता कतिपया, उम्मुज्जनं तदुभयञ्च करोन्ता बहूति तेसं येभ्य्यभावदस्सनत्थं उम्मुज्जनं पठमं वुत्तं ।

**५०-५१. उदकवाहकोति** उदकोघो । **रेणुहतायाति** रजोगताय, रजोकिण्णायाति वुत्तं होति । **नेव च खो त्वं कस्सप अरहाति** एतेन तदा कस्सपस्स असेक्खभावं पटिक्खपति, **नापि अरहत्तमग्गसमापन्नोति** एतेन सेक्खभावं । उभयेनपिस्स अनरियभावमेव दीपेति । **सापि ते पटिपदा नत्थि, याय त्वं अरहा वा अस्ससि अरहत्तमग्गं वा समापन्नोति** इमिना पनस्स कल्याणपुथुज्जनभावमि पटिक्खपति । तत्थ **पटिपदाति** सीलविसुद्धिआदयो छ विसुद्धियो । पटिपज्जति एताय अरियमग्गोति **पटिपदा** । **अस्ससीति** भवेय्यासि । **चिरपटिकाति** चिरकालतो पट्टाय, नागदमनतो पट्टायाति अत्थो । **खारिकाजमिस्सन्ति** एत्थ **खारीति** अरणीकमण्डलसूचिआदयो तापसपरिक्खारा, तं हरणकाजं **खारिकाजं** ।



अग्निहोतमिस्सन्ति दब्बिआदिअग्निपूजोपकरणं ।

५२-५३. उपसगोति उपद्वो । इदानी अड्डुड्डुनि पाटिहारियसहस्सानि एकतो गणेत्वा दस्सेतुं “**भगवतो अधिद्वानेन पञ्च कट्टसतानि न फालियिंसू**”तिआदि आरब्धं । नागदमनादीनि पन सोळस पाटिहारियानि इध न गणितानि, तेहि सद्धिं सोळसातिरेकअड्डुड्डुपाटिहारियसहस्सानीति वेदितव्वं ।

### आदित्तपरियायसुत्तवण्णना

५४. इदानी तस्स भिक्खुसहस्सस्स आदित्तपरियायदेसनाय अरहत्तप्पत्तिं दस्सेतुं “**अथ खो भगवा**”तिआदि आरब्धं । तत्थ गयायं विहरति गयासीसेति गयानामिकाय नदिया अविदूरे भवत्ता गामो गया नाम, तस्सं गयायं विहरति । समीपत्थे चेतं भुम्मवचनं । गयागामस्स हि अविदूरे गयाति एका पोक्खरणीपि अत्थि नदीपि गयासीसनामको हत्थिकुम्भसदिसो पिड्डिपासाणोपि । यत्थ भिक्खुसहस्सस्स ओकासो पहाति, भगवा तत्थ विहरति । तेन वुत्तं “**गयासीसे**”ति, गयागामस्स आसन्ने गयासीसनामके पिड्डिपासाणे विहरतीति वुत्तं होति । **भिक्खू आमन्तेसी**ति तेसं सप्पायधम्मदेसनं विचिन्तित्वा तं देसेस्सामीति आमन्तेसि । भगवा हि तं इद्धिमयपत्तचीवरधरं समणसहस्सं आदाय गयासीसं गन्त्वा तेन परिवारितो निसीदित्वा “कतरा नु खो एतेसं धम्मकथा सप्पाया”ति चिन्तेन्तो “इमे सायं पातं अग्निं परिचरन्ति, इमेसं द्वादसायतनानि आदित्तानि सम्पज्जलितानि विय कत्वा दस्सेस्सामि, एवं इमे अरहत्तं पापुणितुं सक्खिस्सन्ती”ति सन्निद्वानमकासि । अथ नेसं तथा देसेतुं “सब्बं, भिक्खवे, आदित्तं”न्तिआदिना इमं आदित्तपरियायं अभसि ।

तत्थ (सं० नि० अट्ठ० ३.४.२३) सब्बं नाम चतुब्बिधं सब्बसब्बं आयतनसब्बं सक्कायसब्बं पदेससब्बन्ति । तत्थ —

“न तस्स अद्दिट्ठमिधत्थि किञ्चि ।

अथो अविज्जातमजानितव्वं ।

सब्बं अभिज्जासि यदत्थि नेय्यं ।

तथागतो तेन समन्तचक्खू”ति (महानि० १५६; चूलनि० धोतकमाणवपुच्छानिद्वेस ३२; पटि० म० १.१२१) —

इदं **सब्बसब्बं** नाम । “सब्बं वो, भिक्खवे, देसेस्सामि, तं सुणाथा”ति (सं० नि० ४.२३) इदं **आयतनसब्बं** नाम । “सब्बधम्ममूलपरियायं वो, भिक्खवे, देसेस्सामी”ति (म० नि० १.१) इदं **सक्कायसब्बं** नाम । “सब्बधम्मेषु वा पठमसमन्नाहारो उप्पज्जति चित्तं मनो मानसं तज्जा मनोविज्जाणधातू”ति इदं **पदेससब्बं** नाम । इति पञ्चारम्मणमत्तं पदेससब्बं, तेभूमका धम्मा सक्कायसब्बं, चतुभूमका धम्मा आयतनसब्बं, यं किञ्चि नेय्यं सब्बसब्बं । पदेससब्बं सक्कायसब्बं न पापुणाति तस्स तेभूमकधम्मेषुपि एकदेसस्स असङ्गहनतो । सक्कायसब्बं आयतनसब्बं न पापुणाति लोकुत्तरधम्मनं असङ्गहनतो । आयतनसब्बं सब्बसब्बं न पापुणाति । कस्मा? यस्मा आयतनसब्बेन चतुभूमकधम्माव परिग्गहिता, न लक्खणपज्जत्तियोति । इमस्मिं पन सुत्ते आयतनसब्बं अधिप्पेतं, तत्थापि इध विपस्सनुपगधम्माव गहेतव्वा ।

**चक्खू**ति (ध० स० अट्ठ० ५९६; सं० नि० अट्ठ० ३.४.१) द्वे चक्खूनि जाणचक्खु चेव मंसचक्खु च । तत्थ जाणचक्खु पञ्चविधं बुद्धचक्खु धम्मचक्खु समन्तचक्खु दिब्बचक्खु पञ्चाचक्खूति । तेसु **बुद्धचक्खु** नाम आसयानुसयजाणञ्चेव इन्द्रियपरोपरियत्तजाणञ्च, यं “बुद्धचक्खुना लोकं वोलोकेन्तो”ति (दी० नि० २.६९; म० नि० १.२८३) आगतं ।

**धम्मचक्खु** नाम हेट्ठिमा तयो मग्गा तीणि च फलानि, यं “विरजं वीतमलं धम्मचक्खुं उदपादी”ति (दी० नि० १.३५५; सं० नि० ५.१०८१) आगतं। **समन्तचक्खु** नाम सब्बज्जुतज्जाणं, यं “पासादमारुह समन्तचक्खू”ति (दी० नि० २.७०; म० नि० १.२८२) आगतं। **दिब्बचक्खु** नाम आलोकवद्भुनेन उप्पन्नजाणं, यं “दिब्बेन चक्खुना विसुद्धेना”ति (म० नि० १.१४८, २८४) आगतं। **पज्जाचक्खु** नाम चतुसच्चपरिच्छेदकजाणं, यं “चक्खुं उदपादी”ति (सं० नि० ५.१०८१; महाव० १५) आगतं। मंसचक्खुपि दुविधं ससम्भारचक्खु पसादचक्खूति। तेसु य्वायं अक्खिक्कूपके अक्खिपटलेहि परिवारितो मंसपिण्डो, यत्थ चतस्सो धातुयो वण्णगन्धरसोजा सम्भवो जीवितं भावो चक्खुप्पसादो कायप्पसादोति सङ्खेपतो तेरस सम्भारा होन्ति, वित्थारतो पन चतस्सो धातुयो वण्णगन्धरसोजा सम्भवोति इमे नव चतुसमुद्धानवसेन छत्तिस, जीवितं भावो चक्खुप्पसादो कायप्पसादोति इमे कम्मसमुद्धाना ताव चत्तारोति चत्तालीस सम्भारा होन्ति, इदं **ससम्भारचक्खु** नाम। यं पनेत्थ सेतमण्डलपरिच्छिन्नेन कण्हमण्डलेन परिवारिते दिट्ठिमण्डले सन्निविट्ठं रूपदस्सनसमत्थं पसादमत्तं, इदं **पसादचक्खु** नाम। तस्स ततो परेसज्ज सोतादीनं वित्थारकथा **विसुद्धिमग्गे** (विसुद्धि० २.४३६) वुत्ताव।

तत्थ यदिदं पसादचक्खु, तज्ज गहेत्वा भगवा “**चक्खु आदित्तं**”न्ति आदिमाह। तत्थ **आदित्तन्ति** पदित्तं, सम्पज्जलितं एकादसहि अग्गीहि एकजालीभूतन्ति अत्थो। चक्खुसन्निस्सितं विज्जाणं **चक्खुविज्जाणं**, चक्खुस्स वा कारणभूतस्स विज्जाणं **चक्खुविज्जाणं**। कामं रूपालोकमनसिकारादयोपि तस्स विज्जाणस्स कारणं, ते पन साधारणकारणं, चक्खु असाधारणन्ति असाधारणकारणेनायं निद्वेसो यथा “यवङ्कुरो”ति। **सोतविज्जाणादीसुपि** एसेव नयो। चक्खुसन्निस्सितो फस्सो **चक्खुसम्फस्सो**, चक्खुविज्जाणसम्पयुत्तफस्सस्सेतं अधिवचनं। **सोतसम्फस्सादीसुपि** एसेव नयो। **चक्खुसम्फस्सपच्चया उप्पज्जति वेदयितन्ति** चक्खुसम्फस्सं मूलपच्चयं कत्वा उप्पन्ना सम्पटिच्छनसन्तीरणवोदुब्बनजवनवेदना। चक्खुविज्जाणसम्पयुत्ताय पन वेदनाय चक्खुसम्फस्सस्स पच्चयभावे वत्तब्बमेव नत्थि। चक्खुसम्फस्सो हि सहजाताय वेदनाय सहजातादिवसेन, असहजाताय उपनिस्सयादिवसेन पच्चयो होति। तेनेव “चक्खुसम्फस्सपच्चया उप्पज्जति वेदयितं सुखं वा दुक्खं वा अदुक्खमसुखं वा”ति वुत्तं। **सोतद्वारवेदनादीसुपि** एसेव नयो। एत्थ पन **मनोति** भवङ्गचित्तं मनोद्वारस्स अधिप्पेतत्ता। **धम्माति** धम्मरम्मणं। **मनोविज्जाणन्ति** सहावज्जनकं जवनं। **मनोसम्फस्सोति** भवङ्गसहजातो फस्सो। **वेदयितन्ति** आवज्जनवेदनाय सद्धिं जवनवेदना। भवङ्गसम्पयुत्ताय पन वेदनाय गहणे वत्तब्बमेव नत्थि। आवज्जनं वा भवङ्गतो अमोचेत्वा **मनोति** सावज्जनं भवङ्गं ददुब्बं। **धम्माति** धम्मरम्मणमेव। **मनोविज्जाणन्ति** जवनविज्जाणं। **मनोसम्फस्सोति** भवङ्गावज्जनसहजातो फस्सो। **वेदयितन्ति** जवनसहजाता वेदना, भवङ्गावज्जनसहजातापि वट्ठितियेव।

**रागगिनाति** आदीसु रागोव अनुदहनट्टेन अग्गीति **रागगि**। रागो हि तिखिणं हुत्वा उप्पज्जमानो सत्ते अनुदहति झापेति, तस्मा “अग्गी”ति वुच्चति। इतरेसुपि द्वीसु एसेव नयो। तन्निमानि वत्थूनि (दी० नि० अट्ठ० ३.३०५; विभ० अट्ठ० ९२४) — एका दहरभिक्षुनी चित्तलपब्बतविहारे उपोसथागारं गन्त्वा द्वारपालरूपं ओलोकयमाना ठिता। अथस्सा अन्तो रागो तिखिणतरो हुत्वा उप्पन्नो, तस्मा तंसमुद्धाना तेजोधातु अतिविय तिखिणभावेन सद्धिं अत्तना सहजातधम्मोहि हृदयपदेसं झापेसि यथा तं बाहिरा तेजोधातु सन्निस्सयं, तेन सा भिक्षुनी झायित्वा कालमकासि। भिक्षुनियो गच्छमाना “अयं दहरा ठिता, पक्कोसथ न”न्ति आहंसु। एका गन्त्वा “कस्मा ठितासी”ति हत्थे गण्हि। गहितमत्ता परिवत्तित्वा पपता। इदं ताव रागस्स अनुदहनताय वत्थु।

दोसस्स पन अनुदहनताय मनोपदोसिका देवा ददुब्बा। तेसु (दी० नि० अट्ठ० १.४७-४८) किर एको देवपुत्तो “नक्खत्तं कीळिस्सामी”ति सपरिवारो रथेन वीथिं पटिपज्जति। अथज्जो निक्खमन्तो तं पुरतो गच्छन्तं दिस्वा “भो अयं

कपणो अदिट्ठपुब्बं विय एतं दिस्वा पीतिया उद्धुमातो विय भिज्जमानो विय च गच्छती”ति कुञ्जति । पुरतो गच्छन्तोपि निवत्तित्वा तं कुब्भं दिस्वा कुब्भा नाम सुविजाना होन्तीति कुब्भभावमस्स जत्वा “त्वं कुब्भो मय्हं किं करिस्ससि, अयं सम्पत्ति मया दानसीलादीनं वसेन लब्धा, न तुय्हं वसेना”ति पटिकुञ्जति । एकस्मिञ्चि कुब्भे इतरो अकुब्भो रक्खति । कुब्भस्स हि सो कोधो इतरस्मिं अकुञ्जन्ते अनुपादानो एकवारमेव उप्पत्तिया अनासेवनो चावेतुं न सक्कोति, उदकं पत्वा अग्निं विय निब्बायति, तस्मा अकुब्भो तं चवनतो रक्खति । उभोसु पन कुब्भेसु एकस्स कोधो इतरस्स पच्चयो होति, तस्सपि कोधो इतरस्स पच्चयो होतीति उभो कन्दन्तानयेव ओरोधानं चवन्ति । उभोसु हि कुब्भेसु भिय्यो भिय्यो अज्जमज्जम्हि परिवट्ठनवसेन तिखिणसमुदाचारो निस्सयदहनरसो कोधो उप्पज्जमानो हृदयवत्थुं निद्वहन्तो अच्चन्तसुखुमालं करजकायं विनासेति, ततो सकलोपि अत्तभावो अन्तरधायति । इदं दोसस्स अनुदहनताय वत्थु ।

मोहस्स पन अनुदहनताय खिड्डापदोसिका देवा दट्ठब्बा । मोहवसेन हि तेसं सतिसम्मोसो होति, तस्मा खिड्डावसेन आहारकालं अतिवत्तेत्वा कालं करोन्ति । ते (दी० नि० अट्ठ० १.४५-४६) किर पुज्जविसेसाधिगतेन महन्तेन अत्तनो सिरिविभवेन नक्खत्तं कीळन्ता ताय सम्पत्तिमहन्ताय “आहारं परिभुज्जिम्ह, न परिभुज्जिम्हा”तिपि न जानन्ति । अथ एकाहारातिक्कमनतो पट्टाय निरन्तरं खादन्तापि पिवन्तापि चवन्तियेव न तिड्ढन्ति । कस्मा? कम्मजतेजस्स बलवताय । मनुस्सानिज्जि कम्मजतेजो मन्दो, करजकायो बलवा । तेसं तेजस्स मन्दताय करजकायस्स बलवताय सत्ताहम्पि अतिक्कमित्त्वा उण्होदकअच्छयागुआदीहि सक्का वत्थुं उपत्थम्भेतुं । देवानं पन तेजो बलवा होति उळारपुज्जनिब्बत्तत्ता उळारगरुसिनिद्धसुधाहारजरिणतो च, करजं मन्दं मुदुसुखुमालभावतो । तेनेव हि भगवा इन्दसालगुहायं पकतिपथवियं पतिट्ठातुं असक्कोन्तं सक्कं देवराजानं “ओळारिककायं अधिट्ठाही”ति आह, तस्मा ते एकं आहारवेलां अतिक्कमित्त्वा सण्ठातुं न सक्कोन्ति । यथा नाम गिम्हानं मज्झन्हिके तत्तपासाणे ठपितं पदुमं वा उप्पलं वा सायन्हसमये घटसतेनपि सिञ्चियमानं पाकतिकं न होति विनस्सतियेव, एवमेव पच्छा निरन्तरं खादन्तापि पिवन्तापि चवन्तियेव न तिड्ढन्ति ।

को पन तेसं आहारो, का आहारवेलाति? सब्बेसम्पि कामावचरदेवानं सुधा आहारो, सो हेट्ठिमेहि हेट्ठिमेहि उपरिमानं उपरिमानं पणीततमो होति । तं यथासकं दिवसवसेन दिवसे दिवसे भुज्जन्ति । केचि पन “बिळारपदप्पमाणं सुधाहारं भुज्जन्ति । सो जिक्काय ठपितमत्तो याव केसग्गनखग्गा कायं फरति, तेसंयेव दिवसवसेन सत्तदिवसं यापनसमत्थोव होती”ति वदन्ति ।

के पन ते खिड्डापदोसिका नाम देवाति? इमे नामाति अट्ठकथायं विचारणा नत्थि, “कम्मजतेजो बलवा होति, करजं मन्द”न्ति अविसेसेन वुत्तत्ता पन ये केचि कबळीकाराहारूपजीविनो एवं करोन्ति, ते एवं चवन्तीति वेदितब्बा । केचि पनाहु “निम्मानरतिपरनिम्मितवसवत्तिनो ते देवा । खिड्डाय पदुस्सनमत्तेनेव हेते खिड्डापदोसिकाति वुत्ता”ति । मनोपदोसिका पन चातुमहाराजिकाति अट्ठकथायमेव वुत्तं । केचि पन “खिड्डापदोसिकापि चातुमहाराजिकायेवा”ति वदन्ति । एवं ताव रागादयो तयो अनुदहनट्ठेन “अग्गी”ति वेदितब्बा । जातिआदित्तयं पन नानप्पकारदुक्खवत्थुभावेन अनुदहनतो अग्नि । सोकादीनं अनुदहनता पाकटायेव । सेसमेत्थ वुत्तनयमेव । इति इमस्मिं सुत्ते दुक्खलक्खणं कथितं चक्खादीनं एकादसहि अग्गीहि आदित्तभावेन दुक्खमताय दुक्खभावस्स कथितत्ता ।

आदित्तपरियायसुत्तवण्णना निड्ढिता ।

उरुवेलपाटिहारियकथावण्णना निड्ढिता ।

## बिम्बिसारसमागमकथावण्णना

५५. इदानीं “अथ खो भगवा गयासीसे यथाभिरन्तं विहरित्वा”ति आदीसु या सा अनुत्तानपदवण्णना, तं दस्सेतुं “लट्ठिवनेति तालुय्याने”ति आदि आरब्धं। तत्थ तालुय्यानेति तालरुक्खानं बहुभावतो एवंलद्धनामे उय्याने। **अप्पेकच्चे येन भगवा तेनज्जलिं पणामेत्वा**ति आदीसु **अज्जलिं पणामेत्वा**ति ये उभतोपक्खिका, ते सन्धायेतं वुत्तं। ते किर एवं चिन्तयिंसु “सचे नो मिच्छादिट्ठिका चोदेस्सन्ति ‘कस्मा तुम्हे समणं गोतमं वन्दित्था’ति, तेसं ‘किं अज्जलिमतत्तकरणेनपि वन्दितं होती’ति वक्खाम। सचे नो सम्मादिट्ठिका चोदेस्सन्ति ‘कस्मा भगवन्तं न वन्दित्था’ति, ‘किं सीसेन भूमिं पहरन्तेनेव वन्दितं होति, ननु अज्जलिकम्ममि वन्दना एवा’ति वक्खामा”ति। **नामगोत्तं सावेत्वा**ति “भो गोतम, अहं असुकस्स पुत्तो दत्तो नाम मित्तो नाम इध आगतो”ति वदन्ता नामं सावेन्ति नाम, “भो गोतम, अहं वासेट्ठो नाम कच्चानो नाम इधागतो”ति वदन्ता गोत्तं सावेन्ति नाम। एते किर दलिद्वा जिण्णकुलपुत्ता परिसमज्जे नामगोत्तवसेन पाकटा भविस्सामाति एवं अकंसु। ये पन तुण्हीभूता निसीदिंसु, ते केराटिका चेव अन्धबाला च। तत्थ केराटिका “एकं द्वे कथासल्लापे करोन्ते विस्सासिको होति, अथ विस्सासे सति एकं द्वे भिक्खा अदातुं न युत्त”न्ति ततो अत्तानं मोचेन्ता तुण्ही निसीदन्ति। अन्धबाला अज्जाणतायेव अवक्खित्ता मत्तिकापिण्डो विय यत्थ कत्थचि तुण्हीभूता निसीदन्ति।

**किसकोवदानो**ति एत्थ किसकानं ओवदानो **किसकोवदानो**ति इमं ताव अत्थविकपणं दस्सेतुं “**तापसचरियाय किससरीरत्ता**”ति आदि वुत्तं। **अग्गिहुत्तन्ति** अग्गिपरिचरणं। रूपादयोव इध कामनीयट्ठेन “**कामा**”ति वुत्ताति आह “**एते रूपादयो कामे**”ति। **यज्जा अभिवदन्ती**ति यागहेतु इज्जन्तीति वदन्ति। **उपधीसूति** एत्थ चत्तारो उपधी कामुपधि खन्धुपधि किलेसुपधि अभिसङ्गारुपधीति। कामापि हि “यं पञ्च कामगुणे पटिच्च उप्पज्जति सुखं सोमनस्सं, अयं कामानं अस्सादो”ति (म० नि० १.१६७) एवं वुत्तस्स सुखस्स अधिद्वानभावतो उपधीयति एत्थ सुखन्ति इमिना वचनत्थेन “उपधी”ति वुच्चन्ति। खन्धापि खन्धमूलकस्स दुक्खस्स अधिद्वानभावतो, किलेसापि अपायदुक्खस्स अधिद्वानभावतो, अभिसङ्गारापि भवदुक्खस्स अधिद्वानभावतो “उपधी”ति वुच्चन्ति, तेसु खन्धुपधि इधाधिप्पेतोति आह “**खन्धुपधीसु मलन्ति जत्वा**”ति। **यज्जा मलमेव वदन्ती**ति यागहेतु मलमेव इज्जन्तीति वदन्ति। **यिट्ठेति** महायागे। **हुतेति** दिवसे दिवसे कत्तब्बअग्गिपरिचरणे। **कामभवे असत्तन्ति** कामभवे अलग्गं, तब्बिनिमुत्तन्ति वुत्तं होति।

५७-५८. **आसीसना**ति पत्थना। दिब्बसुवण्णेसुपि सिङ्गीसुवण्णस्स सब्बसेट्ठत्ता “**सिङ्गीनिक्खसवण्णो**”ति वुत्तं। यथेव हि मनुस्सपरिभोगे सुवण्णे युत्तिकतं हीनं, ततो रसविद्धं सेट्ठं, रसविद्धतो आकरुप्पन्नं, ततो यं किञ्चि दिब्बं सेट्ठं, एवं दिब्बसुवण्णेसुपि चामीकरतो सातकुम्भं, सातकुम्भतो जम्बुनदं, जम्बुनदतो सिङ्गीसुवण्णं, तस्मा तं सब्बसेट्ठं। **सिङ्गीनिक्खन्ति** च निक्खपरिमाणेन सिङ्गीसुवण्णेन कतं सुवण्णपट्ठं। ऊनकनिक्खेन कतज्झि घट्टनमज्जनक्खमं न होति, अतिरेकेन कतं घट्टनमज्जनं खमति, वण्णवन्तं पन न होति, फरुसधातुकं खायति, निक्खेन कतं घट्टनमज्जनञ्चेव खमति वण्णवन्तञ्च होति। निक्खं पन वीसतिसुवण्णन्ति केचि। पञ्चवीसतिसुवण्णन्ति अपरे। **मज्झिमनिकायट्ठकथायं** पन “निक्खं नाम पञ्चसुवण्णा”ति वुत्तं। **सुवण्णो** नाम चतुधरणन्ति वदन्ति।

**दससु अरियवासेसु वुत्थवासोति** —

“इध, (दी० नि० ३.३४८; अ० नि० १०.२०) भिक्खवे, भिक्खु पञ्चङ्गविप्पहीनो होति छळङ्गसमन्नागतो एकारक्खो चतुरापस्सेनो पनुण्णपच्चेकसच्चो समवयसट्ठेसनो अनाविलसङ्कप्पो पस्सद्धकायसङ्गारो सुविमुत्तचित्तो सुविमुत्तपज्जो।

“कथञ्च, भिक्खवे, भिक्खु पञ्चङ्गविप्पहीनो होति? इध, भिक्खवे, भिक्खुनो कामच्छन्दो पहीनो होति, ब्यापादो पहीनो होति, थिनमिद्धं पहीनं होति, उद्धच्चकुक्कुच्चं पहीनं होति, विचिकिच्छा पहीना होति । एवं खो, भिक्खवे, भिक्खु पञ्चङ्गविप्पहीनो होति ।

“कथञ्च, भिक्खवे, भिक्खु छळङ्गसमन्नागतो होति? इध, भिक्खवे, भिक्खु चक्खुना रूपं दिस्वा नेव सुमनो होति न दुम्मनो, उपेक्खको विहरति सतो सम्पजानो । सोतेन सद्दं सुत्वा...पे०... घानेन गन्धं घायित्वा... जिह्वाय रसं सायित्वा... कायेन फोडुब्बं फुसित्वा... मनसा धम्मं विज्जाय नेव सुमनो होति न दुम्मनो, उपेक्खको विहरति सतो सम्पजानो । एवं खो, भिक्खवे, भिक्खु छळङ्गसमन्नागतो होति ।

“कथञ्च, भिक्खवे, भिक्खु एकारक्खो होति? इध, भिक्खवे, भिक्खु सतारक्खेन चेतसा समन्नागतो होति । एवं खो, भिक्खवे, भिक्खु एकारक्खो होति ।

“कथञ्च, भिक्खवे, भिक्खु चतुरापस्सेनो होति? इध, भिक्खवे, भिक्खु सङ्घायेकं पटिसेवति, सङ्घायेकं अधिवासेति, सङ्घायेकं परिवज्जेति, सङ्घायेकं विनोदेति । एवं खो, भिक्खवे, भिक्खु चतुरापस्सेनो होति ।

“कथञ्च, भिक्खवे, भिक्खु पनुण्णपच्चेकसच्चो होति? इध, भिक्खवे, भिक्खु यानि तानि पुथुसमणब्राह्मणानं पुथुपच्चेकसच्चानि, सब्बानि तानि नुण्णानि होन्ति पनुण्णानि चत्तानि वन्तानि मुत्तानि पहीनानि पटिनिस्सट्ठानि । एवं खो, भिक्खवे, भिक्खु पनुण्णपच्चेकसच्चो होति ।

“कथञ्च, भिक्खवे, भिक्खु समवयसट्ठेसनो होति? इध, भिक्खवे, भिक्खुनो कामेसना पहीना होति, भवेसना पहीना होति, ब्रह्मचरियेसना पटिप्पस्सट्ठा । एवं खो, भिक्खवे, भिक्खु समवयसट्ठेसनो होति ।

“कथञ्च, भिक्खवे, भिक्खु अनाविलसङ्कप्पो होति? इध, भिक्खवे, भिक्खुनो कामसङ्कप्पो पहीनो होति, ब्यापादसङ्कप्पो पहीनो होति, विहिंसासङ्कप्पो पहीनो होति । एवं खो, भिक्खवे, भिक्खु अनाविलसङ्कप्पो होति ।

“कथञ्च, भिक्खवे, भिक्खु पस्सद्दकायसङ्गारो होति? इध, भिक्खवे, भिक्खु सुखस्स च पहाना दुक्खस्स च पहाना पुब्बेव सोमनस्सदोमनस्सानं अत्थङ्गमा अदुक्खमसुखं उपेक्खासतिपारिसुद्धिं चतुत्थं ज्ञानं उपसम्पज्ज विहरति । एवं खो, भिक्खवे, भिक्खु पस्सद्दकायसङ्गारो होति ।

“कथञ्च, भिक्खवे, भिक्खु सुविमुत्तचित्तो होति? इध, भिक्खवे, भिक्खुनो रागाचित्तं विमुत्तं होति, दोसा चित्तं विमुत्तं होति, मोहा चित्तं विमुत्तं होति । एवं खो, भिक्खवे, भिक्खु सुविमुत्तचित्तो होति ।

“कथञ्च, भिक्खवे, भिक्खु सुविमुत्तपज्जो होति? इध, भिक्खवे, भिक्खु ‘रागो मे पहीनो उच्छिन्नमूलो तालावत्थुकतो अनभावंकतो आयतिं अनुप्पादधम्मो’ति पजानाति, ‘दोसो मे पहीनो...पे०... मोहो मे पहीनो उच्छिन्नमूलो तालावत्थुकतो अनभावंकतो आयतिं अनुप्पादधम्मो’ति पजानाति । एवं खो, भिक्खवे, भिक्खु सुविमुत्तपज्जो होती’ति (दी० नि० ३.३४८; अ० नि० १०.२०) —

एवमागतेसु दससु अरियवासेसु वुत्थवासो ।

तत्थ वसन्ति एत्थाति वासा, अरियानं एव वासाति **अरियवासा** अनरियानं तादिसानं वासानं असम्भवतो। अरियाति चेत्थ उक्कट्टुनिद्वेसेन खीणासवा गहिता। **एकारक्खो**ति एका सतिसङ्घाता आरक्खा एतस्साति एकारक्खो। खीणासवस्स (दी० नि० अट्ट० ३.३४८; अ० नि० अट्ट० ३.१०.२०) हि तीसु द्वारेसु सब्बकाले सति आरक्खकिच्चं साधेति। तेनेवस्स चरतो च तिट्ठतो च सुत्तस्स च जागरस्स च सततं समितं जाणदस्सनं पच्चुपट्टितं होतीति वुच्चति।

**चतुरापस्सेनो**ति चत्तारि अपस्सेनानि अपस्सया एतस्साति चतुरापस्सेनो। **सङ्घाया**ति जाणेन (दी० नि० अट्ट० ३.३०८)। **पटिसेवती**ति जाणेन जत्वा सेवितब्बयुत्तकमेव सेवति। तस्स वित्थारो “पटिसङ्घा योनिसो चीवरं परिभुज्जती”तिआदिना (म० नि० १.२३; अ० नि० ६.५८) नयेन वेदितब्बो। **सङ्घायेकं अधिवासेती**ति जाणेन जत्वा अधिवासेतब्बयुत्तकमेव अधिवासेति। वित्थारो पनेत्थ “पटिसङ्घा योनिसो खमो होति सीतस्सा”तिआदिना (म० नि० १.२४) नयेन वेदितब्बो। **परिवज्जेती**ति जाणेन जत्वा परिवज्जेतब्बयुत्तकमेव परिवज्जेति। तस्स वित्थारो “पटिसङ्घा योनिसो चण्डं हत्थिं परिवज्जेती”तिआदिना नयेन वेदितब्बो। **विनोदेती**ति जाणेन जत्वा विनोदेतब्बमेव विनोदेति नुदति नीहरति अन्तो वसितुं न देति। तस्स वित्थारो “उप्पन्नं कामवितक्कं नाधिवासेती”तिआदिना नयेन वेदितब्बो।

**पनुण्णपच्चेकसच्चो**ति (अ० नि० अट्ट० २.४.३८; दी० नि० अट्ट० ३.३४८) “इदमेव दस्सनं सच्चं, इदमेव सच्च”न्ति एवं पाटियेक्कं गहितत्ता पच्चेकसङ्घातानि दिट्ठिसच्चानि पनुण्णानि नीहतानि पहीनानि अस्साति पनुण्णपच्चेकसच्चो। **पुथुसमणब्राह्मणानन्ति** बहूनं समणब्राह्मणानं। एत्थ च **समणा**ति पब्बज्जुपगता। **ब्राह्मणा**ति भोवादिनो। **पुथुपच्चेकसच्चानी**ति बहूनि पाटेक्कसच्चानि, “इदमेव दस्सनं सच्चं, इदमेव सच्च”न्ति पाटियेक्कं गहितानि बहूनि सच्चानीति अत्थो। **नुण्णानी**ति नीहतानि। **पनुण्णानी**ति सुट्ठु नीहतानि। **चत्तानी**ति विस्सट्ठानि। **वन्तानी**ति वमितानि। **मुत्तानी**ति छिन्नबन्धनानि कतानि। **पहीनानी**ति पजहितानि। **पटिनिस्सट्ठानी**ति यथा न पुन चित्तं आरोहन्ति, एवं पटिविस्सज्जितानि। सब्बानेव चेतानि अरियमग्गाधिगमतो पुब्बे गहितस्स दिट्ठिग्गाहस्स विस्सट्ठभाववेवचनानि।

**समवयसट्ठेसनो**ति (दी० नि० अट्ट० ३.३४८; अ० नि० अट्ट० ३.१०.२०) एत्थ **अवया**ति अनूना। **सट्ठा**ति निस्सट्ठा। सम्मा अवया सट्ठा एसना अस्साति **समवयसट्ठेसनो**, सम्मा विस्सट्ठसब्बएसनोति अत्थो। “**रागा चित्तं विमुत्तं**”तिआदीहि मग्गस्स किच्चनिष्फत्ति कथिता रागादीनं पहीनभावदीपनतो। “**रागो मे पहीनो**”तिआदीहि पच्चवेक्खणामुखेन अरियफलं कथितं। अधिगते हि अग्गफले सब्बसो रागादीनं अनुप्पादधम्मत्तं पजानाति, तच्च पजाननं पच्चवेक्खणजाणन्ति। तत्थ पच्चङ्गविप्पहानपच्चेकसच्चापनोदनएसनासमवयसज्जनानि “सङ्घायेकं पटिसेवति अधिवासेति परिवज्जेति विनोदेती”ति वुत्तेसु अपस्सेनेसु विनोदना च मग्गकिच्चानेव, इतरे च मग्गेनेव समिज्जन्ति।

**दसबलो**ति कायबलसङ्घातानि जाणबलसङ्घातानि च दस बलानि एतस्साति दसबलो। दुविधज्झि तथागतस्स बलं कायबलं जाणबलञ्च। तेसु कायबलं हत्थिकुलानुसारेण वेदितब्बं। वुत्तज्जेतं पोरणेहि —

“काळावकञ्च गङ्गेय्यं, पण्डरं तम्बपिङ्गलं।

गन्धमङ्गलहेमञ्च, उपोसथछद्दन्तिमे दसा”ति॥ (म० नि० अट्ट० १.१४८; सं० नि० अट्ट० २.२.२२; अ० नि० अट्ट० ३.१०.२१; विभ० अट्ट ७६; उदा० अट्ट० ७५; बु० वं० अट्ट० १.३९; पटि० म० अट्ट० २.२.४४; चूळनि० अट्ट० ८१)।

इमानि हि दस हत्थिकुलानि। तत्थ **काळावक**न्ति पकतिहत्थिकुलं दट्ठब्बं। यं दस्सनं पुरिसानं कायबलं, तं एकस्स

काळावकस्स हत्थिनो । यं दसन्नं काळावकानं बलं, तं एकस्स गङ्गेय्यस्स । यं दसन्नं गङ्गेय्यानं, तं एकस्स पण्डरस्स । यं दसन्नं पण्डरानं, तं एकस्स तम्बस्स । यं दसन्नं तम्बानं, तं एकस्स पिङ्गलस्स । यं दसन्नं पिङ्गलानं, तं एकस्स गन्धहत्थिनो । यं दसन्नं गन्धहत्थीनं, तं एकस्स मङ्गलस्स । यं दसन्नं मङ्गलानं, तं एकस्स हेमवतस्स । यं दसन्नं हेमवतानं, तं एकस्स उपोसथस्स । यं दसन्नं उपोसथानं, तं एकस्स छद्दन्तस्स । यं दसन्नं छद्दन्तानं, तं एकस्स तथागतस्स कायबलं । नारायनसङ्घातबलन्तिपि इदमेव वुच्चति । तत्थ नारा वुच्चन्ति रस्मियो, ता बहू नानाविधा ततो उप्पज्जन्तीति **नारायनं**, वजिरं, तस्मा वजिरसङ्घातबलन्ति अत्थो । तदेतं पकतिहत्थिगणनाय हत्थीनं कोटिसहस्सानं, पुरिसगणनाय दसन्नं पुरिसकोटिसहस्सानं बलं होति । इदं ताव तथागतस्स **कायबलं** ।

**जाणबलं** पन पाळियं आगतमेव । तत्रायं पाळि (म० नि० १.१४८; अ० नि० १०.२१) —

“दस खो पनिमानि, सारिपुत्त, तथागतस्स तथागतबलानि, येहि बलेहि समन्नागतो तथागतो आसभं ठानं पटिजानाति, परिसासु सीहनादं नदति, ब्रह्मचक्कं पवत्तेति । कतमानि दस? इध, सारिपुत्त, तथागतो ठानञ्च ठानतो अट्टानञ्च अट्टानतो यथाभूतं पजानाति, यम्पि, सारिपुत्त, तथागतो ठानञ्च ठानतो अट्टानञ्च अट्टानतो यथाभूतं पजानाति । इदम्पि, सारिपुत्त, तथागतस्स तथागतबलं होति, यं बलं आगम्म तथागतो आसभं ठानं पटिजानाति, परिसासु सीहनादं नदति, ब्रह्मचक्कं पवत्तेति । (१)

“पुन चपरं, सारिपुत्त, तथागतो अतीतानागतपच्चुप्पन्नानं कम्मसमादानानं ठानसो हेतुसो विपाकं यथाभूतं पजानाति...पे०... । (२)

“पुन चपरं, सारिपुत्त, तथागतो सब्बत्थगामिनिं पटिपदं यथाभूतं पजानाति...पे०... । (३)

“पुन चपरं, सारिपुत्त, तथागतो अनेकधातुं नानाधातुं लोकं यथाभूतं पजानाति...पे०... । (४)

“पुन चपरं, सारिपुत्त, तथागतो सत्तानं नानाधिमुत्तिकतं यथाभूतं पजानाति...पे०... । (५)

“पुन चपरं, सारिपुत्त, तथागतो परसत्तानं परपुग्गलानं इन्द्रियपरोपरियत्तं यथाभूतं पजानाति...पे०... । (६)

“पुन चपरं, सारिपुत्त, तथागतो ज्ञानविमोक्खसमाधिसमापत्तीनं संकिलेसं वोदानं वुट्ठानं यथाभूतं पजानाति...पे०... । (७)

“पुन चपरं, सारिपुत्त, तथागतो अनेकविहितं पुब्बेनिवासं अनुस्सरति । सेय्यथिदं? एकम्पि जातिं द्वेपि जातियो...पे०... इति साकारं सउद्देसं अनेकविहितं पुब्बेनिवासं अनुस्सरति...पे०... । (८)

“पुन चपरं, सारिपुत्त, तथागतो दिब्बेन चक्खुना विसुद्धेन अतिक्कन्तमानुसकेन सत्ते पस्सति चवमाने उपपज्जमाने हीने पणीते सुवण्णे दुब्बण्णे सुगते दुग्गते, यथाकम्मूपगे सत्ते पजानाति...पे०... । (९)

“पुन चपरं, सारिपुत्त, तथागतो आसवानं खया अनासवं चेतोविमुत्तिं पज्जाविमुत्तिं दिट्ठेव धम्मे सयं अभिज्जा सच्छिकत्वा उपसम्पज्ज विहरति...पे०... इदम्पि, सारिपुत्त, तथागतस्स तथागतबलं होति, यं बलं

आगम्म तथागतो आसभं ठानं पटिजानाति, परिसासु सीहनादं नदति, ब्रह्मचक्कं पवत्तेति । इमानि खो, सारिपुत्त, दस तथागतस्स तथागतबलानी”ति । (१०)

तत्थ (म० नि० अट्ठ० १.१४८; अ० नि० अट्ठ० ३.१०.२१; विभ० अट्ठ० ७६०) **ठानञ्च ठानतो**ति कारणञ्च कारणतो । “ये ये धम्मा येसं येसं धम्मानं हेतू पच्चया उप्पादाय, तं तं ठानं । ये ये धम्मा येसं येसं धम्मानं न हेतू न पच्चया उप्पादाय, तं तं अट्ठान”न्ति पजानन्तो ठानञ्च ठानतो अट्ठानञ्च अट्ठानतो यथाभूतं पजानाति । **यम्पी**ति येन जाणेन ।

**कम्मसमादानान्ति** समादियित्वा कतानं कुसलाकुसलकम्मानं, कम्ममेव वा कम्मसमादानं । **ठानसो हेतुसो**ति पच्चयतो चेव हेतुतो च । तत्थ गतिउपधिकालपयोगा विपाकस्स ठानं, कम्मं हेतु ।

**सब्बत्थगामिनिन्ति** सब्बगतिगामिनिञ्च अगतिगामिनिञ्च । **पटिपदन्ति** मगं । **यथाभूतं पजानातीति** बहूसुपि मनुस्सेसु एकमेव पाणं घातेन्तेसु कामं सब्बेसम्पि चेतना तस्सेवेकस्स जीवितिन्द्रियारम्मणा, तं पन कम्मं तेसं नानाकारं । तेसु हि एको आदरेन छन्दजातो करोति, एको “एहि त्वम्पि करोही”ति परेहि निष्पीळितो करोति, एको समानच्छन्दो विय हुत्वा अप्पटिबाहियमानो विचरति, तस्मा तेसु एको तेनेव कम्मेन निरये निब्बत्तति, एको तिरच्छानयोनियं, एको पेत्तिविसये । तं तथागतो आयूहनक्खणेयेव “इमिना नीहारेन आयूहितत्ता एस निरये निब्बत्तिस्सति, एस तिरच्छानयोनियं, एस पेत्तिविसये”ति जानाति । निरये निब्बत्तमानम्पि “एस महानिरये निब्बत्तिस्सति, एस उस्सदनिरये”ति जानाति । तिरच्छानयोनियं निब्बत्तमानम्पि “एस अपादको भविस्सति, एस द्विपादको, एस चतुप्पादो, एस बहुप्पादो”ति जानाति । पेत्तिविसये निब्बत्तमानम्पि “एस निज्झामतण्हिको भविस्सति, एस खुप्पिपासिको, एस परदत्तूपजीवी”ति जानाति । तेसु च कम्मेसु “इदं कम्मं पटिसन्धिं आकट्ठिस्सति, एतं अज्जेन दिन्नाय पटिसन्धिया उपधिवेपक्कं भविस्सती”ति जानाति ।

तथा सकलगामवासिकेसु एकतो पिण्डपातं ददमानेसु कामं सब्बेसम्पि चेतना पिण्डपातारम्मणाव, तं पन कम्मं तेसं नानाकारं । तेसु हि एको आदरेन करोतीति सब्बं पुरिमसदिसं । तस्मा तेसु च केचि देवलोके निब्बत्तन्ति, केचि मनुस्सलोके । तं तथागतो आयूहनक्खणेयेव जानाति । “इमिना नीहारेन आयूहितत्ता एस मनुस्सलोके निब्बत्तिस्सति, एस देवलोके, तत्थापि एस खत्तियकुले, एस ब्राह्मणकुले, एस वेस्सकुले, एस सुद्धकुले, एस परनिम्मितवसवत्तीसु, एस निम्मानरतीसु, एस तुसितेसु, एस यामेसु, एस तावतिंसेसु, एस चातुमहाराजिकेसु, एस भुम्मदेवेसू”ति आदिना तत्थ तत्थ हीनपणीतसुवण्णदुब्बण्णअप्पपरिवारमहापरिवारतादिभेदं तं तं विसेसं आयूहनक्खणेयेव जानाति ।

तथा विपस्सनं पट्टपेन्तेसुयेव “इमिना नीहारेन एस किञ्चि सल्लक्खेतुं न सक्खिस्सति, एस महाभूतमत्तमेव ववत्थपेस्सति, एस रूपपरिग्गहे एव ठस्सति, एस अरूपपरिग्गहेयेव, एस नामरूपपरिग्गहेयेव, एस पच्चयपरिग्गहेयेव, एस लक्खणारम्मणिकविपस्सनायमेव, एस पठमफलेयेव, एस दुतियफले एव, एस ततियफले एव, एस अरहत्तं पापुणिस्सती”ति जानाति । कसिणपरिकम्मं करोन्तेसुपि “इमस्स परिकम्ममत्तमेव भविस्सति, एस निमित्तं उप्पादेस्सति, एस अप्पनं एव पापुणिस्सति, एस ज्ञानं पादकं कत्वा विपस्सनं पट्टपेत्वा अरहत्तं गणिहस्सती”ति जानाति ।

**अनेकधातुन्ति** चक्खुधातुआदीहि, कामधातुआदीहि वा धातूहि बहुधातुं । **नानाधातुन्ति** तासंयेव धातूनं विलक्खणत्ता नानप्पकारधातुं । **लोकन्ति** खन्धायतनधातुलोकं । **यथाभूतं पजानातीति** तासं धातूनं अविपरीततो सभावं पटिविज्झति ।

**नानाधिमुत्तिकतन्ति** हीनादीहि अधिमुत्तीहि नानाधिमुत्तिकभावं । **परसत्तानन्ति** पधानसत्तानं । **परपुग्गलानन्ति** ततो



परेसं हीनसत्तानं । एकत्थमेव वा एतं पदद्वयं, वेनेय्यवसेन पन द्वेधा वुत्तं । **इन्द्रियपरोपरियत्तन्ति** सद्धादीनं इन्द्रियानं परभावञ्च अपरभावञ्च, वुद्धिञ्च हानिञ्चाति अत्थो ।

**ज्ञानविमोक्खसमाधिसमापत्तीनन्ति** पठमादीनं चतुन्नं ज्ञानानं, “रूपी रूपानि पस्सती”ति आदीनं अट्ठन्नं विमोक्खानं, सवितक्कसविचारादीनं तिण्णं समाधीनं, पठमज्झानसमापत्तिआदीनञ्च नवन्नं अनुपुब्बसमापत्तीनं । **संकिलेसन्ति** हानभागियधम्मं । **वोदानन्ति** विसेसभागियधम्मं । **वुट्ठानन्ति** “वोदानम्पि वुट्ठानं, तम्हा तम्हा समाधिम्हा वुट्ठानम्पि वुट्ठानं”न्ति (विभ० ८२८) एवं वुत्तं पगुणज्झानञ्चेव भवङ्गफलसमापत्तियो च । हेट्ठिमं हेट्ठिमज्झि पगुणज्झानं उपरिमस्स उपरिमस्स पदवुट्ठानं होति, तस्मा “वोदानम्पि वुट्ठानं”न्ति वुत्तं । भवङ्गेन सब्बज्ञानेहि वुट्ठानं होति, फलसमापत्तिया निरोधसमापत्तितो वुट्ठानं होति । तमेतं सन्धाय “तम्हा तम्हा समाधिम्हा वुट्ठानम्पि वुट्ठानं”न्ति वुत्तं । सब्बजाणानञ्च वित्थारकथाय विनिच्छयो **सम्मोहविनोदनियं विभङ्गदुक्कथायं** (विभ० अट्ठ० ७६०) वुत्तो । पुब्बेनिवासानुस्सतिदिब्बचक्खुआसवक्खयजाणकथा पन **वेरज्जकण्डे** (पारा० १२) वित्थारितायेव ।

**इमानि खो सारिपुत्ताति** यानि पुब्बे “दस खो पनिमानि, सारिपुत्त, तथागतस्स तथागतबलानी”ति अवोचं, इमानि तानीति अप्पनं करोति । तत्थ परवादिकथा होति “दसबलजाणं नाम पाटियेक्कं नत्थि, सब्बज्जुतज्जाणस्सेवायं पभेदो”ति, तं न तथा दट्ठब्बं । अज्जमेव हि दसबलजाणं, अज्जं सब्बज्जुतज्जाणं । दसबलजाणं सकसककिच्चमेव जानाति, सब्बज्जुतज्जाणं तम्पि ततो अवसेसम्पि पजानाति । दसबलजाणोसु हि पठमं कारणाकारणमेव जानाति, दूतियं कम्मन्तरविपाकन्तरमेव, ततियं कम्मपरिच्छेदमेव, चतुत्थं धातुनानत्तकारणमेव, पञ्चमं सत्तानं अज्झासयाधिमुत्तिमेव, छट्ठं इन्द्रियानं तिक्खमुदुभावमेव, सत्तमं ज्ञानादीहि सद्धिं तेसं संकिलेसादिमेव, अट्ठमं पुब्बेनिवुत्थक्खन्धसन्ततिमेव, नवमं सत्तानं चुत्तिपटिसन्धिमेव, दसमं सच्चपरिच्छेदमेव । सब्बज्जुतज्जाणं पन एतेहि जानितब्बञ्च ततो उत्तरिञ्च पजानाति, एतेसं पन किच्चं न सब्बं करोति । तज्झि ज्ञानं हुत्वा अप्पेतुं न सक्कोति, इद्धि हुत्वा विकुब्बितुं न सक्कोति, मग्गो हुत्वा किलेसे खेपेतुं न सक्कोति । इति यथावुत्तकायबलेन चेव जाणबलेन च समन्नागतत्ता भगवा “दसबलो”ति वुच्चति ।

**दसहि असेक्खेहि अट्ठेहि उपेतोति** “असेक्खा सम्मादिट्ठि, असेक्खो सम्मासङ्कप्पो, असेक्खा सम्मावाचा, असेक्खो सम्माकम्मन्तो, असेक्खो सम्माआजीवो, असेक्खो सम्मावायामो, असेक्खा सम्मासति, असेक्खो सम्मासमाधि, असेक्खं सम्माजाणं, असेक्खा सम्माविमुत्ती”ति (दी० नि० ३.३४८, ३६०) एवं वुत्तेहि दसहि असेक्खधम्मोहि समन्नागतो । असेक्खा सम्मादिट्ठिआदयो च सब्बे फलसम्पयुत्तधम्मा एव । एत्थ च **सम्मादिट्ठि सम्माजाणन्ति** द्वीसु ठानेसु पज्जाव कथिता “सम्मा दस्सनट्ठेन सम्मादिट्ठि, सम्मा पजाननट्ठेन सम्माजाणं”न्ति । अत्थि हि दस्सनजाननानं विसये पवत्तिआकारविसेसो । **सम्माविमुत्तीति** इमिना पन पदेन वुत्तावसेसा फलसमापत्तिसहगतधम्मा सङ्गहिताति वेदितब्बा । अरियफलसम्पयुत्तधम्मापि हि सब्बसो पटिपक्खतो विमुत्ततं उपादाय विमुत्तीति वत्तब्बतं लभन्ति ।

**५९. वचनसद्देन अप्पसद्दन्ति** आरामुपचारेन गच्छतो अद्धिकजनस्सपि वचनसद्देन अप्पसद्दं । **नगरनिग्घोससद्देनाति** अविभावितत्थेन नगरे मनुस्सानं निग्घोससद्देन । मनुस्सेहि समागम्म एकज्झं पवत्तितसद्दो हि निग्घोसो । **अनुसञ्चरणजनस्साति** अन्तोसञ्चारिनो जनस्स । **मनुस्सानं रहस्सकिरियट्ठानियन्ति** मनुस्सानं रहस्सकरणस्स युत्तं अनुच्छविकं । **विवेकानुरूपन्ति** एकीभावस्स अनुरूपं । सेसमेत्थ उत्तानमेव ।

बिम्बिसारसमागमकथावण्णना निट्ठिता ।

## सारिपुत्तमोग्गल्लानपब्बज्जाकथावण्णना

६०. इदानीं “तेन खो पन समयेन सञ्चयो परिब्बाजको”ति आदीसु अपुब्बपदवण्णनं दस्सेन्तो “सारिपुत्तमोग्गल्लाना”ति आदिमाह । तत्थ सारीब्राह्मणिया पुत्तो सारिपुत्तो, मोग्गल्लीब्राह्मणिया पुत्तो मोग्गल्लानो । अम्हाकं किर (अ० नि० अट्ठ० १.१.१८९-१९०; ध० प० अट्ठ० १.१० सारिपुत्तत्थेरवत्थु) भगवतो निब्बत्तितो पुरेतरमेव सारिपुत्तो राजगहनगरस्स अविदूरे उपतिस्सगामे सारीब्राह्मणिया नाम कुच्छियं पटिसन्धिं गण्हि । तं दिवसमेवस्स सहायोपि राजगहस्सेव अविदूरे कोलितगामे मोग्गल्लीब्राह्मणिया कुच्छियं पटिसन्धिं गण्हि । तानि किर द्वेपि कुलानि याव सत्तमा कुलपरिवट्टा आबद्धपटिबद्धसहायानेव । तेसं द्विन्नं एकदिवसमेव गम्भपरिहारं अदंसु । दसमासच्चयेन जातानम्पि तेसं छसट्ठि धातियो उपनयंसु । नामग्गहणदिवसे सारीब्राह्मणिया पुत्तस्स उपतिस्सगामे जेट्टकुलस्स पुत्तत्ता “उपतिस्सो”ति नामं अकंसु, इतरस्स कोलितगामे जेट्टकुलस्स पुत्तत्ता “कोलितो”ति नामं अकंसु । तेन वुत्तं “गिहिकाले उपतिस्सो कोलितोति एवं पब्बज्जायमाननामा”ति ।

अट्ठतेय्यसतमाणवकपरिवाराति एत्थ पञ्चपञ्चसतमाणवकपरिवारातिपि वदन्ति । वुत्तज्हेतं अङ्गुत्तरनिकायट्ठकथायं (अ० नि० अट्ठ० १.१.१८९-१९०) —

“उपतिस्समाणवकस्स कीळनत्थाय नदिं वा उय्यानं वा गमनकाले पञ्च सुवण्णसिविकासतानि परिवारानि होन्ति, कोलितमाणवकस्स पञ्च आजञ्जरथसतानि । द्वेपि जना पञ्चपञ्चमाणवकसतपरिवारा होन्ती”ति ।

राजगहे च अनुसंवच्छरं गिरग्गसमज्जं नाम होति । तेसं द्विन्नम्पि एकट्टानेयेव मञ्चकं बन्धन्ति । द्वेपि एकतोव निसीदित्वा समज्जं पस्सित्वा हसितब्बट्टाने हसन्ति, संवेगट्टाने संविज्जन्ति, दायं दातुं युत्तट्टाने दायं देन्ति । तेसं इमिनाव नियामेन एकदिवसं समज्जं पस्सन्तानं परिपाकगतत्ता जाणस्स पुरिमदिवसेसु विय हसितब्बट्टाने हासो वा संवेगट्टाने संविज्जनं वा दायं दातुं युत्तट्टाने दायदानं वा नाहोसि । द्वेपि पन जना एवं चिन्तयंसु “किं एत्थ ओलोकेतब्बं अत्थि, सब्बेपिमे अप्पत्ते वस्ससते अपण्णत्तिकभावं गमिस्सन्ति, अम्हेहि पन एकं मोक्खधम्मं गवेसितुं वट्ठती”ति आरम्भणं गहेत्वा निसीदंसु । ततो कोलितो उपतिस्सं आह “सम्म उपतिस्स, न त्वं अज्जदिवसेसु विय हट्ठपहट्ठो, अनत्तमनधातुकोसि, किं ते सल्लक्खित”न्ति । “सम्म कोलित, एतेसं ओलोकने सारो नत्थि, निरत्थकमेतं, अत्तनो मोक्खधम्मं गवेसितुं वट्ठती”ति इदं चिन्तयन्तो निसिन्नोम्हीति । त्वं पन कस्मा अनत्तमनोति । सोपि तथेव आह । अथस्स अत्तना सद्धिं एकज्झासयतं जत्वा उपतिस्सो एवमाह “अम्हाकं उभिन्नं सुचिन्तितं, मोक्खधम्मं पन गवेसन्तेहि एका पब्बज्जा लद्धुं वट्ठति, कस्स सन्तिके पब्बजामा”ति ।

तेन खो पन समयेन सञ्चयो परिब्बाजको राजगहे पटिवसति महितया परिब्बाजकपरिसाय सद्धिं । ते “तस्स सन्तिके पब्बजिस्सामा”ति पञ्चहि माणवकसतेहि सद्धिं सञ्चयस्स सन्तिके पब्बजिंसु । तेसं पब्बजितकालतो पट्टाय सञ्चयो अतिरेकलाभग्गयसगप्पत्तो अहोसि । ते कतिपाहेनेव सब्बं सञ्चयस्स समयं परिमदित्वा “आचरिय, तुम्हाकं जाननसमयो एत्तकोव, उदाहु उत्तरिपि अत्थी”ति पुच्छंसु । सञ्चयो “एत्तकोव, सब्बं तुम्हेहि जात”न्ति आह । तस्स कथं सुत्वा चिन्तयंसु “एवं सति इमस्स सन्तिके ब्रह्मचरियवासो निरत्थको, मयं मोक्खधम्मं गवेसितुं निक्खन्ता, सो इमस्स सन्तिके उप्पादेतुं न सक्का, महा खो पन जम्बुदीपो, गामनिगमराजधानियो चरन्ता अवस्सं मोक्खधम्मदेसकं आचरियं लभिस्सामा”ति । ते ततो पट्टाय “यत्थ यत्थ पण्डिता समणब्राह्मणा अत्थी”ति सुणन्ति, तत्थ तत्थ गन्त्वा पज्जसाकच्छं करोन्ति, तेहि पुट्ठं पज्जं अज्जो कथेतुं समत्थो नाम नत्थि, ते पन तेसं पज्जं विस्सज्जेन्ति । एवं सकलजम्बुदीपं परिगण्हित्वा

निवत्तित्वा सकट्टानमेव आगन्त्वा “सम्म कोलित, यो पठमं अमतं अधिगच्छति, सो आरोचेतू”ति कतिकं अकंसु। इममेव वत्थुं सङ्घिपित्वा दस्सेन्तो “तत्र नेसं महाजनं दिस्वा...पे०... कतिकं अकंसू”ति आह।

तत्थ छन्नपरिब्बाजकस्साति सेतपटधरस्स परिब्बाजकस्स। तेन नायं नग्गपरिब्बाजकोति दस्सेति। पासादिकेन अभिक्कन्तेनातिआदीसु पासादिकेनाति पसादावहेन सारुप्पेन समणानुच्छविकेन। अभिक्कन्तेनाति गमनेन। पटिक्कन्तेनाति निवत्तनेन। आलोकितेनाति पुरतो दस्सनेन। विलोकितेनाति इतो चितो दस्सनेन। समिज्जितेनाति पब्बसङ्कोचनेन। पसारितेनाति तेसंयेव पसारणेन। सब्बत्थ इत्थम्भूतलक्खणे करणवचनं, तस्मा सतिसम्पजज्जकेहि वभिसङ्गत्तत्ता पासादिकअभिक्कन्तपटिक्कन्तआलोकितविलोकितसमिज्जितपसारितो हुत्वाति वुत्तं होति। ओक्खित्तचक्खूति हेट्ठाखित्तचक्खु। इरियापथसम्पन्नोति ताथ पासादिकअभिक्कन्तादिताथ सम्पन्नइरियापथो। अत्थिकेहि उपज्जातन्ति “मरणे सति अमतेनपि भवितब्ब”न्ति एवं अनुमानजाणेन “अत्थी”ति उपगतं निब्बानं नाम, तं मग्गन्तो परियेसन्तो यन्नूनाहं इमं भिक्खुं पिट्ठितो पिट्ठितो अनुबन्धेय्यन्ति सम्बन्धो। सुदिन्नकण्डे वुत्तप्पकारन्ति “दानपतीनं घरेसु साला होन्ति, आसनानि चेत्थ पज्जत्तानि होन्ति, उपट्ठापितं उदककज्जियं, तत्थ पब्बजिता पिण्डाय चरित्वा निसीदित्वा भुज्जन्ति। सचे इच्छन्ति, दानपतीनम्पि सन्तकं गणहन्ति, तस्मा तम्पि अज्जतरस्स कुलस्स ईदिसाय सालाय अज्जतरं कुट्टमूलन्ति वेदितब्ब”न्ति एवं वुत्तप्पकारं।

अप्पं वा बहुं वा भासस्सूति परिब्बाजको “अहं उपतिस्सो नाम, त्वं यथासत्तिया अप्पं वा बहुं वा पावद, एतं नयसतेन नयसहस्सेन पटिविज्झितुं मय्हं भारो”ति चिन्तेत्वा एवमाह। निरोधो च निरोधुपायो च एकदेससरूपेकसेसनयेन “निरोधो”ति वुत्तोति दस्सेन्तो “अथ वा”तिआदिमाह। पटिपादेन्तोति निगमेन्तो। इमं धम्मपरियायं सुत्वा विरजं वीतमलं धम्मचक्खुं उदपादीति एत्थ परिब्बाजको पठमपदद्वयमेव सुत्वा सहस्सनयसम्पन्ने सोतापत्तिफले पतिट्ठहि। इतरपदद्वयं सोतापन्नकाले निट्ठासीति वेदितब्बं।

बहुकेहि कप्पनहुतेहीति एत्थ दस दसकानि सतं, दस सतानि सहस्सं, सहस्सानं सतं सतसहस्सं, सतसहस्सानं सतं कोटि, कोटिसतसहस्सानं सतं पकोटि, पकोटिसतसहस्सानं सतं कोटिपकोटि, कोटिपकोटिसतसहस्सानं सतं एकनहुतन्ति वेदितब्बं।

६१. अथ खो सारिपुत्तो परिब्बाजको येन मोग्गल्लानो परिब्बाजको तेनुपसङ्कमीति (अ० नि० अट्ठ० १.१.१८९-१९०; ध० प० अट्ठ० १.१० सारिपुत्तत्थेरवत्थु) सोतापन्नो हुत्वा उपरिविसेसे अप्पवत्तन्ते “भविस्सति एत्थ कारण”न्ति सल्लक्खेत्वा थेरं आह “भन्ते, मा उपरि धम्मदेसनं वड्ढियित्थ, एत्तकमेव होतु, कहं अम्हाकं सत्था वसती”ति। वेळुवने परिब्बाजकाति। “भन्ते, तुम्हे पुरतो याथ, मय्हं एको सहायको अत्थि, अम्हेहि च अज्जमज्जं कतिका कता ‘यो पठमं अमतं अधिगच्छति, सो आरोचेतू’ति, अहं तं पटिज्जं मोचेत्वा सहायकं गहेत्वा तुम्हाकं गतमग्गेनेव सत्थु सन्तिकं आगमिस्सामी”ति पज्चपतिट्ठितेन थेरस्स पादेसु निपतित्वा तिक्खत्तुं पदक्खिणं कत्वा थेरं उय्योजेत्वा परिब्बाजकारामाभिमुखो अगमासि।

६२. सारिपुत्तं परिब्बाजकं एतदवोचाति “अज्ज मय्हं सहायस्स मुखवण्णो न अज्जदिवसेसु विय, अट्ठा अनेन अमतं अधिगतं भविस्सती”ति अमताधिगमं पुच्छन्तो एतदवोच। सोपिस्स “आमावुसो, अमतं अधिगत”न्ति पटिजानित्वा सब्बं पवत्तिं आरोचेत्वा तमेव गाथं अभासि। गाथापरियोसाने मोग्गल्लानो परिब्बाजको सोतापत्तिफले पतिट्ठहि। तेन वुत्तं “अथ खो मोग्गल्लानस्स परिब्बाजकस्स...पे०... धम्मचक्खुं उदपादी”ति। गच्छाम मयं, आवुसो, भगवतो

**सन्तिकेति** “कहं सम्म सत्था वसती”ति पुच्छित्वा “वेळुवने किर सम्म, एवं नो आचरियेन अस्सजित्थेरेन कथित”न्ति वुत्ते एवमाह ।

सारिपुत्तत्थेरो च नामेस सदापि आचरियपूजकोव, तस्मा सहायं मोग्गल्लानं परिब्बाजकं एवमाह “अम्हेहि अधिगतं अमतं अम्हाकं आचरियस्स सञ्चयपरिब्बाजकस्सपि कथेस्साम, बुद्धमानो पटिविज्झिस्सति, अप्पटिविज्झन्तो अम्हाकं सद्वहित्वा सत्थु सन्तिकं गमिस्सति, बुद्धानं देसनं सुत्वा मग्गफलप्पटिवेधं करिस्सती”ति । ततो द्वेपि जना सञ्चयस्स सन्तिकं अगमंसु । तेन वुत्तं “**अथ खो सारिपुत्तमोग्गल्लाना येन सञ्चयो परिब्बाजको तेनुपसङ्कमिंसू**”ति । उपसङ्कमित्वा च “आचरिय, त्वं किं करोसि, लोके बुद्धो उप्पन्नो, स्वाक्खातो धम्मो, सुप्पटिपन्नो सङ्गो, आयाम दसबलं पस्सिस्सामा”ति । सो “किं वदथ ताता”ति तेषि वारेत्वा लाभग्गयसग्गप्पवत्तिमेव नेसं दीपेति । ते “अम्हाकं एवरूपो अन्तेवासिकवासो निच्चमेव होतु, तुम्हाकं पन गमनं वा अगमनं वा जानाथा”ति आहंसु । सञ्चयो “इमे एतकं जानन्ता मम वचनं न करिस्सन्ती”ति जत्वा “गच्छथ तुम्हे ताता, अहं महल्लककाले अन्तेवासिकवासं वसितुं न सक्कोमी”ति आह । ते अनेकेहिपि कारणसतेहि तं बोधेतुं असक्कोन्ता अत्तनो ओवादे वत्तमानं जनं आदाय वेळुवनं अगमंसु । पञ्चसु अन्तेवासिकसतेसु अङ्गुतेय्यसता निवत्तिसु, अङ्गुतेय्यसता तेहि सद्धिं अगमंसु । तेन वुत्तं “**अथ खो सारिपुत्तमोग्गल्लाना तानि अङ्गुतेय्यानि परिब्बाजकसतानि आदाय येन वेळुवनं तेनुपसङ्कमिंसू**”ति ।

**विमुत्तेति** यथावुत्तलक्खणे निब्बाने तदारम्मणाय फलविमुत्तिया अधिमुत्ते ने सारिपुत्तमोग्गल्लाने ब्याकासीति सम्बन्धो ।

एवं ब्याकरित्वा च सत्था चतुपरिसमज्जे धम्मं देसेन्तो नेसं परिसाय चरियवसेन धम्मदेसनं वट्ठेसि, ठपेत्वा द्वे अग्गसावके सब्बेपि अङ्गुतेय्यसता परिब्बाजका अरहत्तं पापुणिसु । सत्था “एथ भिक्खवो”ति हत्थं पसारेसि, सब्बेसं केसमस्सु अन्तरधायि, इद्धिमयपत्तचीवरं कायपटिबद्धं अहोसि । अग्गसावकानम्पि इद्धिमयपत्तचीवरं आगतं, उपरिमग्गत्यकिच्चं पन न निट्ठाति । कस्मा? सावकपारमीजाणस्स महन्तताय । अथायस्मा महामोग्गल्लानो पब्बजितदिवसतो सत्तमे दिवसे मगधरट्ठे कल्लवाळगामकं उपनिस्साय समणधम्मं करोन्तो थिनमिद्धं ओक्कमन्तो सत्थारा संवेजितो थिनमिद्धं विनोदेत्वा तथागतेन दिन्नं धातुकम्मट्ठानं सुणन्तोव उपरिमग्गत्यकिच्चं निट्ठापेत्वा सावकपारमीजाणस्स मत्थकं पत्तो । सारिपुत्तत्थेरोपि पब्बजितदिवसतो अद्धमासं अतिक्कमित्वा सत्थारा सद्धिं तमेव राजगहं उपनिस्साय सूकरखतलेणे विहरन्तो अत्तनो भागिनेय्यस्स दीघनखपरिब्बाजकस्स वेदनापरिग्गहसुत्तन्ते देसियमाने सुत्तानुसारेण जाणं पेसेत्वा परस्स वट्ठितभत्तं भुज्जन्तो विय सावकपारमीजाणस्स मत्थकं पत्तो । तेनेवाह “**महामोग्गल्लानत्थेरो सत्तहि दिवसेहि अरहत्ते पत्तिट्ठितो, सारिपुत्तत्थेरो अद्धमासेना**”ति ।

यदिपि महामोग्गल्लानत्थेरो न चिरस्सेव अरहत्तं पत्तो, धम्मसेनापति ततो चिरेण, एवं सन्तेपि सारिपुत्तत्थेरोव महापज्जतरो । महामोग्गल्लानत्थेरो हि सावकानं सम्मसनचारं यट्ठिकोटिया उप्पीळेन्तो विय एकदेसमेव सम्मसन्तो सत्त दिवसे वायमित्वा अरहत्तं पत्तो । सारिपुत्तत्थेरो ठपेत्वा बुद्धानं पच्चेकबुद्धानञ्च सम्मसनचारं सावकानं सम्मसनचारं निष्पदेसं सम्मसि, एवं सम्मसन्तो अद्धमासं वायमि । उक्कंसगतस्स सावकानं सम्मसनचारस्स निष्पदेसेन पवत्तियमानत्ता सावकपारमीजाणस्स च तथा परिपाचेतब्बत्ता । यथा हि पुरिसो “वेणुयट्ठिं गण्हिस्सामी”ति महाजटं वेणुं दिस्वा “जटं छिन्दन्तस्स पपञ्चो भविस्सती”ति अन्तरेण हत्थं पवेसेत्वा सम्पत्तमेव यट्ठिं मूले च अग्गे च छिन्दित्वा आदाय पक्कमेय्य, सो किञ्चापि पठमतरं गच्छति, यट्ठिं पन सारं वा उज्जुं वा न लभति । अपरो तथारूपमेव वेणुं दिस्वा सचे सम्पत्तयट्ठिं

गण्हिस्सामि, सारं वा उजुं वा न लभिस्सामीति कच्छं बन्धित्वा महन्तेन सत्थेन वेणुजटं छिन्दित्वा सारा चेव उजू च यट्ठियो उच्चिनित्वा आदाय पक्कमेय्य, अयं किञ्चापि पच्छा गच्छति, यट्ठियो पन सारा चेव उजू च लभति, एवंसम्पदमिदं इमेसं द्विन्नं थेरानं पधानं ।

**सम्मसनचारो** च नामेत्य विपस्सनाभूमि वेदितब्बा सम्मसनं चरति एत्थाति सम्मसनचारोति कत्वा । तत्थ बुद्धानं सम्मसनचारो दससहस्सलोकधातुयं सत्तसन्तानगता अनिन्द्रियबद्धा च सङ्खाराति वदन्ति । कोटिसतसहस्सचक्कवाळेसूति अपरे । तथा हि अत्तनियवसेन पटिच्चसमुप्पादनयं ओतरित्वा छत्तिसकोटिसतसहस्समुखेन बुद्धानं महावजिरजाणं पवत्तं । पच्चेकबुद्धानं ससन्तानगतेहि सद्धिं मज्झिमदेसवासीसत्तसन्तानगता अनिन्द्रियबद्धा च सङ्खारा सम्मसनचारोति वदन्ति । जम्बुदीपवासीसन्तानगताति केचि । ससन्तानगते सब्बधम्मे परसन्तानगते च सन्तानविभागं अकत्वा बहिद्वाभावसामञ्जतो सम्मसनं, अयं सावकानं सम्मसनचारो । मोग्गल्लानत्थेरो पन बहिद्वा धम्मेपि ससन्तानविभागेन केचि केचि उद्धरित्वा सम्मसि, तज्ज खो जाणेन फुट्टमत्तं कत्वा । तेन वुत्तं “यट्ठिकोटिया उप्पीलेन्तो विय एकदेसमेव सम्मसन्तो”ति । तत्थ जाणेन नाम यावता नेय्यं वत्तितब्बं, तावता अवत्तनतो “यट्ठिकोटिया उप्पीलेन्तो विया”ति वुत्तं, अनुपदधम्मविपस्सनाय अभावतो “एकदेसमेव सम्मसन्तो”ति वुत्तं । धम्मसेनापतिनोपि यथावुत्तसावकानं विपस्सनाय भूमियेव सम्मसनचारो । तत्थ पन थेरो सातिसयं निरवसेसं अनुपदज्ज सम्मा विपस्सि । तेन वुत्तं “सावकानं सम्मसनचारं निप्पदेसं सम्मसी”ति ।

एत्थ च सुखविपस्सका लोकियाभिज्जप्पत्ता पकतिसावका महासावका अग्गसावका पच्चेकबुद्धा सम्मासम्बुद्धाति छसु जनेसु सुखविपस्सकानं झानाभिज्जाहि अनधिगतपज्जानेपुज्जत्ता अन्धानं विय इच्छितपदेसोक्कमनं विपस्सनाकाले इच्छितिच्छितधम्मभावना नत्थि, ते यथापरिगहितधम्ममत्तेयेव विपस्सनं वट्ठेन्ति । लोकियाभिज्जप्पत्ता पन पकतिसावका येन मुखेन विपस्सनं आरभन्ति, ततो अज्जेनपि विपस्सनं वित्थारिकं कातुं सक्कोन्ति विपुलजाणत्ता । महासावका अभिनीहारसम्पन्नत्ता ततो सातिसयं विपस्सनं वित्थारिकं कातुं सक्कोन्ति । अग्गसावकेसु दुतियो अभिनीहारसम्पत्तिया समाधानस्स सातिसयत्ता विपस्सनं ततोपि वित्थारिकं करोति । पठमो पन ततोपि महापज्जताय सावकेहि असाधारणं कत्वा विपस्सनं वित्थारिकं करोति । पच्चेकबुद्धा तेहिपि महाभिनीहाराय अत्तनो अभिनीहारानुरूपं ततोपि वित्थारिकं विपस्सनं करोन्ति । बुद्धानं सम्मदेव परिपूरितपज्जापारमीपभाविता सब्बज्जुतज्जाणाधिगमस्स अनुरूपा यथा नाम कतवालवेधपरिचयेन सरभङ्गसदिसेन धनुग्गहेन खित्तो सरो अन्तरा रुक्खलतादीसु असज्जमानो लक्खेयेव पतति, न सज्जति न विरज्जति, एवं अन्तरा असज्जमाना अविरज्जमाना विपस्सना सम्मसनीयधम्मेसु याथावतो नानानयेहि पवत्तति, यं “महावजिरजाण”न्ति वुच्चति ।

एतेसु च सुखविपस्सकानं विपस्सनाचारो खज्जोत्तप्पभासदिसो, अभिज्जप्पत्तपकतिसावकानं दीपप्पभासदिसो, महासावकानं उक्काप्पभासदिसो, अग्गसावकानं ओसधितारकप्पभासदिसो, पच्चेकबुद्धानं चन्दप्पभासदिसो, सम्मासम्बुद्धानं रस्मिसहस्सपटिमण्डितसरदसूरियमण्डलसदिसो हुत्वा उपट्ठाति । तथा सुखविपस्सकानं विपस्सनाचारो अन्धानं यट्ठिकोटिया गमनसदिसो, लोकियाभिज्जप्पत्तपकतिसावकानं दण्डकसेतुगमनसदिसो, महासावकानं जङ्घसेतुगमनसदिसो, अग्गसावकानं सकटसेतुगमनसदिसो, पच्चेकबुद्धानं महाजङ्घमगगमनसदिसो, सम्मासम्बुद्धानं महासकटमगगमनसदिसो । तथा बुद्धानं पच्चेकबुद्धानज्ज विपस्सना चिन्तामयजाणसंवट्ठितत्ता सयम्भूजाणभूता, इतरेसं सुतमयजाणसंवट्ठितत्ता परोपदेससम्भूताति वेदितब्बा ।

इदानीं उभिनन्मि थेरानं पुब्बयोगं दस्सेतुं “अतीते किरा”तिआदिमाह । तं सब्बं उत्तानत्थमेव ।

६३. गिरिब्बजनगरन्ति समन्ता पब्बतपरिक्खित्तं वजसदिसं हुत्वा तिट्ठतीति गिरिब्बजन्ति एवंलब्धनामं राजगहनगरं ।  
उसूयनकिरियाय कम्मभावं सन्धाय “उपयोगत्थे वा”ति वुत्तं ।

सारिपुत्तमोगल्लानपब्बज्जाकथावण्णना निट्ठिता ।

### उपज्झायवत्तकथावण्णना

६४. वज्जावज्जं उपनिज्झायतीति उपज्झायो, नत्थि उपज्झायो एतेसन्ति अनुपज्झायका । तेनाह “वज्जावज्जं  
उपनिज्झायकेन गरुना विरहिता”ति । तत्थ वज्जावज्जन्ति खुद्दकं महन्तज्ज वज्जं । वुद्धिअत्थो हि अयमकारो  
“फलाफल”न्तिआदीसु विय । उत्तिट्ठपत्तन्ति एत्थ उच्छिट्ठ-सद्वसमानत्थो उत्तिट्ठ-सद्वो । तेनेवाह “तस्मिज्झि मनुस्सा  
उच्छिट्ठसज्जिनो, तस्मा उत्तिट्ठपत्तन्ति वुत्त”न्ति । पिण्डाय चरणकपत्तन्ति इमिना पन पत्तस्स सरूपदस्सनमुखेन  
उच्छिट्ठकप्पनाय कारणं विभावितं । तस्मिन्ति तस्मिं पिण्डाय चरणकपत्ते ।

६५. सगारवा सप्पतिस्साति एत्थ गरुभावो गारवं, पासाणच्छत्तं विय गरुकरणीयता । सह गारवेनाति सगारवा ।  
गरुना किस्मिज्जि वुत्ते गारववसेन पतिस्सवनं पतिस्सो, पतिस्सवभूतं तंसभागज्ज यंकिज्जि गारवन्ति अत्थो । सह  
पतिस्सेनाति सप्पतिस्सा, ओवादं सम्पटिच्छन्ताति अत्थो । पतिस्सीयतीति वा पतिस्सो, गरुकातब्बो । तेन सह पतिस्सेनाति  
सप्पतिस्सा । अट्ठकथायं पन ब्यज्जनविचारं अकत्वा अत्थमत्तमेव दस्सेतुं “गरुकभावज्जेव जेट्ठकभावज्ज  
उपट्ठपेत्वा”ति वुत्तं । साहूति साधु । लहूति अगरु, मम तुहं उपज्झायभावे भारियं नाम नत्थीति अत्थो । ओपायिकन्ति  
उपायपटिसंयुत्तं ते उपज्झायग्गहणं इमिना उपायेन त्वं मे इतो पट्टाय भारो जातोसीति वुत्तं होति । पतिरूपन्ति अनुरूपं तव  
उपज्झायग्गहणन्ति अत्थो । पासादिकेनाति पसादावहेन कायवचीपयोगेन । सम्पादेहीति तिविधसिक्खं निष्फादेहीति  
अत्थो । कायेन वाति हत्थमुद्वादिं दस्सेन्तो कायेन वा विज्जापेति । गहितो तया...पे०... विज्जापेतीति “साहू”तिआदीसु  
एकं वदन्तोयेव इममत्थं विज्जापेतीति वुच्चति । तेनेवाह “इदमेव ही”तिआदि । साधूति सम्पटिच्छनं सन्धायति  
उपज्झायेन “साहू”ति वुत्ते सद्धिविहारिकस्स “साधू”ति सम्पटिच्छनवचनं सन्धाय । कस्मा नप्पमाणन्ति आह  
“आयाचनदानमत्तेन ही”तिआदि, सद्धिविहारिकस्स “उपज्झायो मे, भन्ते, होही”ति आयाचनमत्तेन, उपज्झायस्स च  
“साहू”तिआदिना दानवचनमत्तेनाति अत्थो । न एत्थ सम्पटिच्छनं अङ्गन्ति सद्धिविहारिकस्स सम्पटिच्छनवचनं एत्थ  
उपज्झायग्गहणे अङ्गं न होति ।

६६. सम्पावत्तनाति सम्पापवत्ति । अस्साति सद्धिविहारिकस्स । तादिसमेव मुखधोवनोदकं दातब्बन्ति उतुम्हि  
सरीरसभावे च एकाकारे तादिसमेव दातब्बं । द्वे चीवरानीति पारुपनं सङ्घाटिज्ज सन्धाय वदति । यदि एवं “सङ्घाटियो”ति  
कस्मा वुत्तन्ति आह “सब्बज्झि चीवरं सङ्घटितत्ता सङ्घाटीति वुच्चती”ति । पदवीतिहारेहीति एत्थ पदं वीतिहरति  
एत्थाति पदवीतिहारो, पदवीतिहरणट्ठानं दूतविलम्बितं अकत्वा समगमने द्विन्नं पदानं अन्तरे मुट्ठिरतनमत्तं । पदानं वा  
वीतिहरणं अभिमुखं हरित्वा निक्खेपो पदवीतिहारोति एवमेत्थ अत्थो दट्ठब्बो । इतो पट्टायाति “न उपज्झायस्स  
भणमानस्सा”ति एत्थ वुत्त न-कारतो पट्टाय । सब्बत्थ दुक्कटापत्ति वेदितब्बाति “ईदिसेसु गिलानोपि न मुच्चती”ति  
दस्सनत्थं वुत्तं । अज्जम्पि हि यथावुत्तं उपज्झायवत्तं अनादरियेन अकरोन्तस्स अगिलानस्स वत्तभेदे सब्बत्थ दुक्कटमेव ।  
तेनेव वक्खति “अगिलानेन हि सद्धिविहारिकेन सद्धिवस्सेनपि सब्बं उपज्झायवत्तं कातब्बं, अनादरेन अकरोन्तस्स वत्तभेदे

दुक्कटं । न-कारपटिसंयुत्तेसु पन पदेसु गिलानस्सपि पटिक्खित्तकिरियं करोन्तस्स दुक्कटमेवा”ति (महाव० अट्ठ० ६४) । **आपत्तिया आसन्नवाचन्ति** आपत्तिजनकमेव वचनं सन्धाय वदति । याय हि वाचाय आपत्तिं आपज्जति, सा वाचा तस्सा आपत्तिया आसन्नाति वुच्चति ।

**चीवरेन पत्तं वेठेत्वा**ति एत्थ “उत्तरासङ्गस्स एकेन कण्णेन वेठेत्वा”ति **गण्ठपदेसु** वुत्तं । **गामे**ति गामपरियापन्ने तादिसे किस्मिञ्चि पदेसे । **अन्तरघरे**ति अन्तोगेहे । **पटिक्कमने**ति आसनसालायं । तिक्खत्तुं पानीयेन पुच्छितब्बोति सम्बन्धो, आदिमिह मज्जे अन्तेति एवं तिक्खत्तुं पुच्छितब्बोति अत्थो । **उपकट्टो**ति आसन्नो । **धोतवालि**कायाति निरजाय परिसुद्धवालि काय । **सचे पहाती**ति वुत्तमेवत्थं विभावेति “न केनचि गेलज्जेन अभिभूतो होती”ति । **परिवेणं गन्त्वा**ति उपज्झायस्स परिवेणं गन्त्वा ।

उपज्झायवत्तकथावण्णना निट्ठिता ।

६७. सद्धिविहारिकवत्तकथा उत्तानत्थायेव ।

### नसम्मावत्तनादिकथावण्णना

६८. नसम्मावत्तनादिकथायं **गेहस्सितपेमन्ति** “पिता मे अयं”न्ति एवं उप्पन्नपेमं । उपज्झायमि पितुचित्तुपट्टानमेव हि इध गेहस्सितपेमं नाम । न हि इदं अकुसलपक्खियं गेहस्सितपेमं सन्धाय वुत्तं पटिविद्धसच्चानं पहीनानुगेधानं तदसम्भवतो, न च भगवा भिक्खू संकिलेसे नियोजेति, गेहस्सितपेमसदिसत्ता पन पेममुखेन मेत्तासिनेहो इध वुत्तोति वेदितब्बं । “तेसु एको वत्तसम्पन्नो भिक्खु...पे... तेसं अनापत्ती”ति वचनतो सचे एको वत्तसम्पन्नो भिक्खु “भन्ते, तुम्हे अप्पोस्सुक्का होथ, अहं तुम्हाकं सद्धिविहारिकं अन्तेवासिकं वा गिलानं उपट्ठहिस्सामि, ओवदितब्बं ओवदिस्सामि, इति करणीयेसु उस्सुक्कं आपज्जिस्सामी”ति वदति, ते एव वा सद्धिविहारिकादयो “भन्ते, तुम्हे केवलं अप्पोस्सुक्का होथा”ति वदन्ति, वत्तं वा न सादियन्ति, ततो पट्टाय आचरियुपज्झायानं अनापत्तीति वदन्ति । सेसमेत्थ उत्तानमेव ।

नसम्मावत्तनादिकथावण्णना निट्ठिता ।

### राधब्राह्मणवत्थुकथावण्णना

६९. राधब्राह्मणवत्थुमिह **किसो अहोसी**ति खादितुं वा भुज्जितुं वा असक्कोन्तो तनुको अहोसि अप्पमंसलोहितो । **उप्पण्डुप्पण्डुकजातो**ति सज्जातुप्पण्डुप्पण्डुकभावो पण्डुपलासप्पटिभागो । **धमनिसन्थतगतो**ति परियादिन्नमंसलोहितत्ता सिराजालेनेव सन्थरितगतो । **अधिकारन्ति** अधिकिरियं, सक्कारन्ति वुत्तं होति । कतं जानन्तीति **कतञ्जुनो**, कतं पाकटं कत्वा जानन्तीति **कतवेदिनो** । किं पन थेरो भगवता बाराणसियं तीहि सरणगमनेहि अनुज्जातं पब्बज्जं उपसम्पदज्ज न जानातीति? नो न जानाति । यदि एवं “कथाहं, भन्ते, तं ब्राह्मणं पब्बाजेमि उपसम्पादेमी”ति कस्मा आहाति इमं अनुयोगं सन्धायाह “**किञ्चापि आयस्मा सारिपुत्तो**”ति आदि । **परिमण्डलेही**ति परिपुण्णेहि । **अज्जथा वा वत्तब्बं अज्जथा वदतीति** “भन्ते”ति वत्तब्बं “बन्धे”ति वदति ।

७१-७३. **समनन्तरा**ति अनन्तरं । **पण्णत्तिवीतिक्कमं करोतीति** सिक्खापदवीतिक्कमं करोति ।

अत्तभावपरिहरणत्थं निस्सीयन्तीति **निस्सया**, पिण्डियालोपभोजनादिका चत्तारो पच्चया । तत्थ **पिण्डियालोपभोजनन्ति**

जङ्घपिण्डियबलेन चरित्वा आलोपमत्तं लङ्घभोजनं । अतिरेकलाभोति “पिण्डियालोपभोजनं निस्साया”ति एवं वुत्तभिक्षाहारलाभतो अधिकलाभो सङ्घभत्तादि । तत्थ सकलस्स सङ्घस्स दातब्बभत्तं सङ्घभत्तं । कतिपये भिक्खू उद्दिसित्वा दातब्बभत्तं उद्देसभत्तं । निमन्तेत्वा दातब्बभत्तं निमन्तनं । सलाकं गाहापेत्वा दातब्बभत्तं सलाकभत्तं । एकस्मिं पक्खे एकदिवसं दातब्बभत्तं पक्खिकं । उपोसथे दातब्बभत्तं उपोसथिकं । पाटिपददिवसे दातब्बभत्तं पाटिपदिकं । वित्थारकथा नेसं सेनासनक्खन्धकवण्णनायं आवि भविस्सति ।

**विहारोति पाकारपरिच्छिन्नो सकलो आवासो । अङ्कयोगोति**

दीघपासादो । गरुळसण्ठानपासादोतिपि वदन्ति । पासादोति चतुरस्सपासादो । हम्मियन्ति मुण्डच्छदनपासादो । अपरे पन भणन्ति “विहारो नाम दीघमुखपासादो, अङ्कयोगो एकपस्सच्छदनकसेनासनं, तस्स किर एकपस्से भित्ति उच्चतरा होति, इतरपस्से नीचा, तेन तं एकपस्सच्छदनकं होति, पासादो आयतचतुरस्सपासादो, हम्मियं मुण्डच्छदनं चन्दिकङ्कणयुत्तं”न्ति । गुहाति पब्बतगुहा । पूतिमुत्तन्ति यं किञ्चि मुत्तं । यथा सुवण्णवण्णोपि कायो “पूतिकायो”ति वुच्चति, एवं अभिनवम्मि मुत्तं पूतिमुत्तमेव । सेसमेत्थ उत्तानत्थमेव ।

राधब्राह्मणवत्थुकथावण्णना निट्ठिता ।

**आचरियवत्तकथावण्णना**

७५. उपसेनवत्थुम्हि आचिण्णन्ति चरितं वत्तं अनुधम्मता । कच्चि भिक्खु खमनीयन्ति भिक्खु कच्चि तुक्कं इदं चतुचक्कं नवद्वारं सरीरयन्तं खमनीयं सक्का खमितुं सहितुं परिहरितुं, न किञ्चि दुक्खं उप्पादेतीति । कच्चि यापनीयन्ति कच्चि सब्बकिच्चेसु यापेतुं सक्का, न किञ्चि अन्तरायं दस्सेतीति । जानन्तापि तथागताति एवमादि यं परतो “कति वस्सोसि त्वं भिक्खू”ति आदिना पुच्छि, तस्स परिहारदस्सनत्थं वुत्तं । तत्रायं सङ्केपत्थो — तथागता नाम जानन्तापि सचे तादिसं पुच्छाकारणं होति, पुच्छन्ति । सचे पन तादिसं पुच्छाकारणं नत्थि, जानन्तापि न पुच्छन्ति । यस्मा पन बुद्धानं अजाननं नाम नत्थि, तस्मा “अजानन्तापी”ति न वुत्तं । कालं विदित्वा पुच्छन्तीति सचे तस्सा पुच्छाय सो कालो होति, एवं तं कालं विदित्वा पुच्छन्ति । सचे न होति, एवम्मि कालं विदित्वाव न पुच्छन्ति । एवं पुच्छन्तापि च अत्थसंहितं तथागता पुच्छन्ति, यं अत्थनिस्सितं कारणनिस्सितं, तदेव पुच्छन्ति, नो अनत्थसंहितं । कस्मा? यस्मा अनत्थसंहिते सेतुघातो तथागतानं । सेतु वुच्चति मग्गो, मग्गेनेव तादिसस्स वचनस्स घातो समुच्छेदोति वुत्तं होति ।

इदानी अत्थसंहितन्ति एत्थ यं अत्थनिस्सितं वचनं तथागता पुच्छन्ति, तं दस्सेन्तो “द्वीहि आकारेही”ति आदिमाह । तत्थ आकारेहीति कारणेहि । धम्मं वा देसेस्सामाति अट्ठप्पत्तियुत्तं सुत्तं वा पुब्बचरितकारणयुत्तं जातकं वा कथयिस्साम । सावकानं वा सिक्खापदं पज्जपेस्सामाति सावकानं वा ताय पुच्छाय वीतिक्कमं पाकटं कत्वा गरुकं वा लहुकं वा सिक्खापदं पज्जपेस्साम आणं ठपेस्साम । अतिलहन्ति अतिसीघं ।

७६. अज्जतित्थियवत्थुम्हि अज्जतित्थियपुब्बोति पुब्बे अज्जतित्थियो भूतोति अज्जतित्थियपुब्बो । एत्थ (अ० नि० अट्ठ० २.३.६२) च तित्थं जानितब्बं, तित्थकरो जानितब्बो, तित्थिया जानितब्बा, तित्थियसावका जानितब्बा । तत्थ तित्थं नाम द्वासट्ठि दिट्ठियो । एत्थ हि सत्ता तरन्ति उप्पिलवन्ति उम्मुज्जनिमुज्जं करोन्ति, तस्मा “तित्थ”न्ति वुच्चन्ति । तासं दिट्ठिनं उप्पादेता तित्थकरो नाम पूरणकस्सपादिको । तस्स लद्धिं गहेत्वा पब्बजिता तित्थिया नाम । ते हि तित्थे जाताति



तित्थिया, यथावुत्तं वा दिट्ठिगतसङ्घातं तित्थं एतेसं अत्थीति तित्थिका, तित्थिका एव तित्थिया । तेसं पच्चयदायका तित्थियसावकाति वेदितब्बा । **सहधम्मिकं वुच्चमानो**ति सहधम्मिकेन वुच्चमानो, करणत्थे उपयोगवचनं । पञ्चहि सहधम्मिकेहि सिक्खितब्बत्ता, तेसं वा सन्तकत्ता “सहधम्मिक”न्ति लद्धनामेन बुद्धपञ्जत्तेन सिक्खापदेन वुच्चमानोति अत्थो । **पसूरो**ति तस्स नामं । **परिब्बाजको**ति गिहिबन्धनं पहाय पब्बज्जुपगतो ।

**तंयेव तित्थायतनन्ति** एत्थ द्वासट्ठिदिट्ठिसङ्घातं तित्थमेव आयतनन्ति तित्थायतनं, तित्थं वा एतेसं अत्थीति तित्थिनो, तित्थिया, तेसं आयतनन्तिपि **तित्थायतनं** । **आयतनन्ति** च “अस्सानं कम्बोजो आयतनं, गुन्नं दक्खिणपथो आयतन”न्ति एत्थ सज्जातिट्ठानं आयतनं नाम ।

“मनोरमे आयतने, सेवन्ति नं विहङ्गमा ।

छायं छायात्थिनो यन्ति, फलत्थं फलभोजिनो”ति ॥ (अ० नि० ५.३८) —

एत्थ समोसरणट्ठानं । “पञ्चिमानि, भिक्खवे, विमुत्तायतनानी”ति (अ० नि० ५.२६) एत्थ कारणं, तं इध सब्बम्पि लब्धमि । सब्बेपि हि दिट्ठिगतिका सज्जायमाना इमासुयेव द्वासट्ठिया दिट्ठीसु सज्जायन्ति, समोसरमानापि एतासुयेव समोसरन्ति सन्निपतन्ति, दिट्ठिगतिकभावे च नेसं इमायेव द्वासट्ठि दिट्ठियो कारणं, तस्मा यथावुत्तं तित्थमेव सज्जातिआदिना अत्थेन आयतनन्ति तित्थायतनं, तेनेवत्थेन तित्थीनं आयतनन्तिपि तित्थायतनं ।

**आयस्मतो निस्साय वच्छामी**ति एत्थ **आयस्मतो**ति उपयोगत्थे सामिवचनं, आयस्मन्तं निस्साय वसिस्सामीति अत्थो । **व्यत्तो...पे०...** वुत्तलक्खणोयेवाति परिसुपट्ठापकबहुस्सुतं सन्धाय वदति । **पञ्चहुपालि अङ्गेही**ति आदीसु यं वत्तब्बं, तं परतो आवि भविस्सति ।

आचरियवत्तकथावण्णना निट्ठिता ।

### पणामनाखमापनाकथावण्णना

८०. यं पुब्बे लक्खणं वुत्तन्ति सम्बन्धो, “तेनेव लक्खणेन निस्सयन्तेवासिकस्स आपत्ति वेदितब्बा”ति पोत्थकेसु पाठो दिस्सति, “न तेनेव लक्खणेन निस्सयन्तेवासिकस्स आपत्ति वेदितब्बा”ति एवं पनेत्थ पाठो वेदितब्बो । सद्धिविहारिकस्स वुत्तलक्खणेन निस्सयन्तेवासिकस्स आपत्ति न वेदितब्बाति एवं पनेत्थ अत्थोपि वेदितब्बो । अज्जथा “निस्सयन्तेवासिकेन हि याव आचरियं निस्साय वसति, ताव सब्बं आचरियवत्तं कातब्ब”न्ति इदं विरुज्जेय्य । इदज्हि वचनं निस्सयन्तेवासिकस्स अमुत्तनिस्सयस्सेव वत्तं अकरोन्तस्स आपत्तीति दीपेति । तस्मा सद्धिविहारिकस्स यथावुत्तवत्तं अकरोन्तस्स निस्सयमुत्तकस्स अमुत्तकस्सपि आपत्ति, निस्सयन्तेवासिकस्स पन अमुत्तनिस्सयस्सेव आपत्तीति गहेतब्बं । तेनेव **विसुद्धिमग्गेपि** (विसुद्धि० १.४१) **जातिपलिबोधकथायं** —

“जातीति विहारे आचरियुपज्झायसद्धिविहारिकअन्तेवासिकसमानुपज्झायकसमानाचरियका, घरे माता पिता भगिनी भाताति एवमादिका । ते गिलाना इमस्स पलिबोधा होन्ति, तस्मा सो पलिबोधो उपट्ठित्वा तेसं पाकतिककरणेन उपच्छिन्दितब्बो । तत्थ उपज्झायो ताव गिलानो सचे लहुं न वुट्ठाति, यावजीवं पटिजगितब्बो । तथा पब्बज्जाचरियो उपसम्पदाचरियो सद्धिविहारिको उपसम्पादितपब्बाजितअन्तेवासिकसमानुपज्झायका च । निस्सयाचरिय उद्देसाचरिय निस्सयन्तेवासिक उद्देसन्तेवासिकसमानाचरियका पन याव निस्सयउद्देसा

अनुपच्छिन्ना, ताव पटिजगितब्बा”ति —

विभागेन वुत्तं । अयञ्च विभागो “तेनेव लक्खणेन निस्सयन्तेवासिकस्स आपत्ति वेदितब्बा”ति एवं पाठे सति न युज्जेय्य । अयञ्हि पाठो सद्धिविहारिकस्स विय निस्सयन्तेवासिकस्सपि यथावुत्तवत्तं अकरोन्तस्स निस्सयमुत्तकस्स अमुत्तकस्सपि आपत्तीति इममत्थं दीपेति, तस्मा वुत्तनयेनेवेत्थ पाठो गहेतब्बो ।

**पब्बज्जउपसम्पदधम्मन्तेवासिकेहि पन...पे०... ताव वत्तं कातब्बन्ति पब्बज्जाचरियउपसम्पदाचरियधम्माचरियानं**

एतेहि यथावुत्तवत्तं कातब्बं । तत्थ येन सिक्खापदानि दिन्नानि, अयं **पब्बज्जाचरियो** । येन उपसम्पदकम्मवाचा वुत्ता, अयं **उपसम्पदाचरियो** । यो उद्देसं परिपुच्छं वा देति, अयं **धम्माचरियो**ति वेदितब्बं । सेसमेत्थ उत्तानमेव ।

पणामनाखमापनाकथावण्णना निट्ठिता ।

### निस्सयपटिप्पस्सद्धिकथावण्णना

८३. निस्सयपटिप्पस्सद्धिकथायं **दिसं गतो**ति पुन आगन्तुकामो अनागन्तुकामो वा हुत्वा वासत्थाय कञ्चि दिसं गतो । **भिक्षुनो सभागतन्ति** पेसलभावं । **ओलोकेत्वा**ति उपपरिक्खित्वा । **विब्भन्ते...पे०... तत्थ गन्तब्बन्ति** एत्थ सचे केनचि करणीयेन तदहेव गन्तुं असक्कोन्तो कतिपाहेन गमिस्सामीति गमने सउस्साहो होति, रक्खतीति वदन्ति । **मा इध पटिक्कमीति** मा इध पविसि । **तत्रेव वसितब्बन्ति** तत्थेव निस्सयं गहेत्वा वसितब्बं । **तंयेव विहारं...पे०... वसितुं वट्टतीति** एत्थ उपज्झायेन परिच्चत्तत्ता उपज्झायसमोधानपरिहारो नत्थि, तस्मा उपज्झायेन समोधानगतस्सपि आचरियस्स सन्तिके गहितनिस्सयो न पटिप्पस्सम्भति ।

**आचरियम्हा निस्सयपटिप्पस्सद्धीसु आचरियो पक्कन्तो वा होतीति** एत्थ “पक्कन्तोति दिसं गतो”तिआदिना उपज्झायस्स पक्कमने यो विनिच्छयो वुत्तो, सो तत्थ वुत्तनयेनेव इधापि सक्का विज्जातुन्ति तं अवत्वा “कोचि आचरियो आपुच्छित्वा पक्कमती”तिआदिना अज्जोयेव नयो आरब्धो, अयञ्च नयो उपज्झायपक्कमनेपि वेदितब्बोयेव । ईदिसेसु हि ठानेसु एकत्थ वुत्तलक्खणं अज्जत्थापि दट्ठब्बं । **सचे द्वे लेड्डुपाते अतिक्कमित्वा निवत्तति, पटिप्पस्सद्धो होतीति** एत्थ एत्तावता दिसापक्कन्तो नाम होतीति अन्तेवासिके अनिक्खित्तधुरेपि निस्सयो पटिप्पस्सम्भति । **आचरियुपज्झाया द्वे लेड्डुपाते अतिक्कम्म अज्जस्मिं विहारे वसन्तीति** बहिउपचारसीमायं अन्तेवासिकसद्धिविहारिकानं वसनट्टानतो द्वे लेड्डुपाते अतिक्कम्म अज्जस्मिं सेनासने वसन्ति, अन्तोउपचारसीमायं पन द्वे लेड्डुपाते अतिक्कमित्वापि वसतो निस्सयो न पटिप्पस्सम्भति । “सचेपि आचरियो मुञ्चितुकामोव हुत्वा निस्सयपणामनाय पणामेती”तिआदि सब्बं उपज्झायस्स आणत्तियम्पि वेदितब्बं । सेसमेत्थ उत्तानमेव ।

निस्सयपटिप्पस्सद्धिकथावण्णना निट्ठिता ।

### उपसम्पादेतब्बपञ्चककथावण्णना

८४. पञ्चहि, भिक्षवे, अङ्गेहि **समन्नागतेनातिआदीसु न सामणेरो उपट्ठापेतब्बो**ति उपज्झायेन हुत्वा सामणेरो न गहेतब्बो । अयमत्थो **अङ्गुत्तरनिकायट्ठकथायं** (अ० नि० अट्ठ० ३.५.२५१-२५३) वुत्तोयेव ।

“अत्तानमेव पठमं, पतिरूपे निवेसये।

अथज्जमनुसासेय्य, न किलिस्सेय्य पण्डितो’ति॥ (ध० प० १५८) —

इमस्स अनुरूपवसेन पठमं ताव अत्तसम्पत्तियं नियोजेतुं “न असेक्खेन सीलक्खन्धेना”तिआदि वुत्तं, न आपत्तिअङ्गवसेन। तत्थ असेक्खेन सीलक्खन्धेनाति असेक्खस्स सीलक्खन्धो असेक्खो सीलक्खन्धो नाम। असेक्खस्स अयन्ति हि असेक्खो, सीलक्खन्धो। एवं सब्बत्थ। एवञ्च कत्वा विमुत्तिजाणदस्सनसङ्घातस्स पच्चवेक्खणजाणस्सपि असेक्खता उपपन्ना। असेक्खसीलन्ति च न मग्गफलमेव अधिप्पेतं, अथ खो यंकिञ्चि असेक्खसन्ताने पवत्तसीलं लोकियलोकुत्तरमिस्सकस्स सीलस्स इधाधिप्पेतत्ता। समाधिक्खन्धादीसुपि विमुत्तिक्खन्धपरियोसानेसु अयमेव नयो। तस्मा यथा सीलसमाधिपञ्चक्खन्धा मिस्सका अधिप्पेता, एवं विमुत्तिक्खन्धोपीति तदङ्गविमुत्तिआदयोपि वेदितब्बा, न पटिप्पस्सद्विमुत्ति एव। विमुत्तिजाणदस्सनं पन लोकियमेव। तेनेव संयुत्तनिकायट्ठकथायं (सं० नि० अट्ठ० १.१.१३५) वुत्तं “पुरिमेहि चतूहि पदेहि लोकियलोकुत्तरसीलसमाधिपञ्चाविमुत्तियो कथिता, विमुत्तिजाणदस्सनं पच्चवेक्खणजाणं होति, तं लोकियमेवा’ति।

अस्सद्धोतिआदीसु तीसु वत्थूसु सद्धा एतस्स नत्थीति अस्सद्धो। सुक्कपक्खे सद्वहतीति सद्धो, सद्धा वा एतस्स अत्थीतिपि सद्धो। नत्थि एतस्स हिरीति अहिरिको, अकुसलसमापत्तिया अजिगुच्छमानस्सेतं अधिवचनं। हिरी एतस्स अत्थीति हिरिमा। न ओत्तप्पतीति अनोत्तप्पी, अकुसलसमापत्तिया न भायतीति वुत्तं होति। तब्बिपरीतो ओत्तप्पी। कुच्छितं सीदतीति कुसीतो, हीनवीरियस्सेतं अधिवचनं। आरद्धं वीरियं एतस्साति आरद्धवीरियो, सम्मप्पधानयुत्तस्सेतं अधिवचनं। मुट्ठा सति एतस्साति मुट्ठस्सति, नट्ठस्सतीति वुत्तं होति। उपट्ठिता सति एतस्साति उपट्ठितस्सति, निच्चं आरम्मणाभिमुखप्पवत्तसतिस्सेतं अधिवचनं।

अधिसीले सीलविपन्नो च अज्झाचारे आचारविपन्नो च आपज्जित्वा अवुट्ठितो। सस्सतुच्छेदसङ्घातं अन्तं गण्हाति गाहयतीति वा अन्तग्गाहिका, मिच्छादिट्ठि। पुरिमानि द्वे पदानीति “न पटिबलो होति अन्तेवासिं वा सद्धिविहारिं वा गिलानं उपट्ठातुं वा उपट्ठापेतुं वा, अनभिरतं वूपकासेतुं वा वूपकासापेतुं वा”ति इमानि द्वे पदानि।

अभिविसिद्धो उत्तमो समाचारोति अभिसमाचारो, अभिसमाचारोव सिक्खितब्बतो सिक्खाति आभिसमाचारिका सिक्खा, अभिसमाचारं वा आरब्ध पञ्चत्ता सिक्खा आभिसमाचारिका। मग्गब्रह्मचरियस्स आदिभूताति आदिब्रह्मचरियका, उभतोविभङ्गपरियापन्नसिक्खायेतं अधिवचनं। तेनेव “उभतोविभङ्गपरियापन्नं आदिब्रह्मचरियकं, खन्धकवत्तपरियापन्नं आभिसमाचारिक”न्ति विसुद्धिमग्गे (विसुद्धि० १.११) वुत्तं। तस्मा सेक्खपण्णत्तियन्ति एत्थ सिक्खितब्बतो सब्बापि उभतोविभङ्गपरियापन्ना पण्णत्तीति गहेतब्बा। तेनेव गण्ठपदेपि वुत्तं “सेक्खपण्णत्तियन्ति पाराजिकमादिं कत्वा सिक्खितब्बसिक्खापदपञ्चत्तिय”न्ति। सेसमेत्थ उत्तानत्थमेव।

उपसम्पादेतब्बपञ्चककथावण्णना निट्ठिता।

अज्जतित्थियपुब्बवत्थुकथावण्णना

८६. अज्जतित्थियवत्थुमिह आजीवको अचेलकोति दुविधो नग्गपरिब्बाजकोति आह “नग्गपरिब्बाजकस्सेव आजीवकस्स वा”तिआदि। तत्थ आजीवको उपरि एकमेव वत्थं उपकच्छके पवेसेत्वा परिदहति, हेट्ठा नग्गो। अचेलको

सब्बेन सब्बं नगोयेव ।

८७. आमिसकिञ्चिक्खसम्पदानं नाम अप्पमत्तकस्सेव देय्यधम्मस्स अनुप्पदानं । रूपपजीविकाति अत्तनो रूपंयेव निस्साय जीवन्तियो । वेसिया गोचरो मित्तसन्थववसेन उपसङ्कमितब्बट्ठानं अस्साति वेसियागोचरो । एस नयो सब्बत्थ । योब्बनप्पत्ता योब्बनातीता वाति उभयेनपि महल्लिका अनिविद्धकुमारियोव वदति । भिक्खुनियो नाम उस्सन्नब्रह्मचरिया, तथा भिक्खूपि । तेसं अज्जमज्जविसभागवत्थुभावतो सन्थववसेन उपसङ्कमने कतिपाहेनेव ब्रह्मचरियन्तरायो सियाति आह “ताहि सद्धिं खिप्पमेव विस्सासो होति, ततो सीलं भिज्जती”ति । सेसमेत्थ उत्तानमेव ।

अज्जतित्थियपुब्बवत्थुकथावण्णना निट्ठिता ।

### पञ्चाबाधवत्थुकथावण्णना

८८. पञ्चाबाधवत्थुमिह नखपिट्ठिप्पमाणन्ति एत्थ “कनिट्ठङ्गुलिनखपिट्ठि अधिप्पेता”ति तीसुपि गण्ठपदेसु वुत्तं । “तज्जे नखपिट्ठिप्पमाणम्पि वट्ठनकपक्खे ठितं होति, न पब्बाजेतब्बो”ति इमिना सामज्जतो लक्खणं दस्सितं, तस्मा यत्थ कत्थचि सरीरावयवेसु नखपिट्ठिप्पमाणं वट्ठनकपक्खे ठितज्जे, न वट्ठतीति सिद्धं । एवज्ज सति नखपिट्ठिप्पमाणम्पि अवट्ठनकपक्खे ठितज्जे, सब्बत्थ वट्ठतीति आपन्नं, तज्ज न सामज्जतो अधिप्पेतन्ति पदेसविसेसेयेव नियमेत्वा दस्सेन्तो “सचे पना”तिआदिमाह । सचे हि अविसेसेन नखपिट्ठिप्पमाणं अवट्ठनकपक्खे ठितं वट्ठेय्य, “निवासनपारुपनेहि पकतिपअच्छन्ने ठाने”ति पदेसनियमं न करेय्य, तस्मा निवासनपारुपनेहि पकतिपटिच्छन्नट्ठानतो अज्जत्थ नखपिट्ठिप्पमाणं अवट्ठनकपक्खे ठितम्पि न वट्ठतीति सिद्धं, नखपिट्ठिप्पमाणतो खुद्दकतरं पन अवट्ठनकपक्खे वट्ठनकपक्खे वा ठितं होतु, वट्ठति नखपिट्ठिप्पमाणतो खुद्दकतरस्स वट्ठनकपक्खे अवट्ठनकपक्खे वा ठितस्स मुखादीसुयेव पटिक्खित्तता ।

गण्ठेपि इमिनाव नयेन विनिच्छयो वेदितब्बो । तत्थ पन मुखादीसु कोलट्ठिमत्ततो खुद्दकतरोपि गण्ठो न वट्ठतीति विसुं न दस्सितो । “मुखादिके अप्पटिच्छन्नट्ठाने अवट्ठनकपक्खे ठितोपि न वट्ठती”ति एत्तकमेव हि तत्थ वुत्तं, तथापि कुट्ठे वुत्तनयेन मुखादीसु कोलट्ठिप्पमाणतो खुद्दकतरोपि गण्ठो न वट्ठतीति विज्जायति, तस्मा अवट्ठनकपक्खे ठितोपीति एत्थ पि-सद्धो अवुत्तसम्पिण्डनत्थो । तेन कोलट्ठिमत्ततो खुद्दकतरोपि न वट्ठतीति अयमत्थो दस्सितोयेवाति अयमम्हाकं खन्ति । पकतिवण्णे जातेति रोगहेतुकस्स विकारवण्णस्स अभावं सन्धाय वुत्तं । कोलट्ठिमत्तकोति बदरट्ठिप्पमाणो । सुछविं कारेत्वाति सज्जातछविं कारेत्वा । “सज्जविं कारेत्वा”तिपि पाठो, विज्जमानछविं कारेत्वाति अत्थो । पदुमपुण्डरीकपत्तवण्णन्ति रत्तपदुमसेतपदुमवसेन पदुमपत्तवण्णं । सोसब्बाधीति खयरोगो ।

पञ्चाबाधवत्थुकथावण्णना निट्ठिता ।

### राजभटादिवत्थुकथावण्णना

९०-९६. राजभटादिवत्थूसु आहंसूति मनुस्सा वदिंसु । तस्मा...पे०... एवमाहाति यस्मा सयं धम्मस्सामी, तस्मा भिक्खूहि अपब्बाजितब्बं चोरं अङ्गुलिमालं पब्बाजेत्वा आयतिं अकरणत्थाय भिक्खूनं सिक्खापदं पज्जपेन्तो “न, भिक्खवे, धजबन्धो चोरो पब्बाजेतब्बो, यो पब्बाजेय्य, आपत्ति दुक्कटस्सा”ति आह । उपरमन्तीति विरमन्ति निवत्तन्ति । भिन्दित्वाति अन्दुबन्धनं भिन्दित्वा । छिन्दित्वाति सङ्गुलिकबन्धनं छिन्दित्वा । मुञ्चित्वाति रज्जुबन्धनं मुञ्चित्वा ।

विवरित्वाति गामबन्धनादीसु गामद्वारादीनि विवरित्वा । अपस्समानानं वा पलायतीति पुरिसगुत्तियं पुरिसानं अपस्समानानं पलायति । उपड्डुपड्डन्ति थोकं थोकं ।

१७. अभिसेकादीसु बन्धनागारादीनि सोधेन्ति, तं सन्धायाह “सब्बसाधारणेन वा नयेना”ति । सचे सयमेव पण्णं आरोपेन्ति, न वट्ठतीति ता भुजिस्सिस्थियो “मयम्पि दासियो होमा”ति सयमेव दासिपण्णं लिखापेन्ति, न वट्ठति । तक्कं सीसे आसित्तकसदिसाव होन्तीति यथा अदासे करोन्ता तक्केन सीसं धोवित्वा अदासं करोन्ति, एवं आरामिकवचनेन दिन्नत्ता अदासाव तेति अधिप्पायो । तक्कासिञ्चनं पन सीहळदीपे चारित्तन्ति वदन्ति । नेव पब्बाजेतब्बोति वुत्तन्ति कप्पियवचनेन दिन्नेपि सङ्गस्स आरामिकदासत्ता एवं वुत्तं । निस्सामिकदासो नाम यस्स सामिका सपुत्तदारादयो मता होन्ति, न कोचि तस्स परिग्गाहको, सोपि पब्बाजेतुं न वट्ठति, तं पन अत्तनापि भुजिस्सं कातुं वट्ठति । ये वा पन तस्मिं रट्ठे सामिनो, तेहिपि कारापेतुं वट्ठति । “देवदासिपुत्तं पब्बाजेतुं वट्ठती”ति तीसु गण्ठपदेसु वुत्तं । दासस्स पब्बजित्वा अत्तनो सामिके दिस्वा पलायन्तस्स आपत्ति नत्थीति वदन्ति । सेसं सब्बत्थ उत्तानमेव ।

राजभटादिवत्थुकथावण्णना निड्ढिता ।

### निस्सयमुच्चनककथावण्णना

१०३. निस्सयमुच्चनकस्स वत्तेसु पञ्चकछक्केसु पन उभयानि खो पन...पे०... अनुब्यञ्जनसोति एत्थ “सब्बोपि चायं पभेदो मातिकाडुकथायं जातायं जातो होती”ति तीसुपि गण्ठपदेसु वुत्तं । आपत्तिं जानातीतिआदीसु च “पाठे अवत्तमानेपि ‘इदं नाम कत्वा इदं आपज्जती’ति जानाति चे, वट्ठती”ति तत्थेव वुत्तं । तच्च खो पुब्बे पाठे पगुणे कतेति गहेतब्बन्ति च आचरियुपज्झायानम्पि एसेव नयोति च केचि वदन्ति । सेसमेत्थ उत्तानमेव ।

निस्सयमुच्चनककथावण्णना निड्ढिता ।

### राहुलवत्थुकथावण्णना

१०५. राहुलवत्थुम्हि तत्थेव विहरिंसूति सब्बेपि ते अरहत्तं पत्तकालतो पट्ठाय अरिया नाम मज्झत्ताव होन्तीति रज्जो पहितसासनं दसबलस्स अनारोचेत्वाव तत्थ विहरिंसु । एकदिवसं जातं काळुदायिं नाम अमच्चन्ति अयं किर (अ० नि० अट्ठ० १.१.२२५) पदुमुत्तरबुद्धकाले हंसवतीनगरे कुलगहे निब्बत्तो सत्थु धम्मदेसनं सुणन्तो सत्थारं एकं भिक्खुं कुलप्पसादकानं अग्गट्ठाने ठपेन्तं दिस्वा अधिकारकम्मं कत्वा तं ठानन्तरं पत्थेसि । सो यावजीवं कुसलं कत्वा देवमनुस्सेसु संसरन्तो अम्हाकं बोधिसत्तस्स मातुकुच्छियं पटिसन्धिग्गहणदिवसे कपिलवत्थुस्मियेव अमच्चगेहे पटिसन्धिं गण्हि । जातदिवसे बोधिसत्तेन सद्धियेव जातोति तं दिवसंयेव दुकूलचुम्बटके निपज्जापेत्वा बोधिसत्तस्स उपट्ठानत्थाय नयिंसु । बोधिसत्तेन हि सद्धिं बोधिरुक्खो राहुलमाता चतस्सो निधिकुम्भियो आरोहनियहत्थी कण्डको छन्नो काळुदायीति इमे सत्त एकदिवसे जातत्ता सहजाता नाम अहेसुं । अथस्स नामग्गहणदिवसे सकलनगरस्स उदग्गचित्तदिवसे जातोति उदायीत्वेव नामं अकंसु । थोकं काळधातुकत्ता पन काळुदायी नाम जातो । सो बोधिसत्तेन सद्धिं कुमारकीळं कीळन्तो वुद्धिं अगमासि ।

सट्ठिमत्ताहि गाथाहीति —

“अङ्गारिनो दानि दुमा भदन्ते ।

फलेसिनो छदनं विष्पहाय ।  
 ते अच्चिमन्तोव पभासयन्ति ।  
 समयो महावीर भागीरसानं ॥ (थेरगा० ५२७)

“नातिसीतं नातिउण्हं, नातिदुब्भिकखछातकं ।  
 सदला हरिता भूमि, एस कालो महामुनी”ति ॥ —

आदिकाहि सट्ठिमत्ताहि गाथाहि । “**पोक्खरवस्सन्ति** पोक्खरपत्तवण्णमुदक”न्ति **गण्ठपदेसु** वुत्तं । पोक्खरपत्तप्पमाणं मज्झे उट्ठित्वा अनुक्कमेन सतपटलं सहस्सपटलं हुत्वा वस्सनकवस्सन्तिपि वदन्ति । तस्मिं किर वस्सन्ते तेमेतुकामाव तेमेन्ति, न इतरे । **एकोपि राजा वा...पे०... गतो नत्थी**ति धम्मदेसनं सुत्वा पक्कन्तेसु जातीसु एकोपि राजा वा राजमहामत्तो वा “स्वे अम्हाकं भिक्खं गण्हथा”ति निमन्तेत्वा गतो नत्थि । पितापिस्स सुद्धोदनमहाराजा “मय्हं पुत्तो मम गेहं अनागन्त्वा कहं गमिस्सती”ति अनिमन्तेत्वाव अगमासि, गन्त्वा पन गेहे वीसतिया भिक्खुसहस्सानं यागुआदीनि पटियादापेत्वा आसनानि पज्जापेसि ।

**कुलनगरे**ति जातिकुलस्स नगरे । **उण्हीसतो पट्टाया**ति सीसतो पट्टाय । **उण्हीसन्ति** हि उण्हीससदिसत्ता भगवतो परिपुण्णनलाटस्स परिपुण्णसीसस्स च एतं अधिवचनं । भगवतो हि दक्खिणकण्णचूळिकतो पट्टाय मंसपटलं उट्ठित्वा सकलनलाटं छादयमानं पूरयमानं गन्त्वा वामकण्णचूळिकाय पतिट्ठितं सण्हतमताय सुवण्णवण्णताय पभस्सरताय परिपुण्णताय च रज्जो बद्धउण्हीसपट्टो विय विरोचति । भगवतो किर इमं लक्खणं दिस्वा राजूनं उण्हीसपट्टं अकंसु । अज्जे पन जना अपरिपुण्णसीसा होन्ति, केचि कप्पसीसा, केचि फलसीसा, केचि अट्ठिसीसा, केचि तुम्बसीसा, केचि कुम्भसीसा, केचि पब्भारसीसा, भगवतो पन आरगगेन वट्टेत्वा ठपितं विय सुपरिपुण्णं उदकपुब्बुळसदिसम्पि होति । तेनेव उण्हीसवेठितसीससदिसत्ता उण्हीसं विय सब्बत्थ परिमण्डलसीसत्ता च उण्हीससीसोति भगवा वुच्चति ।

**नरसीहगाथाहि नाम अट्ठहि गाथाहीति —**

“सिनिद्धनीलमुदुकुञ्चितकेसो ।  
 सूरियनिम्मलतलाभिनलाटो ।  
 युत्ततुङ्गमुदुकायतनासो ।  
 रंसिजालविततो नरसीहो”ति ॥ (जा० अट्ठ० १.सन्तिकेनिदानकथा; अप० अट्ठ० १.सन्तिकेनिदानकथा) —

एवमादिकाहि अट्ठहि गाथाहि । **गण्ठपदेसु** पन —

“चक्कवरङ्गितरत्तसुपादो ।  
 लक्खणमण्डितआयतपण्हि ।  
 चामरछत्तविभूसितपादो ।  
 एस हि तुय्ह पिता नरसीहो ॥

“सक्यकुमारवरो सुखुमालो ।

लक्खणचित्तिकपुण्णसरीरो ।  
 लोकहिताय गतो नरवीरो ।  
 एस हि तुय्ह पिता नरसीहो ॥

“पुण्णससङ्गनिभो मुखवण्णो ।  
 देवनरान पियो नरनागो ।  
 मत्तगजिन्दविलासितगामी ।  
 एस हि तुय्ह पिता नरसीहो ॥

“खत्तियसम्भवअग्गकुलीनो ।  
 देवमनुस्सनमस्सितपादो ।  
 सीलसमाधिपतिट्ठितचित्तो ।  
 एस हि तुय्ह पिता नरसीहो ॥

“आयतयुत्तसुसण्ठितनासो ।  
 गोपखुमो अभिनीलसुनेत्तो ।  
 इन्दधनूअभिनीलभमूको ।  
 एस हि तुय्ह पिता नरसीहो ॥

“वट्टसुवट्टसुसण्ठितगीवो ।  
 सीहहनू मिगराजसरीरो ।  
 कञ्चनसुच्छविउत्तमवण्णो ।  
 एस हि तुय्ह पिता नरसीहो ॥

“सिनिद्धसुगम्भिरमञ्जुसघोसो ।  
 हिङ्गुलबन्धुकरत्तसुजिह्वो ।  
 वीसतिवीसतिसेतसुदन्तो ।  
 एस हि तुय्ह पिता नरसीहो ॥

“अञ्जनवण्णसुनीलसुकेसो ।  
 कञ्चनपट्टविसुद्धनलाटो ।  
 ओसधिपण्डरसुद्धसुउण्णो ।  
 एस हि तुय्ह पिता नरसीहो ॥

“गच्छतिनिलपथे विय चन्दो ।  
 तारगणापरिवेठितरूपो ।  
 सावकमज्झगतो समणिन्दो ।

एस हि तुय्ह पिता नरसीहो'ति ॥ (जा० अट्ट० १.सन्तिकेनिदानकथा) —

इमा नव गाथायोपि एत्थ दस्सिता, ता पन “अट्टहि गाथाही”ति वचनेन न समेन्ति । उण्हीसतो पट्टाय याव पादतलाति वुत्तानुक्कमोपि तत्थ न दिस्सति । भिक्खाय चरतीति **भिक्खाचारो** ।

**उत्तिट्ठे**ति उत्तिट्ठित्वा परेसं घरद्वारे ठत्वा गहेतब्बपिण्डे । **नप्पमज्जेय्या**ति पिण्डचारिकवत्तं हापेत्वा पणीतभोजनानि परियेसन्तो उत्तिट्ठे पमज्जति नाम, सपदानं पिण्डाय चरन्तो पन नप्पमज्जति नाम, एवं करोन्तो उत्तिट्ठे नप्पमज्जेय्य । **धम्मन्ति** अनेसनं पहाय सपदानं चरन्तो तमेव भिक्खाचरियधम्मं सुचरितं चरे । **सुखं सेती**ति देसनामत्तमेतं, एवं पनेतं भिक्खाय चरियधम्मं चरन्तो धम्मचारी इधलोके च परलोके च चतूहिपि इरियापथेहि सुखं विहरतीति अत्थो ।

दुतियगाथाय **न नं दुच्चरितन्ति** वेसियादिभेदे अगोचरे चरन्तो नं भिक्खाचरियधम्मं दुच्चरितं चरति नाम, एवं अचरित्वा तं धम्मं चरे सुचरितं, न नं दुच्चरितं चरे । सेसमेत्थ वुत्तत्थमेव । इमं पन दुतियगाथं पितु निवेसनं गन्त्वा अभासीति वेदितब्बं । तेनेव **थेरगाथासंवण्णनायं** (थेरगा० अट्ट० १.१५६ नन्दत्थेरगाथावण्णना) **आचरियधम्मपालत्थेरेन** वुत्तं “दुतियदिवसे पिण्डाय पविट्ठो ‘उत्तिट्ठे नप्पमज्जेय्या’ति गाथाय पितरं सोतापत्तिफले पतिट्ठापेत्वा निवेसनं गन्त्वा ‘धम्मं चरे सुचरित’न्ति गाथाय महापजापतिं सोतापत्तिफले राजानञ्च सकदागामिफले पतिट्ठापेसी”ति । **धम्मपदट्ठकथायप्पि** (ध० प० अट्ट० १.१२ नन्दत्थेरवत्थु) वुत्तं “पुनदिवसे पिण्डाय पविट्ठो ‘उत्तिट्ठे नप्पमज्जेय्या’ति गाथाय पितरं सोतापत्तिफले पतिट्ठापेत्वा ‘धम्मं चरे’ति गाथाय महापजापतिं सोतापत्तिफले राजानञ्च सकदागामिफले पतिट्ठापेसी”ति ।

**धम्मपालजातकं सुत्वा अनागामिफले पतिट्ठासीति** पुनेकदिवसं राजनिवेसने कतपातरासो एकमन्तं निसिन्नेन रज्जा “भन्ते, तुम्हाकं दुक्करकारिककाले एका देवता मं उपसङ्गमित्वा ‘पुत्तो ते कालकतो’ति आह । अहं तस्सा वचनं असद्वहन्तो ‘न मय्हं पुत्तो बोधिं अप्पत्वा कालं करोती’ति पटिक्खिपन्ति वुत्ते इदानीं कथं सद्वहस्सथ, पुब्बेपि अट्टिकानि दस्सेत्वा ‘पुत्तो ते मतो’ति वुत्ते न सद्वहत्था”ति इमिस्सा अट्ठुप्पत्तिया महाधम्मपालजातकं कथेसि । तं सुत्वा राजा अनागामिफले पतिट्ठहि ।

**केसविस्सज्जनन्ति** कुलमरियादवसेन केसोरोपनं । **पट्टबन्धो**ति युवराजपट्टबन्धो । अभिनवघरप्पवेसनमहो **घरमङ्गलं**, विवाहकरणमहो **आवाहमङ्गलं** । **छत्तमङ्गलन्ति** युवराजछत्तमङ्गलं । **जनपदकल्याणीति** (उदा० अट्ट० २२) जनपदमिह कल्याणी उत्तमा छसरीरदोसरहिता पञ्चकल्याणसमन्नागता । सा हि यस्मा नातिदीघा नातिरस्सा नातिकिसा नातिथूला नातिकाळा नाच्चोदाताति अतिक्कन्ता मानुसं वण्णं, अप्पत्ता दिब्बं वण्णं, तस्मा छसरीरदोसरहिता । छविकल्याणं मंसकल्याणं नहारुकल्याणं अट्टिकल्याणं वयकल्याणन्ति इमेहि पन पञ्चहि कल्याणेहि समन्नागतत्ता पञ्चकल्याणसमन्नागता नाम । तस्सा हि आगन्तुकोभासकिच्चं नत्थि । अत्तनो सरीरोभासेनेव द्वादसहत्थद्वाने आलोकं करोति, पियङ्गुसामा वा होति सुवण्णसामा वा, अयमस्सा **छविकल्याणता** । चत्तारो पनस्सा हत्थपादा मुखपरियोसानञ्च लाखारसपरिकम्मकतं विय रत्तपवाळरत्तकम्बलसदिसं होति, अयमस्सा **मंसकल्याणता** । वीसति पन नखपत्तानि मंसतो अमुत्तद्वाने लाखारसपूरितानि विय मुत्तद्वाने खीरधारासदिसानि होन्ति, अयमस्सा **नहारुकल्याणता** । द्वत्तिस दन्ता सुफुसिता सुधोतवजरपन्ति विय खायन्ति, अयमस्सा **अट्टिकल्याणता** । वीसतिवस्ससतिकापि समाना सोळसवस्सुदेसिका विय होति निवलिपलिता, अयमस्सा **वयकल्याणता** । इति इमेहि पञ्चहि कल्याणेहि समन्नागतत्ता जनपदकल्याणीति वुच्चति ।

**तुवटन्ति** सीधं । सोपि भगवन्तं “पत्तं गणहथा”ति वत्तुं अविसहमानो विहारंयेव अगमासीति । सो किर तथागते



गारवेन “पत्तं वो भन्ते गण्हथा”ति वत्तुं नासक्खि । एवं पन चिन्तेसि “सोपानसीसे पत्तं गण्हिस्सती”ति । सत्था तस्मिम्पि ठाने न गण्हि । इतरो “सोपानपादमूले गण्हिस्सती”ति चिन्तेसि । सत्था तत्थापि न गण्हि । इतरो “राजङ्गणे गण्हिस्सती”ति चिन्तेसि । सत्था तत्थापि न गण्हि । कुमारो निवत्तितुकामो अरुचिया गच्छन्तो सत्थु गारवेन “पत्तं गण्हथा”ति वत्तुम्पि असक्कोन्तो “इध गण्हिस्सति, एत्थ गण्हिस्सती”ति चिन्तेन्तो गच्छति । जनपदकल्याणिया च वुत्तवचनं तस्स हृदये तिरियं पतित्वा विय ठितं । नन्दकुमारज्झि अभिसेकमङ्गलं न तथा पीळेसि, यथा जनपदकल्याणिया वुत्तवचनं, तेनस्स चित्तसन्तापो बलवा अहोसि । अथ नं “इमस्मिं ठाने निवत्तिस्सति, इमस्मिं ठाने निवत्तिस्सती”ति चिन्तेन्तमेव सत्था विहारं नेत्वा “पब्बजिस्ससि नन्दा”ति आह । सो बुद्धगारवेन “न पब्बजिस्सामी”ति अवत्वा “आम पब्बजिस्सामी”ति आह । सत्था “तेन हि नन्दं पब्बाजेथा”ति वत्वा पब्बाजेसि । तेन वुत्तं “अनिच्छमानंयेव भगवा पब्बाजेसी”ति । “सत्था कपिलपुरं गन्त्वा ततियदिवसे नन्दं पब्बाजेसी”ति धम्मपदट्ठकथायं (ध० प० अट्ठ० १.१२ नन्दत्थेरवत्थु) वुत्तं, अङ्गुत्तरनिकायट्ठकथायं (अ० नि० अट्ठ० १.१.२३०) पन —

“महासत्तोपि सब्बञ्जुतं पत्वा पवत्तितवरधम्मचक्को लोकानुगहं करोन्तो राजगहतो कपिलवत्थुं गन्त्वा पठमदस्सनेनेव पितरं सोतापत्तिफले पतिट्ठपेसि, पुनदिवसे पितु निवेसनं गन्त्वा राहुलमाताय ओवादं कत्वा सेसजनस्सपि धम्मं कथेसि, पुनदिवसे नन्दकुमारस्स अभिसेकगेहप्पवेसनआवाहमङ्गलेसु वत्तमानेसु तस्स निवेसनं गन्त्वा कुमारं पत्तं गाहापेत्वा पब्बाजेतुं विहाराभिमुखो पायासी”ति —

वुत्तं, इध पन “भगवा कपिलपुरं आगन्त्वा दुतियदिवसे नन्दं पब्बाजेसी”ति वुत्तं, सब्बम्पेतं आचरियेन तंतंभाणकानं तथा तथा अनुस्सववसेन परिहरित्वा आगतभावतो तत्थ तत्थ तथा तथा वुत्तन्ति नत्थेत्थ आचरियवचने पुब्बापरविरोधो ।

ब्रह्मरूपवण्णन्ति ब्रह्मरूपसमानरूपं । त्यस्साति ते अस्स । वट्टानुगतन्ति वट्टपरियापन्नं । सविधातन्ति दुक्खसहितत्ता सविधातं, सदुक्खन्ति अत्थो । सत्तविधं अरियधनन्ति —

“सद्भाधनं सीलधनं, हिरिओत्तप्पियं धनं ।

सुतधनञ्च चागो च, पज्जा वे सत्तमं धनं”न्ति ॥ (अ० नि० ७.५-६) —

एवं वुत्तं सत्तविधं अरियधनं । उज्झाचरियायाति भिक्खाचरियाय । पुत्तसिनेहो उप्पज्जमानो सकलसरीरं खोभेत्वा अट्ठिमिज्जं आहच्च तिट्ठतीति आह “पुत्तपेमं भन्ते...पे०... अट्ठिमिज्जं आहच्च तिट्ठती”ति । पुत्तसिनेहो हि बलवभावतो सहजातपीतिवेगस्स सविष्कारताय तंसमुट्ठानरूपधम्महि फरणवसेन सकलसरीरं आलोळेत्वा अट्ठिमिज्जं आहच्च तिट्ठति । यत्र हि नामाति यो नाम । सेसमेत्थ उत्तानमेव ।

राहुलवत्थुकथावण्णना निट्ठिता ।

### सिक्खापददण्डकम्मवत्थुकथावण्णना

१०६. अनुजानामि, भिक्खवे, सामणेराणं दस सिक्खापदानीतिआदीसु सिक्खितब्बानि पदानि सिक्खापदानि, सिक्खाकोट्टासाति अत्थो । सिक्खाय वा पदानि सिक्खापदानि, अधिसीलअधिचित्तअधिपज्जासिक्खाय अधिगमुपायाति अत्थो । अत्थतो पन कामावचरकुसलचित्तसम्पयुत्ता विरतियो, तंसम्पयुत्तधम्मा पनेत्थ तग्गहणेनेव गहेतब्बा । सरसेनेव पतनसभावस्स अन्तरा एव अतिपातनं अतिपातो, सणिकं पतितुं अदत्वा सीघं पातनन्ति अत्थो । अतिक्कम्म वा सत्थादीहि

अभिभवित्वा पातनं अतिपातो, पाणस्स अतिपातो **पाणातिपातो**, पाणवधो पाणघातोति वुत्तं होति । **पाणोति** चेत्थ वोहारतो सत्तो, परमत्थतो जीवितिन्द्रियं । तस्मिं पन पाणे पाणसज्जिनो जीवितिन्द्रियुपच्छेदकउपक्कमसमुट्ठापिका कायवचीद्वारानं अज्जतरप्पवत्ता वधकचेतना पाणातिपातो, ततो **पाणातिपाता** ।

**वेरमणी**ति वेरहेतुताय वेरसज्जितं पाणातिपातादिपापधम्मं मणति, “मयि इध ठिताय कथमागच्छसी”ति वा तज्जेन्ती विय नीहरतीति वेरमणी । विरमति एतायाति वा विरमणीति वत्तब्बे निरुत्तिनयेन “वेरमणी”ति वुत्तं । अत्थतो पन **वेरमणी**ति कामावचरकुसलचित्तसम्पयुत्ता विरतियो । सा “पाणातिपातादिं विरमन्तस्स या तस्मिं समये पाणातिपाता आरति विरति पटिविरति वेरमणी अकिरिया अकरणं अनज्झापत्ति वेलानतिक्कमो सेतुघातो”ति एवमादिना नयेन **विभङ्गे** (विभ० ७०४) वुत्ता । कामज्जेसा वेरमणी नाम लोकोत्तरापि अत्थि, इध पन समादानवसप्पवत्ता विरति अधिप्पेताति लोकोत्तराय विरतिया समादानवसेन पवत्तिअसम्भवतो कामावचरकुसलचित्तसम्पयुत्ता विरतियो गहेतब्बा ।

**अदिन्नादाना वेरमणी**तिआदीसु अदिन्तस्स आदानं **अदिन्नादानं**, परस्सहरणं, थेय्यं चोरिकाति वुत्तं होति । तत्थ **अदिन्तन्ति** परपरिग्गहितं । यत्थ परो यथाकामकारितं आपज्जन्तो अदण्डारहो अनुपवज्जो च होति, तस्मिं पन परपरिग्गहिते परपरिग्गहितसअजनो तदादायकउपक्कमसमुट्ठापिका थेय्यचेतना अदिन्नादानं ।

**अब्रह्मचरियं** नाम असेट्ठचरियं द्वयंद्वयसमापत्ति । सा हि “अप्पस्सादा कामा बहुदुक्खा बहुपायासा, आदीनवो एत्थ भिय्यो”तिआदिना (म० नि० १.१७७; २.४२) हीळितत्ता असेट्ठा अप्पसत्था चरियाति वा असेट्ठानं निहीनानं इत्थिपुरिसानं चरियाति वा असेट्ठचरियं, असेट्ठचरियत्ता अब्रह्मचरियन्ति च वुच्चति, अत्थतो पन असद्धम्मसेवनाधिप्पायेन कायद्वारप्पवत्ता मग्गेनमग्गप्पटिपत्तिसमुट्ठापिका चेतना अब्रह्मचरियं ।

**मुसा**ति अभूतं अतच्छं वत्थु, **वादो**ति तस्स भूततो तच्छतो विज्जापनं । लक्खणतो पन अतथं वत्थुं तथतो परं विज्जापेतुकामस्स तथाविज्जत्तिसमुट्ठापिका चेतना **मुसावादो** मुसा वदीयति वुच्चति एतायाति कत्वा ।

**सुरामेरयमज्जप्पमादट्ठाना**ति एत्थ **सुरा**ति पूवसुरा पिट्ठसुरा ओदनसुरा किण्णपक्खित्ता सम्भारसंयुत्ताति पज्च सुरा । **मेरयन्ति** पुष्कासवो फलासवो मध्वासवो गुळासवो सम्भारसंयुत्तोति पज्च आसवा । तत्थ पूवे भाजने पक्खिपित्वा तज्जं उदकं दत्वा मद्दित्वा कता **पूवसुरा** । एवं सेससुरापि । **किण्णा**ति पन तस्सा सुराय बीजं वुच्चति, ये सुरामोदकाति वुच्चन्ति, ते पक्खिपित्वा कता **किण्णपक्खित्ता** । हरीतकीसासपादिनानासम्भारेहि संयोजिता **सम्भारसंयुत्ता** । मधुकतालनाळिकेरादिपुप्फरसो चिरपरिवासितो **पुष्कासवो** । पनसादिफलरसो **फलासवो** । मुद्दिकारसो **मध्वासवो** । उच्छुरसो **गुळासवो** । हरीतकआमलककटुकभण्डादिनानासम्भारानं रसो चिरपरिवासितो **सम्भारसंयुत्तो** । तं सब्बम्पि मदकरणवसेन **मज्जं** पिवन्तं मदयतीति कत्वा । **पमादट्ठानन्ति** पमादकारणं । याय चेतनाय तं मज्जं पिवन्ति, तस्सा एतं अधिवचनं । सुरामेरयमज्जे पमादट्ठानं सुरामेरयमज्जप्पमादट्ठानं, तस्मा **सुरामेरयमज्जप्पमादट्ठाना** ।

**विकालभोजना**ति अरुणुग्गमनतो पट्टाय याव मज्झन्हिका । अयं बुद्धादीनं अरियानं आचिण्णसमाचिण्णो भोजनस्स कालो नाम, तदज्जो विकालो । भुज्जितब्बट्ठेन भोजनं, यागुभत्तादि सब्बं यावकालिकवत्थु । यथा च “रत्तूपरतो”ति (दी० १.१०, १९४; म० नि० १.२९३; ३.१४) एत्थ रत्तिया भोजनं रत्तीति उत्तरपदलोपेन वुच्चति, एवमेत्थ भोजनज्झोहरणं भोजनन्ति । विकाले भोजनं विकालभोजनं, ततो **विकालभोजना**, विकाले यावकालिकवत्थुस्स अज्झोहरणाति अत्थो । अथ वा न एत्थ कम्मसाधनो भुज्जितब्बत्थवाचको भोजनसद्दो, अथ खो भावसाधनो अज्झोहरणत्थवाचको गहेतब्बो,

तस्मा विकाले भोजनं अज्झोहरणं विकालभोजनं । कस्स पन अज्झोहरणन्ति? यामकालिकादीनं अनुज्जातत्ता विकालभोजन-सदस्स वा यावकालिकज्झोहरणे निरुद्धत्ता यावकालिकस्साति विज्जायति, अत्थतो पन कायद्वारप्पवत्ता विकाले यावकालिकज्झोहरणचेतना “विकालभोजन”न्ति वेदितब्बा ।

**नच्चगीतवादितविसूकदस्सनाति** एत्थ सासनस्स अननुलोमत्ता विसूकं पटाणीभूतं दस्सनन्ति विसूकदस्सनं । नच्चादीनज्झि दस्सनं सछन्दरागप्पवत्तितो सङ्खेपतो “सब्बपापस्स अकरण”न्ति आदिनयप्पवत्तं (दी० नि० २.९०; ध० प० १८३) भगवतो सासनं न अनुलोमेति । नच्चज्ज गीतज्ज वादितज्ज विसूकदस्सनज्ज **नच्चगीतवादितविसूकदस्सनं** । अत्तना पयोजियमानं परेहि पयोजापियमानज्जेत्थ नच्चं नच्चभावसामज्जतो पाळियं एकेनेव नच्च-सद्देन गहितं, तथा गीतवादित-सद्देहि गायनगाथापनवादनवादापनानि, तस्मा अत्तना नच्चननच्चापनादिवसेन नच्चा च गीता च वादिता च अन्तमसो मयूरनच्चादिवसेनपि पवत्तानं नच्चादीनं विसूकभूता दस्सना च वेरमणीति एवमेत्थ अत्थो दट्ठब्बो । नच्चादीनि अत्तना पयोजेतुं वा परेहि पयोजापेतुं वा पयुत्तानि पस्सितुं वा नेव भिक्खुनं न भिक्खुनीनं वट्ठति । दस्सनेन चेत्थ सवनम्पि सङ्गहितं विरूपेकसेसनयेन । यथा सकं विसयआलोचनसभावताय वा पज्जनं विज्जाणानं सवनकिरियायपि दस्सनसङ्खेपसम्भवतो “दस्सना” इच्चेव वुत्तं । तेनेव वुत्तं “पज्जहि विज्जाणेहि न कज्जि धम्मं पटिविजानाति अज्जत्र अभिनिपातमत्ता”ति । दस्सनकम्यताय उपसङ्कमित्वा पस्सतो एव चेत्थ वीतिक्कमो होति, ठितनिसिन्नसयनोकासे पन आगतं गच्छन्तस्स वा आपाथगतं पस्सतो सिया संकिलेसो, न वीतिक्कमो ।

**मालागन्धविलेपनधारणमण्डनविभूसनट्टानाति** एत्थ मालाति यं किज्जि पुप्फं । किज्जापि हि माला-सदो लोके बद्धमालवाचको, सासने पन रुळ्हिया पुप्फेसुपि वुत्तो, तस्मा यं किज्जि पुप्फं बद्धमबद्धं वा, तं सब्बं “माला”ति दट्ठब्बं । **गन्धन्ति** वासचुण्णधूमादिकं विलेपनतो अज्जं यं किज्जि गन्धजातं । **विलेपनन्ति** विलेपनत्थं पिसित्वा पटियत्तं यं किज्जि छविरागकरणं । पिळ्ळन्धनं **धारणं**, ऊनट्टानपूरणं **मण्डनं**, गन्धवसेन छविरागवसेन च सादियनं **विभूसनं** । तेनेव **दीघनिकायट्ठकथायं** (दी० नि० अट्ठ० १.१०) **मज्झिमनिकायट्ठकथायज्ज** (म० नि० अट्ठ० १.२९३) “पिळ्ळन्धन्तो धारेति नाम, ऊनट्टानं पूरेन्तो मण्डेति नाम, गन्धवसेन छविरागवसेन च सादियन्तो विभूसेति नामा”ति वुत्तं । **परमत्थजोतिकायं** पन **खुट्ठकट्ठकथायं** (खु० पा० अट्ठ० २.पच्छिमपज्जसिक्खापदवण्णना) “मालादीसु धारणादीनि यथासङ्ख्यं योजेतब्बानी”ति एत्तकमेव वुत्तं । **ठानं** वुच्चति कारणं, तस्मा याय दुस्सील्यचेतनाय तानि मालाधारणादीनि महाजनो करोति, सा धारणमण्डनविभूसनट्टानं ।

**उच्चासयनमहासयनाति** एत्थ उच्चाति उच्च-सद्देन समानत्थं एकं सद्दन्तरं । सेति एत्थाति सयनं, उच्चासयनज्ज महासयनज्ज **उच्चासयनमहासयनं** । **उच्चासयनं** वुच्चति पमाणातिक्कन्तं मज्जादि । **महासयनं** अकप्पियत्थरणेहि अत्थतं आसन्दादि । आसनज्जेत्थ सयनेनेव सङ्गहितन्ति दट्ठब्बं । यस्मा पन आधारे पटिक्खित्ते तदाधारा किरिया पटिक्खित्ताव होति, तस्मा “उच्चासयनमहासयना” इच्चेव वुत्तं, अत्थतो पन तदुपभोगभूतनिसज्जानिपज्जनेहि विरति दस्सिताति दट्ठब्बा । अथ वा उच्चासयनमहासयनसयनाति एतस्मिं अत्थे एकसेसनयेन अयं निद्देसो कतो यथा “नामरूपपच्चया सळायतन”न्ति, आसनकिरियापुब्बकत्ता सयनकिरियाय सयनग्गहणेनेव आसनम्पि गहितन्ति वेदितब्बं ।

**जातरूपरजतपटिग्गहणाति** एत्थ जातरूपन्ति सुवण्णं । **रजतन्ति** कहापणो लोहमासको जतुमासको दारुमासकोति ये वोहारं गच्छन्ति, तस्स उभयस्सपि पटिग्गहणं जातरूपरजतपटिग्गहणं । तिविधज्जेत्थ पटिग्गहणं कायेन वाचाय मनसाति । तत्थ कायेन पटिग्गहणं उग्गहणं, वाचाय पटिग्गहणं उग्गहापनं, मनसा पटिग्गहणं सादियनं । तिविधम्पि

पटिग्गहणं सामञ्जनिद्वेसेन एकसेसनयेन वा गहेत्वा “पटिग्गहणा”ति वुत्तं, तस्मा नेव उग्गहेतुं न उग्गहापेतुं न उपनिक्खित्तं वा सादितुं वट्ठति । इमानि पन दस सिक्खापदानि गहट्टानमपि साधारणानि । वुत्तज्हेतं **विसुद्धिमग्गे** (विसुद्धि० १३) “उपासकउपासिकानं निच्चसीलवसेन पञ्च सिक्खापदानि, सति वा उस्साहे दस, उपोसथङ्गवसेन अट्ठाति इदं गहट्टसील”न्ति । एत्थ हि **दसाति** सामणेरेहि रक्खितब्बसीलमाह घटिकारादीनं विय । **परमत्थजोतिकायं** पन **खुदकट्टकथायं** (खु० पा० अट्ठ० २.साधारणविसेसववत्थान) “आदितो द्वे चतुत्थपञ्चमानि उपासकानं सामणेरानञ्च साधारणानि निच्चसीलवसेन, उपोसथसीलवसेन पन उपासकानं सत्तमट्टमं चेकं अङ्गं कत्वा सब्बपच्छिमवज्जानि सब्बानिपि सामणेरेहि साधारणानि, पच्छिमं पन सामणेरानमेव विसेसभूत”न्ति वुत्तं, तं “सति वा उस्साहे दसा”ति इमिना न समेति । **नासनवत्थूति** लिङ्गनासनाय वत्थु, अधिद्वानं कारणन्ति वुत्तं होति ।

**१०७. किन्तीति** केन नु खो उपायेन । “**अत्तनो परिवेणन्ति** इदं पुग्गलिकं सन्धाय वुत्त”न्ति **गण्ठपदेसु** वुत्तं । अयमेत्थ गण्ठपदकारानं अधिष्ठायो — “वस्सग्गेन पत्तसेनासन”न्ति इमिना तस्स वस्सग्गेन पत्तं सङ्घिकसेनासनं वुत्तं, “अत्तनो परिवेण”न्ति इमिनापि तस्सेव पुग्गलिकसेनासनं वुत्तन्ति । अयं पनेत्थ अम्हाकं खन्ति — “यत्थ वा वसती”ति इमिना सङ्घिकं वा होतु पुग्गलिकं वा, तस्स निबद्धवसनकसेनासनं वुत्तं । “यत्थ वा पटिक्कमती”ति इमिना पन यं आचरियस्स उपज्झायस्स वा वसनद्वानं उपद्वानादिनिमित्तं निबद्धं पविसति, तं आचरियुपज्झायानं वसनद्वानं वुत्तं । तस्मा तदुभयं दस्सेतुं “**उभयेनपि अत्तनो परिवेणञ्च वस्सग्गेन पत्तसेनासनञ्च वुत्त**”न्ति आह । तत्थ **अत्तनो परिवेणन्ति** इमिना आचरियुपज्झायानं वसनद्वानं दस्सितं, **वस्सग्गेन पत्तसेनासनन्ति** इमिना पन तस्स वसनद्वानं । तदुभयमपि सङ्घिकं वा होतु पुग्गलिकं वा, आवरणं कातब्बमेवाति । **मुखद्वारिकन्ति** मुखद्वारेन भुज्जितब्बं । **दण्डकम्मं कत्वाति** दण्डकम्मं योजेत्वा । दण्डेन्ति विनेन्ति एतेनाति दण्डो, सोयेव कातब्बत्ता कम्मन्ति **दण्डकम्मं**, आवरणादि ।

सिक्खापददण्डकम्मवत्थुकथावण्णना निट्ठिता ।

### अनापुच्छावरणवत्थुआदिकथावण्णना

**१०८. दण्डकम्ममस्स करोथाति** अस्स दण्डकम्मं योजेथ आणापेथ । **दण्डकम्मन्ति** वा निग्गहकम्मं, तस्मा निग्गहमस्स करोथाति वुत्तं होति । एस नयो सब्बत्थ ईदिसेसु ठानेसु । **सेनासनग्गाहो च पटिप्पस्सम्भतीति** इमिना च छिन्नवस्सो च होतीति दीपेति । **सचे आकिण्णदोसोव होति, आयतिं संवरे न तिट्ठति, निक्कट्ठितब्बोति** एत्थ सचे यावततियं वुच्चमानो न ओरमति, सङ्घं अपलोकेत्वा नासेतब्बो । पुन पब्बज्जं याचमानोपि अपलोकेत्वा पब्बाजेतब्बोति वदन्ति । **पच्छिमिकाय वस्सावासिकं लच्छतीति** पच्छिमिकाय पुन वस्सं उपगतत्ता लच्छति । **अपलोकेत्वा लाभो दातब्बोति** छिन्नवस्सताय वुत्तं । **इतरानि पञ्च सिक्खापदानीति** विकालभोजनादीनि पञ्च । **अच्चयं देसापेतब्बोति** “अच्चयो मं, भन्ते, अच्चगमा”तिआदिना नयेन देसापेतब्बो ।

अनापुच्छावरणवत्थुआदिकथावण्णना निट्ठिता ।

### पण्डकवत्थुकथावण्णना

**१०९. पण्डकवत्थुम्हि** “यो काळपक्खे इत्थी होति, जुण्हपक्खे पुरिसो, अयं **पक्खपण्डको**”ति केचि वदन्ति, अट्टकथायं पन “काळपक्खे पण्डको होति, जुण्हपक्खे पनस्स परिळाहो वूपसम्मती”ति अपण्डकपक्खे

परिळाहवूपसमस्सेव वुत्तत्ता पण्डकपक्खे उस्सन्नपरिळाहता पण्डकभावापत्तीति विज्जायति, तस्मा इदमेवेत्थ सारतो पच्चेतब्बं । इत्थिभावो पुम्भावो वा नत्थि एतस्साति **अभावको** । तस्मिं **येवस्स पक्खे पब्बज्जा वारिताति** एत्थ “अपण्डकपक्खे पब्बाजेत्वा पण्डकपक्खे नासेतब्बो”ति **तीसुपि गण्ठपदेसु** वुत्तं । केचि पन “अपण्डकपक्खे पब्बजितो सचे किलेसक्खयं पापुणाति, न नासेतब्बो”ति वदन्ति, तं तेसं मतिमत्तं पण्डकस्स किलेसक्खयासम्भवतो खीणकिलेसस्स च पण्डकभावानुपपत्तितो । अहेतुकपटिसन्धिकथायज्झि अविसेसेन पण्डकस्स अहेतुकपटिसन्धिता वुत्ता । आसित्तउसूयपक्खपण्डकानञ्च पटिसन्धितो पट्टायेव पण्डकसभावो, न पवत्तियंयेवाति वदन्ति । तेनेव अहेतुकपटिसन्धिनिद्वेसे जच्चन्धबधिरादयो विय पण्डको जातिसद्देन विसेसेत्वा न निद्विट्ठो । इधापि चतुत्थपाराजिकसंवण्णनायं (पारा० अट्ठ० २.२३३) “अभब्बपुग्गले दस्सेन्तेन पण्डकतिरच्छानगतउभतोब्यञ्जनका तयो वत्थुविपन्ना अहेतुकपटिसन्धिका, तेसं सग्गो अवारितो, मग्गो पन वारितो”ति अविसेसेन वुत्तं ।

पण्डकवत्थुकथावण्णना निद्विता ।

### थेय्यसंवासकवत्थुकथावण्णना

११०. थेय्यसंवासकवत्थुमिह **कोलज्जाति** मातुवंसे पितुवंसे च जाता मातापितुप्पभृतिसब्बजातयो । थेय्याय संवासो एतस्साति **थेय्यसंवासको** । सो च न संवासमत्तस्सेव थेनको इधाधिप्पेतो, अथ खो लिङ्गस्स तदुभयस्स च थेनकोपीति आह “तयो थेय्यसंवासका”तिआदि । न यथावुड्ढं वन्दनं सादियतीति यथावुड्ढं भिक्खूनां वा सामणेरानं वा वन्दनं न सादियति । यथावुड्ढं वन्दनं सादियतीति अत्तना मुसावादं कत्वा दस्सितवस्सानुरूपं यथावुड्ढं वन्दनं सादियति । **भिक्खुवस्सगणनादिको**ति इमिना न एककम्मादिकोव इध संवासो नामाति दस्सेति ।

**राज...पे०... भयेनाति** एत्थ **भय-सद्धो** पच्चेकं योजेतब्बो “राजभयेन दुब्भिकखभयेना”तिआदिना । **संवासं नाधिवासेति, याव सो सुद्धमानसोति** राजभयादीहि गहितलिङ्गताय सो सुद्धमानसो याव संवासं नाधिवासेतीति अत्थो । यो हि राजभयादिं विना केवलं भिक्खू वञ्चेत्वा तेहि सद्धिं संवसितुकामताय लिङ्गं गण्हाति, सो असुद्धचित्तताय लिङ्गगहणेनेव थेय्यसंवासको नाम होति । अयं पन तादिसेन असुद्धचित्तेन भिक्खू वञ्चेतुकामताय अभावतो याव संवासं नाधिवासेति, ताव थेय्यसंवासको नाम न होति । तेनेव “राजभयादीहि गहितलिङ्गानं ‘गिही मं समणोति जानन्तू’ति वञ्चनाचित्ते सतिपि भिक्खूनां वञ्चेतुकामताय अभावा दोसो न जातो”ति **तीसुपि गण्ठपदेसु** वुत्तं । केचि पन “वूपसन्तभयता इध सुद्धचित्तता”ति वदन्ति, एवञ्च सति सो वूपसन्तभयो याव संवासं नाधिवासेति, ताव थेय्यसंवासको न होतीति अयमत्थो विज्जायति । इमस्मिञ्च अत्थे विज्जायमाने अवूपसन्तभयस्स संवाससादियनेपि थेय्यसंवासकता न होतीति आपज्जेय्य, न च अट्ठकथायं अवूपसन्तभयस्स संवाससादियनेपि अथेय्यसंवासकता दस्सिता । **सब्बपासण्डियभत्तानि भुञ्जन्तोति** च इमिना अवूपसन्ततयेनपि संवासं असादियन्तेनेव वसितब्बन्ति दीपेति । तेनेव **तीसुपि गण्ठपदेसु** वुत्तं “यस्मा विहारं आगन्त्वा सङ्घिकं गणहन्तस्स संवासं परिहरितुं दुक्करं, तस्मा सब्बपासण्डियभत्तानि भुञ्जन्तोति इदं वुत्त”न्ति, तस्मा राजभयादीहि गहितलिङ्गतायेवेत्थ सुद्धचित्तताति गहेतब्बं ।

**सब्बपासण्डियभत्तानीति** सब्बसामयिकानं साधारणं कत्वा वीथिचतुक्कादीसु ठपेत्वा दातब्बभत्तानि । **कायपरिहारियानीति** कायेन परिहरितब्बानि । **अभुग्गच्छन्तीति** अभिमुखं गच्छन्ति । **कम्मन्तानुद्धानेनाति** कसिगोरक्खादिकम्मकरणेन । **तदेव पत्तचीवरं आदाय विहारं गच्छतीति** चीवरानि निवासनपारुपनवसेन आदाय पत्तञ्च अंसकूटे लग्गेत्वा विहारं गच्छति । **नापि सयं जानातीति** “यो एवं पब्बजति, सो थेय्यसंवासको नाम होती”ति वा

“एवं कातुं न लभती”ति वा “एवं पब्बजितो समणो न होती”ति वा न जानाति । यो एवं पब्बजति, सो थेय्यसंवासको नाम होतीति इदं पन निदस्सनमत्तं । अनुपसम्पन्नकालेयेवाति इमिना उपसम्पन्नकाले सुत्वा सचेपि नारोचेति, थेय्यसंवासको न होतीति दीपेति ।

सिक्खं अप्पच्चक्खाय...पे०... थेय्यसंवासको न होतीति इदं भिक्खूहि दिन्नलिङ्गस्स अपरिच्चत्तत्ता न लिङ्गथेनको होति, लिङ्गानुरूपस्स संवासस्स सादितत्ता नापि संवासथेनको होतीति वुत्तं । एको भिक्खु कासाये सउस्साहोव ओदातं निवासेत्वाति एत्थापि इदमेव कारणं दट्ठब्बं । परतो सामणेरो सलिङ्गे ठितोतिआदिना सामणेस्स वुत्तविधानेसुपि अथेय्यसंवासकपक्खे अयमेव नयो । भिक्खुनियापि एसेव नयोति वुत्तमेवत्थं “सापि हि गिहिभावं पत्थयमाना”तिआदिना विभावेति । यो कोचि वुड्डपब्बजितोति सामणेरे सन्धाय वुत्तं । महापेळादीसूति एतेन गिहिसन्तकं दस्सितं । सयं सामणेरोव...पे०... थेय्यसंवासको न होतीति एत्थ किञ्चापि थेय्यसंवासको न होति, पाराजिकं पन आपज्जतियेव । सेसमेत्थ उत्तानमेव ।

थेय्यसंवासकवत्थुकथावण्णना निट्ठिता ।

### तित्थियपक्कन्तककथावण्णना

तित्थियपक्कन्तककथायं तेसं लिङ्गे आदिन्नमत्ते तित्थियपक्कन्तको होतीति “तित्थियो भविस्सामी”ति गतस्स लिङ्गगहणेनेव तेसं लद्धिपि गहितायेव होतीति कत्वा वुत्तं । केनचि पन “तेसं लिङ्गे आदिन्नमत्ते लद्धिया गहितायपि अगहितायपि तित्थियपक्कन्तको होती”ति वुत्तं, तं न गहेतब्बं । न हि “तित्थियो भविस्सामी”ति गतस्स लिङ्गसम्पटिच्छनतो अज्जं लद्धिगहणं नाम अत्थि । लिङ्गसम्पटिच्छनेनेव हि सो गहितलद्धिको होति । तेनेव “वीमंसनत्थं कुसचीरादीनि...पे०... याव न सम्पटिच्छति, ताव तं लद्धि रक्खति । सम्पटिच्छितमत्ते तित्थियपक्कन्तको होती”ति वुत्तं । नग्गोव आजीवकानं उपस्सयं गच्छति, पदवारे पदवारे दुक्कटन्ति “आजीवको भविस्स”न्ति असुद्धचित्तेन गमनपच्चया दुक्कटं वुत्तं । नग्गेन हुत्वा गमनपच्चयापि दुक्कटा न मुच्चतियेव । कूटवस्सं गणेन्तोति कूटवस्सं गणेतवा संवासं सादियन्तोति अधिप्पायो ।

तित्थियपक्कन्तककथावण्णना निट्ठिता ।

१११. तिरच्छानगतवत्थु उत्तानमेव ।

### मातुघातकादिवत्थुकथावण्णना

११२. मातुघातकादिवत्थूसु अपवाहनन्ति अपगमनं, पतिकरणन्ति अत्थो । यथा समानजातिकस्स विकोपने कम्मं गरुतरं, न तथा विजातिकस्साति आह “मनुस्सिस्थिभूता”ति । पुत्तसम्बन्धेन मातुपितुसमज्जा, दत्तकित्तिमादिवसेनपि पुत्तवोहारो लोके दिस्सति, सो च खो परियायतोति निप्परियायसिद्धतं दस्सेतुं “जनिका माता”ति वुत्तं । यथा मनुस्सत्तभावे ठितस्सेव कुसलधम्मानं तिक्खविसदसूरभावापत्ति यथा तं तिण्णम्पि बोधिसत्तानं बोधित्तयनिब्बत्तियं, एवं मनुस्सत्तभावे ठितस्सेव अकुसलधम्मानम्पि तिक्खविसदसूरभावापत्तीति आह “सयम्पि मनुस्सजातिकेनेवा”ति । चुतिअनन्तरं फलं अनन्तरं नाम, तस्मिं अनन्तरे नियुत्तं, तंनिब्बत्तनेन अनन्तरकरणसीलं, अनन्तरपयोजनं वा आनन्तरियं, तेन आनन्तरियेन मातुघातककम्मेन । पितुघातकेपि येन मनुस्सभूतो जनको पिता सयम्पि मनुस्सजातिकेनेव सता सज्जिच्च जीविता

वोरोपितो, अयं आनन्तरियेन पितुघातककम्मेन पितुघातकोतिआदिना सब्बं वेदितब्बन्ति आह “**पितुघातकेपि एसेव नयो**”ति ।

परिवत्तितलिङ्गम्पि (म० नि० अट्ठ० ३.१२८; अ० नि० अट्ठ० १.१.२७५; विभ० अट्ठ० ८०९) मातरं पितरं वा जीविता वोरोपेन्तस्स आनन्तरियकम्मं होतियेव । सतिपि हि लिङ्गपरिवत्ते सो एव एककम्मनिब्बत्तो भवङ्गप्पबन्धो जीवितिन्द्रियप्पबन्धो च, नाज्जोति । यो पन सयं मनुस्सो तिरच्छानभूतं मातरं वा पितरं वा, सयं वा तिरच्छानभूतो मनुस्सभूतं, तिरच्छानभूतोयेव वा तिरच्छानभूतं जीविता वोरोपेति, तस्स कम्मं आनन्तरियं न होति, भारियं पन होति, आनन्तरियं आहच्चेव तिड्ढति । एळकचतुक्कं सङ्गामचतुक्कं चोरचतुक्कञ्चेत्थ कथेतब्बं । “एळकं मारेमी”ति अभिसन्धिनापि हि एळकट्टाने ठितं मनुस्सो मनुस्सभूतं मातरं वा पितरं वा मारेन्तो आनन्तरियं फुसति मरणाधिप्पायेनेव आनन्तरियवत्थुनो विकोपितत्ता । एळकाभिसन्धिना पन मातापितिअसन्धिना वा एळकं मारेन्तो आनन्तरियं न फुसति आनन्तरियवत्थुअभावतो । मातापितिअभिसन्धिना मातापितरो मारेन्तो फुसतेव । एस नयो इतरस्मिम्पि चतुक्कद्वये । यथा च मातापितूसु, एवं अरहन्तेपि एतानि चतुक्कानि वेदितब्बानि । सब्बत्थ हि पुरिमं अभिसन्धिचित्तं अप्पमाणं, वधकचित्तं पन तदारम्मणं जीवितिन्द्रियञ्च आनन्तरियानानन्तरभावे पमाणं । कतानन्तरियकम्मो च “तस्स कम्मस्स विपाकं पटिबाहिस्सामी”ति सकलचक्कवाळं महाचेतियप्पमाणेहि कञ्चनथूपेहि पूरेत्वापि सकलचक्कवाळं पूरेत्वा निसिन्नस्स भिक्खुसङ्घस्स महादानं दत्त्वापि बुद्धस्स भगवतो सङ्घाटिकण्णं अमुञ्चन्तो विचरित्वापि कायस्स भेदा निरयमेव उपपज्जति, पब्बज्जञ्च न लभति ।

**११५. इच्छमानन्ति ओदातवत्थवसनं इच्छमानं । तेनेवाह “गिहिभावे सम्पटिच्छित्तमत्तेयेवा”**ति । सङ्घभेदककथावित्थारो परतो आवि भविस्सति । **चतुन्नं कम्मानन्ति** अपलोकनादीनं चतुन्नं कम्मानं । **दुट्ठचित्तेनाति** वुत्तमेवत्थं विभावेति “**वधकचित्तेना**”ति । वधकचेतनाय हि दूसितचित्तं इध दुट्ठचित्तं नाम । **लोहितं उप्पादेतीति** एत्थ तथागतस्स अभेज्जकायताय परूपक्कमेन चम्मच्छेदं कत्वा लोहितपग्घरणं नाम नत्थि, सरीरस्स पन अन्तोयेव एकस्मिं ठाने लोहितं समोसरति, आघातेन पकुप्पमानं सज्जितं होति । देवदत्तेन पविद्धसिलतो भिज्जित्वा गतसक्खलिकापि तथागतस्स पादन्तं पहरि, फरसुना पहटो विय पादो अन्तोलोहितोयेव अहोसि । जीवको पन तथागतस्स रुचिया सत्थकेन चम्मं छिन्दित्वा तम्हा ठाना दुट्ठलोहितं नीहरित्वा फासुमकासि, तेनस्स पुज्जकम्ममेव अहोसि । तेनाह “**जीवको विया**”तिआदि ।

अथ ये परिनिब्बुते तथागते चेतियं भिन्दन्ति, बोधिं छिन्दन्ति, धातुम्हि उपक्कमन्ति, तेसं किं होतीति? भारियं कम्मं होति आनन्तरियसदिसं । सधातुकं पन थूपं वा पटिमं वा बाधमानं बोधिसाखं छिन्दितुं वट्ठति । सचेपि तत्थ निलीना सकुणा चेतिये वच्चं पातेन्ति, छिन्दितुं वट्ठतियेव । परिभोगचेतियतो हि सरीरचेतियं गरुतरं । चेतियवत्थुं भिन्दित्वा गच्छन्ते बोधिमूलोपि छिन्दित्वा हरितुं वट्ठति । या पन बोधिसाखा बोधिघरं बाधति, तं गेहरक्खणत्थं छिन्दितुं न लभति । बोधिअत्थज्झि गेहं, न गेहत्थाय बोधि । आसनघरेपि एसेव नयो । यस्मिं पन आसनघरे धातु निहिता होति, तस्स रक्खणत्थाय बोधिसाखं छिन्दितुं वट्ठति । बोधिजग्गनत्थं ओजोहरणसाखं वा पूतिट्टानं वा छिन्दितुं वट्ठतियेव, सत्थु रूपकायपटिजग्गने विय पुज्जम्पि होति ।

मातुघातकादिवत्थुकथावण्णना निड्ढिता ।

**उभतोव्यज्जनकवत्थुकथावण्णना**

**११६. उभतो ब्यञ्जनमस्स अत्थीति उभतोब्यञ्जनकोति** इमिना असमानाधिकरणविसयो बाहिरत्थसमासोयं, पुरिमपदे च विभक्तिअलोपोति दस्सेति । **ब्यञ्जनन्ति** चेत्थ इत्थिनिमित्तं पुरिसनिमित्तञ्च अधिप्पेतं । अथ उभतोब्यञ्जनकस्स एकमेव इन्द्रियं, उदाहु द्वेति? एकमेव “यस्स इत्थिन्द्रियं उप्पज्जति, तस्स पुरिसिन्द्रियं उप्पज्जतीति? नो । यस्स वा पन पुरिसिन्द्रियं उप्पज्जति, तस्स इत्थिन्द्रियं उप्पज्जतीति? नो”ति (यम० ३.इन्द्रिययमक.१८८) एकस्मिं सन्ताने इन्द्रियद्वयस्स पटिसिद्धत्ता, तञ्च खो इत्थिउभतोब्यञ्जनकस्स इत्थिन्द्रियं, पुरिसउभतोब्यञ्जनकस्स पुरिसिन्द्रियं । यदि एवं दुतियब्यञ्जनकस्स अभावो आपज्जति । इन्द्रियहि ब्यञ्जनकारणं वुत्तं, तञ्च तस्स नत्थीति? वुच्चते — न तस्स इन्द्रियं दुतियब्यञ्जनकारणं । कस्मा? सदा अभावतो । इत्थिउभतोब्यञ्जनकस्स हि यदा इत्थिया रागचित्तं उप्पज्जति, तदा पुरिसब्यञ्जनं पाकटं होति, इत्थिब्यञ्जनं पटिच्छन्नं गुळ्हं होति, तथा इतरस्स इतरं । यदि च तेसं इन्द्रियं दुतियब्यञ्जनकारणं भवेय्य, सदापि ब्यञ्जनद्वयं तिठ्ठेय्य, न पन तिठ्ठति, तस्मा वेदितब्बमेतं “न तस्स तं ब्यञ्जनकारणं, कम्मसहायं पन रागचित्तमेवेत्थ कारण”न्ति ।

यस्मा चस्स एकमेव इन्द्रियं होति, तस्मा इत्थिउभतोब्यञ्जनको सयम्पि गब्भं गण्हाति, परम्पि गण्हापेति । पुरिसउभतोब्यञ्जनको परं गण्हापेति, सयं पन न गण्हाति । यदि पटिसन्धियं पुरिसलिङ्गं, यदि पटिसन्धियं इत्थिलिङ्गन्ति च पटिसन्धियं लिङ्गसम्भावो **कुरुन्दियं**वुत्तो, सो च अयुत्तो । पवत्तियंयेव हि इत्थिलिङ्गादीनि समुट्ठहन्ति, न पटिसन्धियं । पटिसन्धियं पन इन्द्रियमेव समुट्ठाति, न लिङ्गादीनि । न च इन्द्रियमेव लिङ्गन्ति सक्का वत्तुं इन्द्रियलिङ्गानं भिन्नसभावत्ता । वुत्तज्जेतं **अट्टसालिनियं** (ध० स० अट्ट० ६३२) —

“इत्थत्तं इत्थिभावोति उभयं एकत्थं, इत्थिसभावोति अत्थो । अयं कम्मजो पटिसन्धिसमुट्ठितो । इत्थिलिङ्गादि पन इत्थिन्द्रियं पटिच्च पवत्ते समुट्ठितं । यथा बीजे सति बीजं पटिच्च बीजपच्चया रुक्खो वड्ढित्वा साखाविटपसम्पन्नो हुत्वा आकासं पूरेत्वा तिठ्ठति, एवमेव इत्थिभावसङ्घाते इत्थिन्द्रिये सति इत्थिलिङ्गादीनि होन्ति । बीजं विय हि इत्थिन्द्रियं, बीजं पटिच्च वड्ढित्वा आकासं पूरेत्वा ठितरुक्खो विय इत्थिन्द्रियं पटिच्च इत्थिलिङ्गादीनि पवत्ते समुट्ठहन्ति । तत्थ इत्थिन्द्रियं न चक्खुविज्जेय्यं, मनोविज्जेय्यमेव । इत्थिलिङ्गादीनि चक्खुविज्जेय्यानिपि मनोविज्जेय्यानिपी”ति ।

तेनेवाह “तत्थ विचारणक्कमो वित्थारतो **अट्टसालिनिया धम्मसङ्गहट्ठकथाय वेदितब्बो**”ति ।

उभतोब्यञ्जनकवत्थुकथावण्णना निट्ठिता ।

### अनुपज्झायकादिवत्थुकथावण्णना

**११७. सिक्खापदं अपज्जत्तं होतीति** इधेव पज्जत्तं सिक्खापदं सन्धाय वुत्तं । **उपज्झं अग्गाहापेत्वा**ति “उपज्झायो मे, भन्ते, होही”ति एवं उपज्झं अग्गाहापेत्वा । कम्मवाचाय पन उपज्झायकित्तनं कतंयेवाति दट्ठब्बं । अज्जथा “पुगलं न परामसती”ति वुत्तकम्मविपत्तिसम्भवतो कम्मं कुप्पेय्य, तेनेव “उपज्झायं अकित्तेत्वा”ति अवत्वा “उपज्झं अग्गाहापेत्वा”इच्चेव वुत्तं । यथा च अपरिपुण्णपत्तचीवरस्स उपसम्पादनकाले कम्मवाचाय “परिपुण्णस्स पत्तचीवर”न्ति असन्तवत्थुं कित्तेत्वा कम्मवाचाय कतायपि उपसम्पदा रुहति, एवं “अयं बुद्धरक्खितो आयस्मतो धम्मरक्खितस्स उपसम्पदापेक्खो”ति असन्तं पुगलं कित्तेत्वा केवलं सन्तपदनीहारेन कम्मवाचाय कताय उपसम्पदा रुहितयेवाति दट्ठब्बं । तेनेवाह “**कम्मं पन न कुप्पती**”ति । “न, भिक्खवे, अनुपज्झायको उपसम्पादेतब्बो, यो उपसम्पादेय्य, आपत्ति



दुक्कटस्सा’ति एतकमेव वत्वा “सो च पुग्गलो अनुपसम्पन्नो”ति अवुत्तत्ता कम्मविपत्तिलक्खणस्स च असम्भवतो “तं न गहेतब्ब”न्ति वुत्तं। “पञ्चवग्गकरणञ्चे, भिक्खवे, कम्मं पण्डकपञ्चमो कम्मं करेय्य, अकम्मं न च करणीय”न्तिआदिवचनतो (महाव० ३९०) पण्डकादीनम्मि उभतोब्यञ्जनकपरियन्तानं गणपूरकभावेयेव कम्मं कुप्पति, न अञ्जथाति आह “उभतोब्यञ्जनकुपज्झायपरियोसानेसुपि एसेव नयो”ति।

अनुपज्झायकादिवत्थुकथावण्णना निट्ठिता।

### अपत्तकादिवत्थुकथावण्णना

११८. अञ्जे वा भिक्खू दातुकामा होन्तीति सम्बन्धो। **अनामद्वुपिण्डपातन्ति** अगगहितअगं पिण्डपातं। **सामणेरभागसमको आमिसभागो**ति एत्थ किञ्चापि सामणेरानं आमिसभागस्स समकमेव दिव्यमानत्ता विसुं सामणेरभागो नाम नत्थि, हेट्ठा गच्छन्तं पन भत्तं कदाचि मन्दं भवेय्य, तस्मा उपरि अगगहेत्वा सामणेरपाळियाव गहेत्वा दातब्बोति अधिप्पायो। नियतपब्बज्जस्सेव चायं भागो दीयति। तेनेव “**अपक्कं पत्तं**”न्तिआदि वुत्तं।

अपत्तकादिवत्थुकथावण्णना निट्ठिता।

### हत्थच्छिन्नादिवत्थुकथावण्णना

११९. **अजपदके**ति अजपदसण्ठाने पदेसे। **ब्रह्मजुगत्तो**ति ब्रह्मा विय उजुगत्तो। **अवसेसो सत्तो**ति इमिना लक्खणेन रहितसत्तो। एतेन ठपेत्वा महापुरिसं चक्कवत्तिञ्च इतरे सत्ता खुज्जपक्खिकाति दस्सेति। येभुय्येन हि सत्ता खन्धे कटियं जाणूसूति तीसु ठानेसु नमन्ति। ते कटियं नमन्ता पच्छतो नमन्ति, इतरेसु द्वीसु ठानेसु नमन्ता पुरतो नमन्ति। दीघसरीरा पन एकेन पस्सेन वड्ढा होन्ति, एके मुखं उन्नामेत्वा नक्खत्तानि गणयन्ता विय चरन्ति, एके अप्पमंसलोहिता सूलसदिसा होन्ति, एके पुरतो पब्भारा होन्ति, पवेधमाना गच्छन्ति। **परिवटुमो**ति समन्ततो वट्टलो।

**अट्टिसिराचम्मसरीरो**ति अट्टिसिराचम्ममत्तसरीरो। **कप्पसीसो**ति द्विधाभूतसीसो। **केकरो**ति तिरियं पस्सन्तो। “**उदकतारका** नाम उदकपुब्बुळ”न्ति **गण्ठपदेसु** वुत्तं। **अक्खितारका**ति अक्खिभण्डका। **निप्पखुमक्खी**ति अक्खिदललोमेहि विरहितअक्खिको। पखुम-सद्दो हि लोके अक्खिदललोमेसु निरुळ्हो। **पटङ्गमण्डूको** नाम महामुखमण्डूको। **एळमुखो**ति निच्चपग्घरणकलालमुखो। **सब्बञ्चेतन्ति** “कच्छुगत्तो वा”तिआदिं सन्धाय वदति। **वातण्डिको**ति अण्डकेसु वुद्धिरोगेन समन्नागतो। **विकटो**ति तिरियं गमनपादेहि समन्नागतो, यस्स च चङ्कमतो जाणुका बहि गच्छन्ति। **पण्हो**ति पच्छतो परिवत्तपादेहि समन्नागतो, यस्स चङ्कमतो जाणुका अन्तो पविसन्ति।

कुण्डपादताय कारणं विभावेति “**मज्झे सङ्कुटितपादत्ता**”ति। **अग्गे सङ्कुटितपादत्ता**ति कुण्डपादताय कारणनिदस्सनं। कुण्डपादस्सेव गमनसभावं विभावेति “**पिट्ठिपादग्गेन चङ्कमन्तो**”ति। **मम्मनन्ति** खलितवचनं। यो एकमेव अक्खरं चतुपञ्चक्खत्तुं वदति, तस्सेतं अधिवचनं।

हत्थच्छिन्नादिवत्थुकथावण्णना निट्ठिता।

### अलज्जीनिस्सयवत्थुकथावण्णना

१२०. निस्सयपटिसंयुत्तवत्थूसु भिक्खूहि समानो सीलादिगुणभागो अस्साति भिक्खुसभागो, तस्स भावो भिक्खुसभागता। द्वे तीणि दिवसानि वसित्वा गन्तुकामेन अनिस्सितेन वसितब्बन्ति एत्थ “याव भिक्खुसभागतं जानामी”ति आभोगं विनापि अनिस्सितेन वसितुं वट्ठतीति अधिष्ठायो। भिक्खुसभागतं पन जानन्तो “स्वे गमिस्सामि, किं मे निस्सयेना”ति अरुणं उट्ठपेतुं न लभति। “पुरारुणा उट्ठित्वाव गमिस्सामी”ति आभोगेन सयन्तस्स सचे अरुणो उग्गच्छति, वट्ठति। “सत्ताहं वसिस्सामी”ति आलयं करोन्तेन पन निस्सयो गहेतब्बोति “सत्ताहमत्तं वसिस्सामि, किं भिक्खुसभागताजाननेना”ति जानने धुरं निक्खिपित्वा वसितुं न लभति, भिक्खुसभागतं उपपरिक्खित्वा निस्सयो गहेतब्बोति अत्थो।

### गमिकादिनिस्सयवत्थुकथावण्णना

१२१. अन्तरामग्गे विस्समन्तो वा...पे०... अनापत्तीति असति निस्सयदायके अनापत्ति। तस्स निस्सायाति पाळिअनुरूपतो वुत्तं, तं निस्सायाति अत्थो। सचे पन आसाळ्हीमासे...पे०... तत्थ गन्तब्बन्ति एत्थ सचे सो वस्सूपनायिकाय आसन्नाय गन्तुकामो सुणाति “असुको महाथेरो आगमिस्सती”ति, तज्जे आगमेति, वट्ठति। आगमेन्तस्सेव चे वस्सूपनायिकदिवसो होति, होतु, गन्तब्बं तत्थ, यत्थ निस्सयदायकं लभति। केचि पन “सचे सो गच्छन्तो जीवितन्तरायं ब्रह्मचरियन्तरायं वा पस्सति, तत्थेव वसितब्ब”न्ति वदन्ति।

### गोत्तेन अनुस्सावनानुजाननकथावण्णना

१२२. “इत्थन्नामो इत्थन्नामस्स आयस्मतो”ति नामकित्तनस्स अनुस्सावनाय आगतत्ता “नाहं उस्सहामि थेरस्स नामं गहेतु”न्ति वुत्तं, “आयस्मतो पिप्पलिसस्स उपसम्पदापेक्खो”ति एवं नामं गहेतुं न उस्सहामीति अत्थो। “गोत्तेनपि अनुस्सावेतु”न्ति वचनतो येन वोहारेण वोहरति, तेन वट्ठतीति सिद्धं। “कोनामो ते उपज्झायो”ति पुट्टेनपि गोत्तमेव नामं कत्वा वत्तब्बन्ति सिद्धं होति, तस्मा चतुब्बिधेसु नामेसु येन केनचि नामेन अनुस्सावना कातब्बाति वदन्ति। एकस्स बहूनि नामानि होन्ति, तत्थ एकं नामं जत्तिया, एकं अनुस्सावनाय कातुं न वट्ठति, अत्थतो ब्यञ्जनतो च अभिन्नाहि अनुस्सावनाहि भवितब्बन्ति। किञ्चापि “इत्थन्नामो इत्थन्नामस्स आयस्मतो”ति पाळियं “आयस्मतो”ति पदं पच्छा वुत्तं, कम्मवाचापाळियं पन “अयं बुद्धरक्खितो आयस्मतो धम्मरक्खितस्सा”ति पठमं लिखितन्ति तं उप्पटिपाटिया वुत्तन्ति न पच्चेतब्बं। पाळियज्झि “इत्थन्नामो इत्थन्नामस्स आयस्मतो”ति अत्थमत्तं दस्सितं, तस्मा पाळियं अवुत्तोपि “अयं बुद्धरक्खितो आयस्मतो धम्मरक्खितस्सा”ति कम्मवाचापाळियं पयोगो दस्सितो। “न मे दिट्ठो इतो पुब्बे इच्चायस्मा सारिपुत्तो”ति च “आयस्मा सारिपुत्तो अत्थकुसलो”ति च पठमं “आयस्मा”ति पयोगस्स दस्सनतोति वदन्ति। कत्थचि “आयस्मतो बुद्धरक्खितत्थेरस्सा”ति वत्वा कत्थचि केवलं “बुद्धरक्खितस्सा”ति सावेति, सावनं हापेतीति न वुच्चति नामस्स अहापितत्ताति एके। सचे कत्थचि “आयस्मतो बुद्धरक्खितस्सा”ति वत्वा कत्थचि “बुद्धरक्खितस्सायस्मतो”ति सावेति, पाठानुरूपत्ता खेत्तमेव ओतिण्णन्तिपि एके। ब्यञ्जनभेदप्पसङ्गतो अनुस्सावनानं तं न वट्ठतीति वदन्ति। सचे पन सब्बट्ठानेपि एतेनेव पकारेण वदति, वट्ठति।

### द्वेउपसम्पदापेक्खादिवत्थुकथावण्णना

१२३. एकानुस्सावनेति एत्थ एकतो अनुस्सावनं एतेसन्ति एकानुस्सावनाति असमानाधिकरणविसयो बाहिरत्थसमासोति दट्ठब्बं। तेनेवाह “द्वे एकतोअनुस्सावने”ति। तत्थ एकतोति एकक्खणोति अत्थो, विभत्तिअलोपेन

चायं निद्देशो । पुरिमनयेनेव एकतोअनुस्सावने कातुन्ति “एकेन एकस्स, अज्जेन इतरस्सा”तिआदिना पुब्बे वुत्तनयेन द्वीहि वा तीहि वा आचरियेहि एकेन वा एकतोअनुस्सावने कातुं ।

### उपसम्पदाविधिकथावण्णना

१२६. वज्जावज्जं उपनिज्झायतीति उपज्झाति इमिना उपज्झायसदसमानत्थो उपज्झासद्वोपीति दस्सेति ।

### चत्तारोनिस्सयादिकथावण्णना

१३०. सम्भोगेति धम्मसम्भोगे आमिससम्भोगे च । अनापत्ति सम्भोगे संवासेति एत्थ च अयमधिष्णायो — यस्मा अयं ओसारणकम्मस्स कतत्ता पकतत्तद्वाने ठितो, तस्मा न उक्खित्तकेन सद्धिं सम्भोगादिपच्चया पाचित्तियं, नापि अलज्जिना सद्धिं परिभोगपच्चया दुक्कटं अलज्जीलक्खणानुपपत्तितो । यो हि उच्छुरसकसटानं सत्ताहकालिकयावजीविकत्ता वट्टति विकाले उच्छु खादितुन्ति सज्जं उप्पादेत्वा तं खादित्वा तप्पच्चया पाचित्तियं न पस्सति “वट्टती”ति तथासज्जिताय, यो वा पन आपत्तिमापन्नभावं पटिजानित्वा “न पटिकरोमी”ति अभिनिविसति, अयं —

“सज्जिच्च आपत्तिं आपज्जति, आपत्तिं परिगूहति ।

अगतिगमनञ्च गच्छति, एदिसो वुच्चति अलज्जीपुग्गलो”ति ॥ (परि० ३५९) —

वुत्तलक्खणे अपतनतो अलज्जी नाम न होति । तस्मा यथा पुब्बे याव उक्खेपनीयकम्मं कतं, ताव तेन सद्धिं सम्भोगे संवासे च अनापत्ति, एवमिधापीति सब्बथा अनापत्तिद्वानेयेव अनापत्ति वुत्ताति वेदितब्बं । न हि भगवा अलज्जिना सद्धिं सम्भोगपच्चया आपत्तिसम्भवे सति “अनापत्ति सम्भोगे संवासे”ति वदति । ततो यमेत्थ केनचि “अनापत्ति सम्भोगे संवासे”ति इमिना पाचित्तियेन अनापत्ति वुत्ता, “अलज्जीपरिभोगपच्चया दुक्कटं पन आपज्जितियेवा”ति वत्वा बहुधा पपज्चितं, न तं सारतो पच्चेतब्बं । सेसमेत्थ उत्तानमेव ।

इति समन्तपासादिकाय विनयट्ठकथाय सारत्थदीपनियं

महाखन्धकवण्णना निट्ठिता ।

## २. उपोसथक्खन्धकं

### सन्निपातानुजाननादिकथावण्णना

१३२. उपोसथक्खन्धके तरन्ति प्लवन्ति एत्थ बालाति तित्थं । इतोति इमस्मिं सासने लद्धितो । तं कथेन्तीति “इमस्मिं नाम दिवसे मुहुत्ते वा इदं कत्तब्ब”न्तिआदिना कथेन्ति ।

१३४. “सुणातु मे भन्ते”तिआदीसु यं वत्तब्बं, तं मातिकाट्ठकथायं (कट्ठा० अट्ठ० निदानवण्णना) वित्थारतो आगतमेवाति न इध वित्थारयिस्साम, अत्थिकेहि पन ततोयेव गहेतब्बं ।

१३५. आपज्जित्वा वा वुट्ठितोति एत्थ आरोचितापि आपत्ति असन्ती नाम होतीति वेदितब्बं । तेनेव

**मातिकाटुकथायं** (कङ्का० अट्ट० निदानवण्णना) वुत्तं “यस्स पन एवं अनापन्ना वा आपत्ति आपज्जित्वा च पन वुट्ठिता वा देसिता वा आरोचिता वा, तस्स सा आपत्ति असन्ती नाम होती”ति । मुसावादो नाम वचीभेदपच्चया होतीति आह “न मुसावादलक्खणेना”ति । **भगवतो पन वचनेना**ति सम्पजानमुसावादे किं होति? “दुक्कटं होती”ति इमिना वचनेन । **वचीद्वारे अकिरियसमुट्ठाना आपत्ति होतीति** यस्मा यस्स भिक्खुनो अधम्मिकाय पटिज्जाय तुण्हीभूतस्स निसिन्नस्स मनोद्वारे आपत्ति नाम नत्थि, यस्मा पन आवि कातब्बं न आवि अकासि, तेनस्स वचीद्वारे अकिरियसमुट्ठाना आपत्ति होति ।

**वाचाति** वाचाय, य-कारलोपेनायं निद्देशो । केनचि मनुजेन वाचाय अनालपन्तोति योजेतब्बं । **गिरं नो च परे भणेत्याति** “इमे सोस्सन्ती”ति परपुगाले सन्धाय सद्धम्पि न निच्छारेय्य । **आपज्जेय्य वाचसिकन्ति** वाचतो समुट्ठितं आपत्तिं आपज्जेय्य ।

**अन्तरायकरोति** विष्पटिसारवत्थुताय पामोज्जादिसम्भवं निवारेत्वा पठमज्झानादीनं अधिगमाय अन्तरायकरो । **तस्स भिक्खुनो फासु होतीति** अविष्पटिसारमूलकानं पामोज्जादीनं वसेन तस्स भिक्खुनो सुखा पटिपदा सम्पज्जतीति अत्थो ।

सन्निपातानुजाननादिकथावण्णना निट्ठिता ।

### सीमानुजाननकथावण्णना

**१३८. इतरोपीति** सुद्धपंसुपब्बतादिं सन्धाय वदति । **हत्थिप्पमाणो नाम पब्बतो** हेट्ठिमकोटिया अट्ठमरतनुब्बेधो । **तस्माति** यस्मा एकेन न वट्ठति, तस्मा । **द्वित्तिसपलगुळपिण्डप्पमाणता** थूलताय गहेतब्बा, न तुलगणनाय । **अन्तोसारमिस्सकानन्ति** अन्तोसाररुक्खेहि मिस्सकानं । **सूचिदण्डकप्पमाणोति** सीहळदीपे लेखनदण्डप्पमाणोति वदन्ति, सो च कनिट्ठङ्गुलिपरिमाणोति दट्ठब्बं । **एतन्ति** नवमूलसाखानिगमनं । **परभागे कित्तेतुं वट्ठतीति** बहि निक्खमित्वा ठितेसु अट्ठसु मग्गेसु एकस्सा दिसाय एकं, अपराय एकन्ति एवं चतूसु ठानेसु कित्तेतुं वट्ठति ।

**यत्थ कत्थचि उत्तरन्तिया भिक्खुनिया अन्तरवासको तेमियतीति** सिक्खाकरणीयं आगतलक्खणेन तिमण्डलं पटिच्छादेत्वा अन्तरवासकं अनुक्खिपित्वा तित्थेन वा अतित्थेन वा उत्तरन्तिया भिक्खुनिया एकद्वङ्गुलमत्तम्पि अन्तरवासको तेमियति । भिक्खुनिया एव गहणज्चेत्थ भिक्खुनीविभङ्गे भिक्खुनिया वसेन नदीलक्खणस्स पाळियं आगतत्ता तेनेव नयेन दस्सन्तत्थं कत्तं । **सीमं बन्धन्तानं निमित्तं होतीति** अयं वुत्तलक्खणा नदी समुदं वा पविसतु तळाकं वा, पभवतो पट्ठाय निमित्तं होति । **अज्झोत्थरित्वा आवरणं पवत्तितयेवाति** आवरणं अज्झोत्थरित्वा सन्दतियेव । **अप्पवत्तमानाति** असन्दमानुदका । आवरणज्हि पत्वा नदिया यत्तके पदेसे उदकं असन्दमानं सन्तिट्ठति, तत्थ नदीनिमित्तं कातुं न वट्ठति । उपरि सन्दमानट्ठानेयेव वट्ठति, असन्दमानट्ठाने पन उदकनिमित्तं कातुं वट्ठति । ठितमेव हि उदकनिमित्ते वट्ठति, न सन्दमानं । तेनेवाह “**पवत्तनट्ठाने नदीनिमित्तं, अप्पवत्तनट्ठाने उदकनिमित्तं कातुं वट्ठती**”ति । **नदिं भिन्दित्वाति** मातिकामुखद्वारेन नदीकूलं भिन्दित्वा । **उक्खेपिमन्ति** कूपतो विय उक्खिपित्वा गहेतब्बं ।

**सिङ्गाटकसण्ठानाति** तिकोणरच्छासण्ठाना । **मुदिङ्गसण्ठानाति** मुदिङ्गभेरी विय मज्झे वित्थता उभोसु कोटीसु सङ्कोटिता होति । **उपचारं ठपेत्वाति** पच्छा सीमं बन्धन्तानं सीमाय ओकासं ठपेत्वा । **अन्तोनिमित्तगतेहि पनाति** एकस्स गामस्स उपट्ठं अन्तो कत्तुकामताय सति सब्बेसं आगमने पयोजनं नत्थीति कत्वा वुत्तं । **आगन्तब्बन्ति** च सामीचिवसेन

वृत्तं, नायं नियमो “आगन्तव्यमेवा”ति । तेनेवाह “आगमनमपि अनागमनमपि वट्टती”ति । अबद्धाय हि सीमाय नानागामखेत्तानं नानासीमसभावत्ता तेसं अनागमनेपि वगगकम्मं न होति, तस्मा अनागमनमपि वट्टति । बद्धाय पन सीमाय एकसीमभावतो पुन अज्जस्मिं कम्मे करियमाने अन्तो सीमगतेहि आगन्तव्यमेवाति आह “अविप्पवाससीमा...पे०... आगन्तव्य”न्ति । निमित्तकित्तनकाले असोधितायपि सीमाय नेवत्थि दोसो निमित्तकित्तनस्स अपलोकनादीसु अज्जतराभावतो ।

भण्डुकम्मापुच्छनं सन्थाय पब्बज्जा-गहणं । सुखकरणत्थं । **सुखकरणत्थं** । **एकवीसति भिक्खू गणहातीति** वीसतिवगगकरणीयपरमत्ता सङ्गकम्मस्स कम्मरहेन सद्धिं एकवीसति भिक्खू गणहाति । इदञ्च निसिन्नानं वसेन वृत्तं । हेट्ठिमन्ततो हि यत्थ एकवीसति भिक्खू निसीदितुं सक्कोन्ति, तत्तके पदेसे सीमं बन्धितुं वट्टति । **न सक्खिस्सन्तीति** अविप्पवाससीमाय बद्धभावं असल्लखत्वा “समानसंवासकमेव समूहनस्सामा”ति वायमन्ता न सक्खिस्सन्ति । बद्धाय हि अविप्पवाससीमाय तं असमूहनित्वा “समानसंवासकसीमं समूहनस्सामा”ति कतायपि कम्मवाचाय असमूहताव होति सीमा । पठमज्झि अविप्पवासं समूहनित्वा पच्छा सीमा समूहनितव्वा । एकरतनप्पमाणा सुविज्जेय्यतरा होतीति कत्वा वृत्तं “**एकरतनप्पमाणा वट्टती**”ति । एकङ्गुलमत्तापि सीमन्तरिका वट्टतियेव । तत्तकेनपि हि सीमा असम्भिन्नाव होति ।

**अवसेसनिमित्तानीति** महासीमाय बाहिरपस्से निमित्तानि । खण्डसीमतो पट्टाय बन्धनं आचिण्णं, आचिण्णकरणेनेव च सम्मोहो न होतीति आह “**खण्डसीमतोव पट्टाय बन्धितव्वा**”ति । **कुटिगेहेति** कुटिघरे, भूमिघरेति अत्थो । **उदुक्खलन्ति** खुद्दकावाटं । **निमित्तं न कातव्वन्ति** तं राजिं वा उदुक्खलं वा निमित्तं न कातव्वं ।

**हेट्ठा न ओतरतीति** भित्तितो ओरं निमित्तानि ठपेत्वा कित्तितत्ता हेट्ठा आकासप्पदेसं न ओतरति । **हेट्ठापि ओतरतीति** सचे हेट्ठा अन्तोभित्तियं एकवीसतिया भिक्खूनां ओकासो होति, ओतरति । ओतरमाना च उपरिसीमप्पमाणेन न ओतरति, समन्ता भित्तिप्पमाणेन ओतरति । **ओतरणानोतरणं वृत्तनयेनेव वेदितव्वन्ति** सचे हेट्ठा एकवीसतिया भिक्खूनां ओकासो होति, ओतरति । नो चे, न ओतरतीति अधिप्पायो । **सब्बो पासादो सीमट्ठो होतीति** उपरिमतलेन सद्धिं एकाबद्धभित्तिको वा होतु मा वा, सब्बोपि पासादो सीमट्ठोव होति ।

**तालमूलकपब्बतेति** तालमूलसदिसे पब्बते । सो च हेट्ठा महन्तो हुत्वा अनुपुब्बेन तनुको होतीति दट्ठव्वं । **पणवसण्ठानो मज्झे** तनुको होति मूले अगे च वित्थतो । **हेट्ठा वा मज्झे वाति** मुदिङ्गसण्ठानस्स हेट्ठा पणवसण्ठानस्स मज्झे । **आकासपब्भारन्ति** भित्तिया अपरिक्खित्तपब्भारं । **अन्तोलेणं होतीति** पब्बतस्स अन्तो लेणं होति । **सीमामाळकेति** खण्डसीमामाळके । **महासीमं सोधेत्वा वा कम्मं कातव्वन्ति** महासीमगता भिक्खू हत्थपासं वा आनेतव्वा, सीमतो वा बहि कातव्वाति अधिप्पायो । **गण्ठपदेसु** पन “महासीमगतेहि भिक्खूहि तं साखं वा पारोहं वा अनामसित्वा ठातव्वन्ति अधिप्पायो”ति वृत्तं, तं न गहेतव्वं । **पुरिमनयेपीति** खण्डसीमाय उट्ठित्वा महासीमाय ओणतरुक्खेपि । **उक्खिपापेत्वा कातुं न वट्टतीति** खण्डसीमाय अन्तो ठितत्ता रुक्खस्स तत्थ ठितो हत्थपासंयेव आनेतव्वोति उक्खिपापेत्वा कातुं न वट्टति ।

**१४०. पारयतीति** अज्झोत्थरति । **पाराति** सीमापेक्खो इत्थिलिङ्गनिद्देसो । **अस्साति** भवेय्य । इधाधिप्पेतनावाय पमाणं दस्सेन्तो आह “**या सब्बन्तिमेन परिच्छेदेन...पे०... तयो जने वहती**”ति । इमिना च वृत्तप्पमाणतो खुद्दका नावा विज्जमानापि इध असन्तपक्खं भजतीति दीपेति । अवस्सं लब्भनेय्या धुवनावाव होतीति सम्बन्धो । रुक्खं छिन्दित्वा

कतोति पाठसेसो । परतीरे सम्मुखद्वानेति ओरिमतीरे सब्परियन्तनिमित्तस्स सम्मुखद्वाने । सब्निमित्तानं अन्तो ठिते भिक्खू हत्थपासगते कत्वाति एत्थ सचे एकं गामखेत्तं होति, उभोसु तीरेसु सब्निमित्तानं अन्तो ठिते भिक्खू हत्थपासगते कत्वा सम्मन्नितब्बा । नानागामखेत्तं चे, समानसंवासकसीमाबन्धनकाले अनागन्तुम्पि वट्ठति । अविप्पवाससीमासम्मुतियं पन आगन्तब्बमेव । यस्मा उभोसु तीरेसु निमित्तकित्तनमत्तेन दीपको सङ्गहितो नाम न होति, तस्मा दीपकेपि निमित्तानि विसुं कित्तेतब्बानेवाति आह “दीपकस्स ओरिमन्ते च पारिमन्ते च निमित्तं कित्तेतब्ब”न्ति । दीपकसिखरन्ति दीपकमत्थकं । पब्बतसण्ठानाति दीपकस्स एकतो अधिकतरत्ता वुत्तं ।

सीमानुजाननकथावण्णना निट्ठिता ।

### उपोसथागारादिकथावण्णना

१४२. वत्थुवसेन वुत्तन्ति “मयञ्चम्हा असम्मताय भूमिया निसिन्ना पातिमोक्खं अस्सुम्हा”ति वत्थुम्हि पातिमोक्खसवनस्स आगतत्ता वुत्तं । उपोसथप्पमुखं नाम उपोसथागारस्स सम्मुखद्वानं । पाळियं “पठमं निमित्ता कित्तेतब्बा”ति एत्तकमेव वत्वा सीमासम्मुतियं विय “पब्बतनिमित्तं पासाणनिमित्त”न्तिआदिना विसेसेत्वा निमित्तानं अदस्सितत्ता “खुद्दकानि वा...पे०... यानि कानिचि निमित्तानी”ति वुत्तं । कित्तेतुं वट्ठतीति इमिना सम्बन्धो ।

### अविप्पवाससीमानुजाननकथावण्णना

१४४. अस्साति भिक्खुनिसङ्गस्स । द्वेपि सीमायोति पठमं वुत्ता अविप्पवाससीमा समानसंवासकसीमा च । न कम्मवाचं वग्गं करोन्तीति कम्मवाचं न भिन्दन्ति, कम्मं न कोपेतीति अधिप्पायो । एत्थाति “ठपेत्वा गामञ्च गामूपचारञ्चा”ति एत्थ । गामञ्च गामूपचारञ्च न ओत्थरतीति “ठपेत्वा गामञ्च गामूपचारञ्चा”ति वुत्तत्ता । सीमासङ्ख्यमेव गच्छतीति अविप्पवाससीमासङ्खं गच्छति । एकम्पि कुलं पविट्ठं वाति अभिनवकतगेहेसु सब्पठमं एकम्पि कुलं पविट्ठं अत्थि । अगतं वाति पोराणकगामे अज्जेसु गेहानि छुट्टेत्वा गतेसु एकम्पि कुलं अगतं अत्थि ।

अविप्पवाससीमा न समूहन्तब्बाति महासीमं सन्धाय वदति । निरासङ्कद्वानेसु ठत्वाति चेतियङ्गणादीनं खण्डसीमाय अनोकासत्ता वुत्तं । खण्डसीमज्झि बन्धन्ता तादिसं ठानं पहाय अज्जस्मिं विवित्ते ओकासे बन्धन्ति । अप्पेव नाम समूहनितुं सक्खिस्सन्तीति अविप्पवाससीमंयेव समूहनितुं सक्खिस्सन्ति, न खण्डसीमं । पटिबन्धितुं पन न सक्खिस्सन्तेवाति खण्डसीमाय अज्जातत्ता न सक्खिस्सन्ति । न समूहनितब्बाति खण्डसीमं अजानन्तेहि न समूहनितब्बा । उपोसथस्स विसुं गहितत्ता अवसेसकम्मवसेन समानसंवासता वेदितब्बा ।

### गामसीमादिकथावण्णना

१४७. अपरिच्छिन्नायाति बद्धसीमावसेन अकतपरिच्छेदाय । येन केनचि खणित्वा अकतोति अन्तमसो तिरच्छानेनपि खणित्वा अकतो । तस्स अन्तोहत्थपासं विजहित्वा ठितो कम्मं कोपेतीति इमिना बहिपरिच्छेदतो यत्थ कत्थचि ठितो कम्मं न कोपेतीति दीपेति । यं पन वुत्तं मातिकाटुकथायं (कट्ठा० अट्ठ० निदानवण्णना) “परिच्छेदब्धन्तरे हत्थपासं विजहित्वा ठितोपि परिच्छेदतो बहि अज्जं तत्तकंयेव परिच्छेदं अनतिक्कमित्वा ठितोपि कम्मं कोपेति, इदं सब्बअट्ठकथासु सन्निट्ठान”न्ति, तत्थ “अज्जं तत्तकंयेव परिच्छेदं अनतिक्कमित्वा ठितोपि कम्मं कोपेती”ति इदं नेव पाळियं, न अट्ठकथायं उपलब्धति । यदि चेतं द्विन्नं सङ्गानं विसुं उपोसथादिकम्मकरणाधिकारे वुत्तत्ता उदकुक्खेपतो बहि

अञ्जं उदकुक्खेपं अनतिक्कमित्वा उपोसथादिकरणत्थं ठितो सङ्गो सीमासम्भेदसम्भवतो कम्मं कोपेतीति इमिना अधिप्पायेन वुत्तं सिया, एवं सति युज्जेय्य। तेनेव मातिकाडुकथाय लीनत्थप्पकासनियं वुत्तं “अञ्जं तत्तकंयेव परिच्छेदन्ति दुतियं उदकुक्खेपं अनतिक्कन्तोपि कोपेति। कस्मा? अत्तनो उदकुक्खेपसीमाय परेसं उदकुक्खेपसीमाय अज्झोत्थटत्ता सीमासम्भेदो होति, तस्मा कोपेती”ति। “इदं सब्बअडुकथासु सन्निट्ठान”न्ति च इमिना अधिप्पायेन वुत्तन्ति गहेतब्बं सब्बासुपि अडुकथासु सीमासम्भेदस्स अनिच्छितत्ता। तेनेव हि “अत्तनो च अञ्जेसञ्च उदकुक्खेपपरिच्छेदस्स अन्तरा अञ्जो उदकुक्खेपो सीमन्तरिकत्थाय ठपेतब्बो”ति वुत्तं। अञ्जे पनेत्थ अञ्जथापि पपञ्चेन्ति, तं न गहेतब्बं।

सब्बत्थ सङ्गो निसीदतीति हत्थपासं अविजहित्वा निसीदति। उदकुक्खेपसीमाकम्मं नत्थीति यस्मा सब्बोपि नदीपदेसो भिक्खूहि अज्झोत्थटो, तस्मा समन्ततो नदिया अभावा उदकुक्खेपे पयोजनं नत्थि। उदकुक्खेपप्पमाणा सीमन्तरिका सुविज्जेय्यतरा होति, सीमासम्भेदसङ्का न च सियाति सामीचिदस्सनत्थं “अञ्जो उदकुक्खेपो सीमन्तरिकत्थाय ठपेतब्बो”ति वुत्तं। यत्तकेन पन सीमासम्भेदो न होति, तत्तकं ठपेतुं वट्ठतियेव। तेनेवाहु पोराणा “यत्तकेन सीमासङ्करो न होति, तत्तकम्पि ठपेतुं वट्ठती”ति। ऊनकं पन न वट्ठतीति इदम्पि उदकुक्खेपसीमाय परिसवसेन वट्ठनतो सीमासम्भेदसङ्का सियाति तंनिवारणत्थमेव वुत्तं।

गच्छन्तिया पन नावाय कातुं न वट्ठतीति एत्थ उदकुक्खेपमनतिक्कमित्वा परिवत्तमानाय कातुं वट्ठतीति वेदितब्बं। सीमं वा सोधेत्वाति एत्थ सीमसोधनं नाम गामसीमादीसु ठितानं हत्थपासानयनादि। “नदिं विनासेत्वा तळाकं करोन्ती”ति वुत्तमेवत्थं विभावेति “हेट्ठा पाळि बद्धा”ति, हेट्ठानदिं आवरित्वा पाळि बद्धाति अत्थो। छट्ठितमोदकन्ति तळाकरक्खणत्थं एकमन्तेन छट्ठितमुदकं। देवे अवस्सन्तेति दुब्बुट्टिकाले वस्सानेपि देवे अवस्सन्ते। उप्पतित्वाति उत्तरित्वा। गामनिगमसीमं ओत्थरित्वा पवत्ततीति वुत्तप्पकारे वस्सकाले चत्तारो मासे अब्बोच्छिन्ना पवत्तति। विहारसीमन्ति बद्धसीमं सन्धाय वदति।

अगमनपथेति यत्थ तदहेव गन्त्वा पच्चागन्तुं न सक्का होति, तादिसे पदेसे अरञ्जसीमासङ्गमेव गच्छतीति सत्तब्भन्तरसीमं सन्धाय वदति। तेसन्ति मच्छबन्धानं। गमनपरियन्तस्स ओरतोति गमनपरियन्तस्स ओरिमभागे दीपकं पब्बतञ्च सन्धाय वुत्तं, न समुह्वप्पदेसं।

१४८. संसट्ठविटपाति इमिना अञ्जमञ्जस्स आसन्नतं दीपेति। बद्धा होतीति पच्छिमदिसाभागे सीमं सन्धाय वुत्तं। तस्सा पदेसन्ति यत्थ ठत्वा भिक्खूहि कम्मं कातुं सक्का होति, तादिसं पदेसं। यत्थ पन ठितेहि कम्मं कातुं न सक्का होति, तादिसं पदेसं अन्तोकरित्वा बन्धन्ता सीमाय सीमं सम्भिन्दन्ति नाम। द्विन्नं सीमानं निमित्तं होतीति निमित्तस्स सीमतो बाहिरत्ता सीमासम्भेदो न होतीति वुत्तं। सीमासङ्करं करोतीति वट्ठित्वा सीमप्पदेसं पविट्ठे द्विन्नं सीमानं गतट्ठानस्स दुविज्जेय्यत्ता वुत्तं, न पन तत्थ कम्मं कातुं न वट्ठतीति दस्सनत्थं। न हि सीमा तत्तकेन असीमा होति, द्वे पन सीमा पच्छा वट्ठितेन रुक्खेन अज्झोत्थटत्ता एकाबद्धा होन्ति, तस्मा एकत्थ ठत्वा कम्मं करोन्तेहि इतरं सोधेत्वा कातब्बं।

गामसीमादिकथावण्णना निट्ठिता।

### उपोसथभेदादिकथावण्णना

१४९. अधम्मेन वग्गं उपोसथकम्मन्ति एत्थ यत्थ चत्तारो वसन्ति, तत्थ पातिमोक्खुद्देसो अनुज्जातो। यत्थ द्वे वा

तयो वा वसन्ति, तत्थ पारिसुद्धिउपोसथो। इध पन तथा अकत्वा चतुन्नं वसनद्वाने पारिसुद्धिउपोसथस्स कतत्ता तिण्णं वसनद्वाने च पातिमोक्खस्स उद्दिट्ता “अधम्मेना”ति वुत्तं। यस्मा सब्बेव न सन्निपत्तिं सु, छन्दपारिसुद्धि च सङ्गमज्झंयेव आगच्छति, न गणमज्झं, तस्मा “वग्ग”न्ति वुत्तं।

### पातिमोक्खुद्देसकथावण्णना

१५०. एवमेतं धारयामीति “सुता खो पनायस्मन्तेही”ति एत्थ “एवमेतं धारयामी”ति वत्वा “उद्दिट्ठं खो आयस्मन्तो निदानं, सुता खो पनायस्मन्तेहि चत्तारो पाराजिका धम्मा”ति वत्तब्बं। तेनेव मातिकाट्टकथायं (कङ्का<sup>०</sup> अट्ट<sup>०</sup> निदानवण्णना) “तत्थायस्मन्ते पुच्छामि कच्चित्थ परिसुद्धा, दुतियम्पि पुच्छामि...पे०... तस्मा तुण्ही, एवमेतं धारयामीति वत्वा ‘उद्दिट्ठं खो आयस्मन्तो निदानं’न्ति आदिना नयेन अवसेसे सुतेन साविते उद्दिट्ठो होती”ति वुत्तं। सुतेनाति सुतपदेन। सवरभयन्ति वनचरकभयं। तेनाह “अटविमनुस्सभय”न्ति। “अवसेसं सुतेन सावेतब्ब”न्ति वचनतो निदानुद्देसे अनिट्ठिते सुतेन सावेतब्बं नाम नत्थीति आह “दुतियादीसु उद्देसेसू”ति। उद्दिट्ठउद्देसापेक्खज्झि अवसेसगहणं, तस्मा निदाने उद्दिट्ठे पाराजिकुद्देसादीसु यस्मिं विप्पकते अन्तरायो उपपज्जति, तेन सद्धिं अवसेसं सुतेन सावेतब्बं।

तीहिपि विधीहीति ओसारणकथनसरभज्जेहि। एत्थ च अत्थं भणितुकामताय सुत्तस्स ओसारणा ओसारणं नाम। तस्सेव अत्थप्पकासना कथनं नाम। सुत्तस्स तदत्थस्स वा सरेन भणनं सरभज्जं नाम। सज्झायं अधिट्ठित्वाति “सज्झायं करोमी”ति चित्तं उप्पादेत्वा। ओसारेत्वा पन कथेन्तेनाति पठमं उस्सारेत्वा पच्छा अत्थं कथेन्तेन। मनुस्सानं पन “भणाही”ति वत्तुं वट्ठतीति एत्थ उच्चतरे निसिन्नेनपि मनुस्सानं भणाहीति विसेसेत्वायेव वत्तुं वट्ठति, अविसेसेत्वा पन न वट्ठति। सज्झायं करोन्तेनाति यत्थ कत्थचि निसीदित्वा सज्झायं करोन्तेन। थेरोति यो कोचि अत्तना वुट्ठतरो। एकं आपुच्छित्वाति एकं वुट्ठतरं आपुच्छित्वा। अपरो आगच्छतीति अपरो ततोपि वुट्ठतरो आगच्छति।

पातिमोक्खुद्देसकथावण्णना निट्ठिता।

### पातिमोक्खुद्देसकअज्झेसनादिकथावण्णना

१५५. चोदनावत्थु नाम एकं नगरं। सङ्खउपोसथादिभेदेन नवविधन्ति सङ्खे उपोसथो गणे उपोसथो पुग्गले उपोसथोति एवं कारकवसेन तयो, सुत्तुद्देसो पारिसुद्धिउपोसथो अधिद्वानुपोसथोति एवं कत्तब्बाकारवसेन तयो, चातुहसिको पन्नरसिको सामग्गीउपोसथोति एवं दिवसवसेन तयोति नवविधं। चतुब्बिधं उपोसथकम्मन्ति अधम्मेन वग्गं उपोसथकम्मं, अधम्मेन समग्गं उपोसथकम्मं, धम्मेन वग्गं उपोसथकम्मं, धम्मेन समग्गं उपोसथकम्मन्ति एवं चतुब्बिधम्पि उपोसथकम्मं। दुविधं पातिमोक्खन्ति भिक्खुपातिमोक्खं भिक्खुनीपातिमोक्खन्ति दुविधं पातिमोक्खं। नवविधं पातिमोक्खुद्देसन्ति भिक्खूनं पञ्च उद्देसा, भिक्खुनीनं ठपेत्वा अनियतुद्देसं अवसेसा चत्तारोति नवविधं पातिमोक्खुद्देसं।

### पक्खगणनादिउग्गहणानुजाननकथावण्णना

१५८-१६१. समन्नाहरथाति सल्लक्खेथ। परियेसितब्बानीति भिक्खाचारेन परियेसितब्बानि।

### दिसंगमिकादिवत्थुकथावण्णना



१६३. उत्तुवस्सेयेवाति हेमन्तगिम्हेसुयेव ।

### पारिसुद्धिदानकथावण्णना

१६४. येन केनचि अङ्गपच्चङ्गेन विज्जापेतीति मनसा चिन्तेत्वा हत्थप्पयोगादिना येन केनचि विज्जापेति । सङ्गो नप्पहोतीति द्विन्नं द्विन्नं अन्तरा हत्थपासं अविजहित्वा पटिपाटिया ठातुं नप्पहोति । इतरा पन बिळालसङ्गलिकपारिसुद्धि नामाति एत्थ केचि वदन्ति “बिळालसङ्गलिका बद्धाव होति अन्तोगेहे एव सम्पयोजनत्ता, यथा सा न कत्थचि गच्छति, तथा सापि न गच्छतीति अधिप्पायो । इतरथा विसेसनं निरत्थकं होती”ति । अपरे पन “यथा बहूहि मनुस्सेहि एकस्स बिळालस्स अत्तनो अत्तनो सङ्गलिका गीवाय आबद्धा बिळाले गच्छन्ते गच्छन्ति आबद्धत्ता, न अज्जस्मिं बिळाले गच्छन्ते गच्छन्ति अनाबद्धत्ता, एवमेवस्स भिक्खुस्स बहूहि सङ्गलिकसदिसा छन्दपारिसुद्धि दिन्ना, सा तस्मिं भिक्खुस्मिं गच्छन्ते गच्छति तस्मिं सङ्गलिका विय आबद्धत्ता, न अज्जस्मिं अनाबद्धत्ता”ति वदन्ति । सब्बम्पेतं न सारतो पच्चेतब्बं । अयं पनेत्थ सारो — यथा सङ्गलिकाय पठमवल्लयं दुतियंयेव वल्लयं पापुणाति, न ततियं, एवमयम्पि पारिसुद्धिदायकेन यस्स दिन्ना, ततो अज्जत्थ न गच्छतीति सङ्गलिकसदिसत्ता “बिळालसङ्गलिका”ति वुत्ता । बिळालसङ्गलिकगहणज्जेत्थ यासं कासज्जि सङ्गलिकानं उपलक्खणमत्तन्ति दट्ठब्बं ।

### छन्ददानकथावण्णना

१६५. “सन्ति सङ्गस्स करणीयानी”ति वत्तब्बे वचनविपल्लासेन “करणीय”न्ति वुत्तं । तस्स सम्मुतिदानकिच्चं नत्थि । “हत्थपासं आनेतब्बोयेवा”ति गण्ठपदेसु वुत्तं ।

### सङ्गुपोसथादिकथावण्णना

१६६. सङ्गसन्निपाततो पठमं कातब्बं पुब्बकरणन्ति वुत्तं, पुब्बकरणतो पच्छा कातब्बम्पि उपोसथकम्मतो पठमं कातब्बत्ता पुब्बकिच्चन्ति वुत्तं । उभयम्पि चेतं उपोसथकम्मतो पठमं कत्तब्बत्ता कत्थचि पुब्बकिच्चमिच्चवेव वोहरीयति “किं सङ्गस्स पुब्बकिच्च”न्ति आदीसु विय ।

उपोसथोति तीसु उपोसथदिवसेसु अज्जतरदिवसो । तस्मिज्हि सति इदं सङ्गस्स उपोसथकम्मं पत्तकल्लं नाम होति, नासति । यथाह “न च, भिक्खवे, अनुपोसथे उपोसथो कातब्बो”ति (महाव० १८३) । यावतिका च भिक्खू कम्मप्पत्ताति यत्तका भिक्खू तस्स उपोसथकम्मस्स पत्ता युत्ता अनुरूपा सब्बन्तिमेन परिच्छेदेन चत्तारो भिक्खू पकतत्ता, ते च खो हत्थपासं अविजहित्वा एकसीमायं ठिता । सभागापत्तियो च न विज्जन्तीति एत्थ यं सब्बो सङ्गो विकालभोजनादिना सभागवत्थुना लहुकापत्तिं आपज्जति, एवरूपा “वत्थुसभागा”ति वुच्चन्ति । एतासु हि अविज्जमानासु विसभागासु विज्जमानासुपि पत्तकल्लं होतियेव ।

वज्जनीया च पुगला तस्मिं न होन्तीति “न, भिक्खवे, सगहट्ठाय परिसाया”ति (महाव० १५४) वचनतो गहट्ठो, “न, भिक्खवे, भिक्खुनिया निसिन्नपरिसाय पातिमोक्खं उद्दिसितब्ब”न्ति आदिना (महाव० १८३) नयेन वुत्ता भिक्खुनी सिक्खमाना सामणेरो सामणेरी सिक्खापच्चक्खातको अन्तिमवत्थुअज्झापन्नको आपत्तिया अदस्सने उक्खित्तको आपत्तिया अप्पटिकम्मे उक्खित्तको पापिकाय दिट्ठिया अप्पटिनिस्सग्गे उक्खित्तको पण्डको थेय्यसंवासको तित्थियपक्कन्तको तिरच्छानगतो मातुघातको पितुघातको अरहन्तघातको भिक्खुनीदूसको सङ्गभेदको लोहितुप्पादको

उभतोव्यञ्जनकोति इमे वीसति चाति एकवीसति पुगला वज्जनीया नाम, ते हत्थपासतो बहिकरणवसेन वज्जेतब्बा। एतेसु हि तिविधे उक्खित्तके सति उपोसथं करोन्तो सङ्घो पाचित्तियं आपज्जति, सेसेसु दुक्कटं। एत्थ च **तिरच्छानगतोति** यस्स उपसम्पदा पटिक्खित्ता, सोव अधिप्पेतो, तित्थिया गहट्टेनेव सङ्गहिता। एतेपि हि वज्जनीया। एवं पत्तकल्लं इमेहि चतूहि अङ्गेहि सङ्गहितन्ति वेदितब्बं।

**अज्ज मे उपोसथो पन्नरसोतिपीति पि-**सद्देन पाळियं आगतनयेनेव “अज्ज मे उपोसथो”तिपि वत्तुं वट्ठतीति दीपेति। **मातिकाटुकथायं** (कङ्का० अट्ट० निदानवण्णना) पन “अज्ज मे उपोसथो चातुदसोति वा पन्नरसोति वा वत्त्वा अधिट्ठामीति वत्तब्ब”न्ति वुत्तं।

सङ्घोपोसथादिकथावण्णना निट्ठिता।

### आपत्तिपटिकम्मविधिकथावण्णना

१६९. ननु च “न, भिक्खवे, सापत्तिकेन उपोसथो कातब्बो, यो करेय्य, आपत्ति दुक्कटस्सा”ति एवं सापत्तिकस्स उपोसथकरणे विसुं पज्जत्ता आपत्ति न दिस्सति, तस्मा भगवता पज्जत्तं “न सापत्तिकेन उपोसथो कातब्बो”ति इदं कस्मा वुत्तन्ति आह “**यस्स सिया आपत्ति...पे०... पज्जत्तं होतीति वेदितब्ब**”न्ति। किञ्चापि विसुं पज्जत्ता आपत्ति न दिस्सति, अथ खो “यस्स सिया आपत्ति, सो आविकरेय्या”तिआदिं वदन्तेन अत्थतो पज्जत्तायेवाति अधिप्पायो।

**पारिसुद्धिदानपज्जापनेन** चाति इमिनाव “सापत्तिकेन पारिसुद्धिपि न दातब्बा”ति दीपितं होति। न हि सापत्तिको समानो “पारिसुद्धिं दम्मि, पारिसुद्धिं मे हर, पारिसुद्धिं मे आरोचेही”ति वत्तुमरहति। तस्मा पारिसुद्धिं देन्तेन पठमं सन्ती आपत्ति देसेतब्बा “अहं, आवुसो, इत्थन्नामाय आपत्तिया वेमतिको, यदा निब्बेमतिको भविस्सामि, तदा तं आपत्तिं पटिकरिस्सामी”ति वत्त्वा उपोसथो कातब्बो। “पातिमोक्खं सोतब्ब”न्ति वचनतो याव निब्बेमतिको न होति, ताव सभागापत्तिं पटिग्गहेतुं न लभति, अज्जेसज्ज कम्मनं परिसुद्धो नाम होति। “पुन निब्बेमतिको हुत्वा देसेतब्बं न चा”ति नेव पाळियं न अट्टकथायं अत्थि, देसिते पन दोसो नत्थि। “इतो वुट्ठहित्वा पटिकरिस्सामीति एत्थापि एसेव नयो”ति **गण्ठपदेसु** वुत्तं। यथा सब्बो सङ्घो सभागापत्तिं आपज्जित्वा “सुणातु मे भन्ते, सङ्घो...पे०... पटिकरिस्सती”ति जत्तिं ठपेत्त्वा उपोसथं कातुं लभति, एवं तीहि “सुणन्तु मे आयस्मन्ता, इमे भिक्खू सभागं आपत्तिं आपन्ना। यदा अज्जं भिक्खुं सुद्धं अनापत्तिकं पस्सिस्सन्ति, तदा तस्स सन्तिके तं आपत्तिं पटिकरिस्सन्ती”ति गणजत्तिं ठपेत्त्वा, द्वीहि अज्जमज्जं आरोचेत्त्वा उपोसथं कातुं वट्ठति। एकेनपि “परिसुद्धं लभित्वा पटिकरिस्सामी”ति आभोगं कत्वा कातुं वट्ठतीति च वदन्ति।

आपत्तिपटिकम्मविधिकथावण्णना निट्ठिता।

### लिङ्गादिदस्सनकथावण्णना

१७९. **आचारसण्ठानन्ति** आचारसण्ठति। आकरीयति पकासीयति एतेनाति **आकारो**। लीनं गमयति बोधेतीति **लिङ्गं**। निमियन्ति परिच्छिज्ज जायन्ति एतेनाति **निमित्तं**। उद्दिसीयन्ति अपदिसीयन्ति एतेनाति **उद्देशो**। “अम्हाकं इद”न्ति अज्जातं अविदितन्ति **अज्जातकं**। तज्ज अत्थतो परसन्तकंयेवाति आह “**अज्जेसं सन्तकं**”न्ति।

१८०. **नानासंवासकभावन्ति** लद्धिनानासंवासकभावं। तस्स अभिभवो नाम तेसं लद्धिविस्सज्जापनन्ति आह “**तं**

दिट्ठिं न निस्सज्जापेन्तीति अत्थो”ति।

### नगन्तब्बगन्तब्बवारकथावण्णना

१८१. उपोसथाधिट्ठानत्थं सीमापि नदीपि न गन्तब्बाति गरुकं पातिमोक्खुद्देसं विस्सज्जेत्वा लहुकस्स अकत्तब्बत्ता वुत्तं। आरज्जकेनापि भिक्खुनाति एकचारिकेन आरज्जकभिक्खुना, यत्थ वा सङ्घपहोनका भिक्खू न सन्ति, तादिसे अरज्जे वसन्तेन। तत्थ उपोसथं कत्वाव गन्तब्बन्ति तस्स वसनट्ठाने सङ्घुपोसथस्स अप्पवत्तनतो वुत्तं। उपोसथन्तरायोति अत्तनो उपोसथन्तरायो।

### वज्जनीयपुग्गलसन्दस्सनकथावण्णना

१८३. हत्थपासुपगमनमेव पमाणन्ति भिक्खुनीआदयो ठिता वा होन्तु निसिन्ना वा, तेसं हत्थपासुपगमनमेव आपत्तिया पमाणन्ति अधिप्पायो, तस्मा एकसीमायम्पि हत्थपासं जहापेत्वा उपोसथं कातुं वट्ठति। सेसमेत्थ उत्तानमेव।

उपोसथक्खन्धकवण्णना निट्ठिता।

## ३. वस्सूपनायिकक्खन्धकं

### वस्सूपनायिकानुजाननकथावण्णना

१८४. वस्सूपनायिकक्खन्धके इध-सद्दो निपातमत्तोति ओकासपरिदीपनस्सपि असम्भवतो अत्थन्तरस्स अबोधनतो वुत्तं। अपरज्जुगताय अस्साति इमिना असमानाधिकरणविसयो बाहिरत्थसमासोयन्ति दस्सेति। अपरज्जूति आसाळहीपुण्णमितो अपरं दिनं, पाटिपदन्ति अत्थो। अस्साति आसाळहीपुण्णमिया।

### वस्साने चारिकापटिक्खेपादिकथावण्णना

१८५. अनपेक्खगमनेन वा अज्जत्थ अरुणं उट्ठापनेन वा आपत्ति वेदितब्बाति एत्थ अनपेक्खगमनेन उपचारातिक्कमे आपत्ति वेदितब्बा, सापेक्खगमनेन अज्जत्थ अरुणुट्ठापनेन आपत्ति वेदितब्बा।

### सत्ताहकरणीयानुजाननकथावण्णना

१८७-१८९. तीणि परिहीनानीति भिक्खुनीनं वच्चकुटिआदीनं पटिक्खित्तत्ता पहीनानि। वारेय्यन्ति आवाहविवाहमङ्गलं। सुत्तन्तोति अत्तनो पगुणसुत्तन्तो। न पलुज्जतीति न विनस्सति न अन्तरधायति।

### पहितेयेव अनुजाननकथावण्णना

१९९. भिक्खुगतिकोति भिक्खुनिस्सितको। सो पन यस्मा भिक्खूहि सद्धिं वसति, तस्मा वुत्तं “भिक्खूहि सद्धिं वसनकपुरिसो”ति। सत्ताहकरणीयेन गन्त्वा बहिद्धा अरुणुट्ठापनं रत्तिच्छेदो। अनिमन्तितेन गन्तुं न वट्ठतीति एत्थ अनिमन्तितत्ता सत्ताहकिच्चं अधिट्ठित्वा गच्छन्तस्सपि वस्सच्छेदो चेव दुक्कटज्ज होतीति वेदितब्बं। यथावुत्तज्झि

रत्तिच्छेदकारणं विना तिरोविहारे वसित्वा आगच्छिस्सामीति गच्छतोपि वस्सच्छेदं वदन्ति । गन्तुं वट्टतीति सत्ताहकरणीयेन गन्तुं वट्टति । एवं गच्छन्तेन च अन्तोउपचारसीमायं ठितेनेव “अन्तोसत्ताहे आगच्छिस्सामी”ति आभोगं कत्वा गन्तब्बं । सचे आभोगं अकत्वा उपचारसीमं अतिक्कमति, छिन्नवस्सोव होतीति वदन्ति । भण्डकन्ति चीवरं सन्धाय वुत्तं । पहिणन्तीति चीवरधोवनादिकम्मेन पहिणन्ति । सम्पापुणितुं न सक्कोति, वट्टतीति एत्थ “अज्जेव आगमिस्सामी”ति सामन्तविहारं गन्त्वा पुन आगच्छन्तस्स अन्तरामग्गे सचे अरुणुग्गमनं होति, वस्सच्छेदोपि न होति, रत्तिच्छेददुक्कटञ्च नत्थीति वदन्ति । “आचरियं पस्सिस्सामी”ति पन गन्तुं लभतीति “अगिलानम्पि आचरियं उपज्झायं वा पस्सिस्सामी”ति सत्ताहकरणीयेन गन्तुं लभति । सचे पन नं आचरियो “अज्ज मा गच्छा”ति वदति, वट्टतीति एवं सत्ताहकरणीयेन गतं अन्तोसत्ताहेयेव पुन आगच्छन्तं सचे आचरियो उपज्झायो वा “अज्ज मा गच्छा”ति वदति, वट्टति, सत्ताहातिक्कमेपि अनापत्तीति अधिप्पायो, वस्सच्छेदो पन होतियेवाति दट्टब्बं सत्ताहस्स बहिद्वा वीतिनामितत्ता ।

### अन्तराये अनापत्तिवस्सच्छेदकथावण्णना

२०१. सचे दूरं गतो होति, सत्ताहवारेन अरुणो उट्ठापेतब्बोति इमिना वस्सच्छेदकारणे सति सत्ताहकरणीयेन गन्तुं वट्टतीति दीपेति ।

### वजादीसु वस्सूपगमनकथावण्णना

२०३. “इध वस्सं उपेमी”ति तिक्खत्तुं वत्तब्बन्ति सत्थस्साविहारत्ता “इमस्मिं विहारे”ति अवत्वा “इध वस्सं उपेमी”ति एत्तकमेव वत्तब्बं । सत्थे पन वस्सं उपगन्तुं न वट्टतीति कुटिकादीनं अभावे “इध वस्सं उपेमी”ति वचीभेदं कत्वा उपगन्तुं न वट्टति, आलयकरणमत्तेनेव वट्टतीति अधिप्पायो । विप्पकिरतीति विसुं विसुं गच्छति । तीसु ठानेसु नत्थि वस्सच्छेदे आपत्तीति तेहि सद्धिं गच्छन्तस्सेव नत्थि आपत्ति, तेहि वियुज्जित्वा गमने पन आपत्तियेव, पवारेतुञ्च न लभति ।

### वस्सं अनुपगन्तब्बट्टानकथावण्णना

२०४. सेय्यथापि पिसाचिल्लिकाति एत्थ पिसाचा एव पिसाचिल्लिका, पिसाचदारकातिपि वदन्ति । पविसनद्वारं योजेत्वाति सकवाटबद्धमेव योजेत्वा । पञ्चन्नं छदनानन्ति तिणपण्णइट्ठकसिलासुधासङ्घातानं पञ्चन्नं छदनानं । इदञ्च येभुय्येन वुत्तन्ति वेदितब्बं रुक्खादीसु पदरच्छदनायपि कुटिकाय वस्सूपगमनस्स वुत्तत्ता । न, भिक्खवे, असेनासनिकेन वस्सं उपगन्तब्बन्ति वचीभेदं कत्वा वस्सूपगमनं सन्धायेव पटिक्खेपो, न आलयकरणवसेन उपगमनं सन्धायाति वदन्ति । पाळियं पन अविसेसेन वुत्तत्ता अट्ठकथायञ्च दुतियपाराजिकसंवण्णनायं (पारा० अट्ठ० १.८४) “वस्सं उपगच्छन्तेन हि नालकपटिपदं पटिपन्नेनपि पञ्चन्नं छदनानं अज्जतरेन छन्नेयेव सद्धारबन्धे सेनासने उपगन्तब्बं । तस्मा वस्सकाले सचे सेनासनं लभति, इच्चेतं कुसलं । नो चे लभति, हत्थकम्मं परियेसित्वापि कातब्बं । हत्थकम्मं अलभन्तेन सामम्पि कातब्बं, न त्वेव असेनासनिकेन वस्सं उपगन्तब्ब”न्ति दळ्हं कत्वा वुत्तत्ता असेनासनिकस्स नावादिं विना अज्जत्थ आलयो न वट्टतीति अम्हाकं खन्ति । नावासत्थवजेसुयेव हि “अनुजानामि, भिक्खवे, नावाय वस्सं उपगन्तु”न्ति आदिना सति असति वा सेनासने वस्सूपगमनस्स विसुं अनुज्जातत्ता “न, भिक्खवे, असेनासनिकेन वस्सं उपगन्तब्ब”न्ति अयं पटिक्खेपो तत्थ न लब्धतीति असति सेनासने आलयवसेनपि नावादीसु उपगमनं वुत्तं । टट्ठितमञ्चो नाम दीघे मञ्चपादे मज्झे विज्झित्वा

अटनियो पवेसेत्वा कतो मज्जो । तस्स इदं उपरि इदं हेट्ठाति नत्थि, परिवत्तेत्वा अत्थतोपि तादिसोव होति, तं सुसाने देवद्वाने च ठपेन्ति, चतुन्नं पासाणानं उपरि पासाणं अत्थरित्वा कतं गेहम्पि “टङ्कितमज्जो”ति वुच्चति ।

वस्सं अनुपगन्तब्बद्वानकथावण्णना निट्ठिता ।

### अधम्मिककतिककथावण्णना

२०५. तस्सा लक्खणं महाविभङ्गे वुत्तन्ति चतुत्थपाराजिकसंवण्णनायं “यो इमम्हा आवासा पठमं पक्कमिस्सति, तं मयं अरहाति जानिस्सामा”ति (पारा० २२८) एत्थ दस्सितं अधम्मिककतिकवत्तलक्खणं सन्धाय वदति, परतोपि सेनासनक्खन्धकवण्णनायं अधम्मिकं कतिकवत्तं आवि भविस्सतियेव ।

### पटिस्सवदुक्कटापत्तिकथावण्णना

२०७. यस्मा नानासीमायं द्वीसु आवासेसु वस्सं वसन्तस्स दुतिये “वसामी”ति चित्ते उप्पन्ने पठमसेनासनग्गाहो पटिप्पस्सम्भति, पुन पठमेयेव “वसामी”ति चित्ते उप्पन्ने दुतियो पटिप्पस्सम्भति, तस्मा “तस्स, भिक्खवे, भिक्खुनो पुरिमिका च न पज्जायती”ति वुत्तं । पटिस्सवस्स विसंवादनपच्चया होन्तम्पि दुक्कटं सतियेव पटिस्सवे होतीति आह “तस्स तस्स पटिस्सवे दुक्कट”न्ति । तेनेवाह “तज्ज खो...पे०... पच्छा विसंवादनपच्चया”ति ।

अकरणीयोति सत्ताहकरणीयेन अकरणीयो । सकरणीयोति सत्ताहकरणीयेनेव सकरणीयो । यदि एवं “सत्ताहकरणीयेन अकरणीयो सकरणीयो”ति च कस्मा न वुत्तन्ति? “अकरणीयो”ति वुत्तेपि सत्ताहकरणीयेन सकरणीयाकरणीयता विज्जायतीति कत्वा न वुत्तं । यदि एवं परतो “सत्ताहकरणीयेन पक्कमती”ति वारद्वयेपि “सकरणीयो पक्कमती”ति एत्तकमेव कस्मा न वुत्तन्ति? वुच्चते — तत्थ “सत्ताहकरणीयेना”ति अवत्वा “सकरणीयो पक्कमती”ति वुत्ते सो तं सत्ताहं बहिद्वा वीतिनामेतीति न सक्का वत्तुन्ति “सत्ताहकरणीयेन पक्कमती”ति वुत्तं । एवञ्चि वुत्ते सत्ताहस्स अधिकतत्ता सो तं सत्ताहं बहि वीतिनामेतीति सक्का वत्तुं ।

एत्थ च आदिमिह चत्तारो वारा निरपेक्खगमनं सन्धाय वुत्ता, तत्थापि पुरिमा द्वे वारा वस्सं अनुपगतस्स वसेन वुत्ता, पच्छिमा पन द्वे वारा वस्सं उपगतस्स वसेन, ततो परं द्वे वारा सापेक्खगमनं सन्धाय वुत्ता, तत्थापि पठमवारो सापेक्खस्सपि सत्ताहकरणीयेन गन्त्वा तं सत्ताहं बहिद्वा वीतिनामेन्तस्स वस्सच्छेददस्सनत्थं वुत्तो, इतरो वुत्तनयेनेव गन्त्वा अन्तोसत्ताहे निवत्तन्तस्स वस्सच्छेदाभावदस्सनत्थं । “सो सत्ताहं अनागताय पवारणाय सकरणीयो पक्कमती”ति अयं पन वारो नवमितो पट्ठाय गन्त्वा सत्ताहं बहिद्वा वीतिनामेन्तस्सपि वस्सच्छेदाभावदस्सनत्थं वुत्तो । एत्थ च “अकरणीयो पक्कमती”ति दुतियवारस्स अनागतत्ता नवमितो पट्ठाय गच्छन्तेनपि सतियेव करणीये गन्तब्बं, नासतीति दट्ठब्बं । इमे च सत्त वारा बहिद्वा कतउपोसथिकस्स वसेन आगता, अपरे सत्त अन्तोविहारं गन्त्वा कतउपोसथस्स वसेनाति एवं पुरिमिकाय वसेन चुद्धस वारा वुत्ता, ततो परं पच्छिमिकाय वसेन तेयेव चुद्धस वारा वुत्ताति एवमेतेसं नानाकरणं वेदितब्बं ।

इमेहि पन सब्बवारेहि वुत्तमत्थं सम्पिण्डेत्वा दस्सेतुं “सो तदहेव अकरणीयोतिआदीसू”तिआदि आरब्धं । को पन वादो द्वीहतीहं वसित्वा अन्तोसत्ताहे निवत्तन्तस्साति वस्सं उपगन्त्वा द्वीहतीहं वसित्वा सत्ताहकरणीयेन गन्त्वा अन्तोसत्ताहे निवत्तन्तस्स को पन वादो, कथा एव नत्थीति अधिप्पायो । असतिया पन वस्सं न उपेतीति “इमस्मिं विहारे इमं तेमासं वस्सं उपेमी”ति वचीभेदं कत्वा न उपेति ।

**कोमुदिया चातुमासिनियाति** पच्छिमकत्तिकपुण्णमायं । सा हि कुमुदानं अत्थिताय कोमुदी, चतुन्नं वस्सिकानं मासानं परियोसानत्ता “चातुमासिनी”ति वुच्चति । तदा हि कुमुदानि सुपुप्फितानि होन्ति, तस्मा कुमुदानं समूहो, कुमुदानि एव वा कोमुदा, ते एत्थ अत्थीति “कोमुदी”ति वुच्चति, कुमुदवतीति वुत्तं होति । सेसमेत्थ उत्तानमेव ।

पटिस्सवदुक्कटापत्तिकथावण्णना निड्डिता ।

वस्सूपनायिककखन्धकवण्णना निड्डिता ।

## ४. पवारणकखन्धकं

### अफासुकविहारकथावण्णना

२०९. पवारणकखन्धके आदितो लापो आलापो, वचनपटिवचनवसेन समं लापो सल्लापो । **पिण्डाय पटिक्कमेय्याति** गामे पिण्डाय चरित्वा पच्चागच्छेय्य । **अवक्कारपातिं धोवित्वा उपट्टापेय्याति** अतिरेकपिण्डपातं अपनेत्वा ठपनत्थाय एकं समुग्गपातिं धोवित्वा ठपेय्य । **समुग्गपाति** नाम समुग्गपुटसदिसा पाति । **अप्पहरितेति** अपरूळ्हहरिते, यस्मिं ठाने पिण्डपातज्झोत्थरणेन विनस्सनधम्मानि तिणानि नत्थि, तस्मिन्ति अत्थो । तेन नित्तिणञ्च महातिणगहनञ्च यत्थ सकटेनपि छड्डिते पिण्डपाते तिणानि न विनस्सन्ति, तञ्च ठानं परिग्गहितं होति । भूतगामसिक्खापदस्स हि अविकोपनत्थमेतं वुत्तं । **अप्पाणकेति** निप्पाणके, पिण्डपातज्झोत्थरणेन मरितब्बपाणकरहिते वा महाउदककखन्धे । परित्तोदके एव हि भत्तपक्खेपेन आलुळिते सुखुमपाणका मरन्ति, न महातळाकादीसूति । पाणकानुरक्खणत्थज्झि एतं वुत्तं । **ओपिलापेय्याति** निमुज्जापेय्य ।

**वच्चघटन्ति** आचमनकुम्भी । **रित्तन्ति** रित्तकं । **तुच्छन्ति** तस्सेव वेवचनं । **अविसय्हन्ति** उक्खिपितुं असक्कुणेय्यं अतिभारिकं । **हत्थविकारेनाति** हत्थसज्जाय । हत्थेहि उक्खिपनं हत्थविलङ्घनं । तेनाह “हत्थुक्खेपकेना”ति । अथ वा विलङ्घेति देसन्तरं पापेति एतेनाति विलङ्घको, हत्थो एव विलङ्घको हत्थविलङ्घको, तेन **हत्थविलङ्घकेन**, अज्जमज्जं संसिब्बितहत्थेनाति वुत्तं होति । द्वे हि जना हत्थेन हत्थं संसिब्बेत्वा द्वीसु हत्थेसु ठपेत्वा उट्टपेत्ता हत्थविलङ्घकेन उट्टपेन्ति नाम । **तित्थियसमादानन्ति** तित्थियेहि समादातब्बं ।

अफासुकविहारकथावण्णना निड्डिता ।

### पवारणाभेदकथावण्णना

२१२. द्वेमा, भिक्खवे, पवारणा चातुद्दसिका च पन्नरसिका चाति एत्थ पुरिमवस्संवुत्थानं पुब्बकत्तिकपुण्णमा, तेसंयेव सचे भण्डनकारकेहि उपहुता पवारणं पच्चुक्कड्डन्ति, अथ कत्तिकमासस्स काळपक्खचातुद्दसो वा पच्छिमकत्तिकपुण्णमा वा, पच्छिमवस्संवुत्थानञ्च पच्छिमकत्तिकपुण्णमा एव वाति इमे तयो पवारणदिवसाति वेदितब्बा । इदञ्च पकतिचारित्तवसेन वुत्तं, तथारूपपच्चये पन सति द्विन्नं कत्तिकपुण्णमानं पुरिमेसु चातुद्दसेसुपि पवारणं कातुं वट्ठति, तेनेव महाविहारे भिक्खू चातुद्दसिया पवारेत्वा पन्नरसिया कायसामग्गिं देन्ति, चेतियगिरिमहदस्सनत्थम्पि अट्ठमिया गच्छन्ति, तम्पि चातुद्दसियं पवारेतुकामानञ्जेव होति ।

### पवारणादानानुजाननकथावण्णना

२१३. सचे पन वुडुतरो होतीति सचे पवारणदायको भिक्खु वुडुतरो होति । तेन च भिक्खुनाति पवारणदायकेन भिक्खुना ।

### अनापत्तिपन्नरसककथावण्णना

२२२. पन्नरसकेसु पवारितमत्तेति पवारितसमनन्तरं । अवुडुताय परिसायाति पवारेत्वा पच्छा अज्जमज्जं कथेन्तिया । एकच्चाय वुडुतायाति एकच्चेसु यथानिसिन्नेसु एकच्चेसु सकसकट्टानं गतेसु । पुन पवारितब्बन्ति पुनपि सब्बेहि समागन्त्वा पवारेतब्बं । आगच्छन्ति समसमा, तेसं सन्तिके पवारेतब्बन्ति गते अनानेत्वा निसिन्नानज्जेव सन्तिके पवारेतब्बं । सब्बाय वुडुताय परिसाय आगच्छन्ति समसमा, तेसं सन्तिके पवारेतब्बन्ति यदि सब्बे वुडुहित्वा गता सन्निपातेतुज्ज न सकका, एकच्चे सन्निपातेत्वा पवारेतुं वट्टति, अत्तिं ठपेत्वा कत्तब्बसङ्गकम्माभावा वग्गं न होति । उपोसथेपि एसेव नयो ।

### पवारणाठपनकथावण्णना

२३७. “नत्थि दिन्न”न्ति आदिनयप्पवत्ता दसवत्थुका मिच्छादिट्ठि । “होति तथागतो परं मरणा, न होति तथागतो परं मरणा”न्ति आदिना सस्सतुच्छेदसङ्घातं अन्तं गण्हातीति अन्तग्गाहिका ।

### भण्डनकारकवत्थुकथावण्णना

२४०. चतुत्थे कते सुणन्तीति चतुत्थे पन्नरसिकुपोसथे कते अम्हाकं पवारणं ठपेस्सन्तीति सुणन्ति । एवम्पि द्वे चातुदसिका होन्तीति ततियेन सद्धिं द्वे चातुदसिका होन्ति ।

### पवारणासङ्गहकथावण्णना

२४१. अयं पवारणासङ्गहो एकस्स दिन्नोपि सब्बेसं दिन्नोव होतीति आह “एकस्सपि वसेन दातब्बो”ति । आगन्तुका तेसं सेनासनं गहेतुं न लभन्तीति सचेपि सट्ठिवस्सभिक्खू आगच्छन्ति, तेसं सेनासनं गहेतुं न लभन्ति । पवारेत्वा पन अन्तरापि चारिकं पक्कमितुं लभन्तीति पवारणासङ्गहे कते अन्तरा पक्कमितुकामा सङ्गं सन्निपातापेत्वा पवारेतुं लभन्ति । सेसमेत्थ पाळितो अट्ठकथातो च सुविज्जेय्यमेव ।

पवारणक्खन्धकवण्णना निट्ठिता ।

## ५. चम्मक्खन्धकं

### सोणकोळिविसवत्थुकथावण्णना

२४२. चम्मक्खन्धके उण्णपावारणन्ति उण्णामयं पावारणं । विहारपच्छायायन्ति विहारपच्चन्ते छायायं । विहारस्स वड्डमानच्छायायन्तिपि वदन्ति ।

### सोणस्स पब्बज्जाकथावण्णना

२४३. सुत्तत्थो पन सुत्तवण्णनातोयेव गहेतब्बोति एत्थायं सुत्तवण्णना । सीतवनेति (अ० नि० अट्ठ० ३.६.५५) एवंनामके वने । तस्मिं किर पटिपाटिया पञ्च चङ्कमनसतानि मापितानि, तेसु थेरो अत्तनो सप्पायं चङ्कमनं गहेत्वा समणधम्मं करोति । तस्स आरद्धवीरियस्स हुत्वा चङ्कमतो पादतलानि भिज्जिंसु, जाणूहि चङ्कमतो जाणुकानिपि हत्थतलानिपि भिज्जिंसु, छिद्धानि अहेसुं । एवं आरद्धवीरियो विहरन्तो ओभासनिमित्तमत्तकम्पि दस्सेतुं नासक्खि । तस्स वीरियेन किलमितकायस्स चङ्कमनकोटियं पासाणफलके निसिन्नस्स यो वितक्को उदपादि, तं दस्सेतुं “अथ खो आयस्मतो”तिआदि वुत्तं । तत्थ आरद्धवीरियाति परिपुण्णपग्गहितवीरिया । न अनुपादाय आसवेहि चित्तं विमुच्चतीति “सचे अहं उग्घटितज्जू वा विपज्जितज्जू वा नेय्यो वा, न मे चित्तं न विमुच्चेय्य, अब्बा पन पदपरमो, येन मे चित्तं न मुच्चती”ति सन्निट्ठानं कत्वा “संविज्जन्ति खो पना”तिआदीनि चिन्तेसि । तत्थ भोगाति उपयोगत्थे पच्चत्तं ।

पातुरहोसीति थेरस्स चित्ताचारं जत्वा “अयं सोणो अज्ज सीतवने पधानभूमियं निसिन्नो इमं वितक्कं वितक्केति, गन्त्वास्स वितक्कं सहोड्ढं गण्हित्वा वीणोपमकम्मट्ठानं कथेस्सामी”ति सीतवने पातुरहोसि । पज्जत्ते आसनेति पधानिकभिक्षू अत्तनो वसनट्ठाने ओवदितुं आगतस्स बुद्धस्स भगवतो निसीदनत्थं यथालाभेन आसनम्पि पज्जपेत्वाव पधानं करोन्ति, अज्जं अलभमाना पुराणपण्णानि सङ्घरित्वा उपरि सङ्घाटिं पज्जपेन्ति । थेरोपि आसनं पज्जपेत्वाव पधानं अकासि, तं सन्धाय वुत्तं “पज्जत्ते आसने”ति ।

तं किं मज्जसीति सत्था “इमस्स भिक्षुनो अवसेसकम्मट्ठानेन अत्थो नत्थि, अयं गन्धब्बसिप्पे छेको चिण्णवसी, अत्तनो विसये कथियमाने खिप्पमेव सल्लक्खेस्सती”ति वीणोपमं कथेतुं “तं किं मज्जसी”तिआदिमाह । वीणाय तन्तिस्सरे कुसलता नाम वीणाय वादनकुसलता, सो च तत्थ कुसलो । मातापितरो हिस्स “अम्हाकं पुत्तो अज्जं सिप्पं सिक्खन्तो कायेन किलमिस्सति, इदं पन आसने निसिन्नेनेव सक्का उग्गण्हितु”न्ति गन्धब्बसिप्पमेव उग्गण्हापेसुं । तस्स

“सत्त सरा तयो गामा, मुच्छना एकवीसति ।

ठाना एकूनपज्जास, इच्चेते सरमण्डला”ति ॥ —

आदिकं गन्धब्बसिप्पं सब्बमेव पगुणं अहोसि । अच्चायताति अतिआयता खरमुच्छना । सरवतीति सरसम्पन्ना । कम्मज्जाति कम्मक्खमा कम्मयोग्गा । अतिसिथिलाति मन्दमुच्छना । समे गुणे पतिट्ठिताति मज्झिमे सरे ठपेत्वा मुच्छिता ।

अच्चारद्धन्ति अतिगाळ्हं । उद्धच्चाय संवत्ततीति उद्धतभावाय संवत्तति । अतिलीनन्ति अतिसिथिलं । कोसज्जायाति कुसीतभावत्थाय । वीरियसमथं अधिट्ठाहीति वीरियसम्पयुत्तं समथं अधिट्ठाहि, वीरियं समथेन योजेहीति अत्थो । इन्द्रियानज्ज समतं अधिट्ठाहीति सद्भादीनं इन्द्रियानं समतं समभावं अधिट्ठाहि । तत्थ सब्बं पज्जाय, पज्जज्ज सद्भाय, वीरियं समाधिना, समाधिज्ज वीरियेन योजयता इन्द्रियानं समता अधिट्ठिता नाम होति । सति पन सब्बत्थिका, सा सदापि बलवतीयेव वट्ठति । तज्ज पन नेसं योजनाविधानं विसुद्धिमग्गे (विसुद्धि० १.६०-६२) आगतनयेन वेदितब्बं । तत्थ च निमित्तं गण्हाहीति तस्मिज्ज समभावे सति येन आदासे मुखबिम्बेनेव निमित्तेन उप्पज्जितब्बं, तं समथनिमित्तं विपस्सनानिमित्तं मग्गनिमित्तं फलनिमित्तज्ज गण्ह निब्बत्तेहीति एवमस्स सत्था अरहत्ते पक्खिपित्वा कम्मट्ठानं कथेसि ।



तत्थ च निमित्तं अग्गहेसीति समथनिमित्तञ्च विपस्सनानिमित्तञ्च अग्गहेसि । एकोति असहायो । वूपकट्ठोति वत्थुकामेहि च किलेसकामेहि च कायेन चेव चित्तेन च वूपकट्ठो । अप्पमत्तोति कम्मट्ठाने सतिं अविजहन्तो । आतापीति कायिकचेतसिकवीरियातापेन आतापो । आतप्पति किलेसेहीति आतापो, वीरियं । पहितत्तोति काये च जीविते च अनपेक्खताय पेसितत्तो विस्सट्ठुअत्तभावो, निब्बाने वा पेसितचित्तो । न चिरस्सेवाति कम्मट्ठानारम्भतो न चिरेनेव । अञ्जतरोति एको । अरहतन्ति भगवतो सावकानं अरहन्तानं अब्भन्तरो एको महासावको अहोसीति अत्थो ।

२४४. वुसितवाति वुत्थब्रह्मचरियवासो । कतकरणीयोति चतूहि मग्गेहि कत्तब्बं कत्वा ठितो । ओहितभारोति खन्धभारं किलेसभारं अभिसङ्खारभारञ्च ओतारेत्वा ठितो । अनुपत्तसदत्थोति सदत्थो वुच्चति अरहत्तं, तं पत्तोति अत्थो । परिकखीणभवसंयोजनोति खीणभवबन्धनो । सम्मदञ्जा विमुत्तोति सम्मा हेतुना कारणेन जानित्वा विमुत्तो । छ ठानानीति छ कारणानि । अधिमुत्तो होतीति पटिविज्झित्वा पच्चक्खं कत्वा ठितो होति । नेक्खम्माधिमुत्तोतिआदि सब्बं अरहत्तवसेन वुत्तं । अरहत्तञ्हि सब्बकिलेसेहि निक्खन्तत्ता नेक्खम्मं, तेहेव पविवित्तत्ता पविवेको, ब्यापज्जाभावतो अब्यापज्जं, उपादानस्स खयन्ते उप्पन्नत्ता उपादानक्खयो, तण्हाय खयन्ते उप्पन्नत्ता तण्हक्खयो, सम्मोहाभावतो असम्मोहोति च वुच्चति ।

केवलं सद्धामत्तकन्ति पटिवेधरहितं केवलं पटिवेधपज्जाय असम्मिस्सं सद्धामत्तकं । पटिचयन्ति पुनप्पुनं करणेन वड्ढिं । वीतरागत्ताति मग्गपटिवेधेन रागस्स विहतत्तायेव नेक्खम्मसङ्खातं अरहत्तं पटिविज्झित्वा सच्छिकत्वा ठितो होति, फलसमापत्तिविहारेण विहरति, तन्निन्नमानसोयेव होतीति अत्थो । सेसपदेसुपि एसेव नयो ।

लाभसक्कारसिलोक्कन्ति चतुपच्चयलाभञ्च तेसंयेव सुकतभावञ्च वण्णभणनञ्च । निकामयमानोति इच्छमानो पत्थयमानो । पविवेकाधिमुत्तोति “पविवेके अधिमुत्तो अह”न्ति एवं अरहत्तं ब्याकरोतीति अत्थो ।

सीलब्बतपरामासन्ति सीलञ्च वतञ्च परामसित्वा गहितग्गहणमत्तं । सारतो पच्चागच्छन्तोति सारभावेन जानन्तो । अब्यापज्जाधिमुत्तोति अब्यापज्जं अरहत्तं ब्याकरोति । इमिनाव नयेन सब्बवारेसु अत्थो दट्ठब्बो । अपिचेत्थ “नेक्खम्माधिमुत्तोति इमस्मिंयेव अरहत्तं कथितं, सेसेसु पज्जसु निब्बान”न्ति एके वदन्ति । अपरे “असम्मोहाधिमुत्तोति एत्थेव निब्बानं कथितं, सेसेसु अरहत्त”न्ति वदन्ति । अयं पनेत्थ सारो — “सब्बेस्वेवेतेसु अरहत्तम्पि निब्बानम्पि कथितमेवाति ।

भुसाति बलवन्तो दिब्बरूपसदिसा । नेवस्स चित्तं परियादियन्तीति एतस्स खीणासवस्स चित्तं गहेत्वा ठातुं न सक्कोन्ति । किलेसा हि उप्पज्जमाना चित्तं गण्हन्ति नाम । अमिस्सीकतन्ति अमिस्सकतं । किलेसा हि आरम्माणेन सद्धिं चित्तं मिस्सं करोन्ति, तेसं अभावा अमिस्सीकतं । ठितन्ति पतिट्ठितं । आनेज्जप्पत्तन्ति अचलनप्पत्तं । वयञ्चस्सानुपस्सतीति तस्स चेस चित्तस्स उप्पादम्पि वयम्पि पस्सति । भुसा वातवुट्ठीति बलवा वातक्खन्धो । नेव नं सङ्कम्पेय्याति एकभागेन चालेतुं न सक्कुणेय्य । न सम्पक्कम्पेय्याति थूणं विय सब्बभागतो कम्पेतुं न सक्कुणेय्य । न सम्पवेधेय्याति वेधेत्वा पवेधेत्वा पातेतुं न सक्कुणेय्य ।

नेक्खम्मं अधिमुत्तस्साति अरहत्तं पटिविज्झित्वा ठितस्स । सेसपदेसुपि अरहत्तमेव कथितं । उपादानक्खयस्स चाति उपयोगत्थे सामिवचनं । असम्मोहञ्च चेतसोति चित्तस्स च असम्मोहं अधिमुत्तस्स । दिस्वा आयतनुप्पादन्ति आयतनानं उप्पादञ्च वयञ्च दिस्वा । सम्मा चित्तं विमुच्चतीति सम्मा हेतुना नयेन इमाय विपस्सनाय पटिपत्तिया फलसमापत्तिवसेन

चित्तं विमुच्चति, निब्बानारम्भणे अधिमुच्चति । अथ वा इमिना खीणासवस्स पुब्बभागपटिपदा कथिता । तस्स हि आयतनुप्पादं दिस्वा इमाय विपस्सनाय अधिगतस्स अरियमग्गस्स आनुभावेन सब्बकिलेसेहि सम्मा चित्तं विमुच्चति । एवं तस्स सम्मा विमुत्तस्स...पे०... न विज्जति । तत्थ सन्तचित्तस्साति निब्बुतचित्तस्स । सेसमेत्थ उत्तानत्थमेव ।

सोणस्स पब्बज्जाकथावण्णना निट्ठिता ।

**सब्बनीलिकादिपटिक्खेपकथावण्णना**

२४६. अद्वारिदुकवण्णाति अभिनवारिदुफलवण्णा । उदकेन तित्तकाकपत्तवण्णातिपि वदन्ति ।

**अज्झारामे उपाहनपटिक्खेपकथावण्णना**

२४८. अभिजीवन्ति एतेनाति अभिजीवनिकं । किन्तं? सिप्पं । तेनाह “येन सिप्पेना”ति आदि ।

**कट्टपादुकादिपटिक्खेपकथावण्णना**

२५१. उण्णाहि कतपादुकाति उण्णालोममयकम्बलेहि, उण्णालोमेहि एव वा कतपादुका । न, भिक्खवे, गावीनं विसाणेसु गहेतब्बन्ति आदीसु “मोक्खाधिप्पायेन विसाणादीसु गहेतुं वट्ठती”ति गण्ठपदेसु वुत्तं ।

**यानादिपटिक्खेपकथावण्णना**

२५३. अनुजानामि, भिक्खवे, पुरिसयुत्तं हत्थवट्ठकन्ति एत्थ “अनुजानामि, भिक्खवे, पुरिसयुत्तं, अनुजानामि, भिक्खवे, हत्थवट्ठक”न्ति एवं पच्चेकवाक्यपरिसमापनं अधिप्पेतन्ति आह “पुरिसयुत्तं इत्थिसारथि वा...पे०... पुरिसा वा, वट्ठतियेवा”ति । पीठकसिविकन्ति पीठकयानं । पाटङ्गिन्ति अन्दोलिकायेतं अधिवचनं ।

**उच्चासयनमहासयनपटिक्खेपकथावण्णना**

२५४. वाळरूपानीति आहरिमानि वाळरूपानि । “अकप्पियरूपाकुलो अकप्पियमज्जो पल्लङ्को”ति सारसमासे वुत्तं । “दीघलोमको महाकोजवोति चतुरङ्गुलाधिकलोमो काळकोजवो । “चतुरङ्गुलाधिकानि किर तस्स लोमानी”ति वचनतो चतुरङ्गुलतो हेट्ठा वट्ठतीति वदन्ति । वानचित्रो उण्णामयत्थरणोति भित्तिच्छेदादिवसेन विचित्रो उण्णामयत्थरणो । घनपुप्फको उण्णामयत्थरणोति उण्णामयलोहितत्थरणो । पकतितूलिकाति रुक्खतूललतातूलपोटकीतूलसङ्घातानं तिण्णं तूलानं अज्जतरपुण्णा तूलिका । “उदलोमीति उभतोदसं उण्णामयत्थरणं । एकन्तलोमीति एकतोदसं उण्णामयत्थरण”न्ति दीघनिकायट्ठकथायं (दी० नि० अट्ठ० १.१५) वुत्तं, सारसमासे पन “उदलोमीति एकतो उग्गतपुप्फं । एकन्तलोमीति उभतो उग्गतपुप्फ”न्ति वुत्तं । “कोसेय्यकट्ठिस्समयन्ति कोसेय्यकसटमय”न्ति आचरियधम्मपालत्थरेण वुत्तं । सुद्धकोसेय्यन्ति रतनपरिसिब्बनरहितं । दीघनिकायट्ठकथायं पनेत्थ “ठपेत्वा तूलिकं सब्बानेव गोणकादीनि रतनपरिसिब्बितानि वट्ठन्ती”ति वुत्तं । तत्थ “ठपेत्वा तूलिक”न्ति एतेन रतनपरिसिब्बनरहितापि तूलिका न वट्ठतीति दीपेति । “रतनपरिसिब्बितानि वट्ठन्ती”ति इमिना पन यानि रतनपरिसिब्बितानि, तानि भूमत्थरणवसेन यथानुरूपं मज्जादीसु च उपनेतुं वट्ठतीति दीपितन्ति वेदितब्बं । एत्थ च विनयपरियायं पत्वा गरुके ठातब्बत्ता इध वुत्तनयेनेवेत्थ विनिच्छयो वेदितब्बो । सुत्तन्तिकदेसनायं पन गहट्ठानम्पि वसेन वुत्तत्ता तेसं सङ्गहनत्थं “ठपेत्वा तूलिकं...पे०... वट्ठन्ती”ति वुत्तन्ति अपरे ।

अजिनचम्मेहीति अजिनमिगचम्मेहि । तानि किर चम्मानि सुखुमतरानि, तस्मा दुपट्टतिपट्टानि कत्वा सिब्बन्ति । तेन वुत्तं “अजिनपवेणी”ति । उत्तरं उपरिभागं छादेतीति उत्तरच्छदो, वितानं, तज्ज लोहितवितानं इधाधिप्पेतन्ति आह “उपरिबद्धेन रत्तवितानेना”ति । “रत्तवितानेसु च कासावं वट्टति, कुसुम्भादिरत्तमेव न वट्टती”ति गण्ठपदेसु वुत्तं । महाउपधानन्ति पमाणातिक्कन्तं उपधानं । एत्थ च किञ्चापि दीघनिकायट्ठकथायं (दी० नि अट्ठ० १.१५) “अलोहितकानि द्वेपि वट्टन्ति येव, ततो उत्तरि लभित्वा अज्जेसं दातब्बानि, दातुं असक्कोन्तो मज्जे तिरियं अत्थरित्वा उपरि पच्चत्थरणं दत्वा निपज्जितुम्पि लभती”ति अविसेसेन वुत्तं, सेनासनक्खन्धकवण्णनायं (चूळव० अट्ठ० २९७) पन “अगिलानस्स सीसुपधानञ्च पादुपधानञ्चाति द्वयमेव वट्टति, गिलानस्स बिम्बोहनानि सन्थरित्वा उपरि पच्चत्थरणं दत्वा निपज्जितुम्पि वट्टती”ति वुत्तत्ता गिलानोयेव मज्जे तिरियं अत्थरित्वा निपज्जितुं लभतीति वेदितव्वं ।

उच्चासयनमहासयनपटिकखेपकथावण्णना निट्ठिता ।

### गिहिविकतानुज्जातादिकथावण्णना

२५६. अभिनिस्साय निसीदितुन्ति अपस्साय निसीदितुं ।

### सोणकुटिकणवत्थुकथावण्णना

२५७. पपतके पब्बतेति एत्थ “पवत्ते पब्बते”तिपि पठन्ति, पवत्तनामके पब्बतेति अत्थो । सोणो उपासकोतिआदीसु (उदा० अट्ठ० ४६) नामेन सोणो नाम, तीहि सरणगमनेहि उपासकत्तपटिवेदनेन उपासको, कोटिअघनकस्स कण्णपिळन्धनस्स धारणेन “कोटिकण्णो”ति च वत्तब्बे “कुटिकण्णो”ति एवं अभिज्जातो, न सुकुमारसोणोति अधिप्पायो । अयज्झि आयस्मतो महाकच्चानस्स सन्तिके धम्मं सुत्वा सासने अभिप्पसन्नो सरणेषु च सीलेसु च पतिट्ठितो पपतके पब्बते छायूदकसम्पन्ने ठाने विहारं कारेत्वा थेरं तत्थ वसापेत्वा चतूहि पच्चयेहि उपट्ठाति । तेन वुत्तं “आयस्मतो महाकच्चानस्स उपट्ठाको होती”ति ।

सो कालेन कालं थेरस्स उपट्ठानं गच्छति, थेरो चस्स धम्मं देसेति, तेन संवेगबहुलो धम्मचरियायं उस्साहजातो विहरति । सो एकदा सत्थेन सद्धिं वाणिज्जत्थाय उज्जेनिं गच्छन्तो अन्तरामगे अटवियं सत्थे निविट्ठे रत्तियं जनसम्बाधभयेन एकमन्तं अपक्कम्म निदं उपगज्झि । सत्थो पच्चूसवेलायं उट्ठाय गतो, न एकोपि सोणं पबोधेसि, सब्बे विस्सरित्वा अगमिंसु । सो पभाताय रत्तिया पबुज्झित्वा उट्ठाय कज्जि अपस्सन्तो सत्थेन गतमगं गहेत्वा सीधं सीधं गच्छन्तो एकं वटरुक्खं उपगज्झि । तत्थ अहस एकं महाकायं विरूपदस्सनं बीभच्छं पुरिसं अट्ठितो मुत्तानि अत्तनो मंसानि सयमेव खादन्तं, दिस्वान “कोसि त्व”न्ति पुच्छि । पेतोस्मि, भन्तेति । कस्मा एवं करोसीति? अत्तनो पुब्बकम्मेनाति । किं पन तं कम्मन्ति? अहं पुब्बे भारुकच्छनगरवासी कूटवाणिजो हुत्वा परेसं सन्तकं वज्जेत्वा खादिं, समणे च भिक्खाय उपगते “तुम्हाकं मंसं खादथा”ति अक्कोसिं, तेन कम्मेन एतरहि इमं दुक्खं अनुभवामीति । तं सुत्वा सोणो अतिविय संवेगं पटिलभि ।

ततो परं गच्छन्तो मुखतो पग्घरितकाळलोहिते द्वे पेतदारके पस्सित्वा तथेव पुच्छि, तेपिस्स अत्तनो कम्मं कथेसुं । ते किर भारुकच्छनगरे दारककाले गन्धवाणिज्जाय जीविकं कप्पेन्ता अत्तनो मातरि खीणासवे निमन्तेत्वा भोजेन्तिया गेहं गन्त्वा “अम्हाकं सन्तकं कस्मा समणानं देसि, तथा दिन्नं भोजनं भुज्जनकसमणानं मुखतो काळलोहितं पग्घरतू”ति

अक्कोसिंसु । ते तेन कम्मेन निरये पच्चित्वा तस्स विपाकावसेसेन पेतयोनियं निब्बत्तित्वा तदा इमं दुक्खं अनुभवन्ति । तम्पि सुत्वा सोणो अतिविय संवेगजातो अहोसि ।

सो उज्जेनिं गन्त्वा तं करणीयं तीरेत्वा कुररघरं पच्चागतो थेरं उपसङ्कमित्वा कतपटिसन्धारो तमत्यं आरोचेसि । थेरोपिस्स पवत्तिनिवत्तीसु आदीनवानिसंसे विभावेन्तो धम्मं देसेसि । सो थेरं वन्दित्वा गेहं गतो सायमासं भुज्जित्वा सयनं उपगतो थोकंयेव निद्वायित्वा पबुज्जित्वा सयनतले निसज्ज यथासुतं धम्मं पच्चवेक्खितुं आरब्धो । तस्स तं धम्मं पच्चवेक्खतो ते च पेतत्तभावे अनुस्सरतो संसारदुक्खं अतिविय भयानकं हुत्वा उपट्ठासि, पब्बज्जाय चित्तं नमि । सो विभाताय रत्तिया सरीरपटिजगनं कत्वा थेरं उपगन्त्वा अत्तनो अज्झासयं आरोचेत्वा पब्बज्जं याचि । तेन वुत्तं “अथ खो सोणो उपासको...पे०... पब्बाजेतु मं, भन्ते, अय्यो महाकच्चानो”ति ।

तत्थ यथा यथातिआदिपदानं अयं सङ्खेपत्थो — येन येन आकारेन अय्यो महाकच्चानो धम्मं देसेति आचिक्खति पज्जपेति पट्टपेति विवरति विभजति उत्तानिं करोति पकासेति, तेन तेन मे उपपरिक्खतो एवं होति “यदेतं सिक्खत्तयब्रह्मचरियं एकम्पि दिवसं अखण्डं कत्वा चरिमकचित्तं पापेतब्बताय एकन्तपरिपुण्णं, एकदिवसम्पि किलेसमलेन अमलीनं कत्वा चरिमकचित्तं पापेतब्बताय एकन्तपरिसुद्धं, सङ्खलिखितं लिखितसङ्खसदिसं धोतसङ्खसप्पटिभागं चरितब्बं, इदं न सुकरं अगारं अज्झावसता अगारमज्झे वसन्तेन एकन्तपरिपुण्णं...पे०... चरितु”न्ति ।

एवं अत्तनो परिवितक्कितं सोणो उपासको थेरस्स आरोचेत्वा तं पटिपज्जितुकामो “इच्छामहं भन्ते”तिआदिमाह । थेरो पन “न तावस्स जाणं परिपाकं गत”न्ति उपधारेत्वा जाणपरिपाकं आगमयमानो “दुक्करं खो”तिआदिना पब्बज्जाछन्दं निवारेसि । तत्थ एकसेय्यन्ति अदुतियसेय्यं । एत्थ च सेय्यासीसेन “एको तिट्ठति, एको गच्छति, एको निसीदती”तिआदिना नयेन वुत्तं चतूसु इरियापथेसु कायविवेकं दीपेति, न एकिका हुत्वा सयनमत्तं । एकभत्तन्ति “एकभत्तिको होति रत्तूपरतो विरतो विकालभोजना”ति (दी० नि० १.१०, १९४; म० नि० १.२९३ अ० नि० ३.७१) एवं वुत्तं विकालभोजना विरतिं सन्धाय वदति । ब्रह्मचरियन्ति मेथुनविरतिब्रह्मचरियं, सिक्खत्तयानुयोगसङ्घातं सासनब्रह्मचरियं वा । इङ्गाति चोदनत्थे निपातो । तत्थेवाति गेहेयेव । बुद्धानं सासनं अनुयुज्जाति निच्चसीलउपोसथसीलनियमादिभेदं पञ्चङ्गं अट्ठङ्गं दसङ्गञ्च सीलं तदनुरूपञ्च समाधिपज्जाभावनं अनुयुज्ज । एतज्हि उपासकेन पुब्बभागे अनुयुज्जितब्बं बुद्धसासनं नाम । तेनाह “कालयुत्तं एकसेय्यं एकभत्तं ब्रह्मचरिय”न्ति ।

तत्थ कालयुत्तन्ति चातुदसीपञ्चदसीअट्ठमीपाटिहारिकपक्खसङ्घातेन कालेन युत्तं, यथावुत्तकाले वा तुहं अनुयुज्जन्तस्स युत्तं पतिरूपं सक्कुण्येयं, न सब्बकालं सब्बन्ति अधिप्पायो । सब्बमेतं जाणस्स अपरिपक्कत्ता तस्स कामानं दुप्पहानताय सम्मा पटिपत्तियं योग्यं कारापेतुं वदति, न पब्बज्जाछन्दं निवारेतुं । पब्बज्जाभिसङ्घारोति पब्बजितुं आरम्भो उस्साहो । पटिप्पस्सम्भीति इन्द्रियानं अपरिपक्कत्ता संवेगस्स च नातितिक्खभावतो वूपसमि । किञ्चापि पटिप्पस्सम्भि, थेरेन वुत्तविधिं पन अनुतिट्ठन्तो कालेन कालं थेरं उपसङ्कमित्वा पयिरुपासन्तो धम्मं सुणाति । तस्स वुत्तनयेनेव दुतियम्पि पब्बज्जाय चित्तं उप्पज्जि, थेरस्स च आरोचेसि, दुतियम्पि थेरो पटिक्खिपि । ततियवारे पन जाणस्स परिपक्कभावं जत्वा “इदानीं नं पब्बाजेतुं कालो”ति थेरो पब्बाजेसि, पब्बजितञ्च तं तीणि संवच्छरानि अतिक्कमित्वा गणं परियेसित्वा उपसम्पादेसि । तं सन्धाय वुत्तं “दुतियम्पि खो सोणो...पे०... उपसम्पादेसी”ति ।

तत्थ अप्पभिक्खुकोति कतिपयभिक्खुको । तदा किर भिक्खू येभ्य्येन मज्झिमदेसेयेव वसिंसु, तस्मा तत्थ कतिपया एव अहेसुं । ते च एकस्मिं गामे एको, एकस्मिं निगमे द्वेति एवं विसुं विसुं वसिंसु । किच्छेनाति दुक्खेन । कसिरेनाति

आयासेन । ततो ततोति तस्मा तस्मा गामनिगमादितो । थेरेन हि कतिपये भिक्खू आनेत्वा अज्जेसु आनीयमानेसु पुब्बे आनीता केनचिदेव करणीयेन पक्कमिंसु, कज्जि कालं आगमेत्वा पुन तेसु आनीयमानेसु इतरे पक्कमिंसु । एवं पुनप्पुनं आनयनेन सन्निपातो चिरेनेव अहोसि । थेरोपि तदा एकविहारी अहोसि । तेन वुत्तं “**तिण्णं वस्सानं...पे०...सन्निपातापेत्वा**”ति ।

**वस्संवत्थस्साति** वस्सं उपगन्त्वा वुसितवतो । **एदिसो च एदिसो चाति** एवरूपो च एवरूपो च । “एवरूपाय नाम रूपकायसम्पत्तिया समन्नागतो, एवरूपाय धम्मकायसम्पत्तिया समन्नागतो”ति **सुतोयेव मे सो भगवा । न च मया सम्मुखा दिट्ठो**ति एत्थ पन पुथुज्जनसद्भाय एव आयस्मा सोणो भगवन्तं दट्ठुकामो अहोसि । अपरभागे पन सत्थारा सद्धिं एकगन्धकुटियं वसित्वा पच्चूससमयं अज्झिट्ठो सोळस अट्ठकवगियानि सत्थु सम्मुखा अट्ठिं कत्वा मनसि कत्वा सब्बं चेतसा समन्नाहरित्वा अत्थधम्मपटिसंवेदी हुत्वा भणन्तो धम्मपसज्जितपामोज्जादिमुखेन समाहितो सरभज्जपरियोसाने विपस्सनं पट्टपेत्वा सङ्घारे सम्मसन्तो अनुपुब्बेन अरहत्तं पापुणि । एतदत्थमेव हिस्स भगवता अत्तना सद्धिं एकगन्धकुटियं वासो आणत्तोति वदन्ति ।

केचि पनाहु “न च मया सम्मुखा दिट्ठोति इदं रूपकायदस्सनमेव सन्धाय वुत्तं । आयस्मा हि सोणो पब्बजित्वा थेरस्स सन्तिके कम्मट्ठानं गहेत्वा घटेन्तो वायमन्तो अनुपसम्पन्नोव सोतापन्नो हुत्वा उपसम्पज्जित्वा ‘उपासकापि सोतापन्ना होन्ति, अहम्पि सोतापन्नो, किमेत्थ चित्तं’न्ति उपरिमगत्थाय विपस्सनं वट्ठेत्वा अन्तोवस्सेयेव छळभिज्जो हुत्वा विसुद्धिपवारणाय पवारेसि । अरियसच्चदस्सनेन भगवतो धम्मकायो दिट्ठो नाम होति । वुत्तज्जेतं ‘यो खो, वक्कलि, धम्मं पस्सति, सो मं पस्सती’ति (सं० नि० ३.८७) । तस्मास्स धम्मकायदस्सनं पगेव सिद्धं, पवारेत्वा पन रूपकायं दट्ठुकामो अहोसी”ति ।

**पासादिकन्ति** आदिपदानं अत्थो अट्ठकथायमेव वुत्तो । तत्थ **विसूकायिकविप्फन्दितानन्ति** पटिपक्खभूतानं दिट्ठिचित्तविप्फन्दितानन्ति अत्थो । **पासादिकन्ति** (उदा० अट्ठ० १०) वा द्वित्तिसमहापुरिसलक्खणअसीति अनुव्यञ्जनव्यामप्यभाकेतुमालालङ्कताय समन्तपासादिकाय अत्तनो सरीरप्पभाय सम्पत्तिया रूपकायदस्सनव्यावटस्स जनस्स सब्बभागतो पसादावहं । **पसादनीयन्ति** दसबलचतुवेसारज्जछअसाधारणजाणअट्ठारसआवेणिकबुद्धधम्मप्पभुतिअपरिमाणगुणगणसमन्नागताय धम्मकायसम्पत्तिया परिक्खकजनस्स पसादनीयं पसीदितब्बयुत्तं पसादकं वा । **सन्तिन्द्रियन्ति** चक्खादिपञ्चिन्द्रियलोलताविगमेन वूपसन्तपञ्चिन्द्रियं । **सन्तमानसन्ति** छट्ठस्स मनिन्द्रियस्स निब्बिसेवनभावूपगमनेन वूपसन्तमानसं । **उत्तमदमथसमथं अनुप्पत्तन्ति** लोकुत्तरपञ्चाविमुत्तिचेतोविमुत्तिसङ्घातं उत्तमं दमथं समथज्ज अनुप्पत्त्वा अधिगन्त्वा ठितं । **दन्तन्ति** सुपरिसुद्धकायसमाचारताय हत्थपादकुक्कुच्याभावतो दवादिअभावतो च कायेन दन्तं । **गुत्तन्ति** सुपरिसुद्धवचीसमाचारताय निरत्थकवाचाभावतो रवादिअभावतो च वाचाय गुत्तं । **यतिन्द्रियन्ति** सुपरिसुद्धमनोसमाचारताय अरियिद्धियोगेन अब्बावटअप्पटिसङ्खुपेक्खाभावतो च मनिन्द्रियवसेन यतिन्द्रियं । **नागन्ति** छन्दादिवसेन अगमनतो, पहीनानं रागादिकिलेसानं अपुनागमनतो अपच्चागमनतो कस्सचिपि आगुस्स सब्बथापि अकरणतो, पुनब्भवस्स च अगमनतोति इमेहि कारणेहि नागं । एत्थ च “पासादिक”न्ति इमिना रूपकायेन भगवतो पमाणभूततं दीपेति, “पसादनीय”न्ति इमिना धम्मकायेन । “सन्तिन्द्रिय”न्ति आदिना सेसेहि पमाणभूततं दीपेति, तेन चतुप्पमाणिके लोकसन्निवासे अनवसेसतो सत्तानं भगवतो पमाणभावो पकासितोति वेदितब्बो । **एकविहारेति** एकगन्धकुटियं । गन्धकुटि हि इध “विहारो”ति अधिप्पेतो । **वत्थुन्ति** वसितुं ।

**२५८. अज्झोकासे वीतिनामेत्वाति** (उदा० अट्ठ० ४६) अज्झोकासे निसज्जाय वीतिनामेत्वा । “यस्मा भगवा आयस्मतो सोणस्स समापत्तिसमापज्जनेन पटिसन्धारं करोन्तो सावकसाधारणा सब्बा समापत्तियो अनुलोमपटिलोमं समापज्जन्तो बहुदेव रत्तिं अज्झोकासे निसज्जाय वीतिनामेत्वा पादे पक्खालेत्वा विहारं पाविसि, तस्मा आयस्मापि सोणो भगवतो अधिप्पायं जत्वा तदनुरूपं सब्बा ता समापत्तियो समापज्जन्तो बहुदेव रत्तिं अज्झोकासे निसज्जाय वीतिनामेत्वा पादे पक्खालेत्वा विहारं पाविसी”ति केचि वदन्ति । पविसित्वा च भगवता अनुज्जातो चीवरं तिरोकरणीयं कत्वापि भगवतो पादपस्से निसज्जाय वीतिनामेसि । **अज्झेसीति** आणापेसि । **पटिभातु तं भिक्खु धम्मो भासितुन्ति** भिक्खु तुहं धम्मो भासितुं उपट्ठातु जाणमुखं आगच्छतु, यथासुतं यथापरियत्तं धम्मं भणाहीति अत्थो ।

**सब्बानेव अट्ठकवगिकानीति** अट्ठकवग्गभूतानि **कामसुत्तादीनि** (महानि० १) सोळस सुत्तानि । **सरेन अभासीति** सुत्तुस्सारणसरेन अभासि, सरभज्जवसेन कथेसीति अत्थो । **सरभज्जपरियोसानेति** उस्सारणावसाने । **सुग्गहितानीति** सम्मा उग्गहितानि । **सुमनसिकतानीति** सुट्ठु मनसि कतानि । एकच्चो उग्गहणकाले सम्मा उग्गहेत्वापि पच्छा सज्झायादिवसेन मनसिकरणकाले ब्यज्जनानि वा मिच्छा रोपेति, पदपच्चाभट्ठं वा करोति, न एवमयं । इमिना पन सम्मदेव यथुग्गहितं मनसि कतानि । तेन वुत्तं “सुमनसिकतानीति सुट्ठु मनसि कतानी”ति । **सूपधारितानीति** अत्थतोपि सुट्ठु उपधारितानि । अत्थे हि सुट्ठु उपधारिते सक्का पाळि सम्मा उस्सारेतुं । **कल्याणियापि वाचाय समन्नागतोति** सिथिलधनितादीनं यथाविधानं वचनेन परिमण्डलपदव्यज्जनाय पोरिया वाचाय समन्नागतो । **विस्सट्ठायाति** विमुत्ताय । एतेनस्स विमुत्तवादिदं दस्सेति । **अनेलगलायाति** एलं वुच्चति दोसो, तं न पग्घरतीति अनेलगला, ताय निद्वोसायाति अत्थो । अथ वा **अनेलगलायाति** अनेलाय च अगलाय च, निद्वोसाय अगलितपदव्यज्जनाय अपरिहीनपदव्यज्जनायाति अत्थो । तथा हि नं भगवा “एतदग्गं, भिक्खवे, मम सावकानं भिक्खूनं कल्याणवाक्करणानं यदिदं सोणो कुटिकण्णो”ति (अ० नि० १.१९८, २०६) एतदग्गे ठपेसि । **अत्थस्स विज्जापनियाति** यथाधिप्पेतं अत्थं जापेतुं समत्थाय ।

**कतिवस्सोति** सो किर मज्झिमवयस्स ततिये कोट्टासे ठितो आकप्पसम्पन्नो च परेसं चिरतरपब्बजितो विय खायति । तं सन्धाय भगवा पुच्छीति केचि, तं अकारणं । एवं सन्तं समाधिसुखं अनुभवितुं युत्तो, एत्तकं कालं कस्मा पमादं आपन्नोसीति पन अनुयुज्जितुं सत्था “कतिवस्सोसी”ति तं पुच्छि । तेनेवाह “**किस्स पन त्वं भिक्खु एवं चिरं अकासी**”ति । तत्थ **किस्साति** किंकारणा । **एवं चिरं अकासीति** एवं चिरायि, केन कारणेन एवं चिरकालं पब्बज्जं अनुपगन्त्वा अगारमज्झे वसीति अत्थो । **चिरं दिट्ठो मेति** चिरेन चिरकालेन मया दिट्ठो । **कामेसूति** वत्थुकामेसु किलेसकामेसु च । **आदीनवोति** दोसो । **अपिचाति** कामेसु आदीनवे केनचि प्रकारेन दिट्ठेपि न तावाहं घरावासतो निक्खमितुं असक्खिं । कस्मा? **सम्बाधो घरावासो**, उच्चावचेहि किच्चकरणीयेहि समुपब्यूळ्हो अगारियभावो । तेनेवाह “**बहुकिच्चो बहुकरणीयो**”ति ।

**एतमत्थं विदित्वाति** कामेसु यथाभूतं आदीनवदस्सिनो चित्तं चिरायित्वापि घरावासे न पक्खन्दति, अज्जदत्थु पदुमपलासे उदकबिन्दु विय विनिवत्तितियेवाति एतमत्थं सब्बाकारतो विदित्वा । **इमं उदानन्ति** पवत्तिं निवत्तिज्च सम्मदेव जानन्तो पवत्तियं तंनिमित्ते च न कदाचिपि रमतीति इदमत्थदीपकं इमं उदानं उदानेसि ।

तत्थ **दिस्वा आदीनवं लोकेति** सब्बस्मिम्पि सङ्खारलोके “अनिच्चो दुक्खो विपरिणामधम्मो”ति आदीनवं दोसं पज्जाचक्खुना पस्सित्वा । एतेन विपस्सनाचारो कथितो । **जत्वा धम्मं निरूपधन्ति** सब्बूपधिपटिनिस्सग्गत्ता निरूपधिं निब्बानधम्मं यथाभूतं जत्वा, निस्सरणविवेकासङ्ख्यतामतसभावतो मग्गजाणेन पटिविज्झित्वा । “दिस्वा जत्वा”ति इमेसं

पदानं “घतं पिवित्वा बलं होति, सीहं दिस्वा भयं होति, पञ्जाय चस्स दिस्वा आसवा परिकखीणा होन्ती”ति आदीसु (म० नि० १.२७१) विय हेतुअत्थता दड्डब्बा । **अरियो न रमती पापेति** किलेसेहि आरक्ता अरियो सप्पुरिसो अणुमत्तेपि पापे न रमति । कस्मा? **पापे न रमती सुचीति** सुविसुद्धकायसमाचारादिताय सुचि सुद्धपुग्गलो राजहंसो विय उच्चारट्ठाने पापे संकिलिद्धधम्मे न रमति नाभिनन्दति । “पापो न रमती सुचि”न्तिपि पाठो, तस्सत्थो — पापो पुग्गलो सुचिं अनवज्जं वोदानधम्मं न रमति, अज्जदत्थु गामसूकरादयो विय उच्चारट्ठानं असुचिं संकिलेसधम्मंयेव रमतीति पटिपक्खतो देसनं परिवत्तेति ।

सोणकुटिकणवत्थुकथावण्णना निट्ठिता ।

**२५९. काळसीहोति** काळमुखवानरजाति । सेसमेत्थ पाळितो अट्ठकथातो च सुविज्जेय्यमेवाति ।

चम्मक्खन्धकवण्णना निट्ठिता ।

## ६. भेसज्जक्खन्धकं

पञ्चभेसज्जादिकथावण्णना

**२६१. भेसज्जक्खन्धके नच्छादेन्तीति** रुचिं न उप्पादेन्ति ।

**२६२. सुसुकाति** समुदे भवा एका मच्छजाति । कुम्भीलातिपि वदन्ति । **संसट्ठन्ति** परिस्सावितं । **तेलपरिभोगेनाति** सत्ताहकालिकपरिभोगं सन्धाय वुत्तं ।

**२६३. पिट्ठेहीति** पिसितेहि । **उब्भिदं** नाम ऊसरपंसुमयं ।

**२६४. छकणन्ति** गोमयं । **पाकतिकचुण्णं** नाम अपक्ककसावचुण्णं । तेन ठपेत्वा गन्धचुण्णं सब्बं वट्ठतीति वदन्ति ।

**२६५. सुवण्णगेरुकोति** सुवण्णतुत्थादि । **अज्जनूपपिसनन्ति** अज्जनत्थाय उपपिसितब्बं यं किञ्चि चुण्णजातं ।

**२६६. सामं गहेत्वाति** एत्थ सप्पदट्ठस्स अत्थाय अज्जेन भिक्खुना गहितम्पि सामं गहितसङ्खमेव गच्छतीति वेदितब्बं ।

**२६९. घरदिन्नकाबाधो** नाम वसीकरणत्थाय घरणिया दिन्नभेसज्जसमुट्ठितो आबाधो । तेनाह “**वसीकरणपाणकसमुट्ठितरोगो**”ति । घर-सट्ठो चेत्थ अभेदेन घरणिया वत्तमानो अधिप्पेतो । “**अकटयूसेनाति** अनभिसङ्खतेन मुग्गयूसेन । **कटाकटेनाति** मुग्गे पचित्वा अचालेत्वाव परिस्सावितेन मुग्गसूपेना”ति **गण्ठिपदेसु** वुत्तं ।

गुळादिअनुजाननकथावण्णना

**२७२. गुळकरणन्ति** गुळकरणट्ठानं, उच्छुसालन्ति वुत्तं होति ।

२७४. अविस्सत्थाति सासङ्का ।

२७६. अप्पमत्तकेपि पवारेलीति अप्पमत्तकेपि गहिते पवारेलि, “बहुम्हि गहिते अज्जेसं नप्पहोती”ति मज्जमाना अप्पमत्तकं गहेत्वा पवारेलीति अधिप्पायो । पटिसङ्कापि पटिक्खिपन्तीति “दिवा भोजनत्थाय भविस्सती”ति सल्लक्खेत्वापि पटिक्खिपन्ति ।

२७९. सम्बाधे दहनकम्मं पटिक्खेपाभावो वट्ठति ।

२८०. उभतोपसन्नाति उभयतो पसन्ना । माघातोति “मा घातेथ पाणिनो”ति एवं माघातघोसितदिवसो ।

### यागुमधुगोळकादिकथावण्णना

२८२. मधुगोळकन्ति सक्करादिसंयुत्तपूर्वं । आयुं देतीति आयुदानं देति । वण्णन्ति सरीरवण्णं । सुखन्ति कायिकचेतसिकसुखं । बलन्ति सरीरथामं । पटिभानन्ति युत्तमुत्तपटिभानं । वातं अनुलोमेतीति वातं अनुलोमेत्वा हरति । वत्थिं सोधेतीति धमनियो सुद्धं करोति । आमावसेसं पाचेतीति सचे आमावसेसकं होति, तं पाचेति । अनुप्पवेच्छतीति देति । वातज्ज व्यपनेतीति सम्बन्धितब्बं ।

२८३. ननु च “परम्परभोजनेन कारेतब्बो”ति कस्मा वुत्तं । परम्परभोजनज्झि पज्चन्नं भोजनानं अज्जतरेन निमन्तितस्स तं ठपेत्वा अज्जं पज्चन्नं भोजनानं अज्जतरं भुज्जन्तस्स होति, इमे च भिक्खू भोज्जयागुं परिभुज्जिंसु, पज्चसु भोजनेसु अज्जतरन्ति आह “भोज्जयागुया हि पवारणा होती”ति । यस्मा पज्चन्नं भोजनानं अज्जतरं पटिक्खिपन्तस्स वुत्ता पवारणा भोज्जयागुं पटिक्खिपन्तस्सपि होतियेव, तस्मा भोज्जयागुपि ओदनगतिकायेवाति अधिप्पायो ।

२८४. सुखुमोजं पक्खिपिंसूति “भगवा परिभुज्जिस्सती”ति मज्जमाना पक्खिपिंसु ।

### पाटलिगामवत्थुकथावण्णना

२८५. पाटलिगामोति (उदा० अट्ठ० ७६) एवंनामको मगधरट्ठे एको गामो । तस्स किर गामस्स मापनदिवसे गामङ्गणट्ठाने द्वे तयो पाटलङ्कुरा पथवितो उब्भिज्जित्वा निक्खमिंसु । तेन तं “पाटलिगामो” त्वेव वोहरिंसु । तदवसरीति तं पाटलिगामं अवसरि अनुपापुणि । पाटलिगामिकाति पाटलिगामवासिनो । उपासकाति ते किर भगवतो पठमदस्सनेन केचि सरणेषु च सीलेसु च पतिट्ठिता । तेन वुत्तं “उपासका”ति । येन भगवा तेनुपसङ्कमिंसूति पाटलिगामे किर अजातसत्तुनो लिच्छिविराजूनज्ज मनुस्सा कालेन कालं गन्त्वा गेहसामिके गेहतो नीहरित्वा मासम्पि अट्ठमासम्पि वसन्ति । तेन पाटलिगामवासिनो मनुस्सा निच्चुपट्ठिता “एतेसज्जेव आगतकाले वसनट्ठानं भविस्सतीति एकपस्से इस्सरानं भण्डपटिसामनट्ठानं, एकपस्से वसनट्ठानं, एकपस्से आगन्तुकानं अट्ठिकमनुस्सानं, एकपस्से दलिट्ठानं कपणमनुस्सानं, एकपस्से गिलानानं वसनट्ठानं भविस्सती”ति सब्बेसं अज्जमज्जं अघट्ठेत्वा वसनप्पहोनकं नगरमज्जे महतिं सालं कारेसुं, तस्स नामं आवसथागारन्ति । आगन्त्वा वसन्ति एत्थ आगन्तुकाति आवसथो, तदेव आगारं आवसथागारं ।

तं दिवसज्ज तं निट्ठानं अगमासि । ते तत्थ गन्त्वा इट्ठककम्मसुधाकम्मचित्तकम्मादिवसेन सुपरिनिट्ठितं सुसज्जितं देवविमानसदिसं द्वारकोट्ठकतो पट्ठाय ओलोकेत्वा “इदं आवसथागारं अतिविय मनोरमं सस्सिरिकं, केन नु खो पठमं



परिभुत्तं अम्हाकं दीघरत्तं हिताय सुखाय अस्सा”ति चिन्तेसुं, तस्मिंयेव च खणे “भगवा तं गामं अनुप्पत्तो”ति अस्सोसुं, तेन ते उप्पन्नपीतिसोमनस्सा “अम्हेहि भगवा गन्त्वापि आनेतब्बो सिया, सो सयमेव अम्हाकं वसनट्ठानं सम्पत्तो, अज्ज मयं भगवन्तं इध वसापेत्वा पठमं परिभुज्जापेस्साम, तथा भिक्खुसङ्घं, भिक्खुसङ्घे आगते तेपिटकं बुद्धवचनं आगतमेव भविस्सति, सत्थारं मङ्गलं वदापेस्साम, धम्मं कथापेस्साम, इति तीहि रतनेहि परिभुत्ते पच्छा अम्हाकं परेसज्ज परिभोगो भविस्सति, एवं नो दीघरत्तं हिताय सुखाय भविस्सती”ति सन्निट्ठानं कत्वा एतदत्थमेव भगवन्तं उपसङ्कमिंसु। तस्मा एवमाहंसु “अधिवासेतु नो, भन्ते, भगवा आवसथागार”न्ति। तेनुपसङ्कमिंसूति (दी० नि० अट्ठ० ३.२९७-२९८; म० नि० अट्ठ० २.२२) किञ्चापि तं दिवसमेव परिनिट्ठितत्ता देवविमानं विय सुसज्जितं सुपटिज्जितं, बुद्धारहं पन कत्वा न पज्जत्तं। बुद्धा हि नाम अरज्जज्झासया अरज्जारामा, अन्तोगामे वसेय्युं वा नो वा, तस्मा भगवतो रुचिं जानित्वाव पज्जपेस्सामाति चिन्तेत्वा ते भगवन्तं उपसङ्कमिंसु, इदानि भगवतो रुचिं जानित्वा तथा पज्जापेतुकामा येनावसथागारं तेनुपसङ्कमिंसु। **सब्बसन्थरिं आवसथागारं सन्थरित्वा**ति एत्थ सन्थरणं सन्थरि, सब्बो सकलो सन्थरि एत्थाति **सब्बसन्थरि**। अथ वा सन्थतन्ति सन्थरि, सब्बं सन्थरि सब्बसन्थरि, तं **सब्बसन्थरिं**। भावनपुंसकनिद्देशोवायं, यथा सब्बमेव सन्थतं होति, एवं सन्थरित्वाति अत्थो। सब्बपठमं ताव “गोमयं नाम सब्बमङ्गलेसु वट्ठती”ति सुधापरिकम्मकतम्पि भूमिं अल्लगोमयेन ओपुज्जापेत्वा परिसुखभावं जत्वा यथा अक्कन्तट्ठाने पदं पज्जायति, एवं चातुज्जातियगन्धेहि लिम्पेत्वा उपरि नानावण्णकटसारके सन्थरित्वा तेसं उपरि महापिट्ठिककोजवे आदिं कत्वा हत्थत्थरणादीहि नानावण्णेहि अत्थरणेहि सन्थरित्त्वयुत्तकं सब्बोकासं सन्थरापेसुं। तेन वुत्तं “सब्बसन्थरिं आवसथागारं सन्थरित्वा”ति।

**आसनानीति** मज्झट्ठाने ताव मङ्गलत्थम्भं निस्साय महारहं बुद्धासनं पज्जपेत्वा तत्थ यं यं मुदुकज्ज मनोरमज्ज पच्चत्थरणं, तं तं अत्थरित्वा उभतोलोहितकं मनुज्जदस्सनं उपधानं उपदहित्वा उपरि सुवण्णरजततारकविचित्तवितानं बन्धित्वा गन्धदामपुप्फदामपत्तादामादीहि अलङ्कित्वा समन्ता द्वादसहत्थे ठाने पुप्फजालं कारेत्वा तिसहत्थमत्तं ठानं पटसाणिया परिक्षिप्वापेत्वा पच्छिमभित्तिं निस्साय भिक्खुसङ्घस्स पल्लङ्कपीठअपस्सयपीठमुण्डपीठादीनि पज्जपापेत्वा उपरि सेतपच्चत्थरणेहि पच्चत्थरापेत्वा सालाय पाचीनपस्सं अत्तनो निसज्जायोगं कारेसुं। तं सन्धाय वुत्तं “आसनानि पज्जपेत्वा”ति।

**उदकमणिकन्ति** महाकुच्छिकं समेखलं उदकचाटिं। एवं भगवा भिक्खुसङ्घो च यथारुचिया हत्थपादे धोविस्सन्ति, मुखं विक्खालेस्सन्तीति तेसु तेसु ठानेसु मणिवण्णस्स उदकस्स पूरेत्वा वासत्थाय नानापुप्फानि चेव उदकवासचुण्णानि च पक्खिपित्वा कदलिपण्णेहि पिदहित्वा पतिट्ठपेसुं। तेन वुत्तं “उदकमणिकं पतिट्ठापेत्वा”ति।

**तेलपदीपं आरोपेत्वा**ति रजतसुवण्णादिमयदण्डासु दण्डदीपिकासु योनकरूपकादीनं हत्थे ठपितसुवण्णरजतादिमयकपल्लिकासु च तेलपदीपे जलयित्वा। **येन भगवा तेनुपसङ्कमिंसूति** एत्थ पन ते पाटलिगामिकउपासका न केवलं आवसथागारमेव, अथ खो सकलस्मिम्पि गामे वीथियो सज्जापेत्वा धजे उस्सापेत्वा गेहद्वारेसु पुण्णघटे च कदलिआदयो च ठपापेत्वा सकलगामं दीपमालाहि विष्पकिण्णतारकं विय कत्वा “खीरपके दारके खीरं पायेथ, दहरकुमारे लहुं लहुं भोजेत्वा सयापेथ, उच्चासदं मा करित्थ, अज्ज एकरत्तिं सत्था अन्तोगामे वसिस्सति, बुद्धा नाम अप्पसद्वकामा होन्ती”ति भेरिं चरापेत्वा सयं दण्डदीपिका आदाय येन भगवा तेनुपसङ्कमिंसु।

**अथ खो भगवा निवासेत्वा पत्तचीवरमादाय सद्धिं भिक्खुसङ्घेन येन आवसथागारं तेनुपसङ्कमीति** “यस्स

दानि, भन्ते, भगवा कालं मञ्जती”ति एवं किर तेहि काले आरोचिते भगवा लाखारसेन तित्तरत्तकोविळारपुण्णवण्णं सुरत्तं दुपट्टं कत्तरिया पदुमं कन्तेन्तो विय, संविधाय तिमण्डलं पटिच्छादेन्तो निवासेत्वा सुवण्णपामङ्गेन पदुमकलापं परिक्खिपन्तो विय, विज्जुलतासस्सिरिकं कायबन्धनं बन्धित्वा रत्तकम्बलेन गजकुम्भं परियोनन्धन्तो विय, रतनसतुब्बेधे सुवण्णग्घिके पवाळजालं खिपमानो विय, महति सुवण्णचेतिये रत्तकम्बलकञ्चुकं पटिमुञ्चन्तो विय, गच्छन्तं पुण्णचन्दं रत्तवलाहकेन पटिच्छादयमानो विय, कञ्चनगिरिमत्थके सुपक्कलाखारसं परिसिञ्चन्तो विय, चित्तकूटपब्बतमत्थकं विज्जुलताजालेन परिक्खिपन्तो विय च सचक्कवाळसिनेरुयुगन्धरमहापथविं चालेत्वा गहितनिग्रोधपल्लवसमानवण्णं रत्तवरपंसुकूलं पारुपित्वा वनगहनतो केसरसीहो विय, उदयपब्बतकूटतो पुण्णचन्दो विय, बालसूरियो विय च अत्तना निसिन्नतरुसण्डतो निक्खमि ।

अथस्स कायतो मेघमुखतो विज्जुकलापा विय रस्मियो निक्खमित्वा सुवण्णरसधारापरिसेकपिञ्जरपत्तपुण्णफलसाखावितपे विय समन्ततो रुक्खे करिंसु । तावदेव अत्तनो अत्तनो पत्तचीवरमादाय महाभिक्खुसङ्घो भगवन्तं परिवारेसि । ते च नं परिवारेत्वा ठितभिक्खू एवरूपा अहेसुं अप्पिच्छा सन्तुड्ढा पविवित्ता असंसङ्घा आरद्धवीरिया वत्तारो वचनक्खमा चोदका पापगरहिनो सीलसम्पन्ना समाधिसम्पन्ना पञ्जासम्पन्ना विमुत्तिसम्पन्ना विमुत्तिजाणदस्सनसम्पन्ना । तेहि परिवारितो भगवा रत्तकम्बलपरिक्खित्तो विय सुवण्णक्खन्धो, रत्तपदुमसण्डमञ्जगता विय सुवण्णनावा, पवाळवेदिकापरिक्खित्तो विय सुवण्णपासादो विरोचित्थ । महाकस्सपप्पमुखा पन महाथेरा मेघवण्णं पंसुकूलचीवरं पारुपित्वा मणिवम्मवम्मिता विय महानागा परिवारयिंसु वीतरागा भिन्नकिलेसा विजटितजटा छिन्नबन्धना कुले वा गणे वा अलगा ।

इति भगवा सयं वीतरागो वीतरागेहि, वीतदोसो वीतदोसेहि, वीतमोहो वीतमोहेहि, नित्तण्हो नित्तण्हेहि, निक्किलेसो निक्किलेसेहि, सयं बुद्धो अनुबुद्धेहि परिवारितो पत्तपरिवारितं विय केसरं, केसरपरिवारिता विय कणिका, अट्टनागसहस्सपरिवारितो विय छद्दन्तो नागराजा, नवुतिहंससहस्सपरिवारितो विय धतरट्ठो हंसराजा, सेनङ्गपरिवारितो विय चक्कवत्ती, मरुगणपरिवारितो विय सक्को देवराजा, ब्रह्मगणपरिवारितो विय हारितमहाब्रह्मा, तारागणपरिवृतो विय पुण्णचन्दो असमेन बुद्धवेसेन अपरिमाणेन बुद्धविलासेन पाटलिगामीनं मगं पटिपज्जि ।

अथस्स पुरत्थिमकायतो सुवण्णवण्णा घनबुद्धरस्मियो उट्ठित्वा असीतिहत्थं ठानं अग्गहेसुं, पच्छिमकायतो दक्खिणपस्सतो वामपस्सतो सुवण्णवण्णा घनरस्मियो उट्ठित्वा असीतिहत्थं ठानं अग्गहेसुं, उपरिकेसन्ततो पट्टाय सब्बकेसावत्तेहि मोरगीववण्णा घनबुद्धरस्मियो उट्ठित्वा गगनतले असीतिहत्थं ठानं अग्गहेसुं, हेट्ठापादतलेहि पवाळवण्णा रस्मियो उट्ठित्वा घनपथवियं असीतिहत्थं ठानं अग्गहेसुं, दन्ततो अक्खीनं सेतट्ठानतो, नखानञ्च मंसविनिमुत्तट्ठानतो ओदाता घनबुद्धरस्मियो उट्ठित्वा असीतिहत्थं ठानं अग्गहेसुं, रत्तपीतवण्णानं सम्भिन्नट्ठानतो मज्झिट्ठवण्णा रस्मियो उट्ठित्वा असीतिहत्थं ठानं अग्गहेसुं, सब्बत्थकमेव पभस्सरा रस्मियो उट्ठिंसु । एवं समन्ता असीतिहत्थमत्तं ठानं छब्बण्णा बुद्धरस्मियो विज्जोतमाना विष्फन्दमाना विधावमाना कञ्चनदण्डदीपिकाहि निच्छरित्वा आकासं पक्खन्दमाना महापदीपजाला विय, चातुदीपिकमहामेघतो निक्खन्तविज्जुलता विय च दिसोदिसं पक्खन्दिंसु । याहि सब्बदिसाभागा सुवण्णचम्पकपुण्णेहि विकिरियमाना विय, सुवण्णघटतो निक्खन्तसुवण्णरसधाराहि आसिञ्चियमाना विय, पसारितसुवण्णपट्टपरिक्खित्ता विय, वेरम्भवातसमुद्धतकिंसुककणिकारिकिरातपुण्णचुण्णसमोकिण्णा विय चीनपिट्टचुण्णसम्परिरज्जिता विय च विरोचिंसु ।

भगवतोपि असीति अनुब्यञ्जनव्यामप्यभापरिक्खेपसमुज्जलं द्वत्तिसमहापुरिसलक्खणपटिमण्डितं सरीरं  
अब्भमहिकादिउपक्विलेसविमुत्तं समुज्जलतारकपभासितं विय गगनतलं, विकसितं विय पदुमवनं, सब्बपालिफुल्लो विय  
योजनसतिको पारिच्छत्तको, पटिपाटिया ठपितानं द्वत्तिसचन्दानं द्वत्तिससूरियानं द्वत्तिसचक्कवत्तीनं द्वत्तिसदेवराजानं  
द्वत्तिसमहाब्रह्मानं सिरिया सिरिं अभिभवमानं विय विरोचित्थ, यथा तं दसहि पारमीहि दसहि उपपारमीहि दसहि  
परमत्थपारमीहीति सम्मदेव परिपूरिताहि समत्तिंसाय पारमीहि अलङ्कृतं कप्पसतसहस्साधिकानि चत्तारि असङ्ख्येय्यानि  
दिन्नेन दानेन रक्खितेन सीलेन कतेन कल्याणकम्मेन एकस्मिं अत्तभावे समोसरित्वा विपाकं दातुं ओकासं अलभमानेन  
सम्बाधप्पत्तेन विय निब्बत्तितं नावासहस्सस्स भण्डं एकं नावं आरोपनकालो विय, सकटसहस्सस्स भण्डं एकं सकटं  
आरोपनकालो विय, पञ्चवीसतिया गङ्गानं सम्भिज्ज मुखद्वारे एकतो रासीभूतकालो विय च अहोसि ।

इमाय बुद्धरस्मिया ओभासमानस्सपि भगवतो पुरतो अनेकानि दण्डदीपिकासहस्सानि उक्खिपिंसु, तथा पच्छतो  
वामपस्से दक्खिणपस्से । जातिसुमनचम्पकवनमालिकारत्तुप्पलनीलुप्पलबकुलसिन्दुवारादिपुष्पानि चेव  
नीलपीतादिवण्णसुगन्धगन्धचुण्णानि च चातुदीपिकमहआमेघविस्सट्ठा सलिलवुट्ठियो विय विप्पकिरिंसु ।  
पञ्चङ्गिकतूरियनिग्घोसा चेव बुद्धधम्मसङ्गुणपटिसंयुत्ता थुतिघोसा च सब्बा दिसा पूरयमाना मुखरा विय अकंसु ।  
देवसुपण्णनायकवग्गन्धब्बमनुस्सानं अक्खीनि अमतपानं विय लभिंसु । इमस्मिं पन ठाने ठत्वा पदसहस्सेहि गमनवण्णं  
वत्तुं वट्ठति । तत्रिदं मुखमत्तं (मं निं अट्ठं २.२२; उदा० अट्ठं ७६) —

“एवं सब्बङ्गसम्पन्नो, कम्पयन्तो वसुन्धरं ।  
अहेठयन्तो पाणानि, याति लोकविनायको ॥

“दक्खिणं पठमं पादं, उद्धरन्तो नरासभो ।  
गच्छन्तो सिरिसम्पन्नो, सोभते द्विपदुत्तमो ॥

“गच्छतो बुद्धसेट्ठस्स, हेट्ठापादतलं मुदु ।  
समं सम्फुसते भूमिं, रजसानुपलिम्पति ॥

“निन्नं ठानं उन्नमति, गच्छन्ते लोकनायके ।  
उन्नतज्ज समं होति, पथवी च अचेतना ॥

“पासाणा सक्खरा चेव, कथला खाणुकण्टका ।  
सब्बे मग्गा विवज्जन्ति, गच्छन्ते लोकनायके ॥

“नातिदूरे उद्धरति, नाच्चासन्ने च निक्खिपं ।  
अघट्टयन्तो निरय्याति, उभो जाणू च गोप्फके ॥

“नातिसीधं पक्कमति, सम्पन्नचरणो मुनि ।  
न चातिसणिकं याति, गच्छमानो समाहितो ॥

“उद्धं अधो तिरियज्ज, दिसज्ज विदिसं तथा ।

न पेक्खमानो सो याति, युगमत्तञ्चि पेक्खति ॥

“नागविककन्तचारो सो, गमने सोभते जिनो ।  
चारु गच्छति लोकगो, हासयन्तो सदेवके ॥

“उसभराजाव सोभन्तो, चातुचारीव केसरी ।  
तोसयन्तो बहू सत्ते, गामसेट्ठं उपागमी”ति ॥ (म० नि० अट्ठ० २.२२; उदा० अट्ठ० ७६) ।

वण्णकालो नाम किरिसे । एवंविधेषु कालेषु भगवतो सरीरवण्णे वा गुणवण्णे वा धम्मकथिकस्स थामोयेव पमाणं ।  
चुण्णियपदेहि गाथाबन्धेहि वा यत्तकं सक्कोति, तत्तकं वत्तब्बं, “दुक्कथित”न्ति वा “अतित्थेन पक्खन्दो”ति वा न  
वत्तब्बो । अपरिमाणवण्णा हि बुद्धा भगवन्तो, तेसं बुद्धापि अनवसेसतो वण्णं वत्तुं असमत्था । सकलम्पि हि कप्पं वदन्ता  
परियोसापेतुं न सक्कोन्ति, पगेव इतरा पजाति । इमिना सिरिविलासेन अलङ्कृतपटियत्तं पाटलिगामं पविसित्वा भगवा  
पसन्नचित्तेन जनेन पुप्फगन्धधूमवासचुण्णादीहि पूजियमानो आवसथागारं पाविसि । तेन वुत्तं “अथ खो भगवा निवासेत्वा  
पत्तचीवरमादाय सद्धिं भिक्खुसङ्घेन येन आवसथागारं तेनुपसङ्कमी”ति ।

**पादे पक्खालेत्वा**ति यदिपि भगवतो पादे रजोजल्लं न उपलिम्पति, तेसं पन उपासकानं कुसलाभिवुद्धिं आकङ्खन्तो  
परेसं दिट्ठानुगतिं आपज्जनत्थं भगवा पादे पक्खालेसि । अपिच उपादिन्नकसरीरं नाम सीतिकातब्बम्पि होतीति तदत्थम्पि  
भगवा नहानपादधोवनानि करोतियेव । **भगवन्तंयेव पुरक्खत्वा**ति भगवन्तं पुरतो कत्वा । तत्थ भगवा भिक्खूनञ्चेव  
उपासकानञ्च मज्झे निसिन्नो गन्धोदकेन नहापेत्वा दुकूलचुम्बटेन वोदकं कत्वा जातिहिङ्गुलकेन मज्जित्वा  
रत्तकम्बलपलिवेठिते पीठे ठपिता रत्तसुवण्णघनपटिमा विय अतिविय विरोचित्थ । अयं पनेत्थ पोराणानं वण्णभणनमग्गो

—

“गन्त्वान मण्डलमाळं, नागविककन्तचारणो ।  
ओभासयन्तो लोकगो, निसीदि वरमासने ॥

“तहिं निसिन्नो नरदम्मसारथि,  
देवातिदेवो सतपुञ्जलक्खणो ।  
बुद्धासने मज्झगतो विरोचति,  
सुवण्णनेक्खं विय पण्डुकम्बले ॥

“नेक्खं जम्बोनदस्सेव, निक्खित्तं पण्डुकम्बले ।  
विरोचति वीतमलो, मणि वेरोचनो यथा ॥

“महासालोव सम्फुल्लो, मेरुराजावलङ्कतो ।  
सुवण्णथूपसङ्कासो, पदुमो कोसको यथा ॥

“जलन्तो दीपरुक्खोव, पब्बतगो यथा सिखी ।  
देवानं पारिच्छत्तोव, सब्बफुल्लो विरोचथा”ति ॥ (म० नि० अट्ठ० २.२२; उदा० अट्ठ० ७६) ।

**पाटलिगामिके उपासके आमन्तेसीति** यस्मा तेसु उपासकेसु बहू जना सीले पतिट्ठिता, तस्मा पठमं ताव सीलविपत्तिया आदीनवं पकासेत्वा पच्छा सीलसम्पदाय आनिसंसं दस्सेतुं “**पञ्चिमे गहपतयो**”ति आदिना धम्मदेसनत्थं आमन्तेसि। तत्थ **दुस्सीलो**ति निस्सीलो (दी० नि० अट्ठ० २.१४९; अ० नि० अट्ठ० ३.५.२१३; उदा० अट्ठ० ७६)। अभावत्थो हेत्थ दु-सद्वो “दुप्पज्जो”ति आदीसु विय। **सीलविपन्नो**ति विपन्नसीलो भिन्नसंवरो। एत्थ च “दुस्सीलो”ति पदेन पुग्गलस्स सीलाभावो वुत्तो। सो पनस्स सीलाभावो दुविधो असमादानेन वा समादिन्नस्स भेदेन वाति। तेसु पुरिमो न तथा सावज्जो, यथा दुतियो सावज्जतरो। यथाधिप्पेतादीनवनिमित्तं सीलाभावं पुग्गलाधिट्ठानाय देसनाय दस्सेतुं “**सीलविपन्नो**”ति वुत्तं, तेन “दुस्सीलो”ति पदस्स अत्थं दस्सेति। **पमादाधिकरणन्ति** पमादकारणा। इदञ्च सुत्तं गहट्ठानं वसेन आगतं, पब्बजितानम्पि पन लब्भतेव। गहट्ठो हि येन येन सिप्पट्ठानेन जीविकं कप्पेति यदि कसिया यदि वणिज्जाय यदि गोरक्खेन। पाणातिपातादिवसेन पमत्तो तं तं यथाकालं सम्पादेतुं न सक्कोति, अथस्स कम्मं विनस्सति। माघातकाले पाणातिपातं पन अदिन्नादानादीनि च करोन्तो दण्डवसेन महतिं भोगजानिं निगच्छति। पब्बजितो दुस्सीलो पमादकारणा सीलतो बुद्धवचनतो ज्ञानतो सत्तअरियधनतो च जानिं निगच्छति।

**पापको कित्तिसद्वो**ति गहट्ठस्स “असुको असुककुले जातो दुस्सीलो पापधम्मो परिच्चत्तइधलोकपरलोको सलाकभत्तमत्तम्पि न देती”ति चतुपरिसमज्जे पापको कित्तिसद्वो अब्भुगगच्छति। पब्बजितस्स “असुको नाम सत्थुसासने पब्बजित्वा नासक्खि सीलानि रक्खितुं, न बुद्धवचनं उग्गहेतुं, वेज्जकम्मादीहि जीवति, छहि अगारवेहि समन्नागतो”ति एवं पापको कित्तिसद्वो अब्भुगगच्छति।

**अविसारदो**ति गहट्ठो ताव “अवस्सं बहून् सन्निपातट्ठाने कोचि मम कम्मं जानिस्सति, अथ मं निग्गण्हिस्सन्ती”ति वा, “राजकुलस्स वा दस्सन्ती”ति सभयो उपसङ्कमति, मङ्कुभूतो पत्तक्खन्धो अधोमुखो निसीदति, विसारदो हुत्वा कथेतुं न सक्कोति। पब्बजितोपि “बहू भिक्खू सन्निपतिता, अवस्सं कोचि मम कम्मं जानिस्सति, अथ मे उपोसथम्पि पवारणम्पि ठपेत्वा सामज्जतो चावेत्वा निक्कट्ठिस्सन्ती”ति सभयो उपसङ्कमति, विसारदो हुत्वा कथेतुं न सक्कोति। एकच्चो पन दुस्सीलोपि समानो दप्पितो विय वदति, सोपि अज्झासयेन मङ्कु होतियेव विप्पटिसारीभावतो।

**सम्मूळ्हो कालं करोतीति** दुस्सीलस्स हि मरणमज्जे निपन्नस्स दुस्सील्यकम्मानं समादाय वत्तितट्ठानानि आपाथमागच्छन्ति। सो उम्मीलेत्वा अत्तनो पुत्तदारादिदस्सनवसेन इधलोकं पस्सति, निमीलेत्वा गतिनिमित्तपट्ठानवसेन परलोकं पस्सति, तस्स चत्तारो अपाया कम्मानुरूपं उपट्ठहन्ति। सत्तिसतेन पहरियमानो विय अग्गिजालाय आलिङ्गियमानो विय च होति। सो “वारेथ वारेथा”ति विरवन्तोव मरति। तेन वुत्तं “सम्मूळ्हो कालं करोती”ति।

**कायस्स भेदाति** उपादिन्नकक्खन्धपरिच्चागा। **परं मरणाति** तदनन्तरं अभिनिब्बत्तक्खन्धग्गहणे। अथ वा **कायस्स भेदाति** जीवितिन्द्रियस्स उपच्छेदा। **परं मरणाति** चुतितो उद्धं। **अपायन्ति** आदि सब्बं निरयवेवचनं। निरयो हि सग्गमोक्खहेतुभूता पुज्जसङ्घाता अया अपेतत्ता, सुखानं वा आयस्स आगमनस्स अभावा अपायो। दुक्खस्स गति पटिसरणन्ति **दुग्गति**, दोसबहुलताय वा दुट्ठेन कम्मुना निब्बत्ता गतीति **दुग्गति**। विवसा निपतन्ति एत्थ दुक्कटकारिनोति **विनिपातो**, विनस्सन्ता वा एत्थ निपतन्ति संभिज्जमानङ्गपच्चङ्गाति **विनिपातो**। नत्थि एत्थ अस्सादसज्जितो अयोति **निरयो**।

अथ वा अपायग्गहणेन तिरच्छानयोनिं दीपेति। तिरच्छानयोनि हि अपायो सुगतितो अपेतत्ता, न दुग्गति महेसक्खानं नागराजादीनं सम्भवतो। दुग्गतिग्गहणेन पेत्तिविसयं दीपेति। सो हि अपायो चेव दुग्गति च सुगतितो अपेतत्ता दुक्खस्स च

गतिभूतत्ता, न तु विनिपातो असुरसदिसं अविनिपतितत्ता । पेतमहिद्धिकानं विमानानिपि निब्बत्तन्ति । विनिपातगहणेन असुरकायं दीपेति । सो हि यथावुत्तेनत्थेन अपायो चेव दुग्गति च सब्बसम्पत्तिसमुस्सयेहि विनिपातत्ता विनिपातोति च वुच्चति । निरयगहणेन पन अवीचिआदिकं अनेकप्पकारं निरयमेव दीपेति । **उपपज्जतीति** निब्बत्तति ।

**आनिसंसकथा** वुत्तविपरियायेन वेदितब्बा । अयं पन विसेसो — **सीलवाति** समादानवसेन सीलवा । **सीलसम्पन्नोति** परिसुद्धं परिपुण्णञ्च कत्वा सीलस्स सम्पादनेन सीलसम्पन्नो । **भोगक्खन्धन्ति** भोगरासिं । **सुगतिं सगं लोकन्ति** एत्थ सुगतिगहणेन मनुस्सगतिपि सङ्गहति, सगगहणेन देवगति एव । तत्थ सुन्दरा गतीति **सुगति**, रूपादीहि विसयेहि सुद्ध अगोति **सगो**, सो सब्बोपि लुज्जनपलुज्जनट्टेन **लोकोति** ।

**पाटलिगामिके उपासके बहुदेव रत्तिं धम्मिया कथायाति** अज्जायपि पाळिमुत्ताय धम्मकथाय चेव आवसथानुमोदनकथाय च । तदा हि भगवा यस्मा अजातसत्तुना तत्थ पाटलिपुत्तनगरं मापेन्तेन अज्जासु गामनिगमराजधानीसु ये सीलाचारसम्पन्ना कुटुम्बिका, ते आनेत्वा धनधज्जानि घरवत्थुखेत्तवत्थादीनि चेव परिहारञ्च दापेत्वा निवेसियन्ति, तस्मा पाटलिगामिका उपासका आनिसंसदस्साविताय विसेसतो सीलगरुकाति सब्बगुणानञ्च सीलस्स अधिद्वानभावतो तेसं पठमं सीलानिसंसं पकासेत्वा ततो परं आकासगङ्गं ओतारेन्तो विय पथवोजं आकट्टन्तो विय महाजम्बुं मत्थके गहेत्वा चालेन्तो विय योजनप्पमाणं महामधुं चक्कयन्तेन पीळेत्वा सुमधुररसं पायमानो विय च पाटलिगामिकानं उपासकानं हितसुखावहं पकिण्णककथं कथेन्तोपि “आवासदानं नामेतं गहपतयो महन्तं पुज्जं, तुम्हाकं आवासो मया परिभुत्तो, भिक्खुसङ्घेन परिभुत्तो, मया च भिक्खुसङ्घेन च परिभुत्ते धम्मरतनेनपि परिभुत्तोयेव होति, एवं तीहि रतनेहि परिभुत्ते अपरिमेय्योव विपाको, अपिच आवासदानस्मिं दिन्ने सब्बदानं दिन्नमेव होति, भूमट्टकपण्णसालाय वा साखामण्डपस्स वा सङ्घं उद्दिस्स कतस्स आनिसंसो परिच्छिन्दितुं न सक्का । आवासदानानुभावेन हि भवे निब्बत्तमानस्सपि सम्पीळितगम्भवासो नाम न होति, द्वादसहत्थो ओवरको वियस्स मातुकुच्छि असम्बाधोव होती”ति एवं नानानयविचित्तं बहुं धम्मकथं कथेत्वा —

“सीतं उण्हं पटिहन्ति, ततो वाळमिगानि च ।  
सरीसपे च मकसे, सिसिरे चापि वुट्ठियो ॥

“ततो वातातपो घोरो, सज्जातो पटिहज्जति ।  
लेणत्थञ्च सुखत्थञ्च, ज्ञायितुञ्च विपस्सितुं ॥

“विहारदानं सङ्घस्स, अगं बुद्धेन वणिणतं ।  
तस्मा हि पण्डितो पोसो, सम्पस्सं अत्थमत्तनो ॥

“विहारे कारये रम्मे, वासयेत्थ बहुस्सुते ।  
तेसं अन्नञ्च पानञ्च, वत्थसेनासनानि च ॥

“ददेय्य उजुभूतेसु, विप्पसन्नेन चेतसा ।  
ते तस्स धम्मं देसेन्ति, सब्बदुक्खापनूदनं ।  
यं सो धम्मं इधज्जाय, परिनिब्बाति अनासवो”ति ॥ (चूळव० २९५, ३१५) —

एवं अयम्पि आवासदाने आनिसंसो अयम्पि आवासदाने आनिसंसोति बहुदेव रत्तिं अतिरेकदियङ्गुयामं आवासदानानिसंसं कथेसि । तत्थ इमा गाथाव सङ्गहं आरुळ्हा, पकिण्णकधम्मदेसना पन सङ्गहं न आरोहति । **सन्दस्सेत्वा**तिआदीनि वुत्तत्थानेव ।

**अभिवक्कन्ता**ति अतिवक्कन्ता द्वे यामा गता । **यस्सदानि तुम्हे कालं मज्जथा**ति यस्स गमनस्स तुम्हे कालं मज्जथ, गमनकालो तुम्हाकं, गच्छथाति वुत्तं होति । कस्मा पन भगवा ते उय्योजेसीति? अनुकम्पाय । तियामरत्तिज्झि निसीदित्वा वीतिनामेन्तानं तेसं सरीरे आबाधो उप्पज्जेय्य, भिक्खुसङ्घोपि च महा, तस्स सयननिसज्जानं ओकासं लद्धुं वट्ठति, इति उभयानुकम्पाय उय्योजेसि ।

**सुज्जागारन्ति** पाटियेक्कं सुज्जागारं नाम तत्थ नत्थि । ते किर गहपतयो तस्सेव आवसथागारस्स एकपस्से पटसाणिं परिक्खिपापेत्वा कप्पियमज्जं पज्जपेत्वा तत्थ कप्पियपच्चत्थरणानि अत्थरित्वा उपरि सुवण्णरजततारकगन्धमालादिदामपटिमण्डितं वितानं बन्धित्वा गन्धतेलपदीपं आरोपयिंसु “अप्पेव नाम सत्था धम्मासनतो वुट्ठाया थोकं विस्समेतुकामो इध निपज्जेय्य, एवं नो इदं आवसथागारं भगवता चतूहि इरियापथेहि परिभुत्तं दीघरत्तं हिताय सुखाय भविस्सती”ति । सत्थापि तदेव सन्धाय तत्थ सङ्घाटिं पज्जपेत्वा सीहसेय्यं कप्पेसि । तं सन्धाय वुत्तं “सुज्जागारं पाविसी”ति । तत्थ पादधोवनट्टानतो पट्टाय याव धम्मासना अगमासि, एत्तके ठाने गमनं निप्फन्ना । धम्मासनं पत्वा थोकं अट्ठासि, इदं तत्थ ठानं । द्वे यामे धम्मासने निसीदि, एत्तके ठाने निसज्जा निप्फन्ना । उपासके उय्योजेत्वा धम्मासनतो ओरुह्य यथावुत्ते ठाने सीहसेय्यं कप्पेसि । एतं ठानं भगवता चतूहि इरियापथेहि परिभुत्तं अहोसीति ।

पाटलिगामवत्थुकथावण्णना निट्ठिता ।

### सुनिधवस्सकारवत्थुकथावण्णना

२८६. सुनिधवस्सकाराति (दी० नि० २.१५३; उदा० अट्ठ० ७६) सुनिधो च वस्सकारो च द्वे ब्राह्मणा ।

**मगधमहामत्ता**ति मगधरज्जो महाअमच्चा, मगधरट्ठे वा महामत्ता, महतिया इस्सरियमत्ताय समन्नागताति मगधमहामत्ता । **पाटलिगामे नगरं मापेन्ती**ति पाटलिगामन्तसङ्घाते भूमिप्पदेसे नगरं मापेन्ति, पुब्बे “पाटलिगामो”ति लद्धनामं ठानं इदानीं नगरं कत्वा मापेन्तीति अत्थो । **वज्जीनं पटिबाहाया**ति लिच्छविराजूनं आयमुखपच्छिन्दनत्थं । **वत्थूनी**ति घरवत्थूनि घरपतिट्टापनट्टानानि । **चित्तानि नमन्ति निवेसनानि मापेतुन्ति** रज्जो राजमहामत्तानज्ज निवेसनानि मापेतुं वत्थुविज्जापाठकानं चित्तानि नमन्ति । ते किर अत्तनो सिप्पानुभावेन हेट्ठापथवियं तिसहत्थमत्ते ठाने “इध नागानं निवासपरिग्गहो, इध यक्खानं, इध भूतानं निवासपरिग्गहो, इध पासाणो वा खाणुको वा अत्थी”ति जानन्ति, ते तदा सिप्पं जप्पित्वा तादिसं सारम्भट्टानं परिहरित्वा अनारम्भे ठाने ताहि वत्थुपरिग्गाहिकाहि देवताहि सद्धिं मन्तयमाना विय तंतंगेहानि मापेन्ति ।

अथ वा नेसं सरीरे देवता अधिमुच्चित्वा तत्थ तत्थ निवेसनानि मापेतुं चित्तं नामेन्ति । ता चतूसु कोणेषु खाणुके कोट्टेत्वा वत्थुम्हि गहितमत्ते पटिविगच्छन्ति । सद्धानं कुलानं सद्दा देवता तथा करोन्ति, अस्सद्धानं कुलानं अस्सद्दा देवता च । किं कारणा? सद्धानज्झि एवं होति “इध मनुस्सा निवेसनं मापेन्ता पठमं भिक्खुसङ्घं निसीदापेत्वा मङ्गलं वदापेस्सन्ति, अथ मयं सीलवन्तानं दस्सनं धम्मकथं पज्जविस्सज्जनं अनुमोदनज्ज सोतुं लभिस्साम, मनुस्सादानं दत्त्वा अम्हाकं पत्तिं दस्सन्ती”ति । अस्सद्दा देवतापि “अत्तनो इच्छानुरूपं तेसं पटिपत्तिं पस्सितुं कथज्ज सोतुं लभिस्सामा”ति तथा करोन्ति ।

**तावतिंसेही**ति यथा हि एकस्मिं कुले एकं पण्डितं मनुस्सं, एकस्मिञ्च विहारे एकं बहुस्सुतं भिक्खुं उपादाय “असुककुले मनुस्सा पण्डिता, असुकविहारे भिक्खू बहुस्सुता”ति सद्दो अब्भुग्गच्छति, एवमेवं सक्कं देवराजानं विस्सकम्मञ्च देवपुत्तं उपादाय “तावतिंसा पण्डिता”ति सद्दो अब्भुग्गतो। तेनाह “तावतिंसेही”ति। **सेय्यथापीति** आदिना देवेहि त्वावतिंसेहि सद्धिं मन्तेत्वा विय सुनिधवस्सकारा नगरं मापेन्तीति दस्सेति।

**यावता अरियं आयतनन्ति** यत्तकं अरियमनुस्सानं ओसरणट्टानं नाम अत्थि। **यावता वणिप्पथोति** यत्तकं वाणिजानं आहटभण्डस्स रासिवसेनेव कयविककयट्टानं नाम, वाणिजानं वसनट्टानं वा अत्थि। **इदं अगगनगरन्ति** तेसं अरियायतनवणिप्पथानं इदं नगरं अगगं भविस्सति जेट्ठकं पामोक्खं। **पुटभेदनन्ति** भण्डपुटभेदनट्टानं, भण्डगन्धिकानं मोचनट्टानन्ति वुत्तं होति। सकलजम्बुदीपे अलद्धभण्डम्पि हि इधेव लभिस्सति, अज्जत्थ विक्कयं अगच्छन्तम्पि इध विक्कयं गच्छिस्सति, तस्मा इधेव पुटं भिन्दिस्सतीति अत्थो। आयन्ति यानि चतूसु द्वारेसु चत्तारि, सभायं एकन्ति एवं दिवसे दिवसे पञ्चसतसहस्सानि तत्थ उट्ठहिस्सन्ति, तानिस्स भावीनि आयानि दस्सेति। **अगितो वाति** आदीसु च-कारत्थो **वा-**सद्दो, अगिना च उदकेन च मिथुभेदेन च नस्सिस्सतीति अत्थो। तस्स हि एको कोट्टासो अगिना नस्सिस्सति, निब्बापेतुम्पि नं न सक्खिस्सति, एकं कोट्टासं गङ्गा गहेत्वा गमिस्सति, एको इमिना अकथितं अमुस्स, अमुना अकथितं इमस्स वदन्तानं पिसुणवाचानं वसेन भिन्नानं मनुस्सानं अज्जमज्जभेदेन विनस्सिस्सति।

एवं वत्वा भगवा पच्चूसकाले गङ्गातीरं गन्त्वा कतमुखधोवनो भिक्खाचारकालं आगमयमानो निसीदि। सुनिधवस्सकारापि “अम्हाकं राजा समणस्स गोतमस्स उपट्ठाको, सो अम्हे उपगते पुच्छिस्सति ‘सत्था किर पाटलिगामं अगमासि, किं तस्स सन्तिकं उपसङ्कमित्थ, न उपसङ्कमित्था’ति, ‘उपसङ्कमिम्हा’ति च वुत्ते ‘निमन्तयित्थ, न निमन्तयित्था’ति पुच्छिस्सति, ‘न निमन्तयिम्हा’ति च वुत्ते अम्हाकं दोसं आरोपेत्वा निग्गणिहस्सति, इदञ्चापि मयं अकतट्टाने नगरं मापेम, समणस्स खो पन गोतमस्स गतगतट्टाने काळकणिसत्ता पटिक्कमन्ति, तं मयं नगरमङ्गलं वाचापेस्सामा”ति चिन्तेत्वा सत्थारं उपसङ्कमित्वा निमन्तयिंसु। तेन वुत्तं “**अथ खो सुनिधवस्सकारा**”ति आदि। **पुब्बण्हसमयन्ति** पुब्बण्हकाले। **निवासेत्वाति** गामप्पवेसननीहारेन निवासनं निवासेत्वा कायबन्धनं बन्धित्वा। **पत्तचीवरमादायाति** पत्तञ्च चीवरञ्च आदियित्वा कायपटिबद्धं कत्वा, चीवरं पारुपित्वा पत्तं हत्थेन गहेत्वाति अत्थो।

**सीलवन्तेत्थाति** सीलवन्ते एत्थ अत्तनो वसनट्टाने। **सज्जतेति** कायवाचाचित्तेहि सज्जते। **तासं दक्खिणमादिसेति** सङ्घस्स दिन्ने चत्तारो पच्चये तासं घरदेवतानं आदिसेय्यपत्तिं ददेय्य। **पूजिता पूजयन्तीति** “इमे मनुस्सा अम्हाकं जातकापि न होन्ति, तथापि नो पत्तिं देन्तीति आरक्खं सुसंविहितं करोथा”ति सुट्ठु आरक्खं करोन्ति। **मानिता मानयन्तीति** कालानुकालं बलिकम्मकरणेन मानिता “एते मनुस्सा अम्हाकं जातकापि न होन्ति, तथापि चतुमासछमासन्तरे नो बलिकम्मं करोन्ती”ति मानेन्ति उप्पन्नपरिस्सयं हरन्ति। **ततो नन्ति** ततो नं पण्डितजातिकं मनुस्सं। **ओरसन्ति** उरे ठपेत्वा संवट्ठितं, यथा माता ओरसं पुत्तं अनुकम्पति, उप्पन्नपरिस्सयहरणत्थमेवस्स वायमति, एवं अनुकम्पन्तीति अत्थो। **भद्रानि पस्सतीति** सुन्दरानि पस्सति।

**अनुमोदित्वाति** तेहि तदा पसुतपुज्जस्स अनुमोदनवसेन तेसं धम्मकथं कत्वा। सुनिधवस्सकारापि “या तत्थ देवता आसुं, तासं दक्खिणमादिसे”ति भगवतो वचनं सुत्वा देवतानं पत्तिं अदंसु। **तं गोतमद्वारं नाम अहोसीति** तस्स नगरस्स येन द्वारेन भगवा निक्खमि, तं गोतमद्वारं नाम अहोसि। गङ्गाय पन उत्तरणत्थं अनोतिण्णत्ता गोतमतित्थं नाम नाहोसि। **पूराति** पुण्णा। **समतित्तिक्काति** तीरसमं उदकस्स तित्ता भरिता। **काकपेय्याति** तीरे ठितकाकेहि पातुं सक्कुणेय्यउदका।



तीहिपि पदेहि उभतो कूलसमं परिपुण्णभावमेव वदति । उलुम्पन्ति पारगमनत्थाय लहुके दारुदण्डे गहेत्वा कवाटफलके विय अज्जमज्जसम्बन्धे कातुं आणियो कोट्टेत्वा नावासङ्खेपेन कतं । कुल्लन्ति वेळुनळादिके सङ्घरित्वा वल्लिआदीहि कलापवसेन बन्धित्वा कतं ।

**एतमत्थं विदित्वा**ति एतं महाजनस्स गङ्गुदकमत्तस्सपि केवलं तरितुं असमत्थतं, अत्तनो पन भिक्खुसङ्घस्स च अतिगम्भीरवित्थतं संसारमहण्णवं तरित्वा ठितभावज्ज सब्बाकारतो विदित्वा तदत्थपरिदीपनं इमं उदानं उदानेसि । उदानगाथाय अत्थो पन अट्ठकथायं दस्सितोयेव । तत्थ उदकट्टानस्सेतं अधिवचनन्ति यथावुत्तस्स यस्स कस्सचि उदकट्टानस्स एतं अण्णवन्ति अधिवचनं, न समुद्दस्सेवाति अधिष्णायो । सरन्ति इध नदी अधिष्पेता सरति सन्दतीति कत्वा । **गम्भीरं वित्थतन्ति** अगाधेन गम्भीरं, सकललोकत्तयव्यापिताय वित्थतं । **विसज्जाति** अनासज्ज अप्पत्वा एव पल्ललानि तेसं अतरणतो । **कुल्लज्झि जनो बन्धतीति** कुल्लं बन्धितुं आयासं आपज्जति । **विना एव कुल्लेनाति** ईदिसं उदकं कुल्लेन ईदिसेन विना एव । **तिण्णा मेधाविनो जनाति** अरियमग्गजाणसङ्घाताय मेधाय समन्नागतत्ता मेधाविनो बुद्धा च बुद्धसावका च तिण्णा परतीरे पतिट्ठिता ।

सुनिधवस्सकारवत्थुकथावण्णना निट्ठिता ।

### कोटिगामे सच्चकथावण्णना

**२८७. कोटिगामो**ति महापनादस्स रज्जो पासादकोटियं कतगामो, पतितस्स पासादस्स थुपिकाय पतिट्ठितट्टाने निविट्ठगामोति अत्थो । **अरियसच्चानन्ति** ये पटिविज्झन्ति, तेसं अरियभावकरानं सच्चानं । **अननुबोधाति** अबुज्झनेन अजाननेन । **अप्पटिवेधाति** अप्पटिविज्झनेन । **अनुबोधो** चेत्थ पुब्बभागियजाणं, **पटिवेधो** मग्गजाणेन अभिसमयो । तत्थ यस्मा अनुबोधपुब्बको पटिवेधो अनुबोधेन विना न होति, अनुबोधोपि एकच्चो पटिवेधसम्बन्धो तदुभयाभावहेतुकज्ज वट्टे संसरणं, तस्मा वुत्तं “अननुबोधा...पे... तुम्हाकज्जा”ति । तत्थ **सन्धावितन्ति** पटिसन्धिग्गहणवसेन भवतो भवन्तरुपगमनेन सन्धावितं । **संसरितन्ति** अपरापरं चवनुपपज्जनवसेन संसरितं । **ममज्जेव तुम्हाकज्जाति** मया च तुम्हेहि च । अथ वा **सन्धावितं संसरितन्ति** सन्धावनं संसरणं ममज्जेव तुम्हाकज्ज अहोसीति एवमेत्थ अत्थो वेदितब्बो ।

**संसितन्ति** संसरितं । **भवनेत्ति समूहताति** दीघरज्जुया बद्धसकुणं विय रज्जुहत्थो पुरिसो देसन्तरं, तण्हारज्जुया बद्धसत्तसन्तानं अभिसङ्खारो भवन्तरं नेति एतायाति भवनेत्ति, सा भवतो भवं नयनसमत्था तण्हारज्जु अरियमग्गसत्थेन सुट्ठु हता छिन्ना अप्पवत्तिकताति भवनेत्ति समूहता ।

### अम्बपालीवत्थुकथावण्णना

**२८८. यानस्स भूमीति** यत्थ सक्का होति यानं आरुह्य यानेन गन्तुं, अयं यानस्स भूमि नाम । **याना पच्चोरोहित्वाति** विहारस्स बहिद्वारकोट्टके यानतो ओरोहित्वा ।

### लिच्छवीवत्थुकथावण्णना

**२८९. नीलाति** इदं सब्बसङ्गाहकवचनं । **नीलवण्णाति**आदि तस्सेव विभागदस्सनत्थं । तत्थ न तेसं पकतिवण्णो नीलो, नीलविलेपनविलित्तत्ता पनेतं वुत्तं । **नीलवत्थाति** पटदुकूलकोसेय्यादीनिपि नेसं नीलानेव होन्ति । **नीलालङ्काराति**

नीलमणिअलङ्कारेहि नीलपुण्ड्रेहि च अलङ्कृता । ते किर अलङ्कारा सुवण्णविचित्तापि इन्दनीलमणिओभासेहि एकनीला विय खायन्ति, रथापि नेसं नीलमणिखचिता नीलवत्थपरिखित्ता नीलधजनीलवम्मिकेहि नीलाभरणेहि नीलअस्सेहि युत्ता, पतोदयट्टियोपि नीलायेवाति इमिना नयेन सब्बपदेसु अत्थो वेदितब्बो । **पटिवट्टेसीति** पहिरि । **किस्स जे अम्बपालीति जे-**ति आलपनं, भोति अम्बपालि किंकारणाति वुत्तं होति । **साहारन्ति** एत्थ आहरन्ति इमस्मा राजपुरिसा बलिन्ति **आहारो**, तब्भुत्तजनपदो । तेन सहितं साहारं, सजनपदन्ति अत्थो । **अङ्गुलिं फोटेसुन्ति** अङ्गुलिं चालेसुं । **अम्बकायाति** मातुगामेन । उपचारवचनज्हेतं, इत्थीसु यदिदं अम्बका मातुगामो जननिकाति । **ओलोकेथाति** पस्सथ । **अपलोकेथाति** अपवत्तित्वा ओलोकेथ, पुनप्पुनं पस्सथाति अत्थो । **उपसंहरथाति** उपनेथ, इमं लिच्छवीपरिसं तुम्हाकं चित्तेन तावतिससदिसं उपसंहरथ उपनेथ अल्लीयापेथ । यथेव तावतिसा अभिरूपा पासादिका नीलादिनानावण्णा, एवमिमे लिच्छवीराजानोपीति तावतिसेहि समके कत्वा पस्सथाति अत्थो ।

कस्मा पन भगवा अनेकसतेहि सुत्तेहि चक्खादीनं रूपादीसु निमित्तग्गाहं पटिसेधेत्वा इध महन्तेन उस्साहेन निमित्तग्गाहे नियोजेतीति? हितकामताय तेसं भिक्खून् यथा आयस्मतो नन्दस्स हितकामताय सग्गसम्पत्तिदस्सनत्थं । तत्र किर एकच्चे भिक्खू ओसन्नवीरिया, ते सम्पत्तिया पलोभेन्तो “अप्पमादेन समणधम्मं करोन्तानं एवरूपा इस्सरियसम्पत्ति सुलभा”ति समणधम्मे उस्साहजननत्थं आह । अथ वा नयिदं निमित्तग्गाहे नियोजनं, केवलं पन “दिब्बसम्पत्तिसदिसा एतेसं राजूनं इस्सरियसम्पत्ती”ति अनुपुब्बिकथाय सम्पत्तिकथनं विय दट्ठब्बं । अनिच्चलक्खणविभावनत्थञ्चापि एवमाह । न चिरस्सेव हि सब्बेपिमे अजातसत्तुस्स वसेन विनासं पापुणिस्सन्ति, अथ नेसं रज्जसिरिसम्पत्तिं दिस्वा ठितभिक्खू “तथारूपायपि नाम सिरिसम्पत्तिया विनासो पज्जायिस्सती”ति अनिच्चलक्खणं भावेत्वा सह पटिसम्भिदाहि अरहत्तं पापुणिस्सन्तीति अनिच्चलक्खणविभावनत्थं आह ।

**अधिवासेतूति** अम्बपालिया निमन्तितभावं जत्वापि कस्मा निमन्तेन्तीति? असद्वहनताय च वत्तसीसेन च । सा हि धुत्ता इत्थी अनिमन्तेत्वापि “निमन्तेसि”न्ति वदेय्याति तेसं अहोसि । धम्मं सुत्वा गमनकाले च निमन्तेत्वा गमनं नाम मनुस्सानं वत्तमेव ।

लिच्छवीवत्थुकथावण्णना निड्डिता ।

### सीहसेनापतिवत्थुकथावण्णना

**२९०. अभिज्जाताति** (अ० नि० अट्ठ० ३.८.१२) जाता पज्जाता पाकटा । **सन्थागारेति** महाजनस्स सन्थम्भनागारे विस्समनत्थाय कते अगारे । सा किर सन्थागारसाला नगरमज्झे अहोसि, चतूसु द्वारेसु ठितानं पज्जायति, चतूहि दिसाहि आगतमनुस्सा पठमं तत्थ विस्समित्वा पच्छा अत्तनो अत्तनो फासुकट्टानं गच्छन्ति । राजकुलानं रज्जकिच्चसन्थरणत्थं कतं अगारन्तिपि वदन्ति येव । तत्थ हि निसीदित्वा लिच्छवीराजानो रज्जकिच्चं सन्थरन्ति करोन्ति विचारेन्ति । **सन्निसिन्नाति** तेसं निसीदनत्थं येव पज्जत्तेसु महारहपच्चत्थरणेसु समुस्सितसेतच्छत्तेसु आसनेसु सन्निसिन्ना । **अनेकपरियायेन बुद्धस्स वण्णं भासन्तीति** राजकुलकिच्चञ्चेव लोकत्थकिरियञ्च विचारेत्वा अनेकेहि कारणेहि बुद्धस्स वण्णं भासन्ति । पण्डिता हि ते राजानो सद्भासम्पन्ना सोतापन्नापि सकदागामिनोपि अनागामिनोपि अरियसावका, ते सब्बेपि लोकियजटं भिन्दित्वा बुद्धादीनं तिण्णं रतनानं वण्णं भासन्ति ।

तत्थ तिविधो बुद्धवण्णो नाम चरियवण्णो सरीरवण्णो गुणवण्णोति । तत्रिमे राजानो चरियाय वण्णं आरभिसु —

“दुक्करं वत कतं सम्मासम्बुद्धेन कप्पसतसहस्साधिकानि चत्तारि असङ्ख्येय्यानि दस पारमियो दस उपपारमियो दस परमत्थपारमियोति समतिस पारमियो पूरेन्तेन जातत्थचरियं लोकत्थचरियं बुद्धत्थचरियं मत्थकं पापेत्वा पञ्च महापरिच्चागे परिच्चजन्तेना”ति अङ्गुच्छक्केहि जातकसतेहि बुद्धवण्णं कथेन्ता तुसितभवनं पापेत्वा ठपयिंसु। धम्मस्स वण्णं भासन्ता पनेते “भगवता धम्मो देसितो, निकायतो पञ्च निकाया होन्ति, पिटकतो तीणि पिटकानि, अङ्गतो नव अङ्गानि, खन्धतो चतुरासीतिधम्मखन्धसहस्सानी”ति कोट्टासवसेन धम्मगुणं कथयिंसु। सङ्खस्स वण्णं भासन्ता “सत्थु धम्मदेसनं सुत्वा पटिलद्धसद्धा कुलपुत्ता भोगक्खन्धञ्चेव जातिपरिवट्टञ्च पहाय सेतच्छत्तउपरज्जसेनापतिसेट्ठिभण्डागारिकट्टानन्तरादीनि अगणयित्वा निक्खम्म सत्थु वरसासने पब्बजन्ति, सेतच्छत्तं पहाय पब्बजितानं भद्वियमहाराजमहाकप्पिनपुक्कुसातिआदिराजपब्बजितानयेव बुद्धकाले असीति सहस्सानि अहेसुं, अनेककोटिधनं पहाय पब्बजितानं पन यसकुलपुत्तसोणसेट्ठिपुत्तरट्टपालपुत्तादीनं परिच्छेदो नत्थि, एवरूपा च एवरूपा च कुलपुत्ता सत्थु सासने पब्बजन्ती”ति पब्बज्जासङ्खेपवसेन सङ्खगुणं कथयिंसु।

**सीहो सेनापतीति** एवंनामको सेनाय अधिपति। वेसालियज्झि सत्त सहस्सानि सत्त सतानि सत्त च राजानो, ते सब्बेपि सन्निपतित्वा सब्बेसं मनं गहेत्वा “रट्ठं विचारेतुं समत्थं एकं विचिनथा”ति विचिनन्ता सीहराजकुमारं दिस्वा “अयं सक्खिस्सती”ति सन्निट्ठानं कत्वा तस्स रत्तमणिवण्णकम्बलपरियोनद्धं सेनापतिच्छत्तं अदंसु। तं सन्धाय वुत्तं “सीहो सेनापती”ति। **निगण्ठसावकोति** निगण्ठस्स नाटपुत्तस्स पच्चयदायको उपट्ठाको। जम्बुदीपतलस्मिज्झि तयो जना निगण्ठानं अगुपट्ठाका — नाळन्दायं उपालि गहपति, कपिलपुरे वण्णो सक्को, वेसालियं अयं सीहो सेनापतीति। **निसिन्नो होतीति** सेसराजूनम्पि परिसाय अन्तरे आसनानि पज्जापयिंसु, सीहस्स पन मज्झे ठानेति तस्मिं पज्जत्ते महारहे राजासने निसिन्नो होति। **निसंसयन्ति** निब्बिचिकिच्छं अद्धा एकंसेन। न हेते यस्स वा तस्स वा अप्पेसक्खस्स एवं अनेकसतेहि कारणेहि वण्णं भासन्ति।

**येन निगण्ठो नाटपुत्तो तेनुपसङ्कमीति** निगण्ठो किर नाटपुत्तो “सचायं सीहो कस्सचिदेव समणस्स गोतमस्स वण्णं कथेन्तस्स सुत्वा समणं गोतमं दस्सनाय उपसङ्कमिस्सति, मय्हं परिहानि भविस्सती”ति चिन्तेत्वा पठमतरंयेव सीहं सेनापतिं एतदवोच “सेनापति इमस्मिं लोके ‘अहं बुद्धो अहं बुद्धो’ति बहू वदन्ति, सचे त्वं कज्जि दस्सनाय उपसङ्कमितुकामो अहोसि, मं पुच्छेय्यासि, अहं ते युत्तट्ठानञ्जेव पेसेस्सामि, अयुत्तट्ठानतो निवारस्सामी”ति। सो तं कथं अनुस्सरित्वा “सचे मं पेसेस्सति, गमिस्सामि। नो चे, न गमिस्सामी”ति चिन्तेत्वा येन निगण्ठो नाटपुत्तो तेनुपसङ्कमि।

अथस्स वचनं सुत्वा निगण्ठो महापब्बतेन विय बलवसोकेन ओत्थटो “यत्थ दानिस्साहं गमनं न इच्छामि, तत्थेव गन्तुकामो जातो, हतोहमस्मी”ति अनत्तमनो हुत्वा “पटिबाहनुपायमस्स करिस्सामी”ति चिन्तेत्वा “**किं पन त्वं**”न्तिआदिमाह। एवं वदन्तो चरन्तं गोणं तुण्डे पहरन्तो विय जलमानं पदीपं निब्बापेन्तो विय भत्तभरितं पत्तं निकुज्जन्तो विय च सीहस्स उप्पन्नं पीतिं विनासेसि। **गमिकाभिसङ्कारोति** हत्थियानादीनं योजापनगन्धमालादिग्गहणवसेन पवत्तो पयोगो। **सो पटिप्पस्सम्भीति** सो वूपसन्तो।

**दुतियम्पि खोति** दुतियवारम्पि। इमस्मिञ्च वारे बुद्धस्स वण्णं भासन्ता तुसितभवनतो पट्टाय याव महाबोधिपल्लङ्का दसबलस्स हेट्ठा पादतलेहि उपरि केसग्गेहि परिच्छिन्दित्वा द्रत्तिसमहापुरिसलक्खणअसीतिअनुव्यञ्जनव्यामप्पभावसेन सरीरवण्णं कथयिंसु। धम्मस्स वण्णं भासन्ता “एकपदेपि एकव्यञ्जनेपि अवक्खलितं नाम नत्थी”ति सुकथितवसेनेव धम्मगुणं कथयिंसु। सङ्खस्स वण्णं भासन्ता “एवरूपं यससिरिविभवं पहाय सत्थु सासने पब्बजिता न कोसज्जपकतिका

होन्ति, तेरससु पन धुतगुणेषु परिपूरकारिनो हुत्वा सत्तसु अनुपस्सनासु कम्मं करोन्ति, अट्ठित्स आरम्भणविभत्तियो वळज्जेन्ती’ति पटिपदावसेन सङ्खगुणे कथयिंसु ।

ततियवारे पन बुद्धस्स वण्णं भासमाना “इतिपि सो भगवा”ति सुत्तन्तपरियायेनेव बुद्धगुणे कथयिंसु, “स्वाक्खातो भगवता धम्मो”ति आदिना सुत्तन्तपरियायेनेव धम्मगुणे, “सुप्पटिपन्नो भगवतो सावकसङ्घो”ति आदिना सुत्तन्तपरियायेनेव सङ्खगुणे च कथयिंसु । ततो सीहो चिन्तेसि “इमेसं लिच्छवीराजकुलानं ततियदिवसतो पट्टाय बुद्धधम्मसङ्खगुणे कथेन्तानं मुखं नप्पहोति, अद्धा अनोमगुणसमन्नागतो सो भगवा, इमं दानि उप्पन्नं पीतिं अविजहित्वाव अहं अज्ज सम्मासम्बुद्धं पस्सिस्सामी”ति । अथस्स “किञ्चि मे करिस्सन्ति निगण्ठा”ति वितक्को उदपादि । तत्थ **किञ्चि मे करिस्सन्तीति** किं नाम मय्हं निगण्ठा करिस्सन्ति । **अपलोकिता वा अनपलोकिता वा**ति आपुच्छिता वा अनापुच्छिता वा । न हि मे ते आपुच्छिता यानवाहनसम्पत्तिइस्सरिययसविसेसं दस्सन्ति, नापि अनापुच्छिता मारेस्सन्ति, अफलं एतेसं आपुच्छन्ति अधिप्पायो ।

**दिवा दिवस्साति** दिवस्स दिवा मज्झन्हिके अतिक्कन्तमत्ते । **वेसालिया निव्यासीति** यथा हि गिम्हकाले देवे वुट्ठे उदकं सन्दमानं नदिं ओतरित्वा थोकमेव गन्त्वा तिड्ढति नप्पवत्तति, एवं सीहस्स पठमदिवसे “दसबलं पस्सिस्सामी”ति उप्पन्नाय पीतिया निगण्ठेन पटिबाहितकालो, यथा दुतियदिवसे देवे वुट्ठे उदकं सन्दमानं नदिं ओतरित्वा थोकं गन्त्वा वालिकापुज्जं पहरित्वा अप्पवत्तं होति, एवं सीहस्स दुतियदिवसे “दसबलं पस्सिस्सामी”ति उप्पन्नाय पीतिया निगण्ठेन पटिबाहितकालो, यथा ततियदिवसे देवे वुट्ठे उदकं सन्दमानं नदिं ओतरित्वा पुराणपण्णसुक्खदण्डकनळकचवरादीनि परिकट्टन्तं वालिकापुज्जं भिन्दित्वा समुद्धनिन्नमेव होति, एवं सीहो ततियदिवसे तिण्णं वत्थूनं गुणकथं सुत्वा उप्पन्ने पीतिपामोज्जे “अफला निगण्ठा, निप्फला निगण्ठा, किं मे इमे करिस्सन्ति, गमिस्सामहं सत्थु सन्तिक”न्ति गमनं अभिनीहरित्वा वेसालिया निव्यासि । निव्यन्तो च “चिरस्साहं दसबलस्स सन्तिकं गन्तुकामो जातो, न खो पन मे युत्तं अज्जातकवेसेन गन्तु”न्ति “ये केचि दसबलस्स सन्तिकं गन्तुकामो, सब्बे निक्खमन्तू”ति घोसनं कारेत्वा पञ्च रथसतानि योजापेत्वा उत्तमरथे ठितो तेहि चेव पञ्चहि रथसतेहि महतिया च परिसाय परिवुतो गन्धपुप्फचुण्णवासादीनि गाहापेत्वा निव्यासि ।

**येन भगवा तेनुपसङ्कमीति** आरामं पविसन्तो दूरतोव असीति अनुब्यञ्जनव्यामप्पभाद्वत्तिसमहापुरिसलक्खणानि छब्बण्णा घनबुद्धरस्मियो दिस्वा “एवरूपं नाम पुरिसं एवं आसन्ने वसन्तं एत्तकं कालं नादसं, वज्चितो वतम्हि, अलाभा वत मे”ति चिन्तेत्वा महानिधिं दिस्वा दलिद्वपुरिसो विय सज्जातपीतिपामोज्जो येन भगवा तेनुपसङ्कमि । **धम्मस्स चानुधम्मं व्याकरोन्तीति** भोता गोतमेन वुत्तकारणस्स अनुकारणं कथेन्ति । कारणवचनो हेत्थ **धम्म-**सद्वो “हेतुम्हि जाणं धम्मपटिसम्भिदा”ति आदीसु (विभ० ७२०) विय । **कारणन्ति** चेत्थ तथापवत्तस्स सद्वस्स अत्थो अधिप्पेतो तस्स पवत्तिहेतुभावतो । अत्थप्पयुत्तो हि सद्वप्पयोगो । **अनुकारणन्ति** च सो एवं परेहि तथा वुच्चमानो । **सहधम्मिको वादानुवादोति** परेहि वुत्तकारणेन सकारणो हुत्वा तुम्हाकं वादो वा ततो परं तस्स अनुवादो वा कोचि अप्पमत्तकोपि विज्जूहि गरहितब्बं ठानं कारणं न आगच्छति । इदं वुत्तं होति — किं सब्बाकारेनपि तव वादे गारहकारणं नत्थीति । **अनब्भक्खातुकामाति** न अभूतेन वत्तुकामा ।

**२९१-२९२. अत्थि सीह परियायोति** आदीनं अत्थो वेरज्जकण्डे आगतनयेनेव वेदितब्बो । **परमेन अस्सासेनाति** चतुमगगचतुफलसङ्घातेन उत्तमअस्सासेन । **अस्सासाय धम्मं देसेतीति** अस्सासनत्थाय सन्थम्भनत्थाय धम्मं देसेति । इति भगवा अट्ठहङ्गेहि सीहसेनापतिस्स धम्मं देसेति ।

**२९३. अनुविच्चकारन्ति** अनुविदित्वा चिन्तेत्वा तुलयित्वा कातब्बं करोहीति वुत्तं होति । **साधु** होतीति सुन्दरो होति । तुम्हादिसस्मिहि मं दिस्वा मं सरणं गच्छन्ते निगण्ठं दिस्वा निगण्ठं सरणं गच्छन्ते “किं अयं सीहो दिट्ठदिट्ठमेव सरणं गच्छती”ति गरहा उपपज्जति, तस्मा अनुविच्चकारो तुम्हादिसानं साधूति दस्सेति । **पटाकं परिहरेय्युन्ति** ते किर एवरूपं सावकं लभित्वा “असुको नाम राजा वा राजमहामत्तो वा सेट्ठि वा अम्हाकं सरणं गतो सावको जातो”ति पटाकं उक्खिपित्वा नगरे घोसेन्ता आहिण्डन्ति । कस्मा? “एवं नो महन्तभावो आवि भविस्सती”ति च, सचे पनस्स “किमहं एते सरणं गतो”ति विप्पटिसारो उपपज्जेय्य, तम्पि सो “एतेसं मे सरणगतभावं बहू जानन्ति, दुक्करं दानि पटिनिवत्तितु”न्ति विनोदेत्वा न पटिक्कमिस्सतीति च । तेनाह “पटाकं परिहरेय्यु”न्ति । **ओपानभूतन्ति** पटियत्तउदपानो विय ठितं । **कुलन्ति** तव निवेसनं । **दातब्बं मज्जेय्यासीति** पुब्बेपि दसपि वीसतिपि सट्ठिपि जने आगते दिस्वा नत्थीति अवत्वा देसि, इदानि मं सरणं गतकारणमत्तेनेव मा इमेसं देय्यधम्मं उपच्छिन्दित्थ, सम्पत्तानज्झि दातब्बमेवाति ओवदति । **सुतं मे तं भन्तेति** कुतो सुतं? निगण्ठानं सन्तिका । ते किर कुलघरेसु एवं पकासेन्ति “मयं यस्स कस्सचि सम्पत्तस्स दातब्बन्ति वदाम, समणो पन गोतमो ‘मय्हमेव दानं दातब्बं...पे०... न अज्जेसं सावकानं दिन्नं महप्फल’न्ति एवं वदती”ति । तं सन्धाय अयं “सुतं मे तं”न्तिआदिमाह ।

**२९४. पवत्तमंसन्ति** पकतिया पवत्तं कप्पियमंसं, मूलं गहेत्वा अन्तरापणे परियेसाहीति अधिप्पायो । **सम्बहुला** निगण्ठाति पच्चसतमत्ता निगण्ठा । **थूलं पसुन्ति** थूलं महासरीरं गोकण्णमहिंससूकरसङ्घातं पसुं । **उद्दिस्सकतन्ति** अत्तानं उद्दिसित्वा कतं, मारितन्ति अत्थो । **पटिच्चकम्मन्ति** एत्थ **कम्म**-सद्दो कम्मसाधनो अतीतकालिकोति आह “अत्तानं पटिच्च कत”न्ति । निमित्तकम्मस्सेतं अधिवचनं “पटिच्च कम्मं फुसती”तिआदीसु (जा० १.४.७५) विय । **निमित्तकम्मस्साति** निमित्तभावेन लद्धब्बकम्मस्स, न करणकारापनवसेन । **पटिच्चकम्मं एत्थ अत्थीति** मंसं पटिच्चकम्मं यथा “बुद्धं एतस्स अत्थीति बुद्धो”ति । अथ वा पटिच्च कम्मं फुसतीति पाठसेसो दट्ठब्बो, स्वायं एतं मंसं पटिच्च तं पाणवधककम्मं फुसतीति अत्थो । तज्झि अकुसलं उपट्ठं दायकस्स, उपट्ठं पटिग्गाहकस्स होतीति नेसं लद्धि । **उपकण्णकेति** कण्णमूले । **अलन्ति** पटिक्खेपवचनं, होतु किं इमिनाति अत्थो । **न च पन तेति** एते आयस्मन्ता दीघरत्तं अवण्णकामा हुत्वा अवण्णं भासन्तापि अब्भाचिक्खन्ता न जिरिदन्ति, अब्भक्खानस्स अन्तं न गच्छन्तीति अत्थो । अथ वा लज्जनत्थे इदं **जिरिदन्तीति** पदं दट्ठब्बं, न लज्जन्तीति अत्थो ।

सीहसेनापतिवत्थुकथावण्णना निट्ठिता ।

**कप्पियभूमिअनुजाननकथावण्णना**

**२९५. अभिलापमत्तन्ति** देसनामत्तं । **आमिसखादनत्थायाति** तत्थ तत्थ छट्ठितस्स आमिसस्स खादनत्थाय । **अनुप्पगेयेवाति** पातोयेव । **ओरवसहन्ति** महासहं । **तं पन अवत्वापीति** अन्धकटुकथायंवुत्तनयेन अवत्वापि । **पि**-सहेन तथा वचनम्पि अनुजानाति । **अट्टकथासु वुत्तनयेनाति** सेसअट्टकथासु वुत्तनयेन । “कप्पियकुटिं करोमा”ति वा, “कप्पियकुटी”ति वा वुत्ते साधारणलक्खण”न्ति सब्बअट्टकथासु वुत्तउस्सावनन्तिकाकुटिकरणलक्खणं । **चयन्ति** अधिद्वानं । **यतो पट्टायाति** यतो इट्ठकतो सिलतो मत्तिकापिण्डतो वा पट्टाय । **पठमिट्टकादीनं हेट्टा न वट्टन्तीति** भित्तिया पठमिट्टकादीनं हेट्टा भूमियं पतिट्टापियमाना इट्टकादयो भूमिगतिकत्ता “कप्पियकुटिं करोमा”ति वत्वा पतिट्टापेतुं न वट्टन्ति । यदि एवं भूमियं निखणित्वा पतिट्टापियमाना थम्भा कस्मा तथा वत्वा पतिट्टापेतुं वट्टन्तीति आह “थम्भा पन...पे०... वट्टन्ती”ति । **सङ्खसन्तकमेवाति** वासत्थाय कतं सङ्खिकसेनासनं सन्धाय वदति । **भिक्खुसन्तकन्ति** वासत्थाय एव कतं

भिक्षुस्स पुगलिकसेनासनं । **मुखसन्निधीति** इमिना अन्तोवुत्थदुक्कटमेव दीपितं ।

कप्पियभूमिअनुजाननकथावण्णना निड्ढिता ।

### केणियजटिलवत्थुकथावण्णना

**३००. येन आपणं तदवसरीति** आदीसु **आपणन्ति** एकस्स निगमस्सेतं अधिवचनं । तस्मिं किर निगमे वीसति आपणमुखसहस्सानि विभक्तानि अहेसुं । इति सो आपणानं उस्सन्नत्ता “आपण”न्त्वेव सङ्गं गतो । तस्स पन निगमस्स अविदूरे नदीतीरे घनच्छायो रमणीयभूमिभागो महावनसण्डो, तस्मिं भगवा विहरति । **केणियोति** तस्स नामं । **जटिलोति** आहरिमजटाधरो तापसो । सो किर ब्राह्मणमहासालो, धनरक्खणत्थाय पन तापसपब्बज्जं समादाय रज्जो पण्णाकारं दत्त्वा भूमिभागं गहेत्वा तत्थ अस्समं कारेत्वा पच्चहि सकटसतेहि वणिज्जं पयोजेत्वा कुलसहस्सस्स निस्सयो हुत्वा वसति । अस्समेपि चस्स एको तालरुक्खो दिवसे दिवसे एकं सोवण्णमयं फलं मुच्चतीति वदन्ति । सो दिवा कासावानि धारेति, जटा च बन्धति, रत्तिं कामसम्पत्तिं अनुभवति ।

**पवत्तारोति** (दी० नि० अट्ठ० १.२८५; म० नि० अट्ठ० २.४२७; अ० नि० अट्ठ० ३.५.१९२) पवत्तयितारो, पावचनवसेन वत्तारोति अत्थो । **येसन्ति** येसं सन्तकं । **मन्तपदन्ति** मन्तसदे बहिकत्वा रहो भासितब्बट्ठेन मन्ता एव तंतं अत्थपटिपत्तिहेतुताय पदन्ति मन्तपदं, वेदवचनं । **गीतन्ति** अट्ठकादीहि दसहि पोरणब्राह्मणेहि उदात्तानुदात्तादिसरसम्पत्तिवसेन सज्झायितं । **पवुत्तन्ति** पावचनवसेन अज्जेसं वुत्तं, वाचितन्ति अत्थो । **समिहितन्ति** समुपब्यूळ्हं रासिकतं, इरुवेदयजुवेदसामवेदादिवसेन तत्थापि पच्चेकं मन्तब्राह्मणादिवसेन सज्झायनवाचकादिवसेन च पिण्डं कत्वा ठपितन्ति अत्थो । **तदनुगायन्तीति** एतरहि ब्राह्मणा तं तेहि पुब्बे गीतं अनुगायन्ति अनुसज्झायन्ति । **तदनुभासन्तीति** तं अनुभासन्ति, इदं पुरिमस्सेव वेवचनं । **भासितमनुभासन्तीति** तेहि भासितं सज्झायितं अनुसज्झायन्ति । **वाचितमनुवाचेन्तीति** तेहि अज्जेसं वाचितं अनुवाचेन्ति । **सेय्यथिदन्ति** ते कतमेति अत्थो । **अट्ठकोति** आदीनि तेसं नामानि । ते किर दिब्बचक्खुपरिभण्डेन यथाकम्मूपगजाणेन सत्तानं कम्मस्सकतादिं पुब्बेनिवासजाणेन अतीतकप्पे ब्राह्मणानं मन्तज्जेनविधिज्च ओलोकेत्वा परूपघातं अकत्वा कस्सपसम्मासम्बुद्धस्स भगवतो वट्टसन्निस्सितेन वचनेन सह संसन्दित्वा मन्ते गन्थेसुं । अपरापरे पन ओक्काकराजकालादीसु उप्पन्नब्राह्मणा पाणातिपातादीनि पक्खिपित्वा तयो वेदे भिन्दित्वा बुद्धवचनेन सद्धिं विरुद्धे अकंसु । रत्तिभोजनं रत्ति, ततो उपरताति **रत्तूपरता** । अतिक्कन्ते मज्झन्हिके याव सूरियत्थङ्गमना भोजनं विकालभोजनं नाम, ततो विरतत्ता **विरता विकालभोजना** । **पटियादापेत्वाति** सप्पिमधुसक्करादीहि चेव मरिचेहि च सुसङ्घृतं पानं पटियादापेत्वा ।

“**महा खो केणिय भिक्षुसङ्घो**”ति कस्मा भगवा पुनप्पुनं पटिक्खिपि? तिथियानं पटिक्खेपपसन्नताय । तिथिया हि “अहो वतायं अप्पिच्छो, यो निमन्तियमानोपि न सादियती”ति उपनिमन्तियमानस्स पटिक्खेपे पसीदन्तीति केचि, अकारणज्चेतं । नत्थि बुद्धानं पच्चयहेतु एवरूपं कोहज्जं, अयं पन अट्ठतेलसानि भिक्षुसतानि दिस्वा एत्तकानंयेव भिक्खं पटियादेस्सति, स्वेव सेलो ब्राह्मणो तीहि पुरिससतेहि सद्धिं पब्बजिस्सति, अयुत्तं खो पन नवके अज्जतो पेसेत्वा इमेहेव सद्धिं गन्तुं, इमे वा अज्जतो पेसेत्वा नवकेहि सद्धिं गन्तुं । अथापि सब्बेव गहेत्वा गमिस्सामि, भिक्खाहारो नप्पहोस्सति । ततो भिक्खूसु पिण्डाय चरन्तेसु मनुस्सा उज्झायिस्सन्ति “चिरस्सप्पि केणियो समणं गोतमं निमन्तेत्वा यापनमत्तं दातुं नासक्खी”ति, सयज्च विप्पटिसारी भविस्सति । पटिक्खेपे पन कते “समणो गोतमो पुनप्पुनं ‘त्वज्च ब्राह्मणेसु अभिप्पसन्नो’ति ब्राह्मणानं नामं गण्हाती”ति चिन्तेत्वा ब्राह्मणेपि निमन्तेतुकामो भविस्सति, ततो ब्राह्मणे पाटियेक्कं

निमन्तेस्सति, ते तेन निमन्तिता भिक्खू हुत्वा भुञ्जिस्सन्ति, एवमस्स सद्धा अनुरक्खिता भविस्सतीति पुनप्पुनं पटिक्खिपि। **किञ्चापि खो भो गोतमाति** इमिना इदं दीपेति “भो गोतम, किं जातं, यदि अहं ब्राह्मणेसु अभिप्पसन्नो, अधिवासेतु भवं गोतमो, अहं ब्राह्मणानम्पि दातुं सक्कोमि तुम्हाकम्पी”ति। **ठपेत्वा धञ्जफलरसन्ति** एत्थ तण्डुलधोवनोदकम्पि धञ्जरसोयेवाति वदन्ति। **अनुजानामि, भिक्खवे, उच्छुरसन्ति** एत्थ निक्कसटो उच्छुरसो सत्ताहकालिकोति वेदितब्बं।

**इमाहि गाथाहीति** (म० नि० अट्ठ० २.४००) इमाहि केणियस्स चित्तानुकूलाहि गाथाहि। तत्थ अग्गिपरिचरियं विना ब्राह्मणानं यज्जाभावतो “**अग्गिहुत्तमुखा यज्जा**”ति वुत्तं, अग्गिहुत्तसेट्ठा अग्गिजुहनप्पधानाति अत्थो। ब्राह्मणा हि “अग्गिमुखा देवा”ति अग्गिजुहनपुब्बकं यज्जं विदहन्ति। वेदे सज्झायन्तेहि पठमं सज्झायितब्बतो साविती “छन्दसो मुख”न्ति वुत्ता, साविती वेदस्स पुब्बङ्गमाति अत्थो तंपुब्बकत्ता वेदसवनस्स। मनुस्सानं सेट्ठभावतो राजा “मुख”न्ति वुत्तो। ओगाहन्तीनं नदीनं आधारभावतो गन्तब्बद्वानभावेन पटिसरणतो च सागरो “मुख”न्ति वुत्तो। चन्दसमायोगेन “अज्ज कत्तिका, अज्ज रोहिणी”ति सज्जायनतो नक्खत्तानि अभिभवित्वा आलोककरणतो नक्खत्तेहि अतिविसेससोम्मभावतो च “नक्खत्तानं मुखं चन्दो”ति वुत्तं। “दीपसिखा अग्गिजाला असनिविचक्क”न्ति एवमादीनं तपन्तानं विज्जुलतानं अगत्ता आदिच्चो “तपत्तं मुख”न्ति वुत्तो। दक्खिण्येयानं पन अगत्ता विसेसेन तस्मिं समये बुद्धप्पमुखं सङ्गं सन्धाय “पुज्जं आकङ्खमानानं, सङ्गो वे यजतं मुख”न्ति वुत्तं। तेन सङ्गो पुज्जस्स आयमुखं अगदक्खिण्येयभावेनाति दस्सेति।

केणियजटिलवत्थुकथावण्णना निट्ठिता।

### रोजमल्लवत्थुकथावण्णना

**३०१.** रोजवत्थुम्हि विहारोति गन्धकुटिं सन्धाय आहंसु। **अतरमानोति** अतुरन्तो, सणिकं पदप्पमाणद्वाने पदं निक्खिपन्तो वत्तं कत्वा सुसम्मट्ठं मुत्तादलसिन्दुवारसन्थरसदिसं वालिकं अविनासेन्तोति अत्थो। **आळिन्दन्ति** पमुखं। **उक्कासित्वाति** उक्कासितसद्वं कत्वा। **अगगळन्ति** कवाटं। **आकोटेहीति** अगगनखेन ईसकं कुञ्चिकछिद्दसमीपे कोटेहीति वुत्तं होति। द्वारं किर अतिउपरि अमनुस्सा, अतिहेट्ठा तिरच्छानजातिका कोटेन्ति, तथा अकोटेत्वा मज्झे छिद्दसमीपे मनुस्सा कोटेन्ति, इदं द्वारकोटकवत्तन्ति दीपेन्ता वदन्ति। **विवरि भगवा द्वारन्ति** न भगवा उट्ठाया द्वारं विवरि, विवरतूति पन हत्थं पसारिसि। ततो “भगवा तुम्हेहि अनेकासु कप्पकोटीसु दानं ददमानेहि न सहत्था द्वारविवरणकम्मं कत”न्ति सयमेव द्वारं विवटं। तं पन यस्मा भगवतो मनेन विवटं, तस्मा “विवरि भगवा द्वार”न्ति वुत्तं।

रोजमल्लवत्थुकथावण्णना निट्ठिता।

### वुड्डपब्बजितवत्थुकथावण्णना

**३०३.** आतुमावत्थुम्हि अज्जतरो **वुड्डपब्बजितोति** सुभद्धो नाम अज्जतरो भिक्खु वुड्डकाले पब्बजितत्ता “वुड्डपब्बजितो”ति वुत्तो। **द्वे दारकाति** सामणेरभूमियं ठिता द्वे पुत्ता। **नाळियावापकेनाति** नाळिया चेव थविकाय च। **संहरिंसूति** यस्मा मनुस्सा ते दारके मज्जुभाणिने पटिभानवन्ते दिस्वा कारेतुकामापि अकारेतुकामापि कारेन्तियेव, कतकाले च “किं गण्हिस्सथ ताता”ति पुच्छन्ति। ते वदन्ति “न अम्हाकं अज्जेन केनचि अत्थो, पिता पन नो भगवतो आगतकाले यागुदानं कातुकामो”ति। तं सुत्वा मनुस्सा अपरिगणेतवाव यं ते सक्कोन्ति हरितुं, सब्बं देन्ति। यम्पि न

सक्कोन्ति, मनुस्सेहि पेसेन्ति । तस्मा ते दारका बहुं लोणम्पि तेलम्पि सप्पिम्पि तण्डुलम्पि खादनीयम्पि संहरिंसु ।

**आतुमायं विहरतीति** आतुमं निस्साय विहरति । **भुसागारेति** भुसमये अगारके । तत्थ किर महन्तं पलालपुञ्जं अब्भन्तरतो पलालं निक्कट्ठित्वा सालासदिसं पब्बजितानं वसनयोग्गट्टानसदिसं कतं, तदा भगवा तत्थ वसि । अथ भगवति आतुमं आगन्त्वा भुसागारकं पविट्ठे सुभद्धो सायन्हसमयं गामद्वारं गन्त्वा मनुस्से आमन्तेसि “उपासका नाहं तुम्हाकं सन्तिका अञ्जं किञ्चि पच्चासीसामि, मय्हं दारकेहि आनीततेलादीनियेव सङ्घस्स पहोन्ति, हत्थकम्ममत्तं मे देथा”ति । किं, भन्ते, करोमाति? “इदञ्चिदञ्च गणहथा”ति सब्बूपकरणानि गाहेत्वा विहारे उद्धनानि कारेत्वा एकं काळकं कासावं निवासेत्वा तादिसमेव पारुपित्वा “इदं करोथ, इदं करोथा”ति सब्बरत्तिं विचारेन्तो सतसहस्सं विस्सज्जेत्वा भोज्जयागुञ्च मधुगोळकञ्च पटियादापेसि । **भोज्जयागु** नाम पठमं भुज्जित्वा पातब्बयागु, तत्थ सप्पिमधुफाणितमच्छमंसपुप्फफलरसादि यंकञ्चि खादनीयं नाम, सब्बं पविसति, कीळितुकामानं सीसमक्खनयोग्गा होति सुगन्धगन्धा ।

अथ भगवा कालस्सेव सरीरपटिजग्नं कत्वा भिक्खुसङ्घपरिवृतो पिण्डाय चरितुं आतुमगामनगराभिमुखो पायासि । मनुस्सा तस्स आरोचेसुं “भगवा पिण्डाय गामं पविसति, तया कस्स यागु पटियादिता”ति । सो यथानिवत्थपारुतेहेव तेहि काळककासावेहि एकेन हत्थेन दब्बिञ्च कटच्छुञ्च गहेत्वा ब्रह्मा विय दक्खिणजाणुमण्डलं भूमियं पतिट्ठापेत्वा वन्दित्वा “पटिग्गण्हातु मे, भन्ते, भगवा यागु”न्ति आह । तेन वुत्तं “अथ खो सो वुड्ढपब्बजितो तस्सा रत्तिया अच्चयेन बहुतरं यागुं पटियादापेत्वा भगवतो उपनामेसी”ति । जानन्तापि तथागता पुच्छन्तीतिआदि वुत्तनयमेव । कुतायन्ति कुतो अयं । सेसमेत्थ उत्तानमेव ।

**३०४. दसभागं दत्त्वाति** दसमभागं दत्त्वा । तेनेवाह “दस कोट्टासे कत्वा एको कोट्टासो भूमिसामिकानं दातब्बो”ति ।

वुड्ढपब्बजितवत्थुकथावण्णना निट्ठिता ।

### चतुमहापदेसकथावण्णना

**३०५. परिमद्वन्ताति** उपपरिक्खन्ता । पत्तुण्णदेसे सञ्जातवत्थं पत्तुण्णं । कोसेय्यविसेसोति हि अभिधानकोसे वुत्तं । चीनदेसे सोमारदेसे च सञ्जातवत्थानि चीनसोमारपटानि । पत्तुण्णादीनि तीणि कोसेय्यस्स अनुलोमानि पाणकेहि कतसुत्तमयत्ता । **इद्धिमयिकं** एहिभिक्खूनं पुज्जिद्धिया निब्बत्तचीवरं । तं खोमादीनं अञ्जतरं होतीति तेसंयेव अनुलोमं । देवताहि दिन्नचीवरं **देवदत्तियं** । तं कप्परुक्खे निब्बत्तं जालिनीदेवकञ्जाय अनुरुद्धत्थेरस्स दिन्नवत्थसदिसं । तम्पि खोमादीनञ्जेव अनुलोमं होति तेसु अञ्जतरभावतो । **द्वे पटा देसनामेनेव** वुत्ताति तेसं सरूपदस्सनपरमेतं, नाञ्जं निवत्तनपरं पत्तुण्णपटस्सपि देसनामेनेव वुत्तत्ता । **तुम्बाति** भाजनानि । **फलतुम्बोति** लाबुआदि । **उदकतुम्बोति** उदकुक्खिपनककुटको । **किलञ्जच्छत्तन्ति** वेळुविलीवेहि वायित्वा कतछत्तं । **सम्भिन्नरसन्ति** सम्मिस्सितरसं । **पानकं पटिग्गहितं** होतीति अम्बपानादिपानकं पटिग्गहितं होति, तं विकालेपि कप्पति असम्भिन्नरसत्ता । तेन तदहुपटिग्गहितेन सद्भिन्ति तेन सत्ताहकालिकेन तदहुपटिग्गहितेन सद्भिन्ति । सेसमेत्थ सुविज्जेय्यमेव ।

चतुमहापदेसकथावण्णना निट्ठिता ।

भेसज्जक्खन्धकवण्णना निट्ठिता ।



## ७. कथिनक्खन्धकं

### कथिनानुजाननकथावण्णना

३०६. कथिनक्खन्धके सीसवसेनाति पधानङ्गवसेन । “कथिनन्ति पञ्चानिसंसे अन्तोकरणसमत्थताय थिरन्ति अत्थो”ति गण्ठपदेसु वुत्तं । “सो नेसं भविस्सती”ति युज्जतीति “सो तुम्हाक”न्ति अवत्वा “नेस”न्ति वचनं युज्जति । ये अत्थतकथिनाति न केवलं तुम्हाकमेव, ये अज्जेपि अत्थतकथिना, तेसम्पि भविस्सतीति अत्थो । अनामन्तेत्वा चरणन्ति चारित्तसिक्खापदे वुत्तनयेन अनापुच्छित्वा कुलेसु चरणं । मतकचीवरन्ति मतस्स सन्तकं चीवरं । ततुप्पादेन आभतन्ति विहारसन्तकेन खेतवत्थुआदिना आनीतं ।

पठमपवारणाय पवारिताति इदं वस्सच्छेदं अकत्वा वस्संवुत्थभावसन्दस्सनत्थं वुत्तं अन्तरायेन अप्पवारितानम्पि वुत्थवस्सानं कथिनत्थारसम्भवतो । तेनेव “अप्पवारिता वा”ति अवत्वा “छिन्नवस्सा वा पच्छिमिकाय उपगता वा न लभन्ती”ति एतकमेव वुत्तं । अज्जस्मिं विहारे वुत्थवस्सापि न लभन्तीति नानासीमाय अज्जस्मिं विहारे वुत्थवस्सा इमस्मिं विहारे कथिनत्थारं न लभन्तीति अत्थो । खलिमक्खितसाटकोति अहतवत्थं सन्धाय वुत्तं । दानकम्मवाचाति कथिनदुस्सदानकम्मवाचा । अकातुं न लभन्तीति इमिना अनादरियेन अकरोन्तस्स दुक्कटन्ति दीपेति । कम्मवाचा पन एकायेव वट्ठतीति कथिनत्थारसाटकस्स दानकाले वुत्ता एकायेव कम्मवाचा वट्ठति । पुन तस्स अज्जस्मिं वत्थे दिव्यमाने कम्मवाचाय दातब्बकिच्चं नत्थि, अपलोकनमेव अलन्ति अधिप्पायो ।

३०८. महाभूमिकन्ति महाविसयं, चतुवीसति आकारवन्तताय महावित्थारिकन्ति वुत्तं होति । पञ्चकन्ति पञ्चखण्डं । एस नयो सेसेसुपि । पठमचिमिलिकाति कथिनवत्थतो अज्जा अत्तनो पकतिचिमिलिका । “कुच्छिचिमिलिकं कत्वा सिब्बितमत्तेनाति थिरजिण्णानं चिमिलिकानं एकतो कत्वा सिब्बनस्सेतं अधिवचन”न्ति गण्ठपदेसु वुत्तं । महापच्चरियं कुरुन्दियज्ज “वुत्तवचननिदस्सनं ब्यज्जने एव भेदो, अत्थे नत्थीति दस्सनत्थं कत”न्ति वदन्ति । पिट्ठिअनुवातारोपनमत्तेनाति दीघतो अनुवातस्स आरोपनमत्तेन । कुच्छिअनुवातारोपनमत्तेनाति पुथुलतो अनुवातस्स आरोपनमत्तेन । सारुप्पं होतीति समणसारुप्पं होति । रत्तिनिस्सगियेनाति रत्तिअतिक्कन्तेन ।

कथिनानुजाननकथावण्णना निट्ठिता ।

### आदायसत्तकादिकथावण्णना

३११. अयन्ति आसावच्छेदिको कथिनुद्धारो । इध न वुत्तोति पाळियं मातिकापदभाजने सवनन्तिकानन्तरं न वुत्तो । तत्थाति तस्मिं सीमातिक्कन्तिके कथिनुद्धारे । “सीमातिक्कन्तिको नाम चीवरकालसीमातिक्कन्तिको”ति केनचि वुत्तं । “बहिसीमायं चीवरकालसमयस्स अतिक्कन्तत्ता सीमातिक्कन्तिको”ति अयं अम्हाकं खन्ति । सहुब्भारे “सो कतचीवरो”ति पाठो दिस्सति, एवज्ज सति चीवरपलिबोधो पठमं छिज्जतीति विज्जायति, इध पन परिवारपाळियज्ज “द्वे पलिबोधा अपुब्बं अचरिमं छिज्जन्ती”ति (परि० ४१५) वचनतो तं न समेति, तस्मा वीर्मसितब्बमेत्थ कारणं ।

३१२. “समादायवारो आदायवारसदिसो, उपसग्गमत्तमेत्थ विसेसो”ति गण्ठपदेसु वुत्तं । केचि पन “सब्बं अत्तनो परिक्खारं अनवसेसेत्वा पक्कमन्तो ‘समादाय पक्कमती’ति वुच्चती”ति वदन्ति । पुन समादायवारेपि तेयेव दस्सिताति

सम्बन्धो । विष्पकतचीवरे पक्कमनन्तिकस्स कथिनुद्धारस्स असम्भवतो “**यथासम्भव**”न्ति वुत्तं । पक्कमनन्तिको हि कथिनुद्धारो निद्धितचीवरस्सेव वसेन वुत्तो “**भिक्षु अत्थतकथिनो कतचीवरं आदाय पक्कमती**”ति वुत्तत्ता, तस्मा सो विष्पकतचीवरो न सम्भवतीति छळेव उब्भारा तत्थ दस्सिता ।

तत्रायं आदितो पट्टाय वारविभावना — आदायवारा सत्त, तथा समादायवाराति द्वे सत्तकवारा, ततो पक्कमनन्तिकं वज्जेत्वा विष्पकतचीवरस्स आदायसमादायवारवसेन द्वे छक्कवारा, ततो परं निट्ठानसन्निट्ठाननासनन्तिकानं वसेन तीणि तिकानि दस्सितानि । तत्थ पठमत्तिकं अन्तोसीमायं “**पच्चेस्सं न पच्चेस्स**”न्ति इमं विधिं अनामसित्वा बहिसीमायमेव “**न पच्चेस्स**”न्ति पवत्तं, तस्मा पक्कमनन्तिकसीमातिक्कन्तिकसउब्भारा तत्थ न युज्जन्ति । दुतियत्तिकं अन्तोसीमायं “**न पच्चेस्स**”न्ति पवत्तं । ततियत्तिकं **अनधिद्धित**-पदेन विसेसेत्वा पवत्तं, अत्थतो पठमत्तिकेन समेति । **अनधिद्धितेना**ति च “**पच्चेस्सं न पच्चेस्स**”न्ति एवं अनधिद्धितेन, अनियमितेनाति अत्थो । ततियत्तिकानन्तरं चतुत्थत्तिकं सम्भवन्तं अन्तोसीमायं “**पच्चेस्स**”न्ति वचनविसेसेन सम्भवति । तथा च योजियमानं इतरेहि सवनन्तिकादीहि अविरुद्धं होतीति चतुत्थत्तिकं अहुत्वा छक्कं जातन्ति वेदितब्बं । एवं तीणि तिकानि एकं छक्कज्जाति पठमं पन्नरसकं वेदितब्बं ।

**३१६-३२०.** ततो इदमेव पन्नरसकं उपसगगविसेसेन दुतियं समादायपन्नरसकं नाम कतं । पुन “विष्पकतचीवरं आदाया”ति ततियं पन्नरसकं, “**समादाया**”ति चतुत्थं पन्नरसकं दस्सितन्ति एवं चत्तारि पन्नरसकानि वेदितब्बानि । तत्थ पठमदुतियेसु पन्नरसकेसु सब्बेन सब्बं अकतचीवरं अधिप्पेतं, इतरेसु द्वीसु विष्पकतन्ति वेदितब्बं । ततो परं “**चीवरासाय पक्कमती**”तिआदिना नयेन निट्ठानसन्निट्ठाननासनआसावच्छेदिकवसेन एको वारोति इदमेकं चतुक्कं जातं, तस्मा पुब्बे वुत्तानि तिकानि आसावच्छेदिकानि तीणि च तिकानीति एतं अनासायद्वादसकन्ति वेदितब्बं । तदनन्तरे आसायद्वादसके किज्जापि पठमं द्वादसकं लब्धति, तथापि तं निब्बिसेसन्ति तमेकं द्वादसकं अवुत्तसिद्धं कत्वा विसेसतो दस्सेतुं आदितो पट्टाय “**अन्तोसीमायं पच्चेस्स**”न्ति वुत्तं । तं दुतियचतुक्के “**सो बहिसीमगतो सुणाती**”तिआदिवचनस्स ततियचतुक्के सवनन्तिकादीनज्ज ओकासकरणत्थन्ति वेदितब्बं । इदं पन द्वादसकं अनासायवसेनपि लब्धमानं इमिना अवुत्तसिद्धं कत्वा न दस्सितन्ति वेदितब्बं । एवमेत्थ द्वे द्वादसकानि उद्धरितब्बानि । करणीयद्वादसकेपि यथादस्सितं अनासायद्वादसकं अवुत्तसिद्धं आसायद्वादसकज्जाति द्वे द्वादसकानि उद्धरितब्बानि ।

**३२१-३२२.** यस्मा दिसंगमिकनवके “**दिसंगमिको पक्कमती**”ति वचनेनेव “**न पच्चेस्स**”न्ति इदं अवुत्तसिद्धमेव, तस्मा तं न वुत्तं । एत्तावता च आवासपलिबोधाभावो दस्सितो । **चीवरपटिवीसं अपविलायमानो**ति इमिना चीवरपलिबोधसमङ्गितमस्स दस्सेति । तत्थ **चीवरपटिवीसन्ति** अत्तनो पत्तब्बचीवरभागं । **अपविलायमानो**ति आकङ्खमानो । तस्स चीवरलाभे सति वस्संवुत्थावासे निट्ठानसन्निट्ठाननासनन्तिकानं वसेन एकं तिकं, तेसंयेव वसेन अन्तरामगगे एकं, गतट्ठाने एकन्ति तिण्णं तिकानं वसेन एकं नवकं वेदितब्बं ।

**३२४.** ततो परं निट्ठानसन्निट्ठाननासनन्तिकसीमातिक्कन्तिकसउब्भारानं वसेन फासुविहारपज्जकं वुत्तं । सेसमेत्थ पाळितो अट्ठकथातो च सुविज्जेय्यमेव ।

आदायसत्तकादिकथावण्णना निट्ठिता ।

कथिनक्खन्धकवण्णना निट्ठिता ।

## ८. चीवरक्खन्धकं

### जीवकवत्थुकथावण्णना

३२९-३३०. चीवरक्खन्धके कम्मविपाकन्ति कम्मजरोगं । संयमस्साति आनिसंसस्स, उपयोगत्थे चेतं सामिवचनं ।

### पज्जोतराजवत्थुकथादिवण्णना

३३४-३३६. विच्छिकस्स जातोति तस्स किर मातुया उतुसमये सयनगताय विच्छिको नाभिप्पदेसं आरुळ्हो, सा तस्स सम्फस्सेन गब्भं गण्हि । तं सन्धाय वुत्तं “विच्छिकस्स जातो”ति । उस्सन्नदोसोति सज्चितपित्तादिदोसो ।

### वरयाचनकथावण्णना

३३७. इतरीतरेनाति इतरेन इतरेन । इतर-सद्दो पन अनियमवचनो द्विक्खत्तुं वुच्चमानो यंकिज्जि-सद्देहि समानत्थो होतीति वुत्तं “अप्पग्घेनपि महग्घेनपि येन केनची”ति । महापिट्ठियकोजवन्ति हत्थिपिट्ठीसु अत्थरितब्बताय महापिट्ठियन्ति लद्धसमज्जं चतुरङ्गुलपुप्फं कोजवं ।

### कम्बलानुजाननादिकथावण्णना

३४०. उपचारेति सुसानस्स आसन्ने पदेसे । छट्ठेत्वा गताति किज्जि अवत्वायेव छट्ठेत्वा गता । सो एव सामीति अकताय कतिकाय येन गहितं, सोव सामी ।

### चीवरपटिग्गाहकसम्मुतिआदिकथावण्णना

३४२-३४३. धुरविहारट्टानेति विहारद्वारस्स सम्मुखट्टाने । विहारमज्झेयेव सम्मन्नितब्बन्ति सब्बेसं जाननत्थाय विहारमज्झेयेव निसिन्नेहि सम्मन्नितब्बं । तुलाभूतोति तुलासदिसो । वण्णावण्णं कत्वाति सब्बकोट्टासे अग्घतो समके कत्वा । तेनेवाह “समे पटिवीसे ठपेत्वा”ति । इदन्ति सामणेरानं उपट्ठपटिवीसस्स दानं । फातिकम्मन्ति सम्मुज्जनीबन्धनादिहत्थकम्मं । उक्कुट्ठिं करोन्तीति महासदं करोन्ति । समपटिवीसो दातब्बोति करिस्सामाति याचन्तानं पटिज्जामत्तेनपि समकोट्टासो दातब्बो ।

### चीवररजनकथावण्णना

३४४. रजनकुम्भिया मज्झे ठपेत्वाति अन्तोरजनकुम्भिया मज्झे ठपेत्वा एवं वट्ठाधारके अन्तोरजनकुम्भिया पक्खित्ते मज्झे उदकं तिट्ठति, वट्ठाधारकतो बहि समन्ता अन्तोकुम्भियं रजनच्छल्लि । रजनं पक्खिपितुन्ति रजनच्छल्लिं पक्खिपितुं ।

### तिचीवरानुजाननकथावण्णना

३४६. उद्धस्ते अरुणेति उगते अरुणसीसे । नन्दिमुखियाति तुट्ठमुखिया ।

### अतिरेकचीवरादिकथावण्णना

३४८. अच्छुपेय्यन्ति पतिट्टुपेय्यं । हतवत्थकानन्ति कालातीतवत्थानं । उद्धरित्वा अल्लीयापनखण्डन्ति दुब्बलट्टानं अपनेत्वा अल्लीयापनवत्थखण्डं ।

### विसाखावत्थुकथावण्णना

३४९-३५१. विसाखावत्थुम्हि कल्लकायाति अकिलन्तकाया पीतिसोमनस्सेहि फुटसरीरा । गतीति जाणगति जाणाधिगमो । अभिसम्परायोति जाणाभिसम्परायो जाणसहितो पेच्चभावो ।

तं भगवा ब्याकरिस्सतीति “सो भिक्खु सोतापन्नो सकदागामी”ति आदिना तस्स तं जाणगतिं, ततो परं “नियतो सम्बोधिपरायणो सकिदेव इमं लोकं आगन्त्वा दुक्खस्सन्तं करिस्सती”ति आदिना (सं० नि० ५.१००४) जाणाभिसम्परायञ्च आवि करिस्सति । सोवग्गिकन्ति सग्गसंवत्तनिकं । सोकं नुदति विनोदेतीति सोकनुदं ।

### निसीदनादिअनुजाननकथावण्णना

३५३. दुक्खं सुपतीति नानाविधसुपिणं पस्सन्तो दुक्खं सुपति । दुक्खं पटिबुज्झतीति पटिबुज्झन्तोपि उत्तसित्वा सलोमहंसो दुक्खं पटिबुज्झति ।

### पच्छिमविकप्पनुपगचीवरादिकथावण्णना

३५९-३६२. अट्टपदकच्छन्नेन पत्तमुखं सिब्बितुन्ति अट्टपदफलकाकारेण पत्तमुखे तत्थ तत्थ गब्भं दस्सेत्वा सिब्बितुं । अग्गळगुत्तियेव पमाणन्ति इमेहि चतूहि निक्खेपकारणेहि ठपेन्तेनपि अग्गळगुत्तिविहारेयेव ठपेतुं वट्ठीतीति अधिप्पायो ।

### सङ्घिकचीवरुप्पादकथावण्णना

३६३. पञ्च मासेति अच्चन्तसंयोगे उपयोगवचनं । वड्ढिं पयोजेत्वा ठपितउपनिक्खेपतोति वस्सावासिकत्थाय वेय्यावच्चकरेहि वड्ढिं पयोजेत्वा ठपितउपनिक्खेपतो । तत्तुप्पादतोति नाळिकेरआरामादितत्तुप्पादतो । “वस्सावासिकलाभवसेन वा मतकचीवरवसेन वा तत्तुप्पादवसेन वा अज्जेन वा केनचि आकारेण सङ्घं उद्दिस्स उप्पन्नचीवरं, सब्बं तस्सेव अत्थतकथिनस्स पञ्च मासे, अनत्थतकथिनस्स एकं चीवरमासं पापुणाती”ति अविसेसतो वत्वापि पुन वस्सावासिकलाभवसेन उप्पन्ने लब्धमानविसेसं दस्सेतुं “यं पन इद”न्ति आदि आरब्धं । तत्थ इधाति अभिलापमत्तमेतं । “वस्संवुत्थसङ्घस्स देमा”ति वुत्तेपि सोयेव नयो । अनत्थतकथिनस्सपि पञ्च मासे पापुणातीति वस्सावासिकलाभवसेन उप्पन्नत्ता अनत्थतकथिनस्सपि वुत्थवस्सस्स पञ्च मासे पापुणाति । केनचि पन “इध-सद्देन नियमितत्ता”ति कारणं वुत्तं, तं अकारणं । तथा हि इध-सद्देन अनियमेत्वापि “वस्संवुत्थसङ्घस्स देमा”ति वा “वस्सावासिकं देमा”ति वा अन्तोहेमन्ते वस्सावासिकलाभवसेन दिन्नं चीवरं अनत्थतकथिनस्सपि वुत्थवस्सस्स पञ्च मासे पापुणाति, तेनेव परतो अट्टसु मातिकासु “वस्संवुत्थसङ्घस्स देती”ति इमस्स मातिकापदस्स विनिच्छये (महाव० अट्ट० ३७९) “चीवरमासतो पट्टाय याव हेमन्तस्स पच्छिमो दिवसो, ताव वस्सावासिकं देमाति वुत्ते कथिनं अत्थतं वा होतु

अनत्थतं वा, अतीतवस्संवुत्थानमेव पापुणाती'ति वुत्तं। ततो परन्ति पञ्चमासतो परं, गिम्हानस्स पठमदिवसतो पट्टयाति अत्थो।

“कस्मा? पिट्टिसमये उप्पन्नत्ता'ति इदं “उदाहु अनागतवस्से'ति इमस्सानन्तरं दट्ठब्बं। गिम्हानस्स पठमदिवसतो पट्टाय उप्पन्नमेव हि पिट्टिसमये उप्पन्नत्ता “किं अतीतवस्से इदं वस्सावासिक'न्ति आदिना पुच्छितब्बं, तेनेव परतोपि वक्खति “गिम्हानं पठमदिवसतो पट्टाय वुत्ते पन मातिका आरोपेतब्बा ‘अतीतवस्सावासस्स पञ्च मासा अतिक्कन्ता, अनागतो चातुमासच्चयेन भविस्सति, कतरवस्सावासस्स देसी'ति। सचे ‘अतीतवस्संवुत्थानं दम्मी'ति वदति, तंअन्तोवस्संवुत्थानमेव पापुणाती'ति (महाव० अट्ठ० ३७९)। पोत्थकेसु पन “अनत्थतकथिनस्सपि पञ्च मासे पापुणाती'ति इमस्सानन्तरं “कस्मा? पिट्टिसमये उप्पन्नत्ता'ति इदं लिखन्ति, तं न युज्जति। न हि पिट्टिसमये उप्पन्नं सन्धाय “अनत्थतकथिनस्सपि पञ्च मासे पापुणाती'ति वुत्तं, न च पिट्टिसमये उप्पन्नं वुत्थवस्सस्सेव पापुणाति, सम्मुखीभूतानं सब्बेसं पापुणाति, तेनेव परतो वक्खति “असुकविहारे वस्संवुत्थसङ्घस्साति वदति, तत्र वस्संवुत्थानमेव याव कथिनस्सुभारा पापुणाति। सचे पन गिम्हानं पठमदिवसतो पट्टाय एवं वदति, तत्र सम्मुखीभूतानं सब्बेसं पापुणाति। कस्मा? पिट्टिसमये उप्पन्नत्ता'ति (महाव० अट्ठ० ३७९)।

**ठितिका पन न तिट्ठतीति** एत्थ अट्ठिताय ठितिकाय पुन अज्जस्मिं चीवरे उप्पन्ने सचे एको भिक्खु आगच्छति, मज्झे छिन्दित्वा द्वीहिपि गहेतब्बं। ठिताय पन ठितिकाय पुन अज्जस्मिं चीवरे उप्पन्ने सचे नवकतरो आगच्छति, ठितिका हेट्ठा गच्छति। सचे वुट्ठतरो आगच्छति, ठितिका उद्धमारोहति। अथ अज्जो नत्थि, पुन अत्तनो पापेत्वा गहेतब्बं। **दुग्गहितानि होन्तीति** एत्थ सङ्घिकानेव होन्तीति अधिप्पायो। **गहितमेव नामाति** “इमस्स इदं पत्त'न्ति किञ्चापि न विदितं, ते पन भागा अत्थतो तेसं पत्तायेवाति अधिप्पायो। **इतोवाति** थेरानं दातब्बतोयेव।

सङ्घिकचीवरुप्पादकथावण्णना निट्ठिता।

### उपनन्दसक्यपुत्तवत्थुकथावण्णना

**३६४. सत्ताहवारेन अरुणमेव उट्ठापेतीति** एतं वचनमत्तमेव एकस्मिं विहारे सत्ताहकिच्चाभावतो। इदन्ति एकाधिप्पायदानं। **नानालाभेहीति** आदीसु नाना विसुं विसुं लाभो एतेसूति नानालाभा, द्वे विहारा, तेहि **नानालाभेहि**। नाना विसुं विसुं पाकारादीहि परिच्छिन्नो उपचारो एतेसन्ति नानूपचारा, तेहि **नानूपचारेहि**। **एकसीमविहारेहीति** एकूपचारसीमायं द्वीहि विहारेहि।

### गिलानवत्थुकथावण्णना

**३६५. पलिपन्नोति** निमुग्गो, मक्खितोति अत्थो। **उच्चारेत्वाति** उक्खिपित्वा। **समानाचरियकोति** एत्थ सचेपि एकस्स आचरियस्स एको अन्तेवासिको होति, एको सद्धिविहारिको, एतेपि अज्जमज्जं समानाचरियका एवाति वदन्ति।

**३६६. भेसज्जं योजेतुं असमत्थो होतीति** वेज्जेन “इदज्जिदज्ज भेसज्जं गहेत्वा इमिना योजेत्वा दातब्ब'न्ति वुत्ते तथा कातुं असमत्थोति अत्थो। **नीहातुन्ति** नीहरितुं, छट्टेतुन्ति अत्थो।

### मतसन्तककथावण्णना

३६७-३६९. भिक्खुस्स कालकतेति एत्थ कालकत-सद्दो भावसाधनोति आह “कालकिरियाया”ति । तत्थ तत्थ सङ्गस्साति तस्मिं तस्मिं विहारे सङ्गस्स ।

### सङ्गे भिन्ने चीवरुप्पादकथावण्णना

३७६. यत्थ पन दक्खिणोदकं पमाणन्ति भिक्खू यस्मिं रट्ठे दक्खिणोदकपअग्गहणमत्तेनपि देय्यधम्मस्स सामिनो होन्तीति अधिप्पायो । परसमुदेति जम्बुदीपे ।

३७८. मतकचीवरं अधिद्धातीति एत्थ मग्गं गच्छन्तो तस्स कालकिरियं सुत्वा अविहारट्ठाने चे द्वादसरतनब्भन्तरे अज्जेसं भिक्खूनं अभावं जत्वा “इदं चीवरं मय्हं पापुणाती”ति अधिद्धाति, स्वाधिद्धितं ।

### अट्ठचीवरमातिकाकथावण्णना

३७९. पुग्गलाधिद्धाननयेन वुत्तन्ति “सीमायदान”न्तिआदिना वत्तब्बे “सीमाय देती”तिआदि पुग्गलाधिद्धाननयेन वुत्तं । परिकखेपारहट्ठानेन परिच्छिन्नाति इमिना अपरिक्खित्तस्स विहारस्स धुवसन्निपातट्ठानादितो पठमलेट्ठुपातस्स अन्तो उपचारसीमाति दस्सेति । इदानीं दुतियलेट्ठुपातस्स अन्तोपि उपचारसीमायेवाति दस्सेतुं “अपिचा”तिआदि आरब्धं । धुवसन्निपातट्ठानम्पि परियन्तगतमेव गहेतब्बं । भिक्खुनीनं आरामप्पवेसनसेनासनापुच्छनादि परिवासमानत्तारोचनवस्सच्छेदनिस्सयसेनासनग्गाहादि विधानन्ति इदं सब्बं इमिस्सायेव उपचारसीमाय वसेन वेदितब्बं । लाभत्थाय ठपितसीमा लाभसीमा । समानसंवासअविप्पवाससीमासु दिन्नस्स इदं नानत्तं — “अविप्पवाससीमाय दम्मी”ति दिन्नं गामट्ठानं न पापुणाति । कस्मा? “ठपेत्वा गामञ्च गामूपचारञ्चा”ति वुत्तत्ता । “समानसंवासकसीमाय दम्मी”ति दिन्नं पन गामे ठितानम्पि पापुणातीति ।

बुद्धाधिवुत्थोति बुद्धेन भगवता अधिवुत्थो । एकस्मिन्ति एकस्मिं विहारे । पाकवट्ठन्ति दानवट्ठं । वत्ततीति पवत्तति । पंसुकूलिकानम्पि वट्ठतीति “तुय्हं देमा”ति अवत्वा “भिक्खूनं देम, थेरानं देमा”ति वुत्तत्ता पंसुकूलिकानं वट्ठति । विचारितमेवाति उपाहनत्थविकादीनमत्थाय विचारितमेव ।

उपट्ठं दातब्बन्ति यं उभतोसङ्गस्स दिन्नं, ततो उपट्ठं भिक्खूनं, उपट्ठं भिक्खुनीनं दातब्बं । सचेपि एको भिक्खु होति एका वा भिक्खुनी, अन्तमसो अनुपसम्पन्नस्सपि उपट्ठमेव दातब्बं । “भिक्खुसङ्गस्स च भिक्खुनीनञ्च तुय्हञ्चा”ति वुत्ते पन पुग्गलो विसुं न लभतीति इदं अट्ठकथापमाणेनेव गहेतब्बं । न हेत्थ विसेसकारणं उपलब्धति । तथा हि “उभतोसङ्गस्स च तुय्हञ्च दम्मी”ति वुत्ते सामञ्जविसेसवचनेहि सङ्गहितत्ता यथा पुग्गलो विसुं लभति, एवमिधापि “भिक्खुसङ्गस्स च तुय्हञ्चा”ति सामञ्जविसेसवचनसम्भावतो भवितब्बमेव विसुं पुग्गलपटिवीसेनाति विज्जायति, तस्मा अट्ठकथावचनमेवेत्थ पमाणं । पापुणनट्ठानतो एकमेव लभतीति अत्तनो वस्सग्गेन पत्तट्ठानतो एकमेव कोट्टासं लभति । तत्थ कारणमाह “कस्मा? भिक्खुसङ्गग्गहणेन गहितत्ता”ति, भिक्खुसङ्गग्गहणेनेव पुग्गलस्सपि गहितत्ताति अधिप्पायो । भिक्खुसङ्गस्स हराति वुत्तेपि हरितब्बन्ति ईदिसं गिहिवेय्यावच्चं न होतीति कत्वा वुत्तं ।

लक्खणञ्जू वदन्तीति इदं सन्निट्ठानवचनं, अट्ठकथासु अनागतत्ता पन एवं वुत्तं । बहिउपचारसीमायं...पे०... सब्बेसं पापुणातीति यत्थ कत्थचि वुत्थवस्सानं सब्बेसं पापुणातीति अधिप्पायो । तेनेव मातिकाट्ठकथायम्पि (कङ्का० अट्ठ० अकालचीवरसिक्खापदवण्णना) “सचे पन बहिउपचारसीमायं ठितो ‘वस्संवुत्थसङ्गस्सा’ति वदति, यत्थ कत्थचि

वुत्थवस्सानं सब्बेसं सम्पत्तानं पापुणाती”ति वुत्तं । गण्ठपदेसु पन “वस्सावासस्स अननुरूपे पदेसे ठत्वा वुत्तत्ता वस्संवुत्थानं अवुत्थानञ्च सब्बेसं पापुणाती”ति वुत्तं, तं न गहेतब्बं । न हि “वस्संवुत्थसङ्गस्स दम्मी”ति वुत्ते अवुत्थवस्सानं पापुणाति । एवं वदतीति “वस्संवुत्थसङ्गस्स दम्मी”ति वदति । उद्देसं गहेतुं आगतोति तस्स सन्तिके उद्देसं अगहितपुब्बस्सपि उद्देसं गणिहस्सामीति आगतकालतो पट्ठाय अन्तेवासिकभावूपगमनतो वुत्तं । सेसमेत्थ सुविज्जेय्यमेव ।

अट्ठचीवरमातिकाकथावण्णना निट्ठिता ।

चीवरकखन्धकवण्णना निट्ठिता ।

## ९. चम्पेय्यकखन्धकं

कस्सपगोत्तभिक्खुवत्थुकथावण्णना

३८०. चम्पेय्यकखन्धके चम्पायन्ति एवंनामके नगरे । तस्स हि नगरस्स आरामपोक्खरणीआदीसु तेसु तेसु ठानेसु चम्पकरुक्खाव उस्सन्ना अहेसुं, तस्मा “चम्पा”ति सङ्घं अगमासि । गग्गराय पोक्खरण्या तीरेति तस्स चम्पानगरस्स अविदूरे गग्गराय नाम राजमहेसिया खणितत्ता “गग्गरा”ति लद्धवोहारा पोक्खरणी अत्थि, तस्सा तीरे समन्ततो नीलादिपञ्चवण्णकुसुमपटिमण्डितं महन्तं चम्पकवनं, तस्मिं भगवा कुसुमगन्धसुगन्धे चम्पकवने विहरति । तं सन्धाय “गग्गराय पोक्खरण्या तीरे”ति वुत्तं । तन्तिबद्धोति तन्ति वुच्चति ब्यापारो, तत्थ बद्धो पसुतो उस्सुक्कं आपन्नोति अत्थो, तस्मिं आवासे अकतं सेनासनं करोति, जिण्णं पटिसङ्करोति, कते इस्सरो होतीति अधिप्पायो । तेनाह “तस्मिं आवासे कत्तब्बत्ता तन्तिपटिबद्धो”ति, कत्तब्बकम्मे उस्साहमापन्नोति अत्थो ।

जत्तिविपन्नकम्मादिकथावण्णना

३८५-३८७. पटिक्कोसन्तेसूति निवारेन्तेसु । हापनं वा अज्जथा करणं वा नत्थीति जत्तिकम्मस्स एकाय एव जत्तिया कत्तब्बत्ता ततो हापनं न सम्भवति, अनुस्सावनाय अभावतो पच्छा जत्तिठपनवसेन द्वीहि जत्तीहि करणवसेन च अज्जथा करणं नत्थि ।

चतुवग्गकरणादिकथावण्णना

३८९. उक्खेपनीयकम्मकतो कम्मनानासंवासको, उक्खित्तानुवत्तको लद्धिनानासंवासको ।

द्वेनिस्सारणादिकथावण्णना

३९५. अप्पत्तो निस्सारणन्ति एत्थ निस्सारणकम्मं नाम कुलदूसकानज्जेव अनुज्जातं, अयञ्च “बालो होति अब्यत्तो”तिआदिना निट्ठिद्वो कुलदूसको न होति, तस्मा “अप्पत्तो”ति वुत्तो । यदि एवं कथं सुनिस्सारितो होतीति? बालअव्यत्ततादियुत्तस्सपि कम्मकखन्धके “आकङ्खमानो सङ्घो पब्बाजनीयकम्मं करेय्या”ति (चूळव० २७) वुत्तत्ता । तेनेवाह “तज्जेस... पे०... तस्मा सुनिस्सारितो होती”ति । तत्थ तन्ति पब्बाजनीयकम्मं । एसोति “बालो”तिआदिना निट्ठिद्वो । आवेणिकेन लक्खणेनाति पब्बाजनीयकम्मस्स आवेणिकभूतेन कुलदूसकभावलक्खणेन ।

तज्जे सङ्खो निस्सारेति, सुनिस्सारितोति एत्थ अधिप्पेतस्स पब्बाजनीयकम्मस्स वसेन अत्थं दस्सेत्वा इदानीं यदि “तज्जे सङ्खो निस्सारेती”ति तज्जनीयादिकम्मवसेन निस्सारणा अधिप्पेता, तदा निस्सारणं सम्पत्तोयेव तज्जनीयादिवसेन सुनिस्सारितोति ब्यतिरेकमुखेन अत्थं दस्सेतुं पुन “तज्जे सङ्खो निस्सारेती”ति उल्लिङ्गेत्वा अत्थो कथितो। नत्थि एतस्स अपदानं अवखण्डनं आपत्तिपरियन्तोति अनपदानो। एकेकेनपि अङ्गेन निस्सारणा अनुज्जाताति कम्मकखन्धके अनुज्जाता। सेसमेत्थ पाळितो अट्ठकथातो च सुविज्जेय्यमेव।

द्वेनिस्सारणादिकथावण्णना निड्ढिता।

चम्पेय्यकखन्धकवण्णना निड्ढिता।

## १०. कोसम्बककखन्धकं

### कोसम्बकविवादकथावण्णना

४५१. कोसम्बककखन्धके सचे होति, देसेस्सामीति सुब्बचताय सिक्खाकामताय च आपत्तिं पस्सि। नत्थि आपत्तीति अनापत्तिपक्खोपि एत्थ सम्भवतीति अधिप्पायेनाह। सा पनापत्ति एव। तेनाह “सो तस्सा आपत्तिया अनापत्तिदिट्ठि अहोसी”ति।

४५३-४५४. सम्भमअत्थवसेनाति तुरितत्थवसेन। “अकारणे तुम्हेहि सो भिक्खु उक्खित्तो”ति वदेय्याति यस्मा पुब्बे विनयधरस्स वचनेन “सचे आपत्ति होति, देसेस्सामी”ति अनेन पटिज्जातं, इदानीपि तस्सेव वचनेन “असज्जिच्च अस्सतिया कतत्ता नत्थेत्थ आपत्ती”ति अनापत्तिसज्जी, तस्मा “अकारणे तुम्हेहि सो भिक्खु उक्खित्तो”ति उक्खेपके भिक्खू यदि वदेय्याति अधिप्पायो। उक्खित्तानुवत्तके वा “तुम्हे आपत्तिं आपन्ना”ति वदेय्याति यस्मा वत्थुजाननचित्तेनायं सचित्तका आपत्ति, अयज्ज उदकावसेसे उदकावसेसज्जी, तस्मा सापत्तिकस्सेव “तुम्हे छन्दागतिं गच्छथा”ति अधिप्पायेन “तुम्हे आपत्तिं आपन्ना”ति उक्खित्तानुवत्तके वदेय्य।

४५५-४५६. कम्मं कोपेतीति “नानासंवासकचतुत्थो चे, भिक्खवे, कम्मं करेय्य, अकम्मं न च करणीय”न्तिआदिवचनतो (महाव० ३८९) सचे सङ्खो तं गणपूरकं कत्वा कम्मं करेय्य, अयं तत्थ निसिन्नोपि तं कम्मं कोपेतीति अधिप्पायो। उपचारं मुज्जित्वाति एत्थ उपचारो नाम अज्जमज्जं हत्थेन पापुणनट्ठानं।

४५७. भण्डनजातातिआदीसु कलहस्स पुब्बभागो भण्डनं नाम, तं जातं एतेसन्ति भण्डनजाता, हत्थपरामासादिवसेन मत्थकं पत्तो कलहो जातो एतेसन्ति कलहजाता, विरुद्धवादभूतं वादं आपन्नाति विवादापन्ना। मुखसत्तीहीति वाचासत्तीहि। वितुदन्ताति विज्झन्ता। भगवन्तं एतदवोचाति “इध, भन्ते, कोसम्बियं भिक्खू भण्डनजाता”तिआदिवचनं अवोच, तज्ज खो नेव पियकम्यताय, न भेदाधिप्पायेन, अथ खो अत्थकामताय हितकामताय। सामग्गीकारको किरेस भिक्खु, तस्मास्स एतदहोसि “यथा इमे भिक्खू विवादं आरब्धा, न सक्का मया, नापि अज्जेन भिक्खुना समग्गे कातुं, अप्पेव नाम सदेवके लोके अग्गपुग्गलो भगवा सयं वा गन्त्वा अत्तनो वा सन्तिकं पक्कोसापेत्वा एतेसं भिक्खून् खन्तिमेत्तापटिसंयुत्तं सारणीयधम्मदेसनं कथेत्वा सामग्गिं करेय्या”ति अत्थकामताय हितकामताय गन्त्वा अवोच। तस्मा एवमाहाति अत्थकामत्ता एवमाह, न भगवतो वचनं अनादियन्तो। ये पन तदा सत्थु वचनं न गण्हंसु, ते



किञ्चि अवत्वा तुण्हीभूता मङ्कुभूता अट्ठंसु, तस्मा उभयेसम्पि सत्थरि अगारवपटिपत्ति नाहोसि ।

कोसम्बकविवादकथावण्णना निट्ठिता ।

### दीघावुवत्थुकथावण्णना

४५८. अथ खो भगवा भिक्खू आमन्तेसीति आदीसु भूतपुब्बन्ति इदं भगवा पथवीगतं निधिं उद्धरित्वा पुरतो रासिं करोन्तो विय भवपटिच्छन्नं पुरावुत्थं दस्सेन्तो आह । अट्ठोति इस्सरो । यो कोचि अत्तनो सन्तकेन विभवेन अट्ठो होति, अयं पन न केवलं अट्ठोयेव, महद्धनो महता अपरिमाणसङ्घेन धनेन समन्नागतोति आह “महद्धनो”ति । भुज्जितब्बतो परिभुज्जितब्बतो विसेसतो कामा भोगा नाम, तस्मा पञ्चकामगुणवसेन महन्ता उळारा भोगा अस्साति महाभोगो । महन्तं सेनाबलञ्चेव थामबलञ्च एतस्साति महब्बलो । महन्तो हत्थिअस्सादिवाहनो एतस्साति महावाहनो । महन्तं विजितं रट्ठं एतस्साति महाविजितो । परिपुण्णकोसकोट्टागारोति कोसो वुच्चति भण्डागारसारगम्भो, कोट्ठं वुच्चति धज्जस्स आठपनट्ठानं, कोट्ठभूतं अगारं कोट्टागारं, निदहित्वा ठपितेन धनेन परिपुण्णकोसो धज्जानञ्च परिपुण्णकोट्टागारोति अत्थो ।

अथ वा चतुब्बिधो कोसो हत्थी अस्सा रथा पत्तीति । यथा हि असिनो तिक्खभावपरिपालको परिच्छदो “कोसो”ति वुच्चति, एवं रज्जो तिक्खभावपरिपालकत्ता चतुरङ्गिनी सेना “कोसो”ति वुच्चति । तिविधं कोट्टागारं धनकोट्टागारं धज्जकोट्टागारं वत्थकोट्टागारन्ति । तं सब्बम्पि परिपुण्णमस्साति परिपुण्णकोसकोट्टागारो । चतुरङ्गिनिं सेनन्ति हत्थिअस्सरथपत्तिसङ्घातेहि चतूहि अङ्गेहि समन्नागतं सेनं । सन्नद्धित्वाति चम्मपटिमुञ्चनादीहि सन्नाहं कारेत्वा । अब्भुय्यासीति अभिउय्यासि, अभिमुखो हुत्वा निक्खमीति अत्थो । एकसङ्घातम्पीति एकप्पहारम्पि । धोवनन्ति धोवनुदकं । परिनेत्वाति नीहरित्वा । “अनत्थदो”ति वत्तब्बे द-कारस्स त-कारं कत्वा “अनत्थतो”ति वुत्तन्ति आह “अथ वा”ति आदि ।

४६४. वग्गभावेन वा पुथु नाना सट्ठो अस्साति पुथुसट्ठो । समजनोति भण्डने समज्झासयो जनो । तत्थाति तस्मिं जनकाये । अहं बालोति न मज्जित्थाति बाललक्खणे ठितोपि “अहं बालो”ति न मज्जि । भिय्यो चाति अत्तनो बालभावस्स अजाननतो भिय्यो च भण्डनस्स उपरिफोटो विय सङ्गभेदस्स अत्तनो कारणभावम्पि उप्पज्जमानं न मज्जित्थ नाज्जासि ।

कलहवसेन पवत्तवाचायेव गोचरा एतेसन्ति वाचागोचरा । मुखायामन्ति विवदनवसेन मुखं आयामेत्वा भाणिनो । न तं जानन्तीति तं कलहं न जानन्ति । कलहं करोन्तो च तं न जानन्तो नाम नत्थि । यथा पन न जानन्ति, तं दस्सेतुं आह “एवं सादीनवो अयं”न्ति, अयं कलहो नाम अत्तनो परेसञ्च अत्थहापनतो अनत्थुप्पादनतो दिट्ठेव धम्मे सम्पराये च सादीनवो सदोसोति अत्थो । तं न जानन्तीति तं कलहं न जानन्ति । कथं न जानन्तीति आह “एवं सादीनवो अयं”न्ति, “एवं सादीनवो अयं कलहो”ति एवं तं कलहं न जानन्तीति अत्थो ।

अक्कोच्छि मन्ति आदीसु अक्कोच्छीति अक्कोसि । अवधीति पहरि । अजिनीति कूटसक्खिओतारणेन वा वादपटिवादेन वा करणुत्तरियकरणेन वा अजेसि । अहासीति मम सन्तकं पत्तादीसु किञ्चिदेव अवहरि । ये च तन्ति ये केचि देवा वा मनुस्सा वा गहट्ठा वा पब्बजिता वा तं “अक्कोच्छि म”न्ति आदिवत्थुकं कोधं सकट्ठुरं विय नद्धिना पूतिमच्छादीनि विय च कुसादीहि पुनप्पुनं वेठेन्ता उपनद्धन्ति उपनाहवसेन अनुबन्धन्ति, तेसं सकिं उप्पन्नं वेरं न

सम्मतीति अत्थो ।

ये च तं नुपनयन्तीति अस्सतिया अमनसिकारवसेन वा कम्मपच्चवेक्खणादिवसेन वा ये तं अक्कोसादिवत्थुकं कोधं “तयापि कोचि निद्वोसो पुरिमभवे अक्कुटो भविस्सति, पहटो भविस्सति, कूटसक्खिं ओतारेत्वा जितो भविस्सति, कस्सचि ते पसय्ह किञ्चि अच्छिन्नं भविस्सति, तस्मा निद्वोसो हुत्वापि अक्कोसादीनि पापुणासी”ति एवं न उपनयन्ति, तेसु पमादेन उप्पन्नमि वेरं इमिना अनुपनयनेन निरिन्धनो विय जातवेदो उपसम्मति ।

न हि वेरेन वेरानीति यथा हि खेळसिङ्घाणिकादिअसुचिमक्खितं ठानं तेहेव असुचीहि धोवन्तो सुद्धं निग्गन्धं कातुं न सक्कोति, अथ खो तं ठानं भिय्योसो मत्ताय असुद्धतरञ्च दुग्गन्धतरञ्च होति, एवमेव अक्कोसन्तं पच्चक्कोसन्तो पहरन्तं पटिपहरन्तो वेरेन वेरं वूपसमेतुं न सक्कोति, अथ खो भिय्यो वेरमेव करोति । इति वेरानि नाम वेरेन किस्मिञ्चिपि काले न सम्मन्ति, अथ खो वड्ढन्तियेव । अवरेन च सम्मन्तीति यथा पन तानि खेळादीनि असुचीनि विप्पसन्नेन उदकेन धोवियमानानि नस्सन्ति, तं ठानं सुद्धं होति निग्गन्धं, एवमेव अवरेन खन्तिमेत्तोदकेन योनिमनसिकारेण पटिसङ्घानेन पच्चवेक्खणेन वेरानि वूपसम्मन्ति पटिप्पस्सम्भन्ति अभावं गच्छन्ति । एस धम्मो सनन्तनोति एस अवरेन वेरूपसमनसङ्घातो पोराणको धम्मो सब्बेसं बुद्धपच्चेकबुद्धखीणासवानं गतमग्गो ।

न जानन्तीति अनिच्चसज्जं न पच्चुपट्टापेन्तीति अधिप्पायो । ततो सम्मन्ति मेधगाति ततो तस्मा कारणा मेधगा कलहा सम्मन्ति वूपसमं गच्छन्ति । कथं ते सम्मन्तीति आह “एवञ्ही”तिआदि । तत्थ एवञ्हि ते जानन्ताति ते पण्डिता “मयं मच्चुसमीपं गच्छामा”ति एवं जानन्ता योनिमनसिकारं उप्पादेत्वा मेधगानं कलहानं वूपसमाय पटिपज्जन्ति, अथ नेसं ताय पटिपत्तिया ते मेधगा सम्मन्तीति अधिप्पायो ।

तेसमि होति सङ्गतीति ये मातापितूनं अट्ठीनि छिन्दन्ति, पाणे हरन्ति, गवादीनि च पसय्ह गणहन्ति, एवं रट्ठं विलुम्पमानानं तेसमि सङ्गति होति, किमङ्गं पन तुम्हाकं न सियाति अधिप्पायो ।

वण्णावण्णदीपनत्थं वुत्ताति “बालसहायताय इमे भिक्खू कलहपसुता, पण्डितसहायानं पन इदं न सिया”ति पण्डितसहायस्स बालसहायस्स च वण्णावण्णदीपनत्थं वुत्ता । निपकन्ति नेपक्कपज्जाय समन्नागतं । साधुविहारि धीरन्ति भद्दकविहारि पण्डितं । पाकटपरिस्सये च पटिच्छन्नपरिस्सये च अभिभवित्वाति सीहव्यग्घादयो पाकटपरिस्सये च रागभयदोसभयादयो पटिच्छन्नपरिस्सये चाति सब्बेव परिस्सये अभिभवित्वा ।

एकका चरिंसूति “इदं रज्जं नाम महन्तं पमादट्ठानं, किं अम्हाकं रज्जेन कारितेना”ति रट्ठं पहाय ततो महाअरज्जं पविसित्वा तापसपब्बज्जं पब्बजित्वा चतूसु इरियापथेसु एकका चरिंसूति अत्थो ।

एकस्स चरितं सेय्योति पब्बजितस्स पब्बजितकालतो पट्टाय एकीभावाभिरतस्स एककस्सेव चरितं सेय्योति अत्थो । नत्थि बाले सहायताति चूळसीलं मज्झिमसीलं महासीलं दस कथावत्थूनि तेरस धुतगुणा विपस्सनाज्जाणं चत्तारो मग्गा चत्तारि फलानि तिस्सो विज्जा छ अभिज्जा अमतमहानिब्बानन्ति अयं सहायता नाम, सा बालं निस्साय अधिगन्तुं न सक्काति नत्थि बाले सहायता । मातङ्गो अरज्जे मातङ्गरज्जेति सरलोपेन सन्धि । “मातङ्गरज्जो”तिपि पाठो, अरज्जको मातङ्गो वियाति अत्थो । मातङ्ग-सद्देनेव हत्थिभावस्स वुत्तत्ता नागवचनं तस्स महत्तविभावनत्थन्ति आह “नागोति महन्ताधिवचनमेत”न्ति । महन्तपरियायो हि नाग-सद्दो होति “एतं नागस्स नागेन, ईसादन्तस्स हत्थिनो”तिआदीसु (उदा०

३५)।

दीघावुवत्थुकथावण्णना निड्डिता।

**बालकलोणकगमनकथावण्णना****४६५. बालकलोणकारगामोति** उपालिगहपतिस्स एवंनामको भोगगामो। **तेनुपसङ्कमीति**

धम्मसेनापतिमहामोगल्लानत्थेरेसु वा असीतिमहासावकेसु वा अन्तमसो धम्मभण्डागारिकं आनन्दत्थेरम्पि कञ्चि अनामन्तेत्वा सयमेव पत्तचीवरमादाय अनीकनिस्सटो हत्थी विय यूथनिस्सटो काळसीहो विय वातच्छिन्नो वलाहको विय च एककोव उपसङ्कमि। कस्मा उपसङ्कमि? गणे किरस्स आदीनवं दिस्वा एकविहारिं भिक्खुं पस्सितुकामता उदपादि, तस्मा सीतादिपीळितो उण्हादिं पत्थयमानो विय उपसङ्कमि। अथ वा भगवता सो आदीनवो पगेव परिज्जातो, न तेन सत्था निब्बिन्नो, तस्मिं पन अन्तोवस्से केचि बुद्धवेनेय्या नाहेसुं, तेन अज्जत्थ गमनं तेसं भिक्खूनं दमनुपायोति पालिलेय्यकं उद्दिस्स गच्छन्तो एकविहारिं आयस्मन्तं भगुं सम्पहंसेतुं तत्थ गतो। एवं गते च सत्थरि पज्जसता भिक्खू आयस्मन्तं आनन्दं आहंसु “आवुसो आनन्द सत्था एककोव गतो, मयं अनुबन्धिस्सामा”ति। “आवुसो, यदा भगवा सामं सेनासनं संसामेत्वा पत्तचीवरमादाय अनामन्तेत्वा उपट्ठाके अनपलोकेत्वा भिक्खुसङ्घं अदुतियो गच्छति, तदा एकचारिकं चरितुं भगवतो अज्झासयो, सावकेन नाम सत्थु अज्झासयानुरूपं पटिपज्जितब्बं, तस्मा न इमेसु दिवसेसु भगवा अनुगन्तब्बो”ति निवारेसि, सयम्पि नानुगच्छि। **धम्मिया कथायाति** एकीभावे आनिसंसपटिसंयुत्ताय धम्मकथाय।

बालकलोणकगमनकथावण्णना निड्डिता।

**पाचीनवंसदायगमनकथावण्णना**

**४६६. येन पाचीनवंसदायोति** तत्थ कस्मा उपसङ्कमि? यथा नाम जिघच्छितस्स भोजने, पिपासितस्स पानीये, सीतेन फुट्ठस्स उण्हे, उण्हेन फुट्ठस्स सीते, दुक्खितस्स सुखे अभिरुचि उप्पज्जति, एवमेव भगवतो कोसम्बके भिक्खू अज्जमज्जं विवादापन्ने असमग्गवासं वसन्ते, समग्गवासं वसन्ते आवज्जेन्तस्स इमे तयो कुलपुत्ता आपाथमागमिंसु, अथ नेसं पग्गण्हितुकामो उपसङ्कमि “एवायं पटिपत्तिअनुक्कमेन कोसम्बकानं भिक्खूनं विनयनूपायो होती”ति। **विहरन्तीति** सामगिरसं अनुभवमाना विहरन्ति।

**दायपालोति** (म० नि० अट्ठ० १.३२५) अरज्जपालो। सो अरज्जं यथा इच्छतिच्छित्तपदेसेन मनुस्सा पविसित्वा तत्थ पुप्फं वा फलं वा निय्यासं वा दब्बसम्भारं वा न हरन्ति, एवं वतिया परिक्खित्तस्स अरज्जस्स योजिते द्वारे निसीदित्वा अरज्जं रक्खति, तस्मा “दायपालो”ति वुत्तो। **अत्तकामरूपा विहरन्तीति** अत्तनो हितं कामयमानसभावा हुत्वा विहरन्ति। यो हि इमस्मिं सासने पब्बजित्वापि वेज्जकम्मदूतकम्मपहिणगमनादीनं वसेन एकवीसतिअनेसनाहि जीविकं कप्पेति, अयं न अत्तकामरूपो नाम। यो पन इमस्मिं सासने पब्बजित्वा एकवीसतिअनेसनं पहाय चतुपारिसुद्धिसीले पतिट्ठाय बुद्धवचनं उग्गण्हित्वा सप्पायधुतङ्गं अधिट्ठाय अट्ठित्साय आरम्भणेसु चित्तरुचियं कम्मट्ठानं गहेत्वा गामन्तं पहाय अरज्जं पविसित्वा समापत्तियो निब्बत्तेत्वा विपस्सनाय कम्मं कुरुमानो विचरति, अयं अत्तकामो नाम। तेपि तयो कुलपुत्ता एवरूपा अहेसुं। तेन वुत्तं “अत्तकामरूपा विहरन्ती”ति।

**मा तेसं अफासुमकासीति** तेसं अफासुकं मा अकासीति भगवन्तं वारेसि। एवं किरस्स अहोसि “इमे कुलपुत्ता

समग्गा विहरन्ति, एकच्चस्स च गतद्धाने भण्डनकलहविवादा वत्तन्ति, तिखिणसिङ्गो चण्डगोणो विय ओविज्झन्तो विचरति, अथेकमग्गेन द्विन्नं गमनं न होति, कदाचि अयम्पि एवं करोन्तो इमेसं कुलपुत्तानं समग्गवासं भिन्देय्य, पासादिको च पनेस सुवण्णवण्णो रसगिद्धो मज्जे, गतकालतो पट्टाय पणीतदायकानं अत्तनो उपट्टाकानं वण्णकथनादीहि इमेसं कुलपुत्तानं अप्पमादविहारं भिन्देय्य, वसनट्टानानि चापि एतेसं कुलपुत्तानं निबद्धानि परिच्छिन्नानि तिस्सोव पण्णसाला तयो चङ्कमा तीणि दिवाट्टानानि तीणि मज्जपीठानि, अयं पन समणो महाकायो वुट्ठतरो मज्जे भविस्सति, सो अकाले इमे कुलपुत्ते सेनासना वुट्ठपेस्सति, एवं सब्बथापि एतेसं अफासु भविस्सती”ति । तं अनिच्छन्तो “मा तेसं अफासुमकासी”ति भगवन्तं वारेति ।

किं पनेस जानन्तो वारेसि अजानन्तोति? अजानन्तो । सम्मासम्बुद्धो हि नाम यदा अनेकभिक्खुसहस्सपरिवारो ब्यामप्पभाय असीति अनुब्यज्जनेहि द्वित्तिसमहापुरिसलक्खणसिरिया च बुद्धानुभावं दस्सेन्तो विचरति, तदा “को एसो”ति अपुच्छित्वाव जानितब्बो होति । तदा पन भगवा “मास्सु कोचि मम बुद्धानुभावं अज्जासी”ति तथारूपेण इद्वाभिसङ्खारेण सब्बम्पि तं बुद्धानुभावं चीवरगब्भेन विय पटिच्छादेत्वा वलाहकगब्भेन पटिच्छन्तो पुण्णचन्दो विय सयमेव पत्तचीवरमादाय अज्जातकवेसेन अगमासि । इति तं अजानन्तोव दायपालो वारेसि ।

**एतदवोचाति** थेरो किर “मा समणा”ति दायपालस्स कथं सुत्वा चिन्तेसि “मयं तयो जना इध विहराम, अज्जो पब्बजितो नाम नत्थि, अयज्च दायपालो पब्बजितेन विय सद्धिं कथेति, को नु खो भविस्सती”ति दिवाट्टानतो उट्टाय द्वारे ठत्वा मग्गं ओलोकेन्तो भगवन्तं अद्दस । भगवापि थेरस्स सह दस्सनेनेव सरीरोभासं मुज्जि, असीति अनुब्यज्जनविराजिता ब्यामप्पभा पसारितसुवण्णपटो विय विरोचित्थ । थेरो “अयं दायपालो फणकतआसीविसं गीवाय गहेतुं हत्थं पसारेन्तो विय लोके अग्गपुग्गलेन सद्धिं कथेन्तोव न जानाति, अज्जतरभिक्खुना विय सद्धिं कथेती”ति निवारेन्तो एतं “मावुसो, दायपाला”ति आदिवचनं अवोच ।

**तेनुपसङ्कमीति** कस्मा भगवतो पच्चुग्गमनं अकत्वाव उपसङ्कमि? एवं किरस्स अहोसि “मयं तयो जना समग्गवासं वसाम, सचाहं एककोव पच्चुग्गमनं करिस्सामि, समग्गवासो नाम न भविस्सति, पियमित्ते गहेत्वाव पच्चुग्गमनं करिस्सामि । यथा च भगवा मय्हं पियो, एवं सहायानम्पि मे पियो”ति तेहि सद्धिं पच्चुग्गमनं कातुकामो सयं अकत्वा उपसङ्कमि । केचि पन “तेसं थेरानं पण्णसालद्वारे चङ्कमनकोटिया भगवतो आगमनमग्गो होति, तस्मा थेरो तेसं सज्जं ददमानोव गतो”ति वदन्ति । **अभिक्कमथाति** इतो आगच्छथ । **पादे पक्खालेसीति** विकसितपदुमसन्निभेहि जालहत्थेहि मणिवण्णं उदकं गहेत्वा सुवण्णवण्णेसु पिट्ठिपादेसु उदकं आसिज्चित्वा पादेन पादं घंसेन्तो पक्खालेसि । बुद्धानं काये रजोजल्लं नाम न उपलिम्पति, कस्मा पक्खालेसीति? सरीरस्स उतुग्गहणत्थं तेसज्ज चित्तसम्पहंसनत्थं । अम्हेहि अभिहटेन उदकेन भगवा पादे पक्खालेसि, परिभोगं अकासीति तेसं भिक्खूनां बलवसोमनस्सवसेन चित्तं पीणितं होति, तस्मा पक्खालेसि ।

**आयस्मन्तं अनुरुद्धं भगवा एतदवोचाति** सो किर तेसं वुट्ठतरो, तस्स सङ्गहे कते सेसानं कतोव होतीति थेरज्जेव एतं “कच्चि वो अनुरुद्धा”ति आदिवचनं अवोच । **अनुरुद्धाति** वा एकसेसनयेन वुत्तं विरूपेकसेसस्सपि इच्छितबब्बत्ता, एवज्ज कत्वा बहुवचननिद्देशो च समत्थितो होति । **कच्चीति** पुच्छनत्थे निपातो । **वोति** सामिवचनं । इदं वुत्तं होति — कच्चि अनुरुद्धा तुम्हाकं खमनीयं, इरियापथो वो खमति, कच्चि यापनीयं, कच्चि वो जीवितं यापेति घटियति, कच्चि पिण्डकेन न किलमथ, कच्चि तुम्हाकं सुलभपिण्डं, सम्पत्ते वो दिस्वा मनुस्सा उळुङ्कयागुं वा कटच्छुभिक्खं वा दातब्बं मज्जन्तीति

भिक्षाचारवत्तं पुच्छति । कस्मा? यस्मा पच्चयेन अकिलमन्तेन सक्का समणधम्मो कातुं, वत्तमेव वा एतं पब्बजितानं ।

अथ तेन पटिवचने दिन्ने “अनुरुद्धा तुम्हे राजपब्बजिता महापुज्जा, मनुस्सा तुम्हाकं अरज्जे वसन्तानं अदत्त्वा कस्स अज्जस्स दातब्बं मज्जिस्सन्ति, तुम्हे पन एतं भुज्जित्वा किं नु खो मिगपोतका विय अज्जमज्जं घट्टेन्ता विहरथ, उदाहु सामग्गिभावो वो अत्थी”ति सामगिरसं पुच्छन्तो “**कच्चि पन वो अनुरुद्धा समग्गा**”तिआदिमाह । तत्थ **खीरोदकीभूता**ति यथा खीरज्ज उदकज्ज अज्जमज्जं संसन्दति, विसुं न होति, एकत्तं विय उपेति, कच्चि एवं सामग्गिवसेन एकत्तुपगतचित्तुप्पादा विहरथाति पुच्छति । **पियचक्खूही**ति मेत्तचित्तं पच्चुपट्टापेत्वा ओलोकनतो पियभावदीपकानि चक्खूनि पियचक्खूनि नाम, “कच्चि तथारूपेहि चक्खूहि अज्जमज्जं पस्सन्ता विहरथा”ति पुच्छति । **तग्घा**ति एकंसत्थे निपातो, एकंसेन मयं भन्तेति वुत्तं होति । **यथा कथं पना**ति एत्थ **यथा**ति निपातमत्तं, **कथन्ति** कारणपुच्छा, कथं पन तुम्हे एवं विहरथ, केन कारणेन विहरथ, तं मे कारणं बूहीति वुत्तं होति ।

**मेत्तं कायकम्मन्ति** मेत्तचित्तवसेन पवत्तं कायकम्मं । **आवि चेव रहो चा**ति सम्मुखा चेव परम्मुखा च । इतरेसुपि एसेव नयो । तत्थ सम्मुखा कायवचीकम्मनि सहवासे लब्भन्ति, इतरानि विप्पवासे, मनोकम्मं सब्बत्थ लब्भति । यज्झि सहेव वसन्तेसु एकेन मज्जपीठं वा दारुभण्डं वा मत्तिकाभण्डं वा बहि दुन्निक्खित्तं होति, तं दिस्वा “केनिदं वळ्ळित्तं”न्ति अवज्जं अकत्वा अत्तना दुन्निक्खित्तं विय गहेत्वा पटिसामेन्तस्स पटिजगितब्बयुत्तं वा पन ठानं पटिजगन्तस्स सम्मुखा मेत्तं कायकम्मं नाम होति । एकस्मिं पक्कन्ते तेन दुन्निक्खित्तं सेनासनपरिक्खारं तथेव निक्खिपन्तस्स पटिजगितब्बयुत्तं वा पन ठानं पटिजगन्तस्स परम्मुखा मेत्तं कायकम्मं नाम होति । सहवसन्तस्स पन थरेहि सद्धिं मधुरं सम्मोदनीयकथं पटिसन्थारकथं सारणीयकथं धम्मकथं सरभज्जं साकच्छं पज्जपुच्छनं पज्जविस्सज्जनन्ति एवमादिकरणे सम्मुखा मेत्तं वचीकम्मं नाम होति । थरेसु पन पक्कन्तेसु “मय्हं पियसहायो नन्दियत्थेरो किमिलत्थेरो एवं सीलसम्पन्नो एवं आचारसम्पन्नो”तिआदिगुणकथने परम्मुखा मेत्तं वचीकम्मं नाम होति । “मय्हं पियमित्तो नन्दियत्थेरो किमिलत्थेरो अवेरो होतु अब्यापज्जो सुखी”ति एवं समन्नाहरतो पन सम्मुखापि परम्मुखापि मेत्तं मनोकम्मं होतियेव ।

**नाना हि खो नो भन्ते काया**ति अयज्झि कायो पिट्ठं विय मत्तिका विय च ओमदित्वा एकतो कातुं न सक्का । **एकज्ज पन मज्जे चित्तन्ति** चित्तं पन नो अत्तनो विय अज्जमज्जस्स हितभावेन अविरोधभावेन भेदाभावेन समग्गभावेन एकमेवाति दस्सेति । कथं पनेते सकं चित्तं निक्खिपित्वा इतरेसं चित्तवसेन वत्तिसूति? एकस्स पत्ते मलं उट्ठति, एकस्स चीवरं किलिट्ठं होति, एकस्स परिभण्डकम्मं होति । तत्थ यस्स पत्ते मलं उट्ठितं, तेन “ममावुसो पत्ते मलं उट्ठितं, पचित्तुं वट्ठती”ति वुत्ते इतरे “मय्हं चीवरं किलिट्ठं धोवितब्बं, मय्हं परिभण्डं कातब्बं”न्ति अवत्वा अरज्जं पविसित्वा दारूनि आहरित्वा भिन्दित्वा पत्तकटाहे बहलतनुमत्तिकाहि लेपं कत्वा पत्तं पचित्वा ततो परं चीवरं वा धोवन्ति, परिभण्डं वा करोन्ति । “ममावुसो चीवरं किलिट्ठं, धोवित्तुं वट्ठती”ति “मम पण्णसाला उक्लापा, परिभण्डं कातुं वट्ठती”ति पठमतरं आरोचितेपि एसेव नयो ।

इदानी तेसं अप्पमादलक्खणं पुच्छन्तो “**कच्चि पन वो अनुरुद्धा**”तिआदिमाह । तत्थ **वो**ति निपातमत्तं, पच्चत्तवचनं वा, कच्चि तुम्हेति अत्थो । **अम्हाकन्ति** अम्हेसु तीसु जनेसु । **पिण्डाय पटिक्कमती**ति गामे पिण्डाय चरित्वा पच्चागच्छति । **अवक्कारपाति**न्ति अतिरेकपिण्डपातं अपनेत्वा ठपनत्थाय एकं समुग्गपातिं धोवित्वा ठपेति । **यो पच्छा**ति ते किर थेरा न एकतोव भिक्षाचारं पविसन्ति । फलसमापत्तिरता हेते पातोव सरीरपटिजगनं कत्वा वत्तपटिपत्तिं पूरेत्वा

सेनासनं पविसित्वा कालपरिच्छेदं कत्वा फलसमापत्तिं अप्पेत्वा निसीदन्ति । तेसु यो पठमतरं निसिन्नो अत्तनो कालपरिच्छेदवसेन पठमतरं उट्ठाति, सो पिण्डाय चरित्वा पटिनिवत्तो भत्तकिच्चट्ठानं आगन्त्वा जानाति “द्वे भिक्खू पच्छतो, अहं पठमतरं आगतो”ति । अथ पत्तं पिदहित्वा आसनपज्जापनादीनि कत्वा यदि पत्ते पटिवीसमत्तमेव होति, निसीदित्वा भुञ्जति, यदि अतिरेकं होति, अवक्कारपातियं पक्खिपित्वा पातिं पिधाय भुञ्जति, कतभत्तकिच्चो पत्तं धोवित्वा वोदकं कत्वा थविकाय ओसापेत्वा पत्तचीवरं गहेत्वा अत्तनो वसनट्ठानं पविसति ।

दुतियोपि आगन्त्वाव जानाति “एको पठमं आगतो, एको पच्छतो”ति । सो सचे पत्ते भत्तं पमाणमेव होति, भुञ्जति । सचे मन्दं, अवक्कारपातितो गहेत्वा भुञ्जति । सचे अतिरेकं होति, अवक्कारपातियं पक्खिपित्वा पमाणमेव भुञ्जित्वा पुरिमत्थेरो विय वसनट्ठानं पविसति । ततियोपि आगन्त्वाव जानाति “द्वे पठमं आगता, अहं पच्छिमो”ति । सोपि दुतियत्थेरो विय भुञ्जित्वा कतभत्तकिच्चो पत्तं धोवित्वा वोदकं कत्वा थविकाय ओसापेत्वा आसनानि उक्खिपित्वा पटिसामेति, पानीयघटे वा परिभोजनीयघटे वा अवसेसउदकं छट्ठेत्वा घटे निकुज्जित्वा अवक्कारपातियं सचे अवसेसभत्तं होति, तं वुत्तनयेन जहित्वा पातिं धोवित्वा पटिसामेति, भत्तगं सम्मज्जति, सो कचवरं छट्ठेत्वा सम्मज्जनिं उक्खिपित्वा उपचिकाहि मुत्तट्ठाने ठपेत्वा पत्तचीवरमादाय वसनट्ठानं पविसति । इदं थेरानं बहिविहारे अरज्जे भत्तकिच्चकरणट्ठाने भोजनसालाय वत्तं । इदं सन्धाय “यो पच्छा”तिआदि वुत्तं ।

यो पस्सतीतिआदि पन नेसं अन्तोविहारे वत्तन्ति वेदितब्बं । तत्थ वच्चघटन्ति आचमनकुम्भिं । रित्तन्ति रिक्तं । तुच्छन्ति तस्सेव वेवचनं । अविसहन्ति उक्खिपितुं असक्कुण्यं अतिभारियं । हत्थविकारेनाति हत्थसज्जाय । ते किर पानीयघटादीसु यंकिञ्चि तुच्छकं गहेत्वा पोक्खरणिं गन्त्वा अन्तो च बहि च धोवित्वा उदकं परिस्सावेत्वा तीरे ठपेत्वा अज्जं भिक्खुं हत्थविकारेन आमन्तेन्ति, ओदिस्स वा अनोदिस्स वा सद्दं न करोन्ति । कस्मा ओदिस्स न करोन्ति? तज्झि भिक्खुं सद्दो बाधेय्याति । कस्मा अनोदिस्स न करोन्ति? अनोदिस्स सद्दे दिन्ने “अहं पुरे, अहं पुरे”ति द्वेपि निक्खमेय्युं । ततो द्वीहि कत्तब्बकम्मे ततियस्स कम्मच्छेदो भवेय्य । संयतपदसद्दो पन हुत्वा अपरस्स भिक्खुनो दिवाट्ठानसन्तिकं गन्त्वा तेन दिट्ठभावं जत्वा हत्थसज्जं करोति, ताय सज्जाय इतरो आगच्छति, ततो द्वे जना हत्थेन हत्थं संसिब्बन्ता द्वीसु हत्थेसु ठपेत्वा उट्ठापेन्ति । तं सन्धाय “हत्थविकारेन दुतियं आमन्तेत्वा हत्थविलङ्घकेन उपट्ठापेमा”ति ।

पज्जाहिकं खो पनाति चातुदसे पन्नरसे अट्ठमियन्ति इदं ताव पकतिधम्मस्सवनमेव, तं अखण्डं कत्वा पज्जमे पज्जमे दिवसे द्वे थेरा नातिविकाले नहायित्वा अनुरुद्धत्थेरस्स वसनट्ठानं गच्छन्ति । तत्थ तयोपि निसीदित्वा तिण्णं पिटकानं अज्जतरस्मिं अज्जमज्जं पज्जं पुच्छन्ति, अज्जमज्जं विस्सज्जेन्ति । तेसं एवं करोन्तानयेव अरुणं उग्गच्छति । तं सन्धयेतं वुत्तं । एत्तावता थेरेन भगवता अप्पमादलक्खणं पुच्छितेन पमादट्ठानेसुयेव अप्पमादलक्खणं विस्सज्जितं होति । अज्जेसज्झि भिक्खूनं भिक्खाचारपविसनकालो निक्खमनकालो निवासनपरिवत्तनं चीवरपारुपनं अन्तोगामे पिण्डाय चरणं धम्मकथनं अनुमोदनं अन्तोगामतो निक्खमित्वा भत्तकिच्चकरणं पत्तधोवनं पत्तओसापनं पत्तचीवरपटिसामनन्ति पपज्चकरणट्ठानानि एतानि । तस्मा थेरो “अम्हाकं एत्तकं ठानं मुज्जित्वा विस्सट्ठकथापवत्तनेन कम्मट्ठाने पमज्जनट्ठानानि, तत्थापि मयं, भन्ते, कम्मट्ठानविरुद्धं न पटिपज्जामा”ति अज्जेसं पमादट्ठानेसुयेव सिखाप्पत्तं अत्तनो अप्पमादलक्खणं विस्सज्जेसि । इमिनाव एतानि ठानानि मुज्जित्वा अज्जत्थ विहारसमापत्तीनं अवळज्जनवसेन पमादकालो नाम अम्हाकं नत्थीति दीपेति ।

पाचीनवंसदायगमनकथावण्णना निट्ठिता ।

## पालिलेय्यकगमनकथावण्णना

**४६७. धम्मिया कथायाति** समग्गवासे आनिसंसपटिसंयुत्ताय धम्मकथाय । **अनुपुब्बेन** (उदा० अट्ठ० ३५) **चारिकं चरमानोति** अनुक्कमेन गामनिगमपटिपाटिया चारिकं चरमानो । **येन पालिलेय्यकं तदवसरीति** एककोव येन पालिलेय्यकगामो, तं अवसरि । पालिलेय्यकगामवासिनोपि पच्चुगन्त्वा भगवतो दानं दत्त्वा पालिलेय्यकगामस्स अविदूरे रक्खितवनसण्डो नाम अत्थि, तत्थ भगवतो पण्णसालं कत्वा “एत्थ भगवा वसतू”ति याचित्वा वासयिंसु । **भदसालोति** पन तत्थेको मनापो लड्डिको सालरुक्खो । भगवा तं गामं उपनिस्साय वनसण्डे पण्णसालाय समीपे तस्मिं रुक्खमूले विहासि । तेन वुत्तं “**पालिलेय्यके विहरति रक्खितवनसण्डे भदसालमूले**”ति ।

**अथ खो भगवतो रहोगतस्साति**आदि भगवतो विवेकसुखपच्चवेक्खणदस्सनं । **आकिण्णो न फासु विहासिन्ति** सम्बाधप्पत्तो आकिण्णो विहासिं । किं पन भगवतो सम्बाधो अत्थि संसग्गो वाति? नत्थि । न हि कोचि भगवन्तं अनिच्छाय उपसङ्कमितुं सक्कोति । दुरासदा हि बुद्धा भगवन्तो सब्बत्थ च अनुपलित्ता, हितेसिताय पन सत्तेसु अनुकम्पं उपादाय “मुत्तो मोचेस्सामी”ति पटिज्जानुरुपं चतुरोघनित्थरणत्थं अट्ठन्नं परिसानं अत्तनो सन्तिकं कालेन कालं उपसङ्कमनं अधिवासेति, सयज्ज महाकरुणासमुस्साहितो कालञ्जू हुत्वा तत्थ उपसङ्कमीति इदं सब्बबुद्धानं आचिण्णं । नायमिध आकिण्णविहारो अधिप्पेतो, इध पन तेहि कलहकारकेहि कोसम्बकभिक्षूहि सद्धिं एकविहारे वासं विहासि, तदा विनेतब्बाभावतो आकिण्णविहारं कत्वा वुत्तं “अहं खो पुब्बे आकिण्णो न फासु विहासि”न्ति । तेनेवाह “**तेहि कोसम्बकेहि भिक्षूहि भण्डनकारकेही**”तिआदि ।

**दहरपोतकेहीति** दहरेहि हत्थिपोतकेहि, ये भिङ्गातिपि वुच्चन्ति । **तेहीति** हत्थिआदीहि । **कदमोदकानीति** कदममिस्सानि उदकानि । **ओगाहाति** एत्थ “ओगाह”न्तिपि पाळि । **अस्साति** हत्थिनागस्स । **उपनिधंसन्तियोति** घट्टेन्तियो । उपनिधंसियमानोपि अत्तनो उळारभावेन न कुज्झति, तेन ता घंसन्तियेव । **वूपकट्ठोति** वूपकट्ठो दूरीभूतो ।

**यूथाति** हत्थिघटाय । **येन भगवा तेनुपसङ्कमीति** सो किर हत्थिनागो यूथवासे उक्कण्ठितो तं वनसण्डं पविट्ठो । तत्थ भगवन्तं दिस्वा घटसहस्सेन निब्बापितसन्तापो विय निब्बुतो हुत्वा पसन्नचित्तो भगवतो सन्तिके अट्ठासि, ततो पट्टाय वत्तसीसे ठत्वा भदसालस्स पण्णसालाय च समन्ततो अप्पहरितं कत्वा साखाभङ्गेन सम्मज्जति, भगवतो मुखधोवनं देति, नहानोदकं आहरति, दन्तकट्ठं देति, अरज्जतो मधुरानि फलाफलानि आहरित्वा सत्थु उपनेति । सत्था तानि परिभुज्जति । तेन वुत्तं “**सोण्डाय भगवतो पानीयं परिभोजनीयं उपट्ठापेती**”तिआदि । सो किर सोण्डाय दारूनि आहरित्वा अज्जमज्जं घंसित्वा अग्गिं उट्ठापेत्वा दारूनि जालापेत्वा तत्थ पासाणखण्डानि तापेत्वा तानि दण्डकेहि वट्टेत्वा सोण्डियं खिपित्वा उदकस्स तत्तभावं जत्वा भगवतो सन्तिकं उपगन्त्वा तिट्ठति । भगवा “हत्थिनागो मम नहानं इच्छती”ति तत्थ गन्त्वा नहानकिच्चं करोति । पानीयेपि एसेव नयो । तस्मिं पन सीतले जाते उपसङ्कमति । तं सन्धाय वुत्तं “**सोण्डाय भगवतो पानीयं परिभोजनीयं उपट्ठापेती**”ति ।

**अत्तनो च पविवेकं विदित्वाति** केहिचि अनाकिण्णभावलद्धं कायविवेकं जानित्वा । इतरे पन विवेका भगवतो सब्बकालं विज्जन्तियेव । **इमं उदानं उदानेसीति** इमं अत्तनो हत्थिनागस्स च विवेकाभिरतिया समानज्झासयभावदीपनं उदानं उदानेसि ।

गाथाय पन एवमत्थयोजना वेदितब्बा (उदा० अट्ठ० ३५) — **एतं ईसादन्तस्स** रथईसासदिसदन्तस्स हत्थिनागस्स

चित्तं नागेन बुद्धनागस्स चित्तेन समेति संसन्दति । कथं समेति चे? यदेको रमती वने, यस्मा बुद्धनागो “अहं खो पुब्बे आकिण्णो विहासि”न्ति पुरिमं आकिण्णविहारं जिगुच्छित्वा विवेकं उपब्रूहयमानो इदानीं यथा एको अदुतियो वने अरञ्जे रमति अभिरमति, एवं अयम्पि हत्थिनागो पुब्बे अत्तनो हत्थिआदीहि आकिण्णविहारं जिगुच्छित्वा इदानीं एको असहायो वने एकविहारं रमति अभिनन्दति, तस्मास्स चित्तं नागेन समेति, तस्स चित्तेन समेतीति कत्वा एकीभावरतिया एकसदिसं होतीति अत्थो ।

पालिलेय्यकगमनकथावण्णना निट्ठिता ।

### अट्टारसवत्थुकथावण्णना

४७३. यो पटिबाहेय्य, आपत्ति दुक्कटस्साति एत्थ यो सेनासनारहस्स सेनासनं पटिबाहति, तस्सेव आपत्ति । कलहकारकादीनं पनेत्थ “ओकासो नत्थी”ति आदिकं सङ्गस्स कतिकं आरोचेत्वा न पञ्जपेन्तस्स “अहं वुट्ठो”ति पसह् अत्तनाव अत्तनो पञ्जपेत्वा गणहन्तं “युत्तिया गणहथा”ति वत्वा वारेन्तस्स च नत्थि आपत्ति । “भण्डनकारकं निक्कट्ठतीति वचनतो कुलदूसकस्स पब्बाजनीयकम्मानुज्जाय च इध कलहवूपसमनत्थं आगतानं कोसम्बकानम्पि ‘यथावुट्ठ’न्ति अवत्वा ‘विवित्ते असति विवित्तं कत्वापि दातब्ब’न्ति वुत्तत्ता विवित्तं कत्वा देन्तं पटिबाहन्तस्सेव आपत्ती”ति गण्ठपदेसु वुत्तं ।

### उपालिसङ्गसामग्गीपुच्छावण्णना

४७६. न मूला मूलं गन्त्वाति मूलतो मूलं अगन्त्वा । अत्थतो अपगताति सामगिसङ्घातअत्थतो अपगता ।

४७७. येन नं पच्चत्थिका वदेय्युं, तं न हि होतीति सम्बन्धो । अनपगतन्ति कारणतो अनपेतं, सकारणन्ति वुत्तं होति ।

उसूयायाति इमिना दोसागतिगमनस्स सङ्गहितत्ता “अगतिगमनेना”ति अवसेसअगतिगमनं दस्सितन्ति वेदितब्बं । अट्ठहि दूतङ्गेहीति “सोता च होति सावेता च उग्गहेता च धारेता च विज्जापेता च कुसलो च सहितासहितदस्सनो च अकलहकारको चा”ति एवं वुत्तेहि अट्ठहि दूतङ्गेहि । सेसमेत्थ पाळितो अट्ठकथातो च सुविज्जेय्यमेव ।

कोसम्बककखन्धकवण्णना निट्ठिता ।

इति समन्तपासादिकाय विनयट्ठकथाय सारत्थदीपनियं

महावग्गवण्णना निट्ठिता ।

॥ नमो तस्स भगवतो अरहतो सम्मासम्बुद्धस्स ॥

## चूळवग्ग-टीका



## १. कम्मखन्धकं

### तज्जनीयकम्मकथावण्णना

१. चूळवग्गस्स पठमे कम्मखन्धके ताव “यद्धिं पवेसय, कुन्ते पवेसया”ति आदीसु विय सहचरणजायेन “मज्जा उक्कुट्ठिं करोन्ती”ति आदीसु विय निस्सितेसु निस्सयवोहारवसेन वा पण्डुकलोहितकनिस्सिता पण्डुकलोहितकसद्देन वुत्ताति आह “तेसं निस्सितकापि पण्डुकलोहितकात्वेव पज्जायन्ती”ति। पटिवदथाति पटिवचनं देथ।

### अधम्मकम्मद्वादसककथावण्णना

४. तीहि अङ्गेहि समन्नागतन्ति पच्चेकं समुदितेहि वा तीहि अङ्गेहि समन्नागतं। न हि तिण्णं एव अङ्गानं समोधानेन अधम्मकम्मं होति, एकेनपि होतियेव। “अप्पटिज्जाय कतं होतीति लज्जिं सन्धाय वुत्त”न्ति गण्ठपदेसु कथितं।

ननु च “अदेसनागामिनिया आपत्तिया कतं होती”ति इदं परतो “तीहि, भिक्खवे, अङ्गेहि समन्नागतस्स भिक्खुनो आकङ्खमानो सङ्खो तज्जनीयकम्मं करेय्य, अधिसीले सीलविपन्नो होती”ति इमिना विरुज्झति। अदेसनागामिनिं आपन्नो हि “अधिसीले सीलविपन्नो”ति वुच्चतीति? तत्थ केचि वदन्ति “तज्जनीयकम्मस्स हि विसेसेन भण्डनकारकत्तं अङ्ग”न्ति अट्टकथायं वुत्तं, तं पाळिया आगतनिदानेन समेति, तस्मा सब्बतिकेसुपि भण्डनं आरोपेत्वा भण्डनपच्चया आपन्नापत्तिवसेन इदं कम्मं कातब्बं। तस्मा ‘अधिसीले सीलविपन्नो’ति एत्थापि पुब्बभागे वा परभागे वा चोदनासारणादिकाले भण्डनपच्चया आपन्नापत्तिवसेनेव कातब्बं, न केवलं सङ्खादिसेसपच्चया कातब्बं”न्ति। अपरे पन वदन्ति “अदेसनागामिनियाति इदं पाराजिकापत्तियेव सन्धाय वुत्तं, न सङ्खादिसेसं। अट्टकथायं पन ‘अदेसनागामिनियाति पाराजिकापत्तिया वा सङ्खादिसेसापत्तिया वा’ति वुत्तं। तत्थ सङ्खादिसेसापत्तिया वाति अत्युद्धारवसेन वुत्तं, ‘अधिसीले सीलविपन्नो’ति च इदं सङ्खादिसेसंयेव सन्धाय वुत्तं, न पाराजिकं। तस्मा पाराजिकापत्तिपच्चया न तज्जनीयकम्मं कातब्बं पयोजनाभावा, सङ्खादिसेसपच्चया कातब्बन्ति अयमत्थो सिद्धो होति। सुक्कपक्खे ‘देसनागामिनिया आपत्तिया कतं होती’ति इमिना विरुज्झतीति चे? न एकेन परियायेन सङ्खादिसेसस्सपि देसनागामिनीवोहारसम्भवतो”ति, तं युत्तं विय दिस्सति।

### नप्पटिप्पस्सम्भेतब्बअट्टारसककथावण्णना

८. लोमं पातेन्तीति आदि सम्मावत्तनाय परियायवचनं।

### नियस्सकम्मकथावण्णना

११. नियस्सकम्मे “निस्साय ते वत्थब्बन्ति गरुनिस्सयं सन्धाय वुत्तं, न इतर”न्ति केनचि लिखितं। गण्ठपदे पन “नियस्सकम्मं यस्मा बालवसेन करीयति, तस्मा निस्साय वत्थब्बन्ति निस्सयं गाहापेतब्बो”ति वुत्तं, वीमंसित्वा युत्ततरं गहेतब्बं। अपिस्सूति एत्थ सुइति निपातमत्तं, भिक्खू अपि निच्चब्बावटा होन्तीति वुत्तं होति।

### पब्बाजनीयकम्मकथावण्णना

२९. पब्बाजनीयकम्मे तेन हि, भिक्खवे, सङ्गो पब्बाजनीयकम् पटिप्पस्सम्भेतूति इदं तेसु विब्भमन्तेसुपि पक्कमन्तेसुपि सम्मावत्तन्तेयेव सन्धाय वुत्तं ।

### पटिसारणीयकम्मकथावण्णना

३३. सुधम्मवत्थुस्मिं मच्छिकासण्डेति एवंनामके नगरे । तत्थ किर (ध० प० अट्ठ० १.७२ चित्तगहपतिवत्थु) चित्तो गहपति पञ्चवगियानं अब्भन्तरं महानामत्थेरं पिण्डाय चरमानं दिस्वा तस्स इरियापथे पसीदित्वा पत्तं आदाय गेहं पवेसेत्वा भोजेत्वा भत्तकिच्चावसाने धम्मकथं सुणन्तो सोतापत्तिफलं पत्वा अचलसद्दो हुत्वा अम्बाटकवनं नाम अत्तनो उय्यानं सङ्गारामं कातुकामो थेरस्स हत्थे उदकं पातेत्वा निय्यातेसि । तस्मिं खणे “पतिट्ठितं बुद्धसासन”न्ति उदकपरियन्तं कत्वा महापथवी कम्पि, महासेट्ठि उय्याने महाविहारं कारेसि । तत्थायं सुधम्मो भिक्खु आवासिको अहोसि । तं सन्धाय वुत्तं “आयस्मा सुधम्मो मच्छिकासण्डे चित्तस्स गहपतिनो आवासिको होती”तिआदि । तत्थ धुवभत्तिकोति निच्चभत्तिको ।

अपरेन समयेन चित्तस्स गुणकथं सुत्वा भिक्खुसहस्सेन सद्धिं द्वे अगगसावका तस्स सङ्गहं कत्तुकामा मच्छिकासण्डं अगमंसु । तं सन्धाय वुत्तं “तेन खो पन समयेन सम्बहुला थेरा”तिआदि । चित्तो गहपति तेसं आगमनं सुत्वा अद्ध्ययोजनमत्तं पच्चुगन्त्वा ते आदाय अत्तनो विहारं पवेसेत्वा आगन्तुकवत्तं कत्वा “भन्ते, थोकं धम्मकथं सोतुकामोम्ही”ति धम्मसेनापत्तिं याचि । अथ नं थेरो “उपासक, अद्धानेनाम्हा किलन्तरूपा, अपिच थोकं सुणाही”ति तस्स धम्मकथं कथेसि । तेन वुत्तं “एकमन्तं निसिन्नं खो चित्तं गहपतिं आयस्मा सारिपुत्तो धम्मिया कथाय सन्दस्सेसी”तिआदि । सो थेरस्स धम्मकथं सुणन्तोव अनागामिफलं पापुणि ।

४१. नासक्खि चित्तं गहपतिं खमापेतुन्ति सो तत्थ गन्त्वा “गहपति, मय्हमेव सो दोसो, खमाहि मे”ति वत्वापि “नाहं खमामी”ति तेन पटिक्खित्तो मङ्कुभूतो तं खमापेतुं नासक्खि । पुनदेव सत्थु सन्तिकं पच्चागमासि । सत्था “नास्स उपासको खमिस्सती”ति जानन्तोपि “मानथद्दो एस तिसयोजनं गन्त्वाव पच्चागच्छतू”ति खमनुपायं अनाचिक्खित्वाव उय्योजेसि । अथस्स पुन आगतकाले निहतमानस्स अनुदूतं दत्वा “गच्छ, इमिना सद्धिं गन्त्वा उपासकं खमापेही”ति वत्वा “समणेन नाम मय्हं विहारो, मय्हं निवासट्ठानं, मय्हं उपासको, मय्हं उपासिका”ति मानं वा इस्सं वा कातुं न वट्ठति । एवं करोन्तस्स हि इच्छामानादयो किलेसा वट्ठन्ती”ति ओवदन्तो —

“असन्तं भावनमिच्छेय्य, पुरेक्खारज्ज भिक्खुसु ।

आवासेसु च इस्सरियं, पूजा परकुलेसु च ॥

“ममेव कत मज्जन्तु, गिही पब्बजिता उभो ।

ममेवातिवसा अस्सु, किच्चाकिच्चेसु किस्मिचि ।

इति बालस्स सङ्कप्पो, इच्छा मानो च वट्ठती”ति ॥ (ध० प० ७३-७४) —

धम्मपदे इमा गाथा अभसि ।

सुधम्मत्थेरोपि इमं ओवादं सुत्वा सत्थारं वन्दित्वा उट्ठायासना पदक्खिणं कत्वा तेन अनुदूतेन भिक्खुना सद्धिं गन्त्वा उपासकस्स चक्खुपथे आपत्तिं पटिकरित्वा उपासकं खमापेसि । सो उपासकेन “खमामहं भन्ते, सचे मय्हं दोसो अत्थि,

खमथ मे”ति पटिखमापितो सत्थारा दिन्नओवादे ठत्वा कतिपाहेनेव सह पटिसम्भिदाहि अरहत्तं पापुणि ।

### आपत्तिया अदस्सने उक्खेपनीयकम्मकथावण्णना

५०. तस्सा अदस्सनेयेव कम्मं कातब्बन्ति तस्सा अदस्सनेयेव उक्खेपनीयकम्मं कातब्बं । तज्जनीयादिकम्मं पन आपत्तिं आरोपेत्वा तस्सा अदस्सने अप्पटिकम्मे वा भण्डनकारकादिअङ्गेहि कातब्बं । सेसमेत्थ उत्तानमेव ।

कम्मक्खन्धकवण्णना निट्ठिता ।

## २. पारिवासिकक्खन्धकं

### पारिवासिकवत्तकथावण्णना

७५. पारिवासिकक्खन्धके नवकतरं पारिवासिकन्ति अत्तनो नवकतरं पारिवासिकं । पारिवासिकस्स हि अत्तनो नवकतरं पारिवासिकं ठपेत्वा अज्जे मूलायपटिकस्सनारहमानत्तारहमानत्तचारिकअब्भानारहापि पकतत्तट्टानेयेव तिट्ठन्ति । तेनाह “अन्तमसो मूलायपअकस्सनारहादीनम्पी”ति । पादे घंसेन्ति एतेनाति पादघंसनं, सक्खरकथलादि । “अनुजानामि, भिक्खवे, तिस्सो पादघंसनियो सक्खरं कथलं समुद्वेणक”न्ति (चूळव० २६९) हि वुत्तं । सद्धिविहारिकादीनम्पि सादियन्तस्साति सद्धिविहारिकानम्पि अभिवादनादिं सादियन्तस्स । “मा मं गामप्पवेसनं आपुच्छथा”ति वुत्ते अनापुच्छापि गामं पविसितुं वट्ठति । यो यो वुट्ठोति पारिवासिकेसु भिक्खूसु यो यो वुट्ठो । नवकतरस्स सादितुन्ति पारिवासिकनवकतरस्स अभिवादनादिं सादितुं ।

तत्थेवाति सङ्गनवकट्टानेयेव । अत्तनो पाळिया पवारेतब्बन्ति अत्तनो वस्सग्गेन पत्तपाळिया पवारेतब्बं, न पन सब्बेसु पवारितेसूति अत्थो । यदि पन न गण्हाति न विस्सज्जेतीति यदि पुरिमदिवसे अत्तनो न गण्हाति गहेत्वा च न विस्सज्जेति । चतुस्सालभत्तन्ति भोजनसालायं पटिपाटिया दिव्यमानभत्तं । हत्थपासे ठितेनाति दायकस्स हत्थपासे ठितेन ।

७६. अज्जो सामणेरो न गहेतब्बोति उपज्झायेन हुत्वा अज्जो सामणेरो न गहेतब्बो । उपज्झं दत्त्वा गहितसामणेरापीति पकतत्तकाले उपज्झं दत्त्वा गहितसामणेरापि । लद्धसम्मतिकेन आणत्तोपि गरुधम्मेहि अज्जेहि वा ओवदितुं लभतीति आह “पटिबलस्स वा भिक्खुस्स भारो कातब्बो”ति । आगता भिक्खुनियो वत्तब्बाति सम्बन्धो । सवचनीयन्ति सदोसं । जेडुकट्टानं न कातब्बन्ति पधानट्टानं न कातब्बं । किं तन्ति आह “पातिमोक्खुद्देसकेन वा”तिआदि ।

रजेहि हता उपहता भूमि एतिस्साति रजोहतभूमि, रजोकिण्णभूमीति अत्थो । पच्चयन्ति वस्सावासिकलाभं सन्धाय वुत्तं । एकपस्से ठत्वाति पाळिं विहाय भिक्खूनं पच्छतो ठत्वा । सेनासनं न लभतीति सेय्यापरियन्तभागिताय वस्सग्गेन गण्हितुं न लभति । अस्साति भवेय्य । “आगन्तुकेन आरोचेतब्बं, आगन्तुकस्स आरोचेतब्बं”न्ति अविसेसेन वुत्तत्ता सचे द्वे पारिवासिका गतट्टाने अज्जमज्जं पस्सन्ति, उभोहिपि अज्जमज्जस्स आरोचेतब्बं । यथा बहि दिस्वा आरोचितस्स भिक्खुनो विहारं आगते पुन आरोचनकिच्चं नत्थि, एवं अज्जं विहारं गतेनपि तत्थ पुब्बे आरोचितस्स पुन आरोचनकिच्चं नत्थीति वदन्ति ।

८१. अविसेसेनाति पारिवासिकस्स उक्खित्तकस्स च अविसेसेन । ओबद्धन्ति पलिबुद्धं ।

८३. सहवासोति वुत्तप्पकारे छन्ने पकतत्तेन भिक्खुना सद्धिं सयनमेव अधिप्पेतं, न सेसइरियापथकप्पनं । सेसमेत्थ सुविज्जेय्यमेव ।

पारिवासिकक्खन्धकवण्णना निट्ठिता ।

### ३. समुच्चयक्खन्धकं

सुक्कविस्सट्ठिकथावण्णना

९७. समुच्चयक्खन्धके वुत्तनयेन वत्तं समादातब्बन्ति पारिवासिकक्खन्धकवण्णनायं वुत्तनयेन द्वीहि पदेहि एकेन वा समादातब्बं । वेदियामीति चित्तेन सम्पटिच्छित्वा सुखं अनुभवामि, न तप्पच्चया अहं दुक्खित्तोति अधिप्पायो । वुत्तनयेनेव सङ्गमज्जे निक्खिपितब्बन्ति पारिवासिकक्खन्धके वुत्तनयेन “मानत्तं निक्खिपामि, वत्तं निक्खिपामी”ति इमेहि द्वीहि एकेन वा निक्खिपितब्बं । तस्स आरोचेत्वा निक्खिपितब्बन्ति अनारोचनेन वत्तभेददुक्कटपरिमोचनत्थं वुत्तं । द्वे लेड्डुपाते अतिक्कमित्वाति भिक्खून् सङ्गायनसद्वसनूपचारविजहनत्थं वुत्तं, महामग्गतो ओक्कम्माति मग्गप्पटिपन्नभिक्खून् उपचारविजहनत्थं, गुम्बेन वा वतिया वा पटिच्छन्नट्टानेति दस्सनूपचारविजहनत्थं । अनिक्खित्तवत्तेन अन्तोउपचारगतानं सब्बेसम्पि आरोचेतब्बत्ता “अयं निक्खित्तवत्तस्स परिहारो”ति वुत्तं । तत्थ निक्खित्तवत्तस्साति वत्तं निक्खिपित्वा परिवसन्तस्साति अत्थो । अयं पनेत्थ थेरस्स अधिप्पायो — वत्तं निक्खिपित्वा परिवसन्तस्स उपचारगतानं सब्बेसं आरोचनकिच्चं नत्थि, दिट्ठरूपानं सुतसद्धानं आरोचेतब्बं, अदिट्ठअसुतानम्पि अन्तोद्वादसहत्थगतानं आरोचेतब्बं । इदं वत्तं निक्खिपित्वा परिवसन्तस्स लक्खणन्ति ।

परिवासकथावण्णना

१०२. “सतियेव अन्तराये अन्तरायिकसज्जी छादेति, अच्छन्ना होति । अन्तरायिकस्स पन अनन्तरायिकसज्जाय छादयतो अच्छन्नावा”तिपि पाठो । अवेरीति हितकामो । उद्धस्ते अरुणेति उड्डिते अरुणे । सुद्धस्स सन्तिकेति सभागसङ्गादिसेसं अनापन्नस्स सन्तिके । वत्थुन्ति असुचिमोचनादिवीतिक्कमं ।

सुक्कविस्सट्ठीति वत्थु चेव गोत्तज्चाति सुक्कविस्सट्ठीति इदं असुचिमोचनलक्खणस्स वीतिक्कमस्स पकासनतो वत्थु चेव होति, सजातियसाधारणविजातियविनिवत्तसभावाय सुक्कविस्सट्ठिया एव पकासनतो गोत्तज्च होतीति अत्थो । गं तायतीति हि गोत्तं । सङ्गादिसेसोति नामज्जेव आपत्ति चाति सङ्गादिसेसोति तेन तेन वीतिक्कमेन आपन्नस्स आपत्तिनिकायस्स नामप्पकासनतो नामज्जेव होति आपत्तिसभागत्ता आपत्ति च ।

तदनुरूपं कम्मवाचं कत्वा मानत्तं दातब्बन्ति —

“सुणातु मे, भन्ते, सङ्गो, अयं इत्थन्नामो भिक्खु एकं आपत्तिं आपज्जि सज्चेतनिकं सुक्कविस्सट्ठिं एकाहपटिच्छन्नं, सो सङ्गं एकस्सा आपत्तिया सज्चेतनिकाय सुक्कविस्सट्ठिया एकाहपटिच्छन्नाय एकाहपरिवासं याचि । सङ्गो इत्थन्नामस्स भिक्खुनो एकस्सा आपत्तिया सज्चेतनिकाय सुक्कविस्सट्ठिया एकाहपटिच्छन्नाय

एकाहपरिवासं अदासि । सो परिवुत्थपरिवासो । अयं इत्थन्नामो भिक्खु एकं आपत्तिं आपज्जि सञ्चेतनिकं सुक्कविस्सट्ठिं अप्पटिच्छन्नं, सो सङ्गं तासं आपत्तीनं सञ्चेतनिकानं सुक्कविस्सट्ठीनं पटिच्छन्नाय च अप्पटिच्छन्नाय च छारत्तं मानत्तं याचति । यदि सङ्गो इत्थन्नामस्स भिक्खुनो द्विन्नं आपत्तीनं सञ्चेतनिकानं सुक्कविस्सट्ठीनं पटिच्छन्नाय च अप्पटिच्छन्नाय च छारत्तं मानत्तं ददेय्य, एसा जत्ति ।

सुणातु मे, भन्ते...पे०... सो परिवुत्थपरिवासो । अयं इत्थन्नामो भिक्खु एकं आपत्तिं आपज्जि सञ्चेतनिकं सुक्कविस्सट्ठिं अप्पटिच्छन्नं, सो सङ्गं तासं...पे०... याचति । सङ्गो इत्थन्नामस्स भिक्खुनो द्विन्नं आपत्तीनं सञ्चेतनिकानं सुक्कविस्सट्ठीनं पटिच्छन्नाय च अप्पटिच्छन्नाय च छारत्तं मानत्तं देति । यस्सायस्मतो खमति इत्थन्नामस्स भिक्खुनो द्विन्नं आपत्तीनं सञ्चेतनिकानं सुक्कविस्सट्ठीनं पटिच्छन्नाय च अप्पटिच्छन्नाय च छारत्तं मानत्तस्स दानं, सो तुण्हस्स । यस्स नखमति, सो भासेय्य ।

दुतियम्पि एतमत्थं वदामि...पे०... ततियम्पि एतमत्थं वदामि...पे०...

दिन्नं सङ्गेन इत्थन्नामस्स भिक्खुनो द्विन्नं आपत्तीनं सञ्चेतनिकानं सुक्कविस्सट्ठीनं पटिच्छन्नाय च अप्पटिच्छन्नाय च छारत्तं मानत्तं, खमति सङ्गस्स, तस्मा तुण्ही । एवमेतं धारयामीति —

एवं कम्मवाचं कत्वा मानत्तं दातब्बं । चिण्णमानत्तस्स च इमिनाव नयेन कम्मवाचं योजेत्वा अब्भानं कातब्बं ।

**अञ्जस्मिन्ति** सुद्धन्तपरिवासवसेन आपत्तिवुट्ठानतो अञ्जस्मिं । दससतं आपत्तियो रत्तिसतं छादयित्वाति योजेत्तब्बं ।

परिवासकथावण्णना निड्ढिता ।

**अत्तनो सीमं सोधेत्वा विहारसीमायाति** विहारे बद्धसीममेव सन्धाय वुत्तं । **विहारूपचारतोपि द्वे लेड्डुपाता अतिक्कमितब्बाति** भिक्खुविहारं सन्धाय वदति गामूपचारातिक्कमेनेव भिक्खुनीविहारूपचारातिक्कमस्स सिद्धत्ता । **विहारस्स चाति** भिक्खुविहारस्स । **गामस्साति न वुत्तन्ति** गामस्स उपचारं मुञ्चितुं वट्ठतीति न वुत्तं, तस्मा गामूपचारेपि वट्ठतीति अधिप्पायो ।

**तत्थेव ठानं पच्चासीसन्तीति** भिक्खूनं ठानं पच्चासीसन्ति । **परिवासवत्तादीनन्ति** परिवासनिस्सयपटिप्पस्सद्धिआदीनं । **युत्ततरं दिस्सतीति** इमिना अनिक्खित्तवत्तभिक्खुना विय भिक्खुनियापि अन्तोउपचारसीमगतानंयेव आरोचेत्तब्बं, न गामे ठितानम्पि गन्त्वा आरोचेत्तब्बन्ति दीपेति । **तस्मिं गामेति** यस्मिं गामे भिक्खुनुपस्सयो होति, तस्मिं गामे । **बहि उपचारसीमाय ठत्वाति** उपचारसीमतो बहि ठत्वा । **सम्मन्नित्वा दातब्बाति** एत्थ सम्मन्नित्वा दिन्नाय सहवासेपि रत्तिच्छेदो न होति ।

**पटिच्छन्नपरिवासकथावण्णना**

**१०८. विसुं मानत्तं चरितब्बन्ति** मूलायपटिकस्सनं अकत्वा विसुं कम्मवाचाय मानत्तं गहेत्वा चरितब्बं ।

सुक्कविस्सट्ठिकथावण्णना निड्ढिता ।

### अग्निसमोधानपरिवासकथावण्णना

१३४. एकापत्तिमूलकन्ति “एका आपत्ति एकाहप्पटिच्छन्ना, एका आपत्ति द्वीहप्पटिच्छन्ना”तिआदिना वुत्तनयं सन्धाय वदति। आपत्तिवड्डनकन्ति “एका आपत्ति एकाहप्पटिच्छन्ना, द्वे आपत्तियो द्वीहप्पटिच्छन्ना”तिआदिना वुत्तं आपत्तिवड्डनकनयं सन्धाय।

### द्वेभिक्खुवारएकादसकादिकथावण्णना

१८१. थुल्लच्चयादीहि मिस्सकन्ति एकवत्थुम्हि पुब्बभागे आपन्नथुल्लच्चयदुक्कटेहि मिस्सकं। मक्खधम्मो नाम छादेतुकामता।

१८२. सम्बहुला सङ्गादिसेसा आपत्तियो आपज्जति परिमाणम्पीतिआदि जातिवसेनेकवचनं, भावनपुंसकनिद्देशो वा। सेसमेत्थ पाळितो अट्ठकथातो च सुविज्जेय्यमेव।

समुच्चयक्खन्धकवण्णना निट्ठिता।

## ४. समथक्खन्धकं

### सम्मुखाविनयकथावण्णना

१८७. समथक्खन्धके सज्जापेतीति एत्थ सं-सहूपपदो जा-सद्दो तोसनविसिट्ठे अवबोधने वत्ततीति आह “परितोसेत्वा जानापेती”ति।

### सतिविनयादिकथावण्णना

१९५-२००. देसनामत्तमेवेतन्ति “पञ्चिमानी”ति एतं देसनामत्तं। सतिवेपुल्लप्पत्तस्स खीणासवस्स दातब्बो विनयो सतिविनयो। अमूळहस्स दातब्बो विनयो अमूळहविनयो। पटिज्जातेन करणं पटिज्जातकरणं।

२१२. तिणवत्थारकसदिसत्ताति तंसदिसताय तब्बोहारोति दस्सेति यथा “एस ब्रह्मदत्तो”ति।

### अधिकरणकथावण्णना

२१६. विवादाधिकरणस्स किं मूलन्तिआदीसु विवादमूलानीति विवादस्स मूलानि। कोधनोति कुज्झनलक्खणेन कोधेन समन्नागतो। उपनाहीति वेरअप्पटिनिस्सगलक्खणेन उपनाहेन समन्नागतो। अगारवोति (दी० नि० अट्ठ० ३.३२३; म० नि० अट्ठ० ३.४४) गारवविरहितो। अप्पतिस्सोति अप्पतिस्सयो अनीचवुत्ति। एत्थ पन यो भिक्खु सत्थरि धरमाने तीसु कालेसु उपट्ठानं न याति, सत्थरि अनुपाहने चङ्कमन्ते सउपाहनो चङ्कमति, नीचे चङ्कमे चङ्कमन्ते उच्चे चङ्कमति, हेट्ठा वसन्ते उपरि वसति, सत्थु दस्सनट्ठाने उभो अंसे पारुपति, छत्तं धारेति, उपाहनं धारेति, नहायति, उच्चारं वा पस्सावं वा करोति, परिनिब्बुते वा पन चेतियं वन्दितुं न गच्छति, चेतियस्स पज्जायनट्ठाने सत्थुदस्सनट्ठाने वुत्तं सब्बं करोति, अज्जेहि च भिक्खूहि “कस्मा एवं करोसि, न इदं वट्ठति, सम्मासम्बुद्धस्स नाम लज्जितुं वट्ठती”ति वुत्ते “तुण्ही होहि, बुद्धो बुद्धोति

वदसि, किं बुद्धो नामा”ति भणति, अयं सत्थरि अगारवो नाम ।

यो पन धम्मसवने सङ्कुट्टे सक्कच्चं न गच्छति, सक्कच्चं धम्मं न सुणाति, निदायति वा सल्लपन्तो वा निसीदति, सक्कच्चं न गण्हाति न वार्चेति, “किं धम्मे अगारवं करोसी”ति वुत्ते “तुण्ही होहि, धम्मो धम्मोति वदसि, किं धम्मो नामा”ति वदति, अयं धम्मे अगारवो नाम । यो पन थरेन भिक्खुना अनज्झिद्धो धम्मं देसेति उद्दिसति पज्जं कथेति, वुट्ठे भिक्खू घट्टेन्तो गच्छति तिद्धति निसीदति, दुस्सपल्लत्थिकं वा हत्थपल्लत्थिकं वा करोति, सङ्घमज्जे उभो अंसे पारुपति, छत्तुपाहनं धारेति, “भिक्खुसङ्घस्स लज्जितुं वट्ठती”ति वुत्तेपि “तुण्ही होहि, सङ्घो सङ्घोति वदसि, किं सङ्घो, मिगसङ्घो अजसङ्घो”ति आदीनि वदति, अयं सङ्घे अगारवो नाम । एकभिक्खुस्मिम्पि हि अगारवे कते सङ्घे कतोयेव होति । तिस्सो सिक्खा पन अपूरयमानो सिक्खाय न परिपूरकारी नाम ।

**अहिताय दुक्खाय देवमनुस्सानन्ति** (दी० नि० अट्ठ० ३.३२५; म० नि० अट्ठ० ३.४२; अ० नि० अट्ठ० ३.६.३६) एकस्मिं विहारे द्विन्नं भिक्खूनं उप्पन्नविवादो कथं देवमनुस्सानं अहिताय दुक्खाय संवत्तति? कोसम्बकखन्धके विय हि द्वीसु भिक्खूसु विवादं आपन्नेसु तस्मिं विहारे तेसं अन्तेवासिका विवदन्ति, तेसं ओवादं गणहन्तो भिक्खुनिसङ्घो विवदति, ततो तेसं उपट्ठाका विवदन्ति, अथ मनुस्सानं आरक्खदेवता द्वे कोट्टासा होन्ति । तत्थ धम्मवादीनं आरक्खदेवता धम्मवादिनियो होन्ति, अधम्मवादीनं अधम्मवादिनियो । ततो आरक्खदेवतानं मित्ता भुम्मदेवता भिज्जन्ति । एवं परम्पराय याव ब्रह्मलोका ठपेत्वा अरियसावके सब्बे देवमनुस्सा द्वे कोट्टासा होन्ति । धम्मवादीहि पन अधम्मवादिनोव बहुतरा होन्ति । ततो “यं बहुकेहि गहितं, तं तच्छ”न्ति धम्मं विस्सज्जेत्वा बहुतरा अधम्मं गणहन्ति । ते अधम्मं पुरक्खत्वा विहरन्ता अपायेसु निब्बत्तन्ति । एवं एकस्मिं विहारे द्विन्नं भिक्खूनं उप्पन्नो विवादो बहूनं अहिताय दुक्खाय होति । **अज्झत्तं वाति** अत्तनि वा अत्तनो परिसाय वा । **बहिद्धा वाति** परस्मिं वा परस्स परिसाय वा । **आयतिं अनवस्सवायाति** आयतिं अनुप्पादाय ।

**मक्खीति** परेसं गुणमक्खनलक्खणेन मक्खेन समन्नागतो । **पळासीति** युगग्गाहलक्खणेन पळासेन समन्नागतो । **इस्सुकीति** परसक्कारादीनं इस्सायनलक्खणाय इस्साय समन्नागतो । **मच्छरीति** आवासमच्छरियादीहि समन्नागतो । **सठोति** केराटिको । **मायावीति** कतपापपटिच्छादको । **पापिच्छोति** असन्तसम्भावनिच्छको दुस्सीलो । **मिच्छादिट्ठीति** नत्थिकवादी अहेतुकवादी अकिरियवादी । **सन्दिट्ठिपरामासीति** सयं दिट्ठमेव परामसति गण्हाति । **आधानग्गाहीति** दळ्ळग्गाही । **दुप्पटिनिस्सग्गीति** न सक्का होति गहितं निस्सज्जापेतुं । एत्थ च **कोधनो होति उपनाहीति** आदिना पुग्गलाधिद्धाननयेन कोधूपनाहादयो अकुसलधम्मा विवादमूलानीति दस्सितानि, तथा **दुट्ठचित्ता विवदन्तीति** आदिना लोभदोसमोहा । **अदुट्ठचित्ता विवदन्तीति** आदिना च अलोभादयो विवादमूलानीति दस्सितानि ।

**२१७. दुब्बण्णोति** पंसुपिसाचको विय झामखाणुवण्णो । **दुहस्सिकोति** विजातमातुयापि अमनापदस्सनो । **ओकोटिमकोति** लकुण्डको । **काणोति** एकक्खिकाणो वा उभयक्खिकाणो वा । **कुणीति** एकहत्थकुणी वा उभयहत्थकुणी वा । **खज्जोति** एकपादखज्जो वा उभयपादखज्जो वा । **पक्खहतोति** हतपक्खो पीठसप्पी ।

**२२०. विवादाधिकरणं कुसलं अकुसलं अब्याकतन्ति** विवादाधिकरणं किं कुसलं अकुसलं उदाहु अब्याकतन्ति पुच्छति । **विवादाधिकरणं सिया कुसलन्ति** आदि विस्सज्जनं । एस नयो सेसेसुपि । विवदन्ति एतेनाति **विवादोति** आह “येन विवदन्ति, सो चित्तुप्पादो विवादो”ति । कथं पन सो चित्तुप्पादो अधिकरणं नामाति आह “समथेहि च अधिकरणीयताय अधिकरण”न्ति, समथेहि समेतब्बताय अधिकरणन्ति अत्थो । विवादहेतुभूतस्स हि चित्तुप्पादस्स

वूपसमेन तप्पभवस्स सदस्सपि वूपसमो होतीति चित्तुप्पादस्स समथेहि अधिकरणीयता परियायो सम्भवति ।

२२२. आपत्ताधिकरणं सिया अकुसलं सिया अब्याकतन्ति अयं विकप्पो पज्जत्तिवज्जयेव सन्धाय वुत्तो, न लोकवज्जन्ति दस्सेतुं “सन्धायभासितवसेना”तिआदिमाह । कस्मा पनेत्थ सन्धायभासितवसेन अत्थो वेदितब्बोति आह “यस्मिं ही”तिआदि । पथवीखणनादिकेति एत्थ आदि-सद्देन भूतगामपातब्यतादिपज्जत्तिवज्जं सिक्खापदं सङ्गहति । यो विनये अपकतज्जुताय वत्तसीसेन सम्मुज्जनिआदिना पथवीखणनादीनि करोति, तदा तस्सुप्पन्नचित्तं सन्धाय वुत्तं “कुसलचित्तं अङ्गं होती”ति । अङ्गं होतीति च वत्तसीसेन करोन्तस्सपि “इमं पथविं खणामी”तिआदिना वीतिक्कमजाननवसेन पवत्तत्ता तं कुसलचित्तं आपत्ताधिकरणं, कुसलचित्तं आपत्तिया कारणं होतीति अत्थो । न हि वीतिक्कमं अजानन्तस्स पथवीखणनादीसु आपत्ति सम्भवति । तस्मिं सतीति तस्मिं कुसलचित्ते आपत्तिभावेन गहिते सतीति अधिप्पायो । तस्माति यस्मा कुसलचित्ते आपत्तिभावेन गहिते सति “नत्थि आपत्ताधिकरणं कुसल”न्ति न सक्का वत्तुं, तस्मा । नयिदं अङ्गप्पहोनेकचित्तं सन्धाय वुत्तन्ति “आपत्ताधिकरणं सिया अकुसलं सिया अब्याकतं, नत्थि आपत्ताधिकरणं कुसल”न्ति इदं आपत्तिसमुद्गापकभावेन अङ्गप्पहोनेकं आपत्तिया कारणभूतं चित्तं सन्धाय न वुत्तं । किं पन सन्धाय वुत्तन्ति आह “इदं पना”तिआदि । भिक्खुहि कम्मट्ठानगतचित्तेन निपन्ने निद्वायन्ते वा मातुगामो चे सेय्यं कप्पेति, तस्मिं खणे सेय्याकारेण वत्तमानरूपमेव आपत्ति, न कुसलादिवसप्पवत्तं चित्तन्ति आह “असज्जिच्च... पे०... सहसेय्यादिवसेन आपज्जतो (परि० ३२३ अत्थतो समानं) अब्याकतं होती”ति । तस्मिं हि खणे उद्घातब्बे जाते अनुद्धानतो तदाकारपवत्तो रूपक्खन्धोव आपत्ति ।

“आपत्तिं आपज्जन्तो कुसलचित्तो वा आपज्जति अकुसलाब्याकतचित्तो वा”ति वचनतो कुसलम्पि आपत्ताधिकरणं सियाति चे? न । यो हि आपत्तिं आपज्जतीति वुच्चति, सो तीसु चित्तेसु अज्जतरचित्तसमङ्गी हुत्वा आपज्जति, न अज्जथाति दस्सनत्थं “कुसलचित्तो वा”तिआदि वुत्तं । अयञ्हेत्थ अत्थो — पथवीखणनादीसु कुसलचित्तक्खणे वीतिक्कमादिवसेन पवत्तरूपसम्भवतो कुसलचित्तो वा तथापवत्तरूपसङ्घातं अब्याकतापत्तिं आपज्जति, तथा अब्याकतचित्तो वा अब्याकतरूपसङ्घातं अब्याकतापत्तिं आपज्जति । पाणातिपातादिं अकुसलचित्तो वा अकुसलापत्तिं आपज्जति, रूपं पनेत्थ अब्बोहारिकं । सुपिनन्ते च पाणातिपातादिं करोन्तो सहसेय्यादिवसेन आपज्जितब्बापत्तिं आपज्जन्तो अकुसलचित्तो अब्याकतापत्तिं आपज्जतीति ।

कुसलचित्तं आपज्जेय्याति एळकलोमं गहेत्वा कम्मट्ठानमनसिकारेण तियोजनं अतिक्कमन्तस्स पज्जत्तिं अजानित्वा पदसो धम्मं वाचेन्तस्स च आपज्जितब्बापत्तिया कुसलचित्तं आपज्जेय्य । न च तत्थ विज्जमानम्पि कुसलचित्तं आपत्तिया अङ्गन्ति तस्मिं विज्जमानम्पि कुसलचित्तं आपत्तिया अङ्गं न होति, सयं आपत्ति न होतीति अत्थो । चलितप्पवत्तानन्ति चलितानं पवत्तानज्ज । चलितो कायो, पवत्ता वाचा । अज्जतरमेव अङ्गन्ति कायवाचानं अज्जतरमेव आपत्तीति अत्थो । तज्ज रूपक्खन्धपरियापन्नत्ता अब्याकतन्ति इमिना अब्याकतमापत्ताधिकरणं, नाज्जन्ति दस्सेति ।

यदि एवं “सापत्तिकस्स, भिक्खवे, निरयं वा वदामि तिरच्छानयोनिं वा”ति वचनतो अब्याकतस्सपि विपाकधम्मता आपज्जेय्याति? नापज्जेय्य । असज्जिच्च आपन्ना हि आपत्तियो याव सो न जानाति, ताव अनन्तरायकरा, जानित्वा छादेन्तो पन छादनप्पच्चया अज्जं दुक्कटसङ्घातं अकुसलमापत्ताधिकरणमापज्जति, तज्ज अकुसलसभावत्ता सग्गमोक्खानं अन्तरायकरणन्ति सापत्तिकस्स अपायगामिता वुत्ता । अब्याकतं पन आपत्ताधिकरणं अविपाकधम्ममेवाति निट्टमेत्थ गन्तब्बं । तेनेव पोराणगण्ठपदेसुपि “पुथुज्जनो कल्याणपुथुज्जनो सेक्खो अरहाति चत्तारो पुग्गले दस्सेत्वा तेसु



अरहतो आपत्ताधिकरणं अब्याकतमेव, तथा सेक्खानं, तथा कल्याणपुथुज्जनस्स असञ्चिच्च वीतिक्कमकाले अब्याकतमेव । इतरस्स अकुसलम्पि होति अब्याकतम्पि । यस्मा चस्स सञ्चिच्च वीतिक्कमकाले अकुसलमेव होति, तस्मा वुत्तं ‘नत्थि आपत्ताधिकरणं कुसल’न्ति । सब्बत्थ एवं अब्याकतन्ति विपाकाभावमत्तं सन्धाय वुत्तं’न्ति लिखितं । यच्च आपत्ताधिकरणं अकुसलं, तम्पि देसितं वुट्ठितं वा अनन्तरायकरं । यथा हि अरियूपवादकम्मं अकुसलम्पि समानं अच्चयं देसेत्वा खमापनेन पयोगसम्पत्तिपटिबाहितत्ता अविपाकधम्मत्तं आपन्नं अहोसिकम्मं होति, एवमिदम्पि देसितं वुट्ठितं वा पयोगसम्पत्तिपटिबाहितत्ता अविपाकधम्मताय अहोसिकम्मभावेन अनन्तरायकरं जातं । तेनेव “सापत्तिकस्स, भिक्खवे, निरयं वा वदामि तिरच्छानयोनिं वा”ति सापत्तिकस्सेव अपायगामिता वुत्ता ।

### अधिकरणवूपसमनसमथकथावण्णना

२२८. विवादसङ्घाते अत्थे पच्चत्थिका अत्थपच्चत्थिका ।

२२९. सम्मुखाविनयस्मिन्ति सम्मुखाविनयभावे ।

२३०. अन्तरेनाति कारणेन ।

२३१. उब्बाहिकाय खीयनके पाचिन्ति न वुत्ता तत्थ छन्ददानस्स नत्थिताय ।

२३६. तस्स खो तन्ति एत्थ खो तन्ति निपातमत्तं ।

२३८. “का च तत्थ तस्सपापियसिकाया”ति पोत्थकेसु लिखन्ति । “का च तस्सपापियसिका”ति एवं पनेत्थ पाठो वेदितब्बो ।

२४२. किच्चाधिकरणं एकेन समथेन सम्मतीति एत्थ “किच्चमेव किच्चाधिकरण”न्ति (पारा० अट्ठ० २.३८५-८६) वचनतो अपलोकनकम्मादीनमेतं अधिवचनं । तं विवादाधिकरणादीनि विय समथेहि समेतब्बं न होति, किन्तु सम्मुखाविनयेन सम्पज्जति, तस्मा सम्मतीति एत्थ सम्पज्जतीति अत्थो गहेतब्बो । सेसमेत्थ सुविज्जेय्यमेव ।

समथक्खन्धकवण्णना निट्ठिता ।

## ५. खुद्दकवत्थुक्खन्धकं

### खुद्दकवत्थुकथावण्णना

२४३. खुद्दकवत्थुक्खन्धके अट्ठपदाकारेनाति अट्ठपदफलकाकारेन, जूतफलकसदिसन्ति वुत्तं होति । मल्लकमूलसण्ठानेनाति खेळमल्लकमूलसण्ठानेन ।

२४५. मुत्तोलम्बकादीनन्ति आदि-सद्देन कुण्डलादिं सङ्गण्हाति । पलम्बकसुत्तन्ति यज्जोपचिताकारेन ओलम्बकसुत्तं ।

२४६. चिक्कलेनाति सिलेसेन ।

२४८. साधुगीतन्ति अनिच्चतादिपटिसंयुत्तगीतं ।

२४९. चतुरस्सेन वत्तेनाति परिपुण्णेन उच्चारणवत्तेन । तरङ्गवत्तादीनं उच्चारणविधानानि नटुप्पयोगानि ।

बाहिरलोमिन्ति भावनपुंसकनिदेसो, यथा तस्स उण्णपावारस्स बहिद्धा लोमानि दिस्सन्ति, तथा धारेन्तस्स दुक्कटन्ति वुत्तं होति ।

२५१. इमानि चत्तारि अहिराजकुलानीति (अ० नि० अट्ठ० २.४.६७) इदं दट्ठविसे सन्धाय वुत्तं । ये हि केचि दट्ठविसा, सब्बे ते इमेसं चतुन्नं अहिराजकुलानं अब्भन्तरगताव होन्ति । अत्तगुत्तियाति अत्तनो गुत्तत्थाय । अत्तरक्खायाति अत्तनो रक्खणत्थाय । अत्तपरित्तंकातुन्ति अत्तनो परित्ताणत्थाय अत्तपरित्तं नाम कातुं अनुजानामीति अत्थो ।

इदानीं यथा तं परित्तं कातब्बं, तं दस्सेतुं “एवञ्च पन भिक्खवे”ति आदिमाह । तत्थ (जा० अट्ठ० २.२.१०५) विरूपक्खेहीति विरूपक्खनागकुलेहि । सेसेसुपि एसेव नयो । सहयोगे चेत्तं करणवचनं, एतेहि सह मय्हं मित्तभावोति वुत्तं होति अपादकेहीति अपादकसत्तेहि । सेसेसुपि एसेव नयो । सब्बे सत्ताति इतो पुब्बे एत्तकेन ठानेन ओदिस्सकमेत्तं कथेत्वा इदानीं अनोदिस्सकमेत्तं कथेतुं इदमारब्धं । तत्थ सत्ता पाणा भूताति सब्बानेतानि पुग्गलवेवचनानेव । भद्रानि पस्सन्तूति भद्रानि आरम्मणानि पस्सन्तु । मा कञ्चि पापमागमाति कञ्चि सत्तं पापकं लामकं मा आगच्छतु ।

अप्पमाणो बुद्धोति एत्थ बुद्धोति बुद्धगुणा वेदितब्बा, ते हि अप्पमाणा नाम । सेसद्वयेसुपि एसेव नयो, पमाणवन्तानीति गुणप्पमाणेन युत्तानि । उण्णनाभीति लोमसनाभिको मक्कटको । सरबूति घरगोळिका । कता मे रक्खा कतं मे परित्तन्ति मया एत्तकस्स जनस्स रक्खा च परित्ताणञ्च कतं । पटिक्कमन्तु भूतानीति सब्बेपि मे कतपरित्ताणा सत्ता अपगच्छन्तु, मा मं विहेठयिंसूति अत्थो । सोहन्ति यस्स मम एतेहि सब्बेहिपि मेत्तं, सो अहं भगवतो नमो करोमि, विपस्सीआदीनञ्च सत्तन्नं सम्मासम्बुद्धानं नमो करोमीति सम्बन्धो ।

अञ्जम्हि छेतब्बम्हीति रागानुसयं सन्धाय वदति । तादिसं वा दुक्खन्ति मुट्ठिआदीहि दुक्खं उप्पादेन्तस्स ।

२५२. जालानि परिकिखपापेत्वाति परिस्सयमोचनत्थञ्चेव पमादेन गळितानं आभरणादीनं रक्खणत्थञ्च जालानि करण्डकाकारेन परिकिखपापेत्वा । चन्दनगण्ठि आगन्त्वा जाले लगाति एको किर रत्तचन्दनरुक्खो गङ्गाय उपरितीरे जातो गङ्गोदकेन धोतमूलो पतित्वा तत्थ तत्थ पासाणेसु सम्भिज्जमानो विप्पकिरि । ततो एका घटप्पमाणा घटिका पासाणेसु घंसियमाना उदकऊमीहि पोथियमाना मट्ठा हुत्वा अनुपुब्बेन वुय्हमाना सेवालपरियोनद्धा आगन्त्वा तस्मिं जाले लग्गि । तं सन्धायेतं वुत्तं । लेखन्ति लिखितगहितं चुण्णं । उट्ठित्वाति वेळुपरम्पराय उद्धं पापेत्वा, उट्ठापेत्वाति वुत्तं होति । ओहरतूति इद्धिया ओतारेत्वा गण्हतु ।

पूरणकस्सपादयो छ सत्थारो । तत्थ (दी० नि० अट्ठ० १.१५१-१५२; म० नि० अट्ठ० १.३१२) पूरणोति तस्स सत्थुपटिञ्जस्स नामं । कस्सपोति गोत्तं । सो किर अञ्जतरस्स कुलस्स एकूनदाससत्तं पूरयमानो जातो । तेनस्स “पूरणो”ति नामं अकंसु । मङ्गलदासत्ता चस्स कतं “दुक्कट”न्ति वत्ता नत्थि, अकतं वा “न कत”न्ति । सो “किमहं एत्थ वसामी”ति पलायि । अथस्स चोरा वत्थानि अच्छिन्दिंसु । सो पण्णेन वा तिणेन वा पटिच्छादेतुम्पि अजानन्तो जातरूपेनेव एकं गामं

पाविसि । मनुस्सा तं दिस्वा “अयं समणो अरहा अपिच्छो, नत्थि इमिना सदिसो”ति पूवभत्तादीनि गहेत्वा उपसङ्कमन्ति । सो “मय्हं साटकं अनिवत्थभावेन इदं उप्पन्न”न्ति ततो पट्टाय साटकं लभित्वापि न निवासेसि, तदेव पब्बज्जं अगगहेसि । तस्स सन्तिके अज्जेपि अज्जेपीति पज्जसता मनुस्सा पब्बजिसु । एवमयं गणाचरियो हुत्वा “सत्था”ति लोके पाकटो अहोसि ।

**मखली**ति तस्स नामं । गोसालाय जातत्ता **गोसालो**ति दुतियनामं । तं किर सकद्धमाय भूमिया तेलघटं गहेत्वा गच्छन्तं “तात मा खली”ति सामिको आह । सो पमादेन खलित्वा पतित्वा सामिकस्स भयेन पलायितुं आरब्धो । सामिको उपधावित्वा साटककण्णे अगगहेसि, सो साटकं छुट्टेत्वा अचेलको हुत्वा पलायि । सेसं पूरणसदिसमेव ।

**अजितो**ति तस्स नामं । केसकम्बलं धारेतीति **केसकम्बलो** । इति नामद्वयं संसन्दित्वा “अजितो केसकम्बलो”ति वुच्चति । तत्थ **केसकम्बलो** नाम मनुस्सानं केसेहि कतकम्बलो । ततो पटिकिट्ठतरं वत्थं नाम नत्थि । यथाह “सेय्यथापि, भिक्खवे, यानि कानिचि तन्तावुतानं वत्थानं, केसकम्बलो तेसं पटिकिट्ठो अक्खायति । केसकम्बलो, भिक्खवे, सीते सीतो उण्हे उण्हो दुब्बण्णो दुग्गन्धो दुक्खसम्फस्सो”ति (अ० नि० ३.१३८) ।

**पकुधो**ति तस्स नामं । **कच्चायनो**ति गोत्तं । इति नामगोत्तं संसन्दित्वा “पकुधो कच्चायनो”ति वुच्चति । सीतूदकपटिक्खित्तको एस, वच्चं कत्वापि उदककिच्चं न करोति, उण्होदकं वा कज्जियं वा लभित्वा करोति, नदिं वा मग्गोदकं वा अतिक्कम्म “सीलं मे भिन्न”न्ति वालिकथूपं कत्वा सीलं अधिट्ठाय गच्छति । एवरूपनिस्सरिकलद्धिको एस ।

**सज्जयो**ति तस्स नामं । बेलट्टस्स पुत्तो **बेलट्टपुत्तो** । “अम्हाकं गण्ठनकिलेसो पलिबुन्धनकिलेसो नत्थि, किलेसगण्ठिरहिता मय”न्ति एवंवादिताय लद्धनामवसेन **निगण्ठो** । नाटस्स पुत्तोति **नाटपुत्तो** ।

**पिण्डोलभारद्वाजो**ति (उदा० अट्ठ० ३६) पिण्डं उलमानो परियेसमानो पब्बजितोति **पिण्डोलो** । सो किर परिजिण्णभोगो ब्राह्मणो हुत्वा महन्तं भिक्खुसङ्घस्स लाभसक्कारं दिस्वा पिण्डत्थाय निक्खमित्वा पब्बजितो । सो महन्तं कपल्लपत्तं “पत्त”न्ति गहेत्वा चरति, कपल्लपूरं यागुं पिवति, भत्तं भुज्जति, पूवखज्जकज्ज खादति । अथस्स महग्घसभावं सत्थु आरोचयिसु । सत्था तस्स पत्तत्थविकं नानुजानि । थेरो हेट्ठामज्जे पत्तं निकुज्जित्वा ठपेति । सो ठपेन्तोपि घंसेन्तोव पणामेत्वा ठपेति, गण्हन्तोपि घंसेन्तोव आकट्ठित्वा गण्हाति । तं गच्छन्ते गच्छन्ते काले घंसनेन परिकखीणं नाळिकोदनमत्तस्सेव गण्हनकं जातं । ततो सत्थु आरोचेसुं । अथस्स सत्था पत्तत्थविकं अनुजानि । थेरो अपरेन समयेन इन्द्रियभावनं भावेन्तो अगगफले अरहत्ते पतिट्ठासि । इति सो पुब्बे सविसेसं पिण्डत्थाय उलतीति **पिण्डोलो** । गोत्तेन पन **भारद्वाजो**ति उभयं एकतो कत्वा “पिण्डोलभारद्वाजो”ति वुच्चति ।

“अथ खो आयस्मा पिण्डोलभारद्वाजो...पे०... एतदवोचा”ति कस्मा एवमाहंसु? सो किर (ध० प० अट्ठ० २.१८० देवोरोहणवत्थु) सेट्ठि नेव सम्मादिट्ठि, न मिच्छादिट्ठि, मज्झत्तधातुको । सो चिन्तेसि “मय्हं गेहे चन्दनं बहु, किं नु खो इमिना करिस्सामी”ति । अथस्स एतदहोसि “इमस्मिं लोके ‘मयं अरहन्तो, मयं अरहन्तो’ति वत्तारो बहू, अहं एकं अरहन्तम्पि न जानामि, गेहे भमं योजेत्वा पत्तं लिखापेत्वा सिक्काय ठपेत्वा वेळुपरम्पराय सट्ठिहत्थमत्ते आकासे ओलम्बापेत्वा ‘सचे अरहा अत्थि, आकासेनागन्त्वा गण्हातू’ति वक्खामि । यो तं गहेस्सति, तस्स सपुत्तदारो सरणं गमिस्सामी”ति । सो चिन्तितनियामेनेव पत्तं लिखापेत्वा वेळुपरम्पराय उस्सापेत्वा “यो इमस्मिं लोके अरहा, सो आकासेन आगन्त्वा इमं पत्तं

गण्हातू”ति आह ।

तदा छ सत्थारो “अम्हाकं एस अनुच्छविको, अम्हाकमेव नं देही”ति वदिंसु । सो “आकासेनागन्त्वा गण्हाथा”ति आह । छट्ठे दिवसे निगण्ठो नाटपुत्तो अन्तेवासिके पेसेसि “गच्छथ सेट्ठि एवं वदेथ ‘अम्हाकं आचरियस्सेव अनुच्छविको, मा अप्पमत्तकस्स कारणा आकासेन आगमनं करि, देहि किर ते पत्त’न्ति” । ते गन्त्वा सेट्ठि तथा वदिंसु । सेट्ठि “आकासेनागन्त्वा गण्हितुं समत्थोव गण्हातू”ति आह । नाटपुत्तो सयं गन्तुकामो हुत्वा अन्तेवासिकानं सज्जं अदासि “अहं एकं हत्थञ्च पादञ्च उक्खिपित्वा उप्पतितुकामो विय भविस्सामि, तुम्हे मं ‘आचरिय किं करोथ, दारुमयपत्तस्स कारणा पटिच्छन्नं अरहत्तगुणं महाजनस्स मा दस्सयित्था”ति वत्वा मं हत्थेसु च पादेसु च गहेत्वा आकड्ढन्ता भूमियं पातेय्याथा”ति । सो तत्थ गन्त्वा सेट्ठि आह “महासेट्ठि अयं पत्तो अज्जेसं नानुच्छविको, मा ते अप्पमत्तकस्स कारणा मम आकासे उप्पतनं रुच्चि, देहि मे पत्त’न्ति । भन्ते, आकासेन उप्पतित्वाव गण्हाति । ततो नाटपुत्तो “तेन हि अपेथ अपेथा”ति अन्तेवासिके अपनेत्वा “आकासे उप्पतिस्सामी”ति एकं हत्थञ्च पादञ्च उक्खिपि । अथ नं अन्तेवासिका “आचरिय, किं नामेतं करोथ, छवस्स दारुमयपत्तस्स कारणा पटिच्छन्नगुणेन तुम्हेहि महाजनस्स दस्सितेन को अत्थो”ति तं हत्थपादेसु गहेत्वा आकड्ढित्वा भूमियं पातेसु । सो सेट्ठि आह “महासेट्ठि, इमे मे उप्पतितुं न देन्ति, देहि मे पत्त’न्ति । उप्पतित्वाव गण्हाथ भन्तेति । एवं तिथिया छ दिवसानि वायमित्वापि पत्तं न लभिसुयेव ।

अथ सत्तमे दिवसे आयस्मतो च मोग्गल्लानस्स आयस्मतो च पिण्डोलभारद्वाजस्स “राजगहे पिण्डाय चरिस्सामा”ति गन्त्वा एकस्मिं पिट्ठिपासाणे ठत्वा चीवरं पारुपनकाले धुत्तका कथं समुट्ठापेसुं “हम्भो पुब्बे छ सत्थारो ‘मयं अरहन्ताम्हा”ति विचरिंसु, राजगहसेट्ठिनो पन अज्ज सत्तमो दिवसो पत्तं उस्सापेत्वा ठपयतो ‘सचे अरहा अत्थि, आकासेनागन्त्वा गण्हातू”ति वदन्तस्स, एकोपि ‘अहं अरहा”ति आकासे उप्पतन्तो नत्थि, अज्ज नो लोके अरहन्तानं नत्थिभावो जातो”ति । तं कथं सुत्वा आयस्मा महामोग्गल्लानो आयस्मन्तं पिण्डोलभारद्वाजं आह “सुतं ते, आवुसो भारद्वाज, इमेसं वचनं, इमे बुद्धसासनं परिगणहन्ता विय वदन्ति, त्वञ्च महिद्धिको महानुभावो, गच्छेतं पत्तं आकासेन गन्त्वा गण्हाही”ति । “आवुसो मोग्गल्लान, त्वं ‘इद्धिमन्तानं अग्गो”ति पाकटो, त्वं एतं गण्ह, तयि पन अगणहन्ते अहं गण्हिस्सामी”ति आह । अथ आयस्मा महामोग्गल्लानो “गण्हावुसो”ति आह । इति ते लोकस्स अरहन्तेहि असुज्जभावदस्सनत्थं एवमाहंसु ।

**तिक्खत्तुं राजगहं अनुपरियायीति** तिक्खत्तुं राजगहं अनुगन्त्वा परिब्भमि । “सत्तक्खत्तु”न्तिपि वदन्ति । थेरो किर अभिज्जापादकं ज्ञानं समापज्जित्वा उट्ठाय तिगावुतं पिट्ठिपासाणं अन्तन्तेन परिच्छिन्दन्तो तूलपिचु विय आकासे उट्ठापेत्वा राजगहनगरस्स उपरि सत्तक्खत्तुं अनुपरियायि । सो तिगावुतप्पमाणस्स नगरस्स अपिधानं विय पज्जायि । नगरवासिनो “पासाणो नो अवत्थरित्वा गण्हाती”ति भीता सुप्पादीनि मत्थके कत्वा तत्थ तत्थ निलीयिंसु । सत्तमे वारे थेरो पिट्ठिपासाणं भिन्दित्वा अत्तानं दस्सेति । महाजनो थेरं दिस्वा “भन्ते पिण्डोलभारद्वाज, तव पासाणं गाळ्हं कत्वा गण्ह, मा नो सब्बे नासयी”ति आह । थेरो पासाणं पादन्तेन खिपित्वा विस्सज्जेसि । सो गन्त्वा यथाठानेयेव पतिट्ठासि । थेरो सेट्ठिस्स गेहमत्थके अट्ठासि । तं दिस्वा सेट्ठि उरेन निपज्जित्वा “ओतर सामी”ति वत्वा आकासतो ओतिण्णं थेरं निसीदापेत्वा पत्तं गहेत्वा चतुमधुरपुण्णं कत्वा थेरस्स अदासि । थेरो पत्तं गहेत्वा विहारभिमुखो पायासि । अथस्स ये अरज्जगता पाटिहारियं नादसंसु, ते सन्निपतित्वा “भन्ते, अम्हाकम्पि पाटिहारियं दस्सेही”ति थेरं अनुबन्धिंसु । सो तेसं तेसं पाटिहारियं दस्सेन्तो विहारं अगमासि । सत्था तं अनुबन्धित्वा उन्नादेन्तस्स महाजनस्स सद्दं सुत्वा “आनन्द, कस्सेसो सद्दो”ति पुच्छि । तेन वुत्तं “अस्सोसि खो भगवा...पे०... किं नु खो सो, आनन्द, उच्चासद्दो महासद्दो”ति ।

विकुब्बनिद्धिया पाटिहारियं पटिक्खित्तन्ति एत्थ विकुब्बनिद्धि नाम “सो पकतिवण्णं विजहित्वा कुमारकवण्णं वा दस्सेति नागवण्णं वा, विविधम्पि सेनाब्यूहं दस्सेती”ति (पटि० म० ३.१३) एवमागता पकतिवण्णविजहनविकारवसेन पवत्ता इद्धि। अधिद्धानिद्धि पन “पकतिया एको बहुकं आवज्जति सतं वा सहस्सं वा सतसहस्सं वा, आवज्जित्वा जाणेन अधिद्धानि “बहुको होमी””ति (पटि० म० ३.१० दसइद्धिनिद्देस) एवं विभजित्वा दस्सिता अधिद्धानवसेन निप्फन्ना इद्धि।

२५३-२५४. न अच्छुपियन्तीति न सुफस्सितानि होन्ति। रूपकाकिण्णानीति इत्थिरूपादीहि आकिण्णानि। भूमिआधारकेति वलयाधारके। दारुआधारकदण्डाधारकेसूति एकदारुना कतआधारके बहूहि दण्डकेहि कतआधारके वाति अत्थो, तीहि दण्डेहि कतो पन न वट्ठति। भूमियं पन निक्कुज्जित्वा एकमेव ठपेतब्बन्ति एत्थ द्वे ठपेन्तेन उपरि ठपितपत्तं एकेन पस्सेन भूमियं फुसापेत्वा ठपेतुं वट्ठतीति वदन्ति। आलिन्दकमिड्डिकादीनन्ति पमुखमिड्डिकानं। परिवत्तित्वा तत्थेव पतिट्ठातीति एत्थ “परिवत्तित्वा ततियवारे तत्थेव मिड्डिया पतिट्ठाती”ति गण्ठपदेसु वुत्तं। परिभण्डं नाम गेहस्स बहि कुट्टपादस्स थिरभावत्थं कता तनुकमिड्डिका वुच्चति। तनुकमिड्डिकायाति खुदकमिड्डिकाय। मिड्डन्तेपि आधारके ठपेतुं वट्ठति। “अनुजानामि, भिक्खवे, आधारक”न्ति हि वचनतो मिड्डादीसु यत्थ कत्थचि आधारकं ठपेत्वा तत्थ पत्तं ठपेतुं वट्ठति आधारके ठपनोकासस्स अनियमितत्ताति वदन्ति। “पत्तमाळो नाम वट्ठेत्वा पत्तानं अगमनत्थं वट्ठं वा चतुरस्सं वा इट्ठकादीहि परिक्खपित्वा कतो”ति गण्ठपदेसु वुत्तं।

२५५. घटिकन्ति उपरि योजितं अगगळं। तावकालिकं परिभुज्जितुं वट्ठतीति सकिदेव गहेत्वा तेन आमिसं परिभुज्जित्वा छट्टेतुं वट्ठतीति अधिप्पायो। घटिकटाहेति भाजनकपाले। अभुं मेति एत्थ भवतीति भू, वट्ठि। न भूति अभू, अवट्ठि। भयवसेन पन सा इत्थी “अभु”न्ति आह, विनासो म्हन्ति अत्थो। छवसीसस्स पत्तन्ति छवसीसमयं पत्तं। पकतिविकारसम्बन्धे चेतं सामिवचनं, अभेदेपि वा भेदूपचारेनायं वोहारो “सिलापुत्तकस्स सरीर”न्ति आदीसु विय।

चब्बेत्वाति खादित्वा। एकं उदकगण्डुसं गहेत्वाति वामहत्थेनेव पत्तं उक्खिपित्वा मुखेन गण्डुसं गहेत्वा। उच्छिद्वहत्थेनाति सामिसेन हत्थेन। एत्तावताति एकगण्डुसगहणमत्तेन। लुज्चित्वाति ततो मंसं उद्धरित्वा। एतेसु सब्बेसु पण्णात्तिं जानातु वा मा वा, आपत्तियेव।

२५६. किण्णचुण्णेनाति सुराकिण्णचुण्णेन। “अनुवातं परिभण्डन्ति किलज्जादीसु करोन्ती”ति गण्ठपदेसु वुत्तं। बिदलकन्ति दुगुणकरणसङ्घातस्स किरियाविसेसस्स अधिवचनं। कस्स दुगुणकरणं? येन किलज्जादिना महन्तं कथिनं अत्थतं, तस्स। तज्झि दण्डकथिनप्पमाणेन परियन्ते संहरित्वा दुगुणं कातब्बं। पटिग्गहन्ति अङ्गुलिकञ्चुकं।

२५७-२५९. पाति नाम पटिग्गहणसण्ठानेन कतो भाजनविसेसो। न सम्मतीति नप्पहोति।

२६०-२६२. नीचवत्थुकं चिनिनुन्ति बहिकुट्टस्स समन्ततो नीचवत्थुकं कत्वा चिनिनुं। अरहटघटियन्तं नाम सकटचक्कसण्ठानं अरे अरे घटिकानि बन्धित्वा एकेन द्वीहि वा परिब्भमियमानं यन्तं।

२६३. आविद्धपक्खपासकन्ति कण्णिकमण्डलस्स समन्ता ठपितपक्खपासकं। मण्डलेति कण्णिकमण्डले। पक्खपासके ठपेत्वाति समन्ता पक्खपासकफलकानि ठपेत्वा।

२६४. “नमतकं सन्थतसदिस”न्ति गण्ठपदेसु वुत्तं। चम्मखण्डपरिहारेन परिभुज्जितब्बन्ति अनधिद्वहित्वा

परिभुज्जितब्बं। एत्थेव पविट्ठानीति मळोरिकाय एव अन्तोगधानि। पुब्बे पत्तसङ्गोपनत्थं आधारको अनुज्जातो, इदानीं भुज्जनत्थं।

२६५. निक्कुज्जितब्बोति तेन दिन्नस्स देय्यधम्मस्स अप्पटिग्गहणत्थं पत्तनिक्कुज्जनकम्मवाचाय निक्कुज्जितब्बो, न अधोमुखठपनेन। तेनेवाह “एवञ्च पन, भिक्खवे, निक्कुज्जितब्बो”तिआदि। अलाभायाति चतुन्नं पच्चयानं अलाभत्थाय। अनत्थायाति उपदवाय अवट्ठिया।

२६६. पसादेस्सामाति आयाचिस्साम। एतदवोचाति “अप्पतिरूपं मया कतं, भगवा पन महन्तेपि अगुणे अचिन्तेत्वा मय्हं अच्चयं पटिग्गण्हिस्सती”ति मज्जमानो एतं “अच्चयो मं भन्ते”तिआदिवचनं अवोच। तत्थ जायपटिपत्तिं अतिच्च एति पवत्ततीति अच्चयो, अपराधो। मं अच्चगमाति मं अतिक्कम्म अभिभवित्वा पवत्तो। पुरिसेन मदित्वा अभिभवित्वा पवत्तितोपि हि अपराधो अत्थतो पुरिसं अतिच्च अभिभवित्वा पवत्तो नाम होति। पटिग्गण्हातूति खमतु। आयतिं संवरायाति अनागते संवरणत्थाय पुन एवरूपस्स अपराधस्स दोसस्स खलितस्स अकरणत्थाय। तग्घाति एकंसेन। यथाधम्मं पटिकरोसीति यथा धम्मो ठितो, तथेव करोसि, खमापेसीति वुत्तं होति। तं ते मयं पटिग्गण्हामाति तं तव अपराधं मयं खमाम। वुट्ठि हेसा, आवुसो वट्ठ, अरियस्स विनयेति एसा, आवुसो वट्ठ, अरियस्स विनये बुद्धस्स भगवतो सासने वुट्ठि नाम। कतमा? अच्चयं अच्चयतो दिस्वा यथाधम्मं पटिकरित्वा आयतिं संवरापज्जना। देसनं पन पुग्गलाधिद्वानं करोन्तो “यो अच्चयं अच्चयतो दिस्वा यथाधम्मं पटिकरोति, आयतिं संवरं आपज्जती”ति आह।

२६८. बोधिराजकुमारवत्थुम्हि (म० नि० अट्ठ० २.३२४ आदयो) कोकनदोति कोकनदं वुच्चति पदुमं, सो च मङ्गलपासादो ओलोकनपदुमं दस्सेत्वा कतो, तस्मा “कोकनदो”ति सङ्खं लभि। याव पच्छिमसोपानकळेवरान्ति एत्थ पच्छिमसोपानकळेवरान्ति पठमसोपानफलकं वुत्तं तस्स सब्बपच्छा दुस्सेन सन्थतत्ता। उपरिमसोपानफलकतो पट्टाय हि सोपानं सन्थतं। अदसा खोति ओलोकनत्थंयेव द्वारकोट्टके ठितो अदस।

भगवा तुण्ही अहोसीति “किस्स नु खो अत्थाय राजकुमारेन अयं महासक्कारो कतो”ति आवज्जेन्तो पुत्तपत्थनाय कतभावं अज्जासि। सो हि राजपुत्तो अपुत्तको। सुतज्जानेन अहोसि “बुद्धानं किर अधिकारं कत्वा मनसा इच्छितं लभन्ती”ति। सो “सचाहं पुत्तं लभिस्सामि, सम्मासम्बुद्धो इमं चेलपटिकं अक्कमिस्सति। नो चे लभिस्सामि, न अक्कमिस्सती”ति पत्थनं कत्वा सन्थरापेसि। अथ भगवा “निब्बत्तिस्सति नु खो एतस्स पुत्तो”ति आवज्जेत्वा “न निब्बत्तिस्सती”ति अदस। पुब्बे किर सो एकस्मिं दीपे वसमानो समानच्छन्देन सकुणपोतके खादि। सचस्स मातुगामो पुज्जवा भवेय्य, पुत्तं लभेय्य। उभोहि पन समानच्छन्देहि हुत्वा पापकम्मं कतं, तेनस्स पुत्तो न निब्बत्तिस्सतीति अज्जासि। दुस्से पन अक्कन्ते “बुद्धानं अधिकारं कत्वा पत्थितं लभन्तीति लोके अनुस्सवो, मया च महाअधिकारो कतो, न च पुत्तं लभामि, तुच्छं इदं वचनं”न्ति मिच्छागहणं गणहेय्य। तित्थियापि “नत्थि समणानं अकत्तब्बं नाम, चेलपटिकं मद्दन्ता आहिण्डन्ती”ति उज्झायेय्युं। एतरहि च अक्कमन्तेसु बहू भिक्खू परचित्तविदुनो, ते भब्बतं जानित्वा अक्कमिस्सन्ति, अभब्बतं जानित्वा न अक्कमिस्सन्ति। अनागते पन उपनिस्सयो मन्दो भविस्सति, अनागतं न जानिस्सन्ति, तेसु अक्कमन्तेसु सचे पत्थितं इज्झिस्सति, इच्चेतं कुसलं। नो चे इज्झिस्सति, “पुब्बे भिक्खुसङ्घस्स अधिकारं कत्वा इच्छितिच्छितं लभन्ति, इदानीं न लभन्ति, तेयेव मज्जे भिक्खू पटिपत्तिपूरका अहेसुं, इमे पन पटिपत्तिं पूरेतुं न सक्कोन्ती”ति मनुस्सा विप्पटिसारिनो भविस्सन्तीति इमेहि तीहि कारणेहि भगवा अक्कमितुं अनिच्छन्तो तुण्ही अहोसि। पच्छिमं जनतं तथागतो अनुकम्पतीति इदं पन थेरो वुत्तेसु कारणेसु ततियं कारणं सन्धायाह। मङ्गलं इच्छन्तीति

मङ्गलिका ।

२६९. बीजनान्ति चतुरस्सबीजनिं । तालवण्टन्ति तालपत्तादीहि कतं मण्डलिकबीजनिं ।

२७०-२७५. “एकपण्णच्छत्तं नाम तालपत्तं”न्ति गण्ठपदेसु वुत्तं । कम्मसतेनाति एत्थ सत्त-सद्दो अनेकपरियायो, अनेकेन कम्मेनाति अत्थो, महता उस्साहेनाति वुत्तं होति । रुधीति खुद्दकवणं ।

२७६. “अकायबन्धनेन सञ्चिच्च असञ्चिच्च वा गामप्पवेसने आपत्ति । सरित्तुनतो बन्धित्वा पविसितब्बं निवत्तितब्बं वा”ति गण्ठपदेसु वुत्तं । मुरजवट्टिसण्ठानं वेठेत्वा कतन्ति बहू रज्जुके एकतो कत्वा नानावण्णेहि सुत्तेहि वेठेत्वा मुरजवट्टिसदिसं कतं । तेनेव दुतियपाराजिकवण्णनायं (पारा० अट्ठ० १.८५ पाळिमुत्तकविनिच्छय) वुत्तं “बहू रज्जुके एकतो कत्वा एकेन निरन्तरं वेठेत्वा कतं बहुरज्जुकन्ति न वत्तब्बं, तं वट्टती”ति । तत्थ यं वत्तब्बं, तं हेट्ठा वुत्तमेव । मुद्दिककायबन्धनं नाम चतुरस्सं अकत्वा सज्जितं । पामङ्गदसा चतुरस्सा । मुदिङ्गसण्ठानेनाति वरकसीसाकारेन । पासन्तोति दसामूलं ।

२८०-२८२. मुण्डवट्टीति मल्लकम्मकरादयो । पमाणङ्गुलेनाति वट्टकीअङ्गुलं सन्धाय वुत्तं । सेसमेत्थ पाळितो अट्टकथातो च सुविज्जेय्यमेव ।

खुद्दकवत्थुकखन्धकवण्णना निट्ठिता ।

## ६. सेनासनकखन्धकं

विहारानुजाननकथावण्णना

२९४. सेनासनकखन्धके सेनासनं अपञ्चत्तं होतीति विहारसेनासनं सन्धाय वुत्तं । चतुब्बिधज्झि (म० नि० अट्ठ० १.२९६) सेनासनं विहारसेनासनं मञ्चपीठसेनासनं सन्थतसेनासनं ओकाससेनासनन्ति । तत्थ “मञ्चोपि सेनासनं, पीठम्पि भिसिपि बिम्बोहनम्पि विहारोपि अट्टयोगोपि पासादोपि हम्मियम्पि गुहापि अट्टोपि माळोपि लेणम्पि वेळुगुम्बोपि रुक्खमूलम्पि मण्डपोपि सेनासनं । यत्थ वा पन भिक्खू पटिक्कमन्ति, सब्बमेतं सेनासनं”न्ति (विभ० ५२७) वचनतो विहारो अट्टयोगो पासादो हम्मियं गुहाति इदं विहारसेनासनं नाम । मञ्चो पीठं भिसि बिम्बोहनन्ति इदं मञ्चपीठसेनासनं नाम । चिमिलिका चम्मखण्डो तिणसन्थारो पण्णसन्थारोति इदं सन्थतसेनासनं नाम । यत्थ वा पन भिक्खू पटिक्कमन्तीति इदं ओकाससेनासनं नाम ।

रुक्खमूलेति आदीसु रुक्खमूलसेनासनं नाम यंकिञ्चि सन्दच्छायं विवित्तं रुक्खमूलं । पब्बतो नाम सेलो । तत्थ हि उदकसोण्डीसु उदककिच्चं कत्वा सीताय रुक्खच्छायाय निसिन्ना नानादिसासु खायमानासु सीतेन वातेन बीजियमाना समणधम्मं करोन्ति । कन्दरेति कं वुच्चति उदकं, तेन दारितो उदकेन भिन्नो पब्बतप्पदेसो कन्दरं । यं “नितम्ब”न्तिपि “नदीकुञ्ज”न्तिपि वदन्ति । तत्थ हि रजतपट्टसदिसा वालिका होति, मत्थके मणिवितानं विय वनगहनं, मणिकखन्धसदिसं उदकं सन्दति, एवरूपं कन्दरं ओरुह पानीयं पिवित्वा गत्तानि सीतं कत्वा वालिकं उस्सापेत्वा पंसुकूलचीवरं पञ्चपेत्वा तत्थ निसिन्ना ते भिक्खू समणधम्मं करोन्ति । गिरिगुहा नाम द्विन्नं पब्बतानं अन्तरा, एकस्मिंयेव वा उमङ्गसदिसं

महाविवरं ।

“वनपत्थन्ति दूरानमेतं सेनासनानं अधिवचन”न्ति आदिवचनतो (विभ० ५३१) यत्थ न कसन्ति न वपन्ति, तादिसं मनुस्सानं उपचारद्वानं अतिक्कमित्वा ठितं अरञ्जकसेनासनं “वनपत्थ”न्ति वुच्चति । **अज्झोकासो** नाम केनचि अच्छन्नो पदेसो । आकङ्खमाना पनेत्थ चीवरकुटिं कत्वा वसन्ति । **पलालपुज्जे**ति पलालरासिम्हि । महापलालपुज्जतो हि पलालं निक्कट्ठित्वा पम्भारलेणसदिसे आलये करोन्ति, गच्छगुम्बादीनम्पि उपरि पलालं परिक्खित्वा हेट्ठा निसिन्ना समणधम्मं करोन्ति, तं सन्धायेतं वुत्तं । **पञ्च लेणानी**ति पञ्च लीयनद्वानानि । निलीयन्ति एत्थ भिक्खूति लेणानि, विहारादीनमेतं अधिवचनं । **सुपण्णवङ्कगे**हन्ति गरुळपक्खसण्ठानेन कतगेहं ।

**२९५.** अनुमोदनगाथासु **सीतन्ति** अज्झत्तधातुक्खोभवसेन वा बहिद्भउतुविपरिणामवसएन वा उप्पज्जनकसीतं । **उण्हन्ति** अगिसन्तापं, तस्स वनदाहादीसु वा सम्भवो दट्ठब्बो । **पटिहन्ती**ति बाधति । यथा तदुभयवसेन कायचित्तानं बाधनं न होति, एवं करोति । सीतुण्हम्भाहते हि सरीरे विक्खित्तचित्तो भिक्खु योनिसो पदहितुं न सक्कोति । **वाळमिगानी**ति सीहब्यग्धादिवाळमिगे । गुत्तसेनासनज्हि पविसित्वा द्वारं पिधाय निसिन्नस्स ते परिस्सया न होन्ति । **सरीसपे**ति ये केचि सरन्ते गच्छन्ते दीघजातिके । **मकसे**ति निदस्सनमत्तमेतं, डंसादीनम्पि एतेनेव सङ्गहो दट्ठब्बो । **सिसिरे**ति सिसिरकालवसेन सत्ताहवद्धलिकादिवसेन च उप्पन्ने सिसिरसम्फस्से । **वुट्ठियो**ति यदा तदा उप्पन्ना वस्सवुट्ठियो ।

**वातातपो घोरो**ति रुक्खगच्छादीनं उम्मूलभज्जनादिवसेन पवत्तिया घोरो सरजअरजादिभेदो वातो चेव गिम्हपरिळाहसमयेसु उप्पत्तिया घोरो सूरियातपो च **पटिहज्जति** पटिबाहीयति । **लेणत्थन्ति** नानारम्मणतो चित्तं निवत्तेत्वा पटिसल्लानारामत्थं । **सुखत्थन्ति** वुत्तपरिस्सयाभावेन फासुविहारत्थं । **झायितुन्ति** अट्ठितिसारम्मणेसु यत्थ कत्थचि चित्तं उपनिज्झायितुं । **विपस्सितुन्ति** अनिच्चादितो सङ्खारे सम्मसितुं ।

**विहारे**ति पतिस्सये । **कारये**ति कारापेय्य । **रम्मे**ति मनोरमे निवाससुखे । **वासयेत्थ बहुस्सुते**ति कारेत्वा पन एत्थ विहारेसु बहुस्सुते सीलवन्ते कल्याणधम्मे निवासेय्य । ते निवासेन्तो पन तेसं बहुस्सुतानं यथा पच्चयेहि किलमथो न होति, एवं अन्नञ्च पानञ्च वत्थसेनासनानि च ददेय्य उजुभूतेसु अज्झासयसम्पन्नेसु कम्मफलानं रतनत्तयगुणानञ्च सदहनेन विप्पसन्नेन चेतसा ।

इदानीं गहट्ठपब्बजितानं अज्जमज्जुपकारितं दस्सेतुं “**ते तस्सा**”ति गाथमाह । तत्थ तेति ते बहुस्सुता । **तस्सा**ति उपासकस्स । **धम्मं देसेन्ती**ति सकलवट्ठदुक्खापनूदनं सद्धम्मं देसेन्ति । **यं सो धम्मं इधज्जायाति** सो पुगलो यं सद्धम्मं इमस्मिं सासने सम्मा पटिपज्जनेन जानित्वा अगमग्गाधिगमेन अनासवो हुत्वा परिनिब्बायति ।

**सो च सब्बददो होती**ति आवासदानस्मिं दिन्ने सब्बदानं दिन्नमेव होतीति कत्वा वुत्तं । तथा हि (सं० नि० अट्ठ० १.१.४२) द्वे तयो गामे पिण्डाय चरित्वा किञ्चि अलद्धा आगतस्सपि छायूदकसम्पन्नं आरामं पविसित्वा नहायित्वा पतिस्सये मुहुत्तं निपज्जित्वा उट्ठाय निसिन्नस्स काये बलं आहरित्वा पक्खित्तं विय होति, बहि विचरन्तस्स च काये वण्णधातु वातातपेहि किलमति, पतिस्सयं पविसित्वा द्वारं पिधाय मुहुत्तं निपन्नस्स विसभागसन्तति वूपसम्मति, सभागसन्तति पतिट्ठाति, वण्णधातु आहरित्वा पक्खित्ता विय होति, बहि विचरन्तस्स च पादे कण्टको विज्झति, खाणु पहरति, सरीसपादिपरिस्सया चेव चोरभयञ्च उप्पज्जति, पतिस्सयं पविसित्वा द्वारं पिधाय निपन्नस्स सब्बे परिस्सया न होन्ति, सज्झायन्तस्स धम्मपीतिसुखं, कम्मद्वानं मनसिकरोन्तस्स उपसमसुखञ्च उप्पज्जति बहिद्भाविकखेपाभावतो, बहि



विचरन्तस्स च सेदा मुच्चन्ति, अक्खीनि फन्दन्ति, सेनासनं पविसनक्खणे मज्जपीठानि न पज्जायन्ति, मुहुत्तं निसिन्नस्स पन अक्खिपसादो आहरित्वा पक्खित्तो विय होति, द्वारवातपानमज्जपीठादीनि पज्जायन्ति, एतस्मिञ्च आवासे वसन्तं दिस्वा मनुस्सा चतूहि पच्चयेहि सक्कच्चं उपट्ठहन्ति । तेन वुत्तं “सो च सब्बददो होति, यो ददाति उपस्सय”न्ति ।

**२९६. आविञ्चनच्छिदन्ति** यत्थ अङ्गुलिं पवेसेत्वा द्वारं आकङ्कन्ता द्वारबाहं फुसापेन्ति, तस्सेतं अधिवचनं । **आविञ्चनरज्जुन्ति** कवाटेयेव छिदं कत्वा तत्थ पवेसेत्वा येन रज्जुकेन कङ्कन्ता द्वारं फुसापेन्ति, तं आविञ्चनरज्जुकं । सेनासनपरिभोगे अक्खियचम्मं नाम नत्थीति दस्सनत्थं “सचेपि दीपिनङ्गुटेन कता होति, वट्ठितियेवा”ति वुत्तं । **चेतिये वेदिकासदिसन्ति** वातपानबाहासु चेतिये वेदिकाय विय पट्टिकादीहि दस्सेत्वा कतं । **थम्भकवातपानं** नाम तिरियं दारूनि अदत्वा उजुकं ठितेहि एव वेणुसलाकादीहि कतं ।

विहारानुजाननकथावण्णना निट्ठिता ।

### मज्जपीठादिअनुजाननकथावण्णना

**२९७. पोटकितूलन्ति** एरकतिणतूलं । पोटकिगहणज्जेत्थ तिणजातीनं निदस्सनमत्तन्ति आह “येसं केसज्जि तिणजातिकान”न्ति । **पज्जविधं उण्णादितूलम्पि वट्ठतीति** एत्थापि “बिम्बोहने”ति आनेत्वा सम्बन्धितब्बं । “तूलपूरितं भिसिं अपस्सयितुं न वट्ठती”ति केचि वदन्ति, वट्ठतीति अपरे । **उपदहन्तीति** ठपेन्ति । **सीसप्पमाणन्ति** यत्थ गलवाटकतो पट्टाय सब्बसीसं उपदहन्ति, तं सीसप्पमाणं । तज्ज उक्कट्टपरिच्छेदतो तिरियं मुट्ठिरतनं होतीति दस्सेतुं “यस्स वित्थारतो तीसु कण्णेसू”तिआदिमाह । **मज्झट्टानं मुट्ठिरतनं होतीति** बिम्बोहनस्स मज्झट्टानं तिरियतो मुट्ठिरतनप्पमाणं होति । **मसूरकेति** चम्ममयभिसियं । **फुसितानि दातुन्ति** सज्जाकरणत्थं बिन्दूनि दातुं ।

**२९८.** न निबन्धतीति **अनिबन्धनीयो**, न अल्लीयतीति अत्थो । **पटिबाहेत्वाति** मट्ठं कत्वा ।

### इट्ठकाचयादिअनुजाननकथावण्णना

**३००. रुक्खं विज्झित्वाति** रुक्खदारुं विज्झित्वा । **खाणुके आकोटेत्वाति** द्वे द्वे खाणुके आकोटेत्वा । तं **आहरिमं भित्तिपादन्ति** वुत्तनयेन खाणुके आकोटेत्वा कतंयेव सन्धाय वुत्तं । **भूमियं पतिट्ठापेतुन्ति** मूलेन भूमियं पतिट्ठापेत्वा भित्तिपादस्स उपत्थम्भनवसेन उस्सापेत्वा खाणुकेहि भित्तिपादं उस्सापेत्वा ठपेतुन्ति अधिप्पायो । **उभतो कुट्टं नीहरित्वा कतपदेसस्साति** यथा अन्तोद्वारसमीपे निसिन्नेहि उजुकं बहि ओलोकेतुं न सक्का होति, एवं उभोहि पस्सेहि कुट्टं नीहरित्वा अभिमुखे भित्तिं उपट्ठपेत्वा कतपदेसस्स । **समन्ता परियागारेति** समन्ततो आविद्धपमुखं । **उग्घाटनकिटिकन्ति** दण्डेहि उक्खिपित्वा ठपनकपदरकिटिकं ।

### अनाथपिण्डिकवत्थुकथावण्णना

**३०४.** अनाथपिण्डिकसेट्ठिवत्थुम्हि (सं० नि० अट्ठ० १.१.२४२) **केनचिदेव करणीयेनाति** वाणिज्जकम्मं अधिप्पेतं । अनाथपिण्डिको किर राजगहसेट्ठि च अज्जमज्जं भगिनिपतिका होन्ति । यदा राजगहे उट्ठानकभण्डं समग्घं होति, तदा राजगहसेट्ठि तं गहेत्वा सकटसतेहि सावत्थिं गन्त्वा योजनमत्ते ठितो अत्तनो आगतभावं जानापेति । अनाथपिण्डिको पच्चुगन्त्वा तस्स महासक्कारं कत्वा एकं यानं आरोपेत्वा सावत्थिं पविसति । सो सचे भण्डं लहुकं विक्कीयति,

विविक्किणाति । नो चे, भगिनिघरे ठपेत्वा पक्कमति । अनाथपिण्डिकोपि तथेव करोति । स्वायं तदापि तेनेव करणीयेन अगमासि । तं सन्धायेतं वुत्तं ।

तं दिवसं पन राजगहसेट्ठि योजनमत्ते ठितेन अनाथपिण्डिकेन आगतभावजाननत्थं पेसितं पण्णं न सुणि, धम्मस्सवनत्थाय विहारं अगमासि । सो धम्मकथं सुत्वा स्वातनाय बुद्धप्पमुखं भिक्खुसङ्घं निमन्तेत्वा अत्तनो घरे उद्धनखणापनदारुफालनादीनि कारेसि । अनाथपिण्डिकोपि “इदानी मय्हं पच्चुग्गमनं करिस्सति, इदानी करिस्सती”ति घरद्वारेपि पच्चुग्गमनं अलभित्वा अन्तोघरं पविट्ठो पटिसन्धारम्पि न बहुं अलत्थ । “किं महासेट्ठि कुसलं दारकरूपानं, नसि मग्गे किलन्तो”ति एत्तकोव पटिसन्धारो अहोसि । तेन वुत्तं “अथ खो अनाथपिण्डिकस्स गहपतिस्स एतदहोसी”तिआदि ।

बुद्धोति त्वं गहपति वदेसीति तस्स किर मुखतो बुद्धसद्वं सुत्वा अनाथपिण्डिको पच्चवण्णं पीतिं पटिलभति, सा तस्स सीसे उट्ठित्वा याव पादपिट्ठिया, पादपिट्ठिया उट्ठाय याव सीसा गच्छति, उभतो उट्ठाय मज्झे ओसरति, मज्झे उट्ठाय उभतो गच्छति । सो पीतिया निरन्तरं फुटो “बुद्धोति त्वं गहपति वदेसी”ति एवं तिक्खत्तुं पुच्छि । अकालो खो, गहपति, इमं कालं तं भगवन्तं दस्सनाय उपसङ्कमितुन्ति “बुद्धा नाम दुरासदा आसीविससदिसा होन्ति, सत्था च सिवथिकाय समीपे वसति, न सक्का तत्थ इमाय वेलाय इमिना गन्तु”न्ति मज्जमानो एवमाह । बुद्धगताय सतिया निपज्जीति अज्जं किञ्चि अचिन्तेत्वा बुद्धगताय एव सतिया निपज्जि । तं दिवसं किरस्स भण्डसकटेसु वा उपट्ठाकेसु वा चित्तम्पि नुप्पज्जि, सायमासम्पि न अकासि । सत्तभूमिकं पन पासादं आरुह्य सुपज्जत्तालङ्कितवरसयने “बुद्धो बुद्धो”ति सज्झायं करोन्तोव निपज्जित्वा निदं ओक्कमि । तिक्खत्तुं वुट्ठासि पभातं मज्जमानोति पठमयामे ताव वीतिवत्ते उट्ठाय बुद्धं अनुस्सरि, अथस्स बलवप्पसादो उदपादि, पीतिआलोको अहोसि, सब्बतमं विगच्छि, दीपसहस्सुज्जलनं विय चन्दुट्ठानसूरियुट्ठानं विय च जातं । सो “पमादं आपन्नोमि, वज्जितोमि, सूरियो उगगतो”ति उट्ठाय आकासतले ठत्वा चन्दं ओलोकेत्वा “एकोव यामो गतो, अज्जे द्वे अत्थी”ति पुन पविसित्वा निपज्जि, एतेनुपायेन मज्झिमयामावसानेपि पच्छिमयामावसानेपि तिक्खत्तुं उट्ठासि । पच्छिमयामावसाने पन बलवपच्चूसेयेव उट्ठाय आकासतलं आगन्त्वा महाद्वाराभिमुखो अहोसि, सत्तभूमिकद्वारं सयमेव विवटं अहोसि, पासादा ओरुह्य अन्तरवीथिं पटिपज्जि ।

३०५. अमनुस्साति अधिगतविसेसा देवता । तथा हि ता सेट्ठिस्स भाविनिसम्पत्तिं पच्चक्खतो सम्पस्समाना “अयं महासेट्ठि ‘बुद्धपट्ठानं गमिस्सामी’ति निक्खन्तो पठमदस्सनेनेव सोतापत्तिफले पतिट्ठाय तिण्णं रतनानं अग्गुपट्ठाको हुत्वा असदिसं सङ्घारामं कत्वा चातुदिसस्स अरियसङ्घस्स अनावटद्वारो भविस्सति, न युत्तमस्स द्वारं पिदहितु”न्ति चिन्तेत्वा द्वारं विवरिंसु । अन्तरधायीति राजगहं किर आकिण्णमनुस्सं, अन्तोनगरे नव कोटियो बहिनगरे नवाति तं उपनिस्साय अट्ठारस मनुस्सकोटियो वसन्ति । अवेलाय मतमनुस्से बहि नीहरितुं असक्कोन्ता अट्ठालके ठत्वा बहिद्वारे खिपन्ति । महासेट्ठि नगरतो बहि निक्खन्तमत्तोव अल्लसरीरं पादेन अक्कमि, अपरम्पि पिट्ठिपादेन पहरि, मक्खिका उप्पतित्वा पकिरिंसु, दुग्गन्धो नासापुटं अभिहनि, बुद्धप्पसादो तनुत्तं गतो । तेनस्स आलोको अन्तरधायि अन्धकारो पातुरहोसि पीतिवेगस्स तनुभावे तंसमुट्ठितरूपानं परिदुब्बलभावतो । सद्धमनुस्सावेसीति “सेट्ठिस्स उस्साहं जनेस्सामी”ति सुवण्णकिङ्किणिकं घट्टेन्तो विय मधुरस्सरेन सद्वं अनुस्सावेसि ।

सतं कज्जासहस्सानीति पुरिमपदानिपि इमिनाव सहस्स-पदेन सद्धि सम्बन्धितब्बानि । यथेव हि सतं कज्जासहस्सानि, एवं सतं सहस्सानि हत्थी, सतं सहस्सानि अस्सा, सतं सहस्सानि रथाति अयमेत्थ अत्थो, इति एकेकं

सतसहस्सं दीपितं होति । **पदवीतिहारस्साति** पदं वीतिहरति एत्थाति **पदवीतिहारो** । सो दुतविलम्बितं अकत्वा समगमने द्विन्नं पदानं अन्तरे मुट्ठिरतनमत्तं । **कलं नाग्घन्ति सोळसिन्ति** तं एकं पदवीतिहारं सोळस भागे कत्वा ततो एको कोट्टासो पुन सोळसधा, ततो एको सोळसधाति एवं सोळस वारे सोळसधा भिन्नस्स एको कोट्टासो सोळसी कला नाम, तं सोळसिं कलं एतानि चत्तारि सतसहस्सानि न अग्घन्ति । इदं वुत्तं होति — सतं हत्थिसहस्सानि सतं अस्ससहस्सानि सतं रथसहस्सानि सतं कज्जासहस्सानि, ता च खो आमुक्कमणिकुण्डला सकलजम्बुदीपराजधीतरोवाति इमस्मा एत्तका लाभा विहारं गच्छन्तस्स तस्मिं सोळसिकलासङ्घाते पदेसे लङ्घनसाधनवसेन पवत्तचेतनाव उत्तरितराति । पदं वा वीतिहरति एतेनाति **पदवीतिहारो**, तथापवत्ता कुसलचेतना, तस्सा फलं सोळसधा कत्वाति च वदन्ति । इदं पन विहारगमनं कस्स वसेन गहितन्ति? विहारं गन्त्वा अनन्तरायेन सोतापत्तिफले पतिट्ठहन्तस्स वसेन गहितं । “गन्धमालादीहि पूजं करिस्सामि, चेतियं वन्दिस्सामि, धम्मं सोस्सामि, दीपपूजं करिस्सामि, सङ्गं निमन्तेत्वा दानं दस्सामि, सिक्खापदेसु वा सरणेसु वा पतिट्ठहिस्सामी”ति गच्छतोपि वसेन वट्ठितियेव ।

**अन्धकारो अन्तरधायीति** सो किर चिन्तेसि “अहं एकोति सज्जं करोमि, अमनुस्सा च मे अनुगामिनो सहाया अत्थि, कस्मा भायामी”ति सूरु अहोसि । अथस्स बलवा बुद्धप्पसादो उदपादि, तस्मा अन्धकारो अन्तरधायि । सेसवारेसुपि एसेव नयो । **आलोको पातुरहोसीति** पुरिमबुद्धेसु चिरकालपरिचयसम्भूतस्स बलवतो पसादस्स वसेन उप्पन्नाय उळाराय बुद्धारम्माणाय पीतिया समुट्ठापितो विपस्सन्नोभाससदिसो सातिसयो चित्तपच्चयउतुसमुट्ठानो आलोको पातुरहोसि । देवताहि कतोतिपि वदन्ति, पुरिमोयेवेत्थ युत्तरतो । **एहि सुदत्ताति** सो किर सेट्ठि गच्छमानोव चिन्तेसि “इमस्मिं लोके बहू पूरणकस्सपादयो तित्थिया ‘मयं बुद्धा, मयं बुद्धा’ति वदन्ति, कथं नु खो अहं सत्थु बुद्धभावं जानेय्य”न्ति । अथस्स एतदहोसि “मय्हं गुणवसेन उप्पन्नं नामं महाजनो जानाति, कुलदत्तियं पन मे नामं अज्जत्र मया न कोचि जानाति, सचे बुद्धो भविस्सति, कुलदत्तिकनामेन मं आलपिस्सती”ति । सत्था तस्स चित्तं जत्वा एवमाह ।

**परिनिब्बुतोति** किलेसपरिनिब्बानेन परिनिब्बुतो । **आसत्तियोति** रूपादीसु आसज्जनट्ठेन आसत्तियो, तण्हायो । **सन्तिन्ति** किलेसवूपसमं । **पप्पुय्याति** अगगमग्गेन पत्वा । सेसमेत्थ पाळिअनुसारेनेव वेदितब्बं । यज्जेत्थ अनुत्तानमत्थं, तं अट्ठकथायं वुत्तमेव ।

**३०६. वयमेव वेय्यायिकन्ति** आह “वेय्यायिकन्ति वयकरणं वुच्चती”ति ।

अनाथपिण्डिकवत्थुकथावण्णना निट्ठिता ।

**अग्गासनादिअनुजाननकथावण्णना**

**३१०-३११. दक्खिणोदकन्ति** अगगतो उपनीयमानं दक्खिणोदकं । **अथ खो भगवा भिक्खू आमन्तेसीति** (जा० अट्ठ० १.१.३६ तित्तिरजातकवण्णना) तेहि भिक्खूहि अत्तनो अत्तनो रुचिवसेन अग्गासनादिरहानं कथितकाले “न, भिक्खवे, मय्हं सासने अग्गासनादीनि पत्वा खत्तियकुला पब्बजितो पमाणं, न ब्राह्मणकुला, न गहपतिकुला पब्बजितो, न विनयधरो, न सुत्तन्तिको, न आभिधम्मिको, न पठमज्झानादिलाभिनो, न सोतापन्नादयो पमाणं, अथ खो, भिक्खवे, इमस्मिं सासने यथावुट्ठं अभिवादनं पच्चुट्ठानं अज्जलिकम्मं सामीचिकम्मं कत्तब्बं, अग्गासनं अग्गोदकं अग्गपिण्डो लद्धब्बो, इदमेत्थ पमाणं, तस्मा वुट्ठतरो भिक्खु एतेसं अनुच्छविको । इदानि खो पन, भिक्खवे, सारिपुत्तो मय्हं अग्गसावको अनुधम्मचक्कप्पवत्तको ममानन्तरसेनासनं लद्धं अरहति । सो इमं रत्तिं सेनासनं अलभन्तो रुक्खमूले वीतिनामेसि । तुम्हे

इदानीं एवं अगारवा अप्पतिस्सा, गच्छन्ते गच्छन्ते काले किन्ति कत्वा विहरिस्सथा”ति वत्वा अथ नेसं ओवाददानत्थाय “पुब्बे, भिक्खवे, तिरच्छानगतापि ‘न खो पनेतं अम्हाकं पतिरूपं, यं मयं अज्जमज्जं अगारवा अप्पतिस्सा असभागवुत्तिनो विहरेय्याम, अम्हेसु महल्लकतरं जानित्वा तस्स अभिवादनादीनि करिस्सामा”ति साधुकं वीमंसित्वा ‘अयं महल्लको”ति जत्वा तस्स अभिवादनादीनि कत्वा देवपथं पूरयमाना गता”ति वत्वा अतीतं आहरित्वा दस्सेतुं भिक्खू आमन्तेसि ।

ये **वुड्डमपचायन्ती**ति जातिवुड्डो वयोवुड्डो गुणवुड्डोति तयो वुड्डा । तेसु जातिसम्पन्नो **जातिवुड्डो** नाम, वये ठितो **वयोवुड्डो** नाम, गुणसम्पन्नो **गुणवुड्डो** नाम । तेसु गुणसम्पन्नो वयोवुड्डो इमस्मिं ठाने वुड्डोति अधिप्पेतो । **अपचायन्ती**ति जेट्ठापचायिककम्मेन पूजेन्ति । **धम्मस्स कोविदा**ति जेट्ठापचायनधम्मस्स कोविदा कुसला । **दिट्ठेव धम्मे**ति इमस्मिंयेव अत्तभावे । **पासंसा**ति पसंसारहा । **सम्पराये च सुगती**ति सम्परेतब्बे इमं लोकं हित्वा गन्तब्बे परलोकेपि तेसं सुगतियेव होतीति अत्थो । अयं पनेत्थ पिण्डत्थो — भिक्खवे, खत्तिया वा होन्तु ब्राह्मणा वा वेस्सा वा सुद्धा वा गहट्ठा वा पब्बजिता वा तिरच्छानगता वा, ये केचि सत्ता जेट्ठापचितिकम्मे छेका कुसला गुणसम्पन्नानं वयोवुड्डानं अपचितिं करोन्ति, ते इमस्मिञ्च अत्तभावे जेट्ठापचितिकारकाति पसंसं वण्णनं थोमनं लभन्ति, कायस्स च भेदा सग्गे निब्बत्तन्तीति ।

अग्गासनादिअनुजाननकथावण्णना निट्ठिता ।

### आसनप्पटिबाहनादिकथावण्णना

**३१३-४. उद्दिस्सकतन्ति** गिहीहि सङ्गं उद्दिस्स कतं । **गिहिविकतन्ति** गिहीहि कतं पज्जत्तं, गिहिसन्तकन्ति वुत्तं होति । **अतिसमीपं अगन्त्वा**ति भिक्खूनं आसन्नतरं ठानं अगन्त्वा ।

### सेनासनग्गाहापकसम्मुतिकथावण्णना

**३१८. पच्चयेनेव हि तं पटिजग्गनं लभिस्सती**ति तस्मिं सेनासने महाथेरा तस्स पच्चयस्स कारणा अज्जत्थ अगन्त्वा वसन्तायेव नं पटिजग्गिस्सन्तीति अत्थो । **उब्भण्डिका भविस्सन्ती**ति उक्खित्तभण्डा भविस्सन्ति, अत्तनो अत्तनो परिक्खारे गहेत्वा तत्थ तत्थ विचरिस्सन्तीति अत्थो । **दीघसाला**ति चङ्कमनसाला । **मण्डलमाळो** उपट्टानसाला । **अनुदहती**ति पीळेति । **जम्बुदीपे पना**ति अरियदेसे भिक्खू सन्थाय वुत्तं । ते किर तथा पज्जापेन्ति । **न गोचरगामो घट्टे**त्तब्बोति वुत्तमेवत्थं विभावेति “**न तत्थ मनुस्सा वत्तब्बा**”तिआदिना । **वितक्कं छिन्दित्वा**ति “इमिना नीहारेन गच्छन्तं दिस्वा निवारेत्वा पच्चये दस्सन्ती”ति एवरूपं वितक्कं अनुप्पादेत्वा । **तेसु चे एको**ति तेसु मनुस्सेसु एको पण्डितपुरिसो । **भण्डपटिच्छादनन्ति** पटिच्छादनकभण्डं, सरीरपटिच्छादनं चीवरन्ति अत्थो ।

**पटिजगितब्बानी**ति सम्मज्जनादीहि पटिजगितब्बानि । **मुण्डवेदिकाया**ति चेतियस्स हम्मियवेदिकाय । **हम्मियवेदिका**ति च चेतियस्स उपरि चतुरस्सवेदियो वुच्चति । **पटिक्कम्मा**ति विहारतो अपसक्कित्वा । **उपनिक्खेपन्ति** खेत्तं वा नाळिकेरादिआरामं वा कहापणादीनि वा आरामिकादीनं निन्यातेत्वा “इतो उप्पन्ना वड्ढि वस्सावासिकत्थाय होतू”ति दिन्नं । **वत्तं कत्वा**ति तस्मिं सेनासने कत्तब्बवत्तं कत्वा ।

**पुग्गलवसेनेव कातब्बन्ति** परतो वक्खमाननयेन “भिक्खू चीवरेन किलमन्ति, एत्तकं नाम तण्डुलभागं भिक्खूनं चीवरं कातुं रुच्चती”तिआदिना पुग्गलपरामासवसेनेव कातब्बं, “सङ्गो चीवरेन किलमती”तिआदिना पन

सङ्घपरामासवसेन न कातब्बं । **चीवरपच्चयन्ति** चीवरसङ्घातं पच्चयं । वुत्तन्ति **महाअट्ठकथायं**वुत्तं । कस्मा एवं वुत्तन्ति आह “**एवञ्हि नवको वुट्ठतरस्स, वुट्ठो च नवकस्स गाहेस्सती**”ति, यस्मा अत्तनाव अत्तनो पापेतुं न सक्का, तस्मा द्वीसु सम्मतेसु नवको वुट्ठतरस्स, वुट्ठो च नवकस्साति उभो अज्जमज्जं गाहेस्सन्तीति अधिप्पायो । सम्मतसेनासनग्गाहापकस्स आणत्तिया अज्जेन गाहितेपि गाहो रुहितियेवाति वेदितब्बं । **अट्ठपि सोळसपि जने सम्मन्नितुं वट्ठतीति** किं विसुं विसुं सम्मन्नितुं वट्ठति, उदाहु एकतोति? एकतोपि वट्ठति । निग्गहकम्ममेव हि सङ्घो सङ्घस्स न करोति, सम्मुत्तिदानं पन बहूनप्पि एकतो कातुं वट्ठति, तेनेव सत्तसतिकक्खन्धके उब्बाहिकसम्मुतियं अट्ठपि जना एकतो सम्मताति ।

**मग्गोति** मग्गे कतदीघसाला । **पोक्खरणीति** नहायन्तानं पोक्खरणियं कतसाला । **रुक्खमूला**दयो छन्ना कवाटबद्धाव सेनासनं । **विजटेत्वाति** वियोजेत्वा, विसुं विसुं कत्वाति अत्थो । **आवासेसूति** सेनासनेसु । **पक्खिपित्वाति** एत्थ **पक्खिपनं** नाम तेसु वसन्तानं इतो उप्पन्नवस्सावासिकदानं । **पविसितब्बन्ति** अज्जेहि भिक्खूहि तस्मिं महालाभे परिवेणे वसित्वा चेतिये वत्तं कत्वाव लाभो गहेतब्बोति अधिप्पायो ।

**पच्चयं विस्सज्जेतीति** चीवरपच्चयं नाधिवासेति । **अयम्पीति** तेन विस्सट्ठपच्चयोपि । **उपनिबन्धित्वा गाहेतब्बन्ति** “इमस्मिं रुक्खे वा मण्डपे वा वसित्वा चेतिये वत्तं कत्वा गण्हा”ति एवं उपनिबन्धित्वा गाहेतब्बं । “कत्थ नु खो वसिस्सामि, कत्थ वसन्तस्स फासु भविस्सति, कत्थ वा पच्चयो भविस्सती”ति एवं उप्पन्नेन वितक्केन चरतीति **वितक्कचारिको** । अरज्जविहारेसु परिस्सयविजाननत्थं इच्छितब्बत्ता “**पञ्च पञ्च उक्का कोट्टेतब्बा**”ति वुत्तं ।

**वत्तन्ति** कतिकवत्तं । **तिविधम्पीति** परियत्तिपटिपत्तिपटिवेधवसेन तिविधम्पि । **सोधेत्वा पब्बाजेथाति** भब्बे आचारकुलपुत्ते उपपरिक्खित्वा पब्बाजेथ । **दसवत्थुककथा** नाम अप्पिच्छकथा सन्तुट्ठिकथा पविवेककथा असंसग्गकथा वीरियारम्भकथा सीलकथा समाधिकथा पज्जाकथा विमुत्तिकथा विमुत्तिजाणदस्सनकथा ।

विग्गहसंवत्तनिकवचनं **विग्गाहिकं** । **चतुरारक्खं अहापेन्ताति** बुद्धानुस्सति मेत्ता असुभं मरणस्सतीति इमं चतुरारक्खं अपरिहापेन्ता । **दन्तकट्टुखादनवत्तं आचिक्खितब्बन्ति** एत्थ **दन्तकट्टुखादनवत्तं** यो देवसिकं सङ्घमज्झे ओसरति, तेन सामणेरादीहि आहरित्वा भिक्खूनं यथासुखं परिभुज्जनत्थाय दन्तकट्टुमाळके निक्खित्तेसु दन्तकट्टेसु दिवसे दिवसे एकमेव दन्तकट्टुं गहेतब्बं । यो पन देवसिकं न ओसरति, पधानघरे वसित्वा धम्मस्सवने वा उपोसथग्गे वा दिस्सति, तेन पमाणं सल्लक्खेत्वा चत्तारि पञ्च दन्तकट्टानि अत्तनो वसनट्टाने ठपेत्वा खादितब्बानि । तेसु खीणेषु सचे पुनपि दन्तकट्टुमाळके बहूनि होन्तियेव, पुनपि आहरित्वा खादितब्बानि । यदि पन पमाणं असल्लक्खेत्वा आहरति, तेसु अखीणेषुयेव माळके खीयति, ततो केचि थेरा “येहि गहितानि, ते पटिहरन्तू”ति वदेय्युं, केचि “खादन्तु, पुन सामणेरा आहरिस्सन्ती”ति । तस्मा विवादपरिहारत्थं पमाणं सल्लक्खेतब्बं । गहणे पन दोसो नत्थि, मग्गं गच्छन्तेनपि एकं वा द्वे वा थविकाय पक्खिपित्वा गन्तब्बन्ति । **भिक्खाचारवत्तं** वत्तक्खन्धके पिण्डचारिकवत्ते आवि भविस्सति ।

**पत्तट्टानेति** वस्सग्गेन आगन्तुकभिक्खुनो पत्तट्टाने । तेसं छिन्नवस्सत्ता “सादियन्तापि हि ते नेव वस्सावासिकस्स सामिनो”ति वुत्तं, पठमंयेव कतिकाय कतत्ता खीयन्तापि च आवासिका नेव अदातुं लभन्तीति वुत्तं । **भतिनिविट्ठन्ति** भतिं कत्वा विय निविट्ठं परियिट्ठं । **सङ्घिकं पन अपलोकनकम्मं कत्वा गाहितन्ति** तत्तुप्पादं सन्धाय वुत्तं । **पच्चयवसेन गाहितन्ति** दायकानं वस्सावासिकपच्चयवसेन गाहितं सन्धाय वुत्तं । “इध, भिक्खवे, वस्संवुत्थो भिक्खु विब्भमति, सङ्घस्सेवेत”न्ति (महाव० ३७४-३७५) वचनतो “**गतट्टाने...पे०... सङ्घिकं होती**”ति वुत्तं । **मनुस्सेति** दायकमनुस्से ।

वरभागं सामणेरस्साति पठमभागस्स गाहितत्ता वुत्तं ।

सेनासनग्गाहापकसम्मतिकथावण्णना निट्ठिता ।

### उपनन्दवत्थुकथावण्णना

३१९. यं तया तत्थ सेनासनं गहितं...पे०... इध मुत्तं होतीति यं तया तत्थ गामकावासे पच्छा सेनासनं गहितं, तं ते गण्हन्तेनेव इध सावत्थियं पठमगहितसेनासनं मुत्तं होति । इध दानाहं ...पे०... तत्रापि मुत्तन्ति “इदानाहं, आवुसो, इमस्मिं गामकावासे गहितसेनासनं मुञ्चामी”ति वदन्तेन तत्रापि गामकावासे गहितसेनासनं मुत्तं ।

३२०. दीघासनं नाम मञ्चपीठविनिमुत्तं यं किञ्चि एकतो सुखं निसीदितुं पहोति । हत्थिम्हि नखो अस्साति हत्थिनखो । “पासादस्स नखो नाम हेट्ठिमपरिच्छेदो, सो च हत्थिकुम्भे पतिट्ठितो”ति गण्ठपदेसु वुत्तं । गिहिविकतनीहारेन लब्धन्तीति गिहिविकतनीहारेन परिभुज्जितुं लब्धन्ति, तेहि अत्थरित्वा दिन्नानेव निसीदितुं लब्धन्ति, न सयं अत्थतानि अत्थरापितानि वा ।

### अविस्सज्जियवत्थुकथावण्णना

३२१. अरञ्जरोति बहुउदकगण्हनका महाचाटि । जलं गण्हितुं अलन्ति अरञ्जरो । “वट्टुचाटि विय हुत्वा थोकं दीघमुखो मज्झे परिच्छेदं दस्सेत्वा कतो”ति गण्ठपदेसु वुत्तं । पञ्चनिम्मललोचनोति मंसदिब्बधम्मबुद्धसमन्तचक्रवुवसेन पञ्चलोचनो ।

थावरेन च थावरं गरुभण्डेन च गरुभण्डन्ति एत्थ पञ्चसु कोट्ठासेसु पुरिमद्वयं थावरं, पच्छिमत्तयं गरुभण्डन्ति वेदितब्बं । जानापेत्वाति भिक्खुसङ्घं जानापेत्वा । कप्पियमञ्चा सम्पटिच्छितब्बाति “सङ्घस्स देमा”ति दिन्नं सन्धाय वुत्तं । सचे पन “विहारस्स देमा”ति वदन्ति, सुवण्णरजतमयादिकप्पियमञ्चेपि सम्पटिच्छितुं वट्टति । न केवलं...पे०... परिवत्तेतुं वट्टन्तीति इमिना अथावरेन थावरम्पि अथावरम्पि परिवत्तेतुं वट्टतीति दस्सेति । थावरेन अथावरमेव हि परिवत्तेतुं न वट्टति । अकप्पियं वा महग्घं कप्पियं वाति एत्थ अकप्पियं नाम सुवण्णमयमञ्चादि अकप्पियभिसिबिम्बोहनानि च । महग्घं कप्पियं नाम दन्तमयमञ्चादि पावारादिकप्पियअत्थरणादीनि च ।

पारिहारियं न वट्टतीति अत्तनो सन्तकं विय गहेत्वा परिहरितुं न वट्टति । “गिहिविकतनीहारेनेव परिभुज्जितब्ब”न्ति इमिना सचे आरामिकादयो पटिसामेत्वा पटिदेन्ति, परिभुज्जितुं वट्टतीति दस्सेति । “पण्णसूचि नाम लेखनी”ति महागण्ठपदे वुत्तं ।

“अट्ठुबाहूति कप्परतो पट्टाय याव अंसकूट”न्ति गण्ठपदेसु वुत्तं । अट्ठुबाहु नाम विदत्थिचतुरङ्गुलन्तिपि वदन्ति । तत्थजातकाति सङ्घिकभूमियं जाता । अट्ठुङ्गुलसूचिदण्डमत्तोति दीघतो अट्ठुङ्गुलमत्तो परिणाहतो पण्णसूचिदण्डमत्तो । मुञ्जपब्बजानयेव पाळियं विसुं आगतत्ता “मुञ्जं पब्बजञ्च ठपेत्वा”ति वुत्तं । अट्ठुङ्गुलप्पमाणोति दीघतो अट्ठुङ्गुलप्पमाणो । घट्टनफलकं नाम यत्थ ठपेत्वा रजितचीवरं हत्थेन घट्टेन्ति । घट्टनमुग्गरो नाम अनुवातादिघट्टनत्थं कतोति वदन्ति । अम्बणन्ति फलकेहि पोक्खरणीसदिसं कतपानीयभाजनं । रजनदोणीति यत्थ पक्करजनं आकिरित्वा ठपेन्ति । भूमत्थरणं कातुं वट्टतीति अकप्पियचम्मं सन्धाय वुत्तं । पच्चत्थरणगतिकन्ति इमिना मञ्चपीठेपि अत्थरितुं

वट्टतीति दीपेति । पावारादिपच्चत्थरणम्पि गरुभण्डन्ति एके, नोति अपरे, वीमंसित्वा गहेतब्बं । मुट्ठिपण्णन्ति तालपण्णं सन्धाय वुत्तं ।

### नवकम्मदानकथावण्णना

३२३. किञ्चिदेव समादपेत्वा कारेस्सतीति सामिकोयेव कञ्चि भिक्खुं समादपेत्वा कारेस्सति । उतुकाले पटिबाहितुं न लभतीति हेमन्तगिम्हेसु अञ्जे सम्पत्तिभिक्खू पटिबाहितुं न लभति । तिभागन्ति ततियभागं । सचे सद्धिविहारिकानं दातुकामो होतीति सचे सो सङ्खस्स भण्डकठपनट्टानं वा नवकानं वा वसनट्टानं दातुं न इच्छति, अत्तनो सद्धिविहारिकानञ्जेव दातुकामो होतीति अत्थो । एतज्झि सद्धिविहारिकानं दातुं लभतीति एतं ततियभागं उपट्ठुभागं वा दातुं लभति । अकतट्टानेति सेनासनतो बहि चयादीनं अकतट्टाने । बहिकुट्टेति कुट्टतो बहि ।

### अञ्जत्रपरिभोगपटिक्खेपादिकथावण्णना

३२४. चक्कलिकन्ति कम्बलादीहि वेठेत्वा चक्कसण्ठानेन पादपुञ्छनयोगं कतं । परिभण्डकता भूमि नाम सण्हमत्तिकाहि कता काळवण्णादिभूमि । सेनासनं मञ्चपीठादि । तथेव वळ्ज्जेतुं वट्टतीति अञ्जेहि आवासिकभिक्खूहि परिभुत्तनीहारेन परिभुज्जितुं वट्टति । “नेवासिका पकतिया अनत्थताय भूमिया ठपेन्ति चे, तेसम्पि अनापत्तियेवा”ति गण्ठपदेसु वुत्तं । द्वारम्पीति आदिना वुत्तद्वारवातपानादयो अपरिकम्मकतापि न अपस्सयितब्बा । लोमेसूति लोमेसु फुसन्तेसु ।

### सङ्गभत्तादिअनुजाननकथावण्णना

३२५. उद्देसभत्तं निमन्तनन्ति इमं वोहारं पत्तानीति एत्थ इति-सद्धो आदिअत्थो, “उद्देसभत्तं निमन्तन”न्ति आदिवोहारं पत्तानीति अयमेत्थ अत्थो । तम्पि अन्तो कत्वाति आर्यतिं भिक्खूनं कुक्कुच्चविनोदनत्थाय तम्पि सङ्गभत्तं अन्तो कत्वा ।

### उद्देसभत्तकथावण्णना

अत्तनो विहारद्वारेति विहारस्स द्वारकोट्टकसमीपं सन्धाय वुत्तं । भोजनसालायाति भत्तुद्देसट्टानभूताय भोजनसालाय । “दिन्नं पना”ति वत्वा यथा सो दायको देति, तं विधिं दस्सेतुं “सङ्गतो भन्ते”ति आदिमाह । अन्तरघरेति अन्तोगेहे । अन्तोउपचारगतानन्ति एत्थ गामद्वारवीथिचतुक्केसु द्वादसहत्थम्भन्तरं अन्तोउपचारो नाम । अन्तरघरस्स उपचारे पन लब्धमानविसेसं दस्सेतुं “घरूपचारो चेत्था”ति आदिमाह । एकवळ्ज्जन्ति एकेन द्वारेन वळ्ज्जितब्बं । नानानिवेसनेसूति नानाकुलस्स निवेसनेसु । लज्जी पेसलो अगतिगमनं वज्जेत्वा मेधावी च उपपरिक्खित्वा उद्धिसिस्सतीति आह “पेसलो लज्जी मेधावी इच्छितब्बो”ति । निसिन्नस्सपि निद्वायन्तस्सपीति अनादरे सामिवचनं । तिचीवरपरिवारन्ति एत्थ “उदकपत्तलाभी विय अञ्जोपि उद्देसभत्तं अलभित्वा वत्थादिमनेकप्पकारकं लभति चे, तस्सेव त”न्ति गण्ठपदेसु वुत्तं । अत्तनो रुचिवसेन यं किञ्चि वत्वा आहरितुं विस्सज्जितत्ता विस्सट्टुतो नाम । यं इच्छतीति “उद्देसपत्तं देथा”ति आदीनि वदन्तो यं इच्छति । पुच्छासभागेनाति पुच्छासदिसेन ।

“एका कूटट्टितिका नाम होती”ति वत्वा तमेव ठितिकं विभावेन्तो “रज्जो वा ही”ति आदिमाह । अञ्जेहि

उद्देसभत्तेहि अमिस्सेत्वा विसुंयेव ठितिकाय गहेतब्बत्ता “एकचारिकभत्तानी”ति वुत्तं। थेय्याय हरन्तीति पत्तहारका हरन्ति। गीवा होतीति आणापकस्स गीवा होति। “मनुस्सानं वचनं कातुं वट्टती”ति गच्छन्तीति “मनुस्सानं वचनं कातुं वट्टती”ति तेन भिक्खुना वुत्ता गच्छन्ति। अकतभागो नामाति आगन्तुकभागो नाम। “सब्बो सङ्घो परिभुज्जतू”ति वुत्तेति एत्थ “पठममेव ‘सब्बं सङ्घिकं पत्तं देथा’ति वत्वा पच्छा ‘सब्बो सङ्घो परिभुज्जतू’ति अवुत्तेपि भाजेत्वाव परिभुज्जितब्ब”न्ति गण्ठपदेसु वुत्तं।

### निमन्तनभक्तकथावण्णना

“एत्तके भिक्खू सङ्घतो उद्दिसित्वा देथा”ति आदीनि अवत्वा “एत्तकानं भिक्खून् भत्तं गणहथा”ति वत्वा दिन्नं सङ्घिकं निमन्तनं नाम। पिण्डपातिकानमि वट्टतीति भिक्खापरियायेन वुत्तत्ता वट्टति। पटिपाटियाति लद्धपटिपाटिया। विच्छिन्दित्वाति “भत्तं गणहथा”ति पदं अवत्वा। तेनेवाह “भत्तन्ति अवदन्तेना”ति। आलोपसङ्केपेनाति एकेकपिण्डवसेन। अयञ्च नयो निमन्तनेयेव, न उद्देसभत्ते। तत्थ हि एकस्स पहोनकप्पमाणंयेव भाजेतब्बं, तस्मा उद्देसभत्ते आलोपट्टितिका नाम नत्थि। अच्छतीति तिड्ढति। “एकवारन्ति याव तस्मिं आवासे वसन्ति भिक्खू, सब्बे लभन्ती”ति गण्ठपदेसु वुत्तं। अयं पनेत्थ अधिप्पायो — एकवारन्ति न एकदिवसं सन्धाय वुत्तं, यत्तका पन भिक्खू तस्मिं आवासे वसन्ति, ते सब्बे। एकस्मिं दिवसे गहितभिक्खू अज्जदा अगगहेत्वा याव एकवारं सब्बे भिक्खू भोजिता होन्ति, ताव ये जानन्ति, ते गहेत्वा गन्तब्बन्ति।

### सलाकभक्तकथावण्णना

उपनिबन्धित्वाति लिखित्वा। निग्गहेन दत्त्वाति अनिच्छन्तमि निग्गहेन सम्पटिच्छापेत्वा। एकगेहवसेनाति एकाय घरपाळिया वसेन। उद्दिसित्वाति “तुह्मञ्च तुह्मञ्च पापुणाती”ति वत्वा। दूरत्ता निग्गहेत्वापि वारेन गाहेतब्बगामो वारगामो। विहारवारे नियुत्ता विहारवारिका, वारेन विहाररक्खणका। अज्जथत्तन्ति पसादज्जथत्तं। फातिकम्ममेव भवन्तीति विहाररक्खणत्थाय सङ्घेन दातब्बअतिरेकलाभा होन्ति। सङ्घनवकेन लद्धकालेति दिवसे दिवसे एकेकस्स पापितानि द्वे तीणि एकचारिकभत्तानि तेनेव नियामेन अत्तनो पापुणनट्टाने सङ्घनवकेन लद्धकाले। यस्स कस्सचि सम्मुखीभूतस्स पापेत्वाति एत्थ “येभ्य्येन चे भिक्खू बहिसीमगता होन्ति, सम्मुखीभूतस्स यस्स कस्सचि पापेतब्बं सभागत्ता एकेन लद्धं सब्बेसं होति, तस्मिम्पि असति अत्तनो पापेत्वा दातब्ब”न्ति गण्ठपदेसु वुत्तं। रससलाकन्ति उच्छुरससलाकं।

“सङ्घतो निरामिससलाकापि विहारे पक्कभत्तमि वट्टतियेवा”ति साधारणं कत्वा विसुद्धिमग्गे (विसुद्धि० १.२६) वुत्तत्ता “एवं गाहिते सादितब्बं, एवं न सादितब्बं”न्ति विसेसेत्वा अवुत्तत्ता च भेसज्जादिसलाकायो चेत्थ किञ्चापि पिण्डपातिकानमि वट्टन्ति, सलाकवसेन गाहितत्ता पन न सादितब्बाति एत्थ अधिप्पायो वीमंसितब्बो। यदि हि भेसज्जादिसलाका सलाकवसेन गाहिता न सादितब्बा सिया, सङ्घतो निरामिससलाका वट्टतियेवाति न वदेय्य, “अतिरेकलाभो सङ्घभत्तं उद्देसभत्त”न्ति आदिवचनतो (महाव० १२८) “अतिरेकलाभं पटिक्खिपामी”ति सलाकवसेन गाहेतब्बं भत्तमेव पटिक्खित्तं, न भेसज्जं। सङ्घभत्तादीनि हि चुद्दस भत्तानियेव तेन न सादितब्बानीति वुत्तानि, खन्धकभाणकानं वा मतेन इध एवं वुत्तन्ति गहेतब्बं। अगगतो दातब्बभिक्खा अगगभिक्खा। लद्धा वा अलद्धा वाति लभित्वा वा अलभित्वा वा। निबद्धाय अगगभिक्खाय अप्पमत्तिकाय एव सम्भवतो लभित्वापि पुनदिवसे गणितुं वुत्तं। अगगभिक्खामत्तन्ति हि एत्थ मत्त-सद्दो बहुभावं निवत्तेति।



सलाकभत्तं नाम विहारेयेव उद्दिशीयति विहारमेव सन्धाय दिव्यमानत्ताति आह “विहारे अपापितं पना”तिआदि । तत्र आसनसालायाति तस्मिं गामे आसनसालाय । विहारं आनेत्वा गाहेतब्बन्ति तथा वत्वा तस्मिं दिवसे दिन्नभत्तं विहारमेव आनेत्वा ठितिकाय गाहेतब्बं । तत्थाति तस्मिं दिसाभागे । तं गहेत्वाति तं वारगामसलाकं अत्तना गहेत्वा । तेनाति यो अत्तनो पत्तं वारगामसलाकं दिसंगमिकस्स अदासि, तेन । अनतिक्कन्तेयेव तस्मिं तस्स सलाका गाहेतब्बाति यस्मा उपचारसीमट्टस्सेव सलाका पापुणाति, तस्मा तस्मिं दिसंगमिके उपचारसीमं अनतिक्कन्तेयेव तस्स दिसंगमिकस्स पत्तसलाका अत्तनो पापेत्वा गहेतब्बा ।

अनागतदिवसेति एत्थ कथं तेसं भिक्खूनां आगतानागतभावो विज्जायतीति चे? यस्मा ततो ततो आगता भिक्खू तस्मिं गामे आसनसालाय सन्निपतन्ति, तस्मा तेसं आगतानागतभावो सक्का विज्जातुं । अम्हाकं गोचरगामेति सलाकभत्तदायकानं गामे । भुज्जितुं आगच्छन्तीति “महाथेरो एककोव विहारे ओहीनो अवस्सं सब्बसलाका अत्तनो पापेत्वा ठितो”ति मज्जमाना आगच्छन्ति ।

### पक्खिकभत्तादिकथावण्णना

अभिलक्खितेसु चतूसु पक्खदिवसेसु दातब्बभत्तं पक्खिकं । अभिलक्खितेसूति एत्थ अभीति उपसगमत्तं, लक्खणीयेसु इच्चेव अत्थो, उपोसथसमादानधम्मस्सवनपूजासक्कारादिकरणत्थं लक्खितब्बेसु सल्लक्खेतब्बेसु उपलक्खेतब्बेसूति वुत्तं होति । स्वे पक्खोति “अज्ज पक्खिकं न गाहेतब्बं”न्ति पक्खिकस्स अनियमत्ता वुत्तं । “स्वे अम्हाकं घरे लूखभत्तं भविस्सती”ति पोत्थकेसु लिखन्ति, “पक्खभत्तं भविस्सती”ति पाठेन भवितब्बं । उपोसथे दातब्बं भत्तं उपोसथिकं । निबन्धापितन्ति “असुकविहारस्सा”ति नियमितं । गाहेत्वा भुज्जितब्बन्ति तस्मिं सेनासने वसन्तोहि ठितिकाय गाहेत्वा भुज्जितब्बं । तण्डुलादीनिपेसेन्ति...पे०... वट्टतीति अभिहट्ठिक्खत्ता वट्टति । तथा पटिग्गहितत्ताति भिक्खानामेन पटिग्गहितत्ता । पत्तं पूरेत्वा थकेत्वा दिन्नन्ति “गुळकभत्तं देमा”ति दिन्नं । गुळपिण्डेपि...पे०... दातब्बोति एत्थ गुळपिण्डं तालपक्कप्पमाणन्ति वेदितब्बं । सेसमेत्थ सुविज्जेय्यमेवाति ।

सेनासनक्खन्धकवण्णना निट्ठिता ।

## ७. सङ्गभेदकक्खन्धकं

### छसक्यपब्बज्जाकथावण्णना

३३०. सङ्गभेदकक्खन्धके अनुपियायन्तिआदीसु “अनुपिया नामा”ति वत्तब्बे आकारस्स रस्सत्तं अनुनासिकस्स च आगमं कत्वा “अनुपियं नामा”ति वुत्तं । मल्लानन्ति मल्लराजूनं । न हेट्ठा पासादा ओरोहतीति उपरिपासादतो हेट्ठिमत्तलं न ओरोहति, “हेट्ठापासाद”न्तिपि पठन्ति । अनुरुद्धो वा पब्बाजेय्याति योजेतब्बं । घरावासत्थन्ति घरावासस्स अनुच्छविकं कम्मं । उदकं अभिनेतब्बन्ति उदकं आहरितब्बं । निन्नेतब्बन्ति आभतमुदकं पुन नीहरितब्बं । निद्धापेतब्बन्ति अन्तरन्तरा उट्ठिततिणानि उद्धरित्वा अपनेतब्बं । लवापेतब्बन्ति परिपक्ककाले लवापेतब्बं । उब्बाहापेतब्बन्ति खलमण्डलं हरापेतब्बं । उज्जुं कारापेतब्बन्ति पुज्जं कारापेतब्बं । पलालानि उद्धरापेतब्बानीति पलालानि अपनेतब्बानि । भुसिका उद्धरापेतब्बाति गुन्नं खुरग्गेहि सज्झिन्ना भुससङ्घाता नाळदण्डा अपनेतब्बा । ओपुनापेतब्बन्ति वातमुखे ओपुनापेत्वा पलालं अपनेतब्बं । अतिहरापेतब्बन्ति अन्तोकोट्टागारं उपनेतब्बं । न कम्माति न

कम्मानि । घरावासत्थेनाति उपयोगत्थे करणवचनं । उपजानाहीति च उपसगमत्तो उप-सद्धो । तेनाह “घरावासत्थं जानाही”ति । जानाहीति चेत्थ पटिपज्जाति अत्थो वेदितब्बो । अकामकाति अनिच्छमाना ।

३३१-३३२. यं न निवत्तोति यस्मा न निवत्तो । सुज्जागारगतोति (उदा० अट्ठ० २०) “ठपेत्वा गामञ्च गामूपचारञ्च अवसेसं अरञ्ज”न्ति (पारा० ९२) वुत्तं अरञ्जं रुक्खमूलञ्च ठपेत्वा अञ्जं पब्बतकन्दरादि पब्बजितसारुप्यं निवासट्ठानं जनसम्बाधाभावतो इध “सुज्जागार”न्ति अधिप्पेतं । अथ वा ज्ञानकण्टकानं सद्धानं अभावतो विवित्तं यं किञ्चि अगारम्पि “सुज्जागार”न्ति वेदितब्बं । तं सुज्जागारं उपगतो । अभिक्खणन्ति बहुलं । उदानं उदानेसीति सो हि आयस्मा अरञ्जे दिवाविहारं उपगतोपि रत्तिवासूपगतोपि येभ्य्येन फलसमापत्तिसुखेन निरोधसमापत्तिसुखेन च वीतिनामेसि, तस्मा तं सुखं सन्धाय पुब्बे अत्तना अनुभूतं सभयं सपरिळाहं रज्जसुखं जिगुच्छित्वा “अहो सुखं अहो सुखं”न्ति सोमनस्ससहितजाणसमुट्ठानं पीतिसमुग्गारं समुगिरति । ते भिक्खू भगवन्तं एतदवोचुन्ति ते सम्बहुला भिक्खू उल्लुम्पनसभावसण्ठिता तस्स अनुगणहनाधिप्पायेन भगवन्तं एतदवोचुं, न उज्झानवसेन । निस्संसयन्ति असन्देहेन, एकन्तेनाति अत्थो । ते किर भिक्खू पुथुज्जना तस्स आयस्मतो विवेकसुखं सन्धाय उदानं अजानन्ता एवमाहंसु । समनुस्सरन्तोति उक्कण्ठनवसेन अनुस्सरन्तो ।

अञ्जतरन्ति नामगोत्तेन अपाकटं एकं भिक्खुं । आमन्तेसीति आणापेसि ते भिक्खू सज्जापेतुकामो । एवन्ति वचनसम्पटिग्गहे, साधूति अत्थो । एवं भन्तेति एत्थ पन एवं-सद्धो पटिज्जायं । “अभिक्खणं ‘अहो सुखं अहो सुखं’न्ति इमं उदानं उदानेसी”ति यथा ते भिक्खू वदन्ति, तं एवं तथेवाति अत्तनो उदानं पटिजानाति । “किं पन त्वं भद्विया”ति कस्मा भगवा पुच्छति, किं तस्स चित्तं न जानातीति? नो न जानाति, तेनेव पन तमत्थं वदापेत्वा ते भिक्खू सज्जापेतुं पुच्छति । वुत्तहेतं “जानन्तापि तथागता पुच्छन्ति, जानन्तापि न पुच्छन्ती”तिआदि (पारा० १६, १९४) । अत्थवसन्ति कारणं ।

अन्तोपि अन्तेपुरेति इत्थागारस्स सञ्चरणट्ठानभूते राजगेहस्स अब्भन्तरे, यत्थ राजा नहानभोजनसयनादिं कप्पेति । रक्खा सुसंविहिताति आरक्खादिकतपुरिसेहि गुत्ति सुट्ठु समन्ततो विहिता । बहिपि अन्तेपुरेति अट्टकरणट्ठानादिके अन्तेपुरतो बहिभूते राजगेहे । एवं रक्खितो गोपितो सन्तोति एवं राजगेहराजधानीरज्जदेसेसु अन्तो बहि च अनेकेसु ठानेसु अनेकसतेहि सुसंविहितरक्खावरणगुत्तिया ममेव निब्भयत्थं फासुविहारत्थं रक्खितो गोपितो समानो । भीतोतिआदीनि पदानि अञ्जमञ्जवेवचनानि । अथ वा भीतोति परराजूहि भायमानो । उब्बिग्गोति सकरज्जेपि पकतिक्खोभतो उपपज्जनकभयुब्बेगेन उब्बिग्गो चलितो । उस्सङ्कीति “रज्जा नाम सब्बकालं अविस्सत्थेन भवितब्ब”न्ति वचनतो सब्बत्थ अविस्सासनवसेन तेसं तेसं किच्चकरणीयानं अच्चयतो उपपज्जनकपरिसङ्काय च उद्धमुद्धं सङ्कमानो । उत्रासीति “सन्तिकावचरेहिपि अजानन्तस्सेव मे कदाचि अनत्थो भवेय्या”ति उपपन्नेन सरीरकम्पम्पि उप्पादनसमत्थेन तासेन उत्रासि । “उत्रस्तो”तिपि पठन्ति । विहरामीति एवंभूतो हुत्वा विहरामि ।

एतरहीति इदानि पब्बजितकालतो पट्टाय । एकोति असहायो । तेन विवेकट्टकायतं दस्सेति । अभीतोतिआदीनं पदानं वुत्तविपरियायेन अत्थो वेदितब्बो । भयादिनिमित्तस्स परिग्गहस्स तंनिमित्तस्स च किलेसगहनस्स अभावेनेवस्स अभीतादिताति एतेन चित्तविवेकं दस्सेति । अप्पोस्सुक्कोति सरीरगुत्तियं निरुस्सुक्को । पन्नलोमोति लोमहंसुप्पादकस्स छम्भितत्तस्स अभावेन अनुगतलोमो । पदद्वयेनपि सेरिविहारं दस्सेति । परदत्तवुत्तोति परेहि दिन्नेन चीवरादिना वत्तमानो । एतेन सब्बसो सङ्गाभावदीपनमुखेन अनवसेसभयहेतुविरहं दस्सेति । मिगभूतेन चेतसाति विस्सत्थविहारिताय मिगस्स विय जातेन चित्तेन । मिगो हि अमनुस्सपथे अरञ्जे वसमानो विस्सत्थो तिट्ठति निसीदति निपज्जति येनकामञ्च पक्कमति

अप्पटिहतचारो, एवं अहम्पि विहरामीति दस्सेति । वुत्तज्जेतं पच्चेकसम्बुद्धेन —

“मिगो अरज्जमिह यथा अबद्धो ।

येनिच्छकं गच्छति गोचराय ।

विज्जू नरो सेरित पेक्खमानो ।

एको चरे खग्गविसाणकप्पो”ति ॥ (सु० नि० ३९; अप० थेर १.१.९५) ।

**इमं खो अहं, भन्ते, अत्थवसन्ति** भगवा यदिदं मम एतरहि परमं विवेकसुखं फलसमापत्तिसुखं, इदमेव कारणं सम्पस्समानो “अहो सुखं, अहो सुखं”न्ति उदानेमि । **एतमत्थन्ति** एतं भद्वियत्थेरस्स पुथुज्जनविसयातीतं विवेकसुखसङ्घातं अत्थं सब्बाकारतो विदित्वा । **इमं उदानन्ति** इमं सहेतुकभयसोकविगमानुभावदीपकं उदानं उदानेसि ।

**यस्सन्तरतो न सन्ति कोपाति** यस्स अरियपुग्गलस्स अन्तरतो अब्भन्तरे अत्तनो चित्ते चित्तकालुस्सियकरणतो चित्तप्पकोपा रागादयो आघातवत्थुआदिकारणभेदतो अनेकभेदा दोसकोपा एव वा न सन्ति, मग्गेन पहीनत्ता न विज्जन्ति । अयज्झि **अन्तर-**सद्दो किञ्चापि “मज्ज त्वज्ज किमन्तर”न्तिआदीसु (सं० नि० १.२२८) कारणे दिस्सति, “अन्तरद्दुके हिमपातसमये”तिआदीसु (महाव० ३४६) वेमज्झे, “अन्तरा च जेतवनं अन्तरा च सावत्थि”न्तिआदीसु (उदा० १३, ४४) विवरे, “भयमन्तरतो जात”न्तिआदीसु (इतिवु० ८८; महानि० ५) चित्ते, इधापि चित्ते एव दट्ठब्बो । तेनेवाह “**यस्स चित्ते कोपा न सन्ती**”ति ।

**अभव-सद्दस्स विभव-सद्देन** अत्थुद्धारे कारणमाह “**विभवोति च अभवोति च अत्थतो एक**”न्ति । इति-सद्दो पकारवचनोति आह “**इति अनेकप्पकारा भवाभवता**”ति । **वीतिवत्तोति** अतिक्कन्तो । एत्थ च “यस्सा”ति इदं यो वीतिवत्तोति विभत्तिविपरिणामवसेन योजेतब्बं । तं **विगतभयन्ति** तं एवरूपं यथावुत्तगुणसमन्नागतं खीणासवं चित्तकोपाभावतो इतिभवाभवसमतिक्कमनतो च भयहेतुविगमेन विगतभयं । विवेकसुखेन अग्गफलसुखेन च **सुखिं**, विगतभयत्ता एव **असोकं** । **देवा नानुभवन्ति दस्सनायाति** अधिगतमग्गे ठपेत्वा सब्बेपि उपपत्तिदेवा वायमन्तापि चित्तचारदस्सनवसेन दस्सनाय दट्ठं नानुभवन्ति न अभिसम्भुणन्ति न सक्कोन्ति, पगेव मनुस्सा । सेक्खापि हि पुथुज्जना विय अरहतो चित्तप्पवर्ति न जानन्ति । **तस्स दस्सनं देवानम्पि दुल्लभन्ति** एत्थापि चित्तचारदस्सनवसेन तस्स दस्सनं देवानम्पि दुल्लभं अलब्भनीयं, देवेहिपि तं दस्सनं न सक्का पापुणितुन्ति एवमत्थो गहेतब्बो । अभावत्थो हेत्थ **दु-**सद्दो “**दुप्पज्जो**”तिआदीसु विय ।

**३३३. भत्ताभिहारोति** अभिहरितब्बभत्तं । तस्स पन पमाणं दस्सेतुं “**पज्ज च थालिपाकसतानी**”ति वुत्तं । तत्थ एको थालिपाको दस्सनं पुरिसानं भत्तं गण्हाति । **लाभसक्कारसिलोकेनाति** एत्थ **लाभो** नाम चतुपच्चयलाभो । **सक्कारोति** तेसंयेव सुकतानं सुसङ्घतानं लाभो । **सिलोकोति** वण्णघोसो । **मनोमयं कायन्ति** ज्ञानमनेन निब्बत्तं ब्रह्मकायं । **उपपन्नोति** उपगतो । **अत्तभावप्पटिलाभोति** सरीरपटिलाभो । **द्वे वा तीणि वा मागधकानि गामखेत्तानीति** एत्थ **मागधकं गामखेत्तं** अत्थि खुद्दकं, अत्थि मज्झिमं, अत्थि महन्तं । **खुद्दकं गामखेत्तं** इतो चत्तालीस उसभानि, एत्तो चत्तालीस उसभानीति गावुतं होति । **मज्झिमं** इतो गावुतं, एत्तो गावुतन्ति अट्ठयोजनं होति । **महन्तं** इतो दियट्ठगावुतं, एत्तो दियट्ठगावुतन्ति तिगावुतं होति । तेसु खुद्दकेन गामखेत्तेन तीणि, खुद्दकेन च मज्झिमेन च द्वे गामखेत्तानि तस्स अत्तभावो । तिगावुतज्झिस्स सरीरं । **परिहरिस्सामीति** पटिजग्गिस्सामि गोपयिस्सामि । **रक्खस्सेतन्ति** रक्खस्सु एतं ।

### पञ्चसत्थुकथावण्णना

३३४. सत्थारोति गणसत्थारो । नास्सस्साति न एतस्स भवेय्य । तन्ति तं सत्थारं । तेनाति अमनापेन । समुदाचरेय्यामाति कथेय्याम । सम्मन्नतीति अम्हाकं सम्मानं करोति । तेनाह “सम्मानेती”ति, सम्मन्नतीति वा परेहि सम्मानीयतीति अत्थो ।

३३५. नासाय पित्तं भिन्देय्युन्ति अच्छपित्तं वा मच्छपित्तं वा नासापुटे पक्खिपेय्युं । पराभवायाति अवड्ढिया विनासाय । अस्सतरीति वळवाय कुच्छिस्मिं गद्रभस्सजाता, तं अस्सेन सद्धिं सम्पयोजेन्ति, सा गब्भं गण्हित्वा काले सम्पत्ते विजायितुं न सक्कोति, पादेहि भूमिं पहरन्ती तिड्ढति, अथस्सा चत्तारो पादे चतूसु खाणुकेसु बन्धित्वा कुच्छिं फालेत्वा पोतकं नीहरन्ति, सा तत्थेव मरति । तेन वुत्तं “अत्तवधाय गब्भं गण्हाती”ति ।

३३९. पोत्थनिकन्ति छुरिकं, यं खरन्तिपि वुच्चति ।

### नाळागिरिपेसनकथावण्णना

३४२. मा कुञ्जर नागमासदोति भो, कुञ्जर, बुद्धनागं वधकचित्तेन मा उपगच्छ । दुक्खन्ति दुक्खकारणत्ता दुक्खं । कथं तं दुक्खन्ति आह “न हि नागहतस्सा”तिआदि । नागहतस्स सुगतिपटिकखेपेन बुद्धनागस्स घातो दुग्गतिदुक्खकारणन्ति दस्सेति । इतोति इतो जातितो । यतोति यस्मा । इतो परं यतोति इतो परं गच्छन्तस्साति वा अत्थो । मदोति मानमदो । पमादोति पमत्तभावो । पटिकुटितोति सङ्कुटितो । अलक्खिकोति अहिरिको । यत्र हि नामाति यो नाम ।

### पञ्चवत्थुयाचनकथावण्णना

३४३. तिकभोजनन्ति तीहि भुज्जितब्बभोजनं, तिण्णं एकतो पटिग्गहेत्वा भुज्जितुं पञ्चपेस्सामीति अत्थो । कोकालिकोतिआदीनि चतुन्नं देवदत्तपक्खियानं गणपामोक्खानं नामानि । आयुकप्पन्ति एकं महाकप्पं असीतिभागं कत्वा ततो एकभागमत्तं कालं अन्तरकप्पसज्जितं कालं ।

आयस्मन्तं आनन्दं एतदवोचाति (उदा० अट्ठ० ४८) देवदत्तो सब्बं सङ्गभेदस्स पुब्बभागं निष्पादेत्वा “एकंसेनेव अज्ज आवेणिकं उपोसथं सङ्गकम्मञ्च करिस्सामी”ति चिन्तेत्वा एतं “अज्जतग्गे”तिआदिवचनं अवोच । तत्थ अज्जत्रेव भगवताति विना एव भगवन्तं, तं सत्थारं अकत्वाति अत्थो । अज्जत्र भिक्खुसङ्गा उपोसथं करिस्सामि सङ्गकम्मानि चाति भगवतो ओवादकारकं भिक्खुसङ्गं विना मं अनुवत्तन्तेहि भिक्खूहि सद्धिं आवेणिकं उपोसथं सङ्गकम्मानि च करिस्सामि । अज्जतग्गे, भन्ते, देवदत्तो सङ्गं भिन्दिस्सतीति भेदकारकानं सब्बेसं देवदत्तेन सज्जितत्ता “एकंसेनेव देवदत्तो अज्ज सङ्गं भिन्दिस्सती”ति मज्जमानो एवमाह । भिन्दिस्सतीति द्विधा करिस्सति ।

एतमत्थं विदित्वाति एतं अवीचिमहानिरयुप्पत्तिसंवत्तनियं कप्पट्टियं अतेकिच्छं देवदत्तेन निब्बत्तियमानं सङ्गभेदकम्मं सब्बाकारतो विदित्वा । इमं उदानन्ति कुसलाकुसलेसु यथाक्कमं सप्पुरिसासप्पुरिसानं सुकरा पटिपत्ति, न पन नेसं अकुसलकुसलेसूति इदमत्थविभावनं उदानं उदानेसि ।

तत्थ सुकरं साधुना साधूति अत्तनो परेसञ्च हितं साधेतीति साधु, सम्मापटिपन्नो । तेन साधुना सारिपुत्तादिना

सावकेन पच्चेकसम्बुद्धेन सम्मासम्बुद्धेन अज्जेन वा लोकियसाधुना साधु सुन्दरं भद्रकं अत्तनो परेसञ्च हितसुखावहं सुकरं सुखेन कातुं सक्का । साधु पापेन दुक्करन्ति तदेव पन वुत्तलक्खणं साधु पापेन देवदत्तादिना पापपुग्गलेन दुक्करं कातुं न सक्का, न सो तं कातुं सक्कोतीति अत्थो । पापं पापेन सुकरन्ति पापं असुन्दरं अत्तनो परेसञ्च अनत्थावहं पापेन यथावुत्तपापपुग्गलेन सुकरं सुखेन कातुं सक्कुण्येयं । पापमरियेहि दुक्करन्ति अरियेहि पन बुद्धादीहि तं पापं दुक्करं दुरभिसम्भवं । सेतुघातोयेव हि तेसं तत्थाति दीपेति ।

### सङ्गभेदकथावण्णना

३४५. अथ खो आयस्मा सारिपुत्तो आदेसनापाटिहारियानुसासनियाति आदीसु परस्स चित्तं जत्वा कथनं आदेसनापाटिहारियं, सावकानञ्च बुद्धानञ्च सततं धम्मदेसनं अनुसासनीपाटिहारियं, इद्धिविधं इद्धिपाटिहारियं । तत्थ इद्धिपाटिहारियेन सद्धिं अनुसासनीपाटिहारियं महामोग्गल्लानत्थेरस्स आचिण्णं, आदेसनापाटिहारियेन सद्धिं अनुसासनीपाटिहारियं धम्मसेनापतिस्स । तेन वुत्तं “आयस्मा सारिपुत्तो आदेसनापाटिहारियानुसासनिया भिक्खू धम्मिया कथाय ओवदी”ति आदि । तदा हि द्वीसु अगगसावकेसु धम्मसेनापति तेसं भिक्खून् चित्तचारं जत्वा धम्मं देसेसि, महामोग्गल्लानत्थेरो विकुब्बनं दस्सेत्वा धम्मं देसेसि, पाळियञ्चेत्थ द्विन्नम्मि थेरानं देसनाय धम्मचक्खुपटिलाभोव दस्सितो । दीघभाणका पन एवं वदन्ति “भगवता पेसितेसु द्वीसु अगगसावकेसु धम्मसेनापति तेसं चित्तचारं जत्वा धम्मं देसेसि, थेरस्स धम्मदेसनं सुत्वा पञ्चसतापि भिक्खू सोतापत्तिफले पतिट्ठहिंसु । अथ नेसं महामोग्गल्लानत्थेरो विकुब्बनं दस्सेत्वा धम्मं देसेसि, तं सुत्वा सब्बे अरहत्तफले पतिट्ठहिंसू”ति । देवदत्तं उट्ठापेसीति जण्णुकेन हृदयमज्जे पहरित्वा उट्ठापेसि ।

३४६. सरसीति सरो । सुविक्खालितन्ति सुट्ठु विक्खालितं, सुविसोधितं कत्वाति अत्थो । संखादित्वाति सुट्ठु खादित्वा । महिं विकुब्बतोति महिं दन्तेहि विलिखन्तस्स । नदीसु भिसं घसानस्साति योजेतब्बं । नदीति चेत्थ महासरो अधिप्पेतो । जग्गतोति हत्थियूथं पालेन्तस्स । भिङ्कोवाति हत्थिपोतको विय । ममानुकुब्बन्ति मं अनुकरोन्तो ।

३४७. दूतेय्यन्ति दूतकम्मं । गन्तुमरहतीति दूतेय्यसङ्घातं सासनं हरितुं धारेत्वा हरितुं अरहति । सोताति यं अस्स सासनं देन्ति, तस्स सोता । सावेताति तं उगग्हित्वा “इदं नाम तुम्हेहि वुत्त”न्ति पटिसावेता । उगगहेताति सुउगग्हितं कत्वा उगगहेता । धारेताति सुधारितं कत्वा धारेता । विज्जाताति अत्तना तस्स अत्थं जानिता । विज्जापेताति परं विजानापेता । सहितासहितस्साति “इदं सहितं, इदं असहित”न्ति एवं सहितासहितस्स कुसलो उपगतानुपगतेसु छेको सासनं आरोचेन्तो सहितासहितं सल्लक्खेत्वा आरोचेति । न व्यथतीति न वेधति न छम्भति । उगगवादिनिन्ति फरुसवचनेन समन्नागतं । पुच्छितोति पटिज्जत्थाय पुच्छितो ।

३४८. अट्ठहि, भिक्खवे, असद्धमेहीति आदीसु असद्धमेहीति (इतिवु० अट्ठ० ८९) असतं धम्मेहि, असन्तेहि वा असोभनेहि वा धम्मेहि । अभिभूतोति अज्झोत्थटो । परियादिन्नचित्तोति खेपितचित्तो लाभादिहेतुकेन इच्छाचारेण मानमदादिना च खयं पापितकुसलचित्तो । अथ वा परियादिन्नचित्तोति परितो आदिन्नचित्तो, वुत्तप्पकारेण अकुसलकोट्टासेन यथा कुसलचित्तस्स उप्पत्तिवारो न होति, एवं समन्ततो गहितचित्तसन्तानोति अत्थो । अपाये निब्बत्तनारहताय आपायिको । तत्थपि अवीचिसङ्घाते महानिरये उप्पज्जतीति नेरयिको । एकं अन्तरकप्पं परिपुण्णमेव कत्वा तत्थ तिट्ठतीति कप्पट्टो । अतेकिच्छोति बुद्धेहिपि अनिवत्तनीयत्ता अवीचिनिब्बत्तिता तिकिच्छाभावतो अतेकिच्छो, अतिकिच्छनीयोति अत्थो । लाभेनाति लाभेन हेतुभूतेन । अथ वा लाभहेतुकेन मानादिना । लाभज्झि निस्साय इधेकच्चे

पुगला पापिच्छा इच्छापकता इच्छाचारे ठत्वा “लाभं निब्बत्तेस्सामा”ति अनेकविहितं अनेसनं अप्पतिरूपं आपज्जित्वा इतो चुता अपायेसु निब्बत्तन्ति । अपरे यथालाभं लभित्वा तंनिमित्तं मानातिमानमदमच्छरियादिवसेन पमादं आपज्जित्वा इतो चुता अपायेसु निब्बत्तन्ति, अयञ्च तादिसो । तेन वुत्तं “लाभेन, भिक्खवे, अभिभूतो परियादिन्नचित्तो देवदत्तो आपायिको”ति आदि । असक्कारेणाति हीळेत्वा परिभवित्वा परेहि अत्तनि पवत्तितेन असक्कारेन, असक्कारहेतुकेन वा मानादिना । असन्तगुणसम्भावनाधिप्पायेन पवत्ता पापा इच्छा एतस्साति पापिच्छो, तस्स भावो **पापिच्छता**, ताय । “अहं बुद्धो भविस्सामि, भिक्खुसङ्घं परिहरिस्सामी”ति हि तस्स इच्छा उप्पन्ना । कोकालिकादयो पापा लामका मित्ता एतस्साति पापमित्तो, तस्स भावो **पापमित्तता**, ताय ।

**३४९. अभिभूय्याति अभिभवित्वा मद्दित्वा ।**

**३५०. तीहि, भिक्खवे, असद्धमेहीति** आदि वुत्तनयमेव । **ओरमत्तकेन विसेसाधिगमेन अन्तरा वोसानं आपादीति** एत्थ पन अयमत्थो । **ओरमत्तकेनाति** अप्पमत्तकेन ज्ञानाभिज्जामत्तेन । **विसेसाधिगमेनाति** उत्तरिमनुस्सधम्मधिगमेन । **अन्तराति** वेमज्झो । **वोसानं आपादीति** अकतकिच्चोव समानो “कतकिच्चोम्ही”ति मज्जमानो समणधम्मतो विगमं आपज्जि । इदं वुत्तं होति — ज्ञानाभिज्जाहि उत्तरिकरणीये अधिगन्तब्बे मग्गफले अनधिगते सतियेव तं अनधिगन्त्वा समणधम्मतो विगमं आपज्जीति । इति भगवा इमिना सुत्तेन विसेसतो पृथुज्जनभावे आदीनवं पकासेति “भारियो पृथुज्जनभावो, यत्र हि नाम ज्ञानाभिज्जापरियोसाना सम्पत्तियो निब्बत्तेत्वापि अनेकानत्थावहं नानाविधदुक्खहेतुअसन्तगुणसम्भावनं असप्पुरिससंसग्गं आलसियानुयोगञ्च अविजहन्तो अवीचिसंवत्तनिकं कप्पट्टियं अतेकिच्छं किब्बिसं पसवती”ति ।

गाथासु माति पटिसेधे निपातो । **जातूति** एकंसेन । **कोचीति** सब्बसङ्गाहकवचनं । **लोकस्मिन्ति** सत्तलोके । इदं वुत्तं होति — इमस्मिं सत्तलोके कोचि पुगलो एकंसेन पापिच्छो मा होतूति । **तदमिनापि जानाथ, पापिच्छानं यथा गतीति** पापिच्छानं पुगलानं यथागति यादिसी निब्बन्ति यादिसो अभिसम्परायोति इमिनापि कारणेन जानाथाति देवदत्तं निदस्सेन्तो एवमाह ।

**पण्डितोति समज्जातोति** परियत्तिबाहुसच्चेन पण्डितोति जातो । **भावितत्तोति सम्मतोति** ज्ञानाभिज्जाहि भावितचित्तोति सम्भावितो । तथा हि सो “महिद्धिको गोधिपुत्तो, महानुभावो गोधिपुत्तो”ति धम्मसेनापतिनापि पसंसितो अहोसि । **जलंव यससा अट्टा, देवदत्तोति विस्सुतोति** अत्तनो कित्तिया परिवारेन च जलन्तो विय ओभासन्तो विय ठितो देवदत्तोति एवं विस्सुतो पाकटो अहोसि । “मे सुत”न्तिपि पाठो, मया सुतं सुतमत्तं, कतिपाहेनेव अतथाभूतत्ता तस्स तं पण्डिच्चादिसवनमत्तमेवाति अत्थो ।

**सो पमादं अनुचिण्णो, आसज्ज नं तथागतन्ति** सो एवंभूतो देवदत्तो “बुद्धोपि साकियपुत्तो, अहम्पि साकियपुत्तो, बुद्धोपि समणो, अहम्पि समणो, बुद्धोपि इद्धिमा, अहम्पि इद्धिमा, बुद्धोपि दिब्बचक्खुको, दिब्बसोतचेतोपरियजाणलाभी, बुद्धोपि अतीतानागतपच्चुप्पन्ने धम्मे जानाति, अहम्पि ते जानामी”ति अत्तनो पमाणं अजानित्वा सम्मासम्बुद्धं अत्तना समसमट्ठपनेन पमादं आपज्जन्तो “इदानीहं बुद्धो भविस्सामि, भिक्खुसङ्घं परिहरिस्सामी”ति अभिमारपयोजनादिना तथागतं आसज्ज आसादेत्वा विहेठेत्वा । “पमादमनुजिण्णो”तिपि पठन्ति । तस्सत्थो — पमादं वुत्तनयेन पमज्जन्तो पमादं निस्साय भगवता सद्धिं युगगाहचित्तुप्पादेन सहेव ज्ञानाभिज्जाहि अनुजिण्णो परिहीनोति । **अवीचिनिरयं पत्तो, चतुद्वारं भयानकन्ति** जालानं तत्थ उप्पन्नसत्तानं वा निरन्तरताय “अवीची”ति लद्धनामं चतूसु पस्सेसु चतुमहाद्वारयोगेन चतुद्वारं

अतिभयानकं महानिरयं पटिसन्धिगहणवसेन पत्तो । तथा हि वुत्तं —

“चतुक्कण्णो चतुद्वारो, विभत्तो भागसो मितो ।  
अयोपाकारपरियन्तो, अयसा पटिकुज्जितो ॥

“तस्स अयोमया भूमि, जलिता तेजसा युता ।  
समन्ता योजनसतं, फरित्वा तिष्ठति सब्बदा”ति ॥ (म० नि० ३.२५०, २६७; अ० नि० ३.३६) ।

अदुट्टस्साति अदुट्टचित्तस्स । दुब्भेति दुस्सेय्य । तमेव पापं फुसतीति तमेव अदुट्टदुब्भं पापपुग्गलं पापं निहीनं पापफलं फुसति पापुणाति अभिभवति । भेस्माति विपुलभावेन गम्भीरभावेन च भिसापनो, भिसापेन्तो विय विपुलगम्भीरोति अत्थो । वादेनाति दोसेन । उपहिंसतीति बाधति आसादेति । वादो तम्हि न रूहतीति तस्मिं तथागते परेन आरोपियमानो दोसो न रुहति न तिष्ठति, विसकुम्भो विय समुद्दस्स न तस्स विकारं जनेतीति अत्थो ।

एवं छहि गाथाहि पापिच्छतादिसमन्नागतस्स निरयूपगभावदस्सनेन दुक्खतो अपरिमुत्तिं दस्सेत्वा इदानि तप्पटिपक्खधम्मसमन्नागतस्स दुक्खक्खयं दस्सेन्तो “तादिसं मित्तं”न्ति ओसानगाथमाह । तस्सत्थो — यस्स सम्मा पटिपन्नस्स मग्गानुगो पटिपत्तिमगं अनुगतो सम्मा पटिपन्नो अप्पिच्छतादिगुणसमन्नागमेन सकलस्स वट्टदुक्खस्स खयं परियोसानं पापुण्येय्य, तादिसं बुद्धं बुद्धसावकं वा पण्डितो सप्पज्जो अत्तनो मित्तं कुब्बेथ तेन मेत्तिं करेय्य, तज्ज सेवेथ तमेव पयिरुपासेय्याति ।

किं पनेतं सुत्तं देवदत्तस्स निरयूपपत्तितो पुब्बे भासितं, उदाहु पच्छाति? इतिवुत्तकट्टकथायं (इतिवु० अट्ठ० ८९) ताव

“देवदत्ते हि अवीचिमहानिरयं पविट्ठे देवदत्तपक्खिका अज्जतित्थिया ‘समणेन गोतमेन अभिसपितो देवदत्तो पथविं पविट्ठो’ति अब्भाचिक्खिंसु । तं सुत्वा सासने अनभिप्पसन्ना मनुस्सा ‘सिया नु खो एतदेवं, यथा इमे भणन्ती’ति आसङ्कं उप्पादेसुं । तं पवत्तिं भिक्खू भगवतो आरोचेसुं । अथ खो भगवा ‘न, भिक्खवे, तथागता कस्सचि अभिसपं देन्ति, तस्मा न देवदत्तो मया अभिसपितो, अत्तनो कम्मेनेव निरयं पविट्ठो’ति वत्वा तेसं मिच्छागाहं पटिसेधेन्तो इमाय अट्ठप्पत्तिया इदं सुत्तं अभासी”ति —

वुत्तं, तस्मा तेसं मतेन तस्स निरयूपपत्तितो पच्छापि भगवा इदं सुत्तमभासीति वेदितब्बं । इध पन तस्स निरयूपपत्तितो पठममेव उप्पन्ने वत्थुम्हि भासितं पाळिआरुळ्हन्ति दट्ठब्बं । तेनेव “अवीचिनिरयं पत्तो”ति इदं पन आसंसायं अतीतवचनन्ति वुत्तं, आसंसाति चेत्थ अवस्सम्भाविनी अत्थसिद्धि अधिप्पेता । अवस्सम्भाविनिज्झि अत्थसिद्धिमपेक्खित्वा अनागतमि भूतं विय वोहरन्ति, तज्ज सदलक्खणानुसारेण वेदितब्बं ।

सङ्गभेदकथावण्णना निड्डिता ।

उपालिपज्झकथावण्णना

३५१. उपालिपज्झे यं वत्तब्बं, तं अट्ठकथायं दस्सितमेव । तत्थ अनुनयन्तोति अनुजानापेन्तो, भेदस्स अनुरूपं वा

बोधेन्तो, यथा भेदो होति, एवं भिन्दितब्बे भिक्खू विज्जापेन्तोति अत्थो। तेनाह “न तुम्हाक”न्तिआदि।

३५२. अट्टारसभेदकरवत्थुम्हि दस अकुसलकम्मपथा संकिलिडुधम्मताय वोदानधम्मपअपक्खत्ता “अधम्मो”ति दस्सिता, तथा उपादानादयो, बोधिपक्खियधम्मानं एकन्तानवज्जभावतो नत्थि अधम्मभावो, भगवता पन देसिताकारेण हापेत्वा वट्ठेत्वा वा कथनं यथाधम्मं अकथनन्ति कत्वा अधम्मभावोति दस्सेन्तो आह “तयो सतिपट्टाना”तिआदि। **निय्यानिकन्ति** सपाटिहीरं अप्पटिहतं हुत्वा पवत्ततीति अत्थो। **तथेवाति** इमिना “एवं अम्हाक”न्तिआदिना वुत्तमत्थं आकट्ठति। **कातब्बं कम्मं धम्मो नामाति** यथाधम्मं करणतो **धम्मो** नाम, इतरं वुत्तविपरियायतो **अधम्मो** नाम।

**रागविनयो...पे०... अयं विनयो नामाति** रागादीनं विनयनतो संवरणतो पजहनतो पटिसङ्खानतो च **विनयो** नाम, वुत्तविपरियायेन इतरो **अविनयो**। वत्थुसम्पत्तिआदिवसेन सब्बेसं विनयकम्मानं अकुप्पताति आह “**वत्थुसम्पत्ति...पे०... अयं विनयो नामा**”ति। तप्पटिपक्खतो **अविनयो** वेदितब्बो। तेनाह “**वत्थुविपत्ती**”तिआदि। यासं आपन्नस्स पब्बज्जा सावसेसा, ता आपत्तियो **सावसेसा**।

३५४. **आपायिकोति**आदिगाथासु (इतिवु० अट्ठ० १८) सङ्खस्स भेदसङ्खाते वग्गे रतोति **वग्गरतो**। अधम्मिकताय अधम्मे भेदकरवत्थुम्हि सङ्खभेदसङ्खाते एव च अधम्मे ठितोति **अधम्मट्ठो**। **योगक्खेमा पधंसतीति** हिततो परिहायति, चतूहिपि योगेहि अनुपट्ठुत्ता **योगक्खेमं** नाम अरहतं निब्बानञ्च, ततो पनस्स धंसने वत्तब्बमेव नत्थि। दिट्ठिसीलसामञ्जतो सङ्गतट्ठेन **सङ्गं**, ततो एव एककम्मादिविधानयोगेन **समगं** सहितं **भिन्दित्वा** पुब्बे वुत्तलक्खणेन सङ्खभेदेन भिन्दित्वा। **कप्पन्ति** अन्तरकप्पसङ्घातं आयुकप्पं। **निरयम्हीति** अवीचिमहानिरयम्हि।

**सुखा सङ्खस्स सामग्गीति** (इतिवु० अट्ठ० १९) सुखस्स पच्चयभावतो सामग्गी “सुखा”ति वुत्ता यथा “सुखो बुद्धानमुप्पादो”ति (ध० प० १९४)। **समगगानञ्चनुग्गहोति** समगगानं सामग्गिअनुमोदनेन अनुगण्हनं सामग्गिअनुरूपं वा, यथा ते सामग्गिं न विजहन्ति, तथा गहणं ठपनं अनुबलप्पदानन्ति अत्थो। **समगं कत्त्वानाति** भिन्नं सङ्गं सङ्गराजिप्पत्तं वा समगं सहितं कत्वा। **कप्पन्ति** आयुकप्पमेव। **सग्गम्हि मोदतीति** कामावचरदेवलोके अञ्जे देवे दसहि ठानेहि अभिभवित्वा दिब्बसुखं अनुभवन्तो इच्छितनिब्बत्तिया च मोदति पमोदति लळति कीळति।

३५५. **सिया नु खो, भन्ते, सङ्खभेदकोति**आदि पाळिअनुसारेनेव वेदितब्बं। “पञ्चहि, उपालि, आकारेहि सङ्खो भिज्जति कम्मेन उद्देसेन वोहरन्तो अनुस्सावनेन सलाकग्गाहेना”ति एवं **परिवारे** (परि० ४५८) आगतम्पि सङ्खभेदलक्खणं इध वुत्तेन किं नानाकरणन्ति दस्सेतुं “**परिवारे पना**”तिआदिमाह। एत्थ च सीमट्ठकसङ्गे असन्निपतिते विसुं परिसं गहेत्वा कतवोहारानुस्सावनसलाकग्गाहस्स कम्मं वा करोन्तस्स उद्देसं वा उद्दिसन्तस्स भेदो च होति आनन्तरियकम्मञ्च। समगसज्जाय पन “वट्ठती”ति सज्जाय वा करोन्तस्स भेदोव होति, न आनन्तरियकम्मं। ततो ऊनपरिसाय करोन्तस्स नेव सङ्खभेदो न आनन्तरियं। सब्बन्तिमेन हि परिच्छेदेन नवन्नं जनानं यो सङ्गं भिन्दति, तस्स आनन्तरियकम्मं होति, अनुवत्तकानं अधम्मवादीनं महासावज्जं कम्मं, धम्मवादिनो अनवज्जा। सेसमेत्थ उत्तानमेवाति।

उपालिपञ्चकथावण्णना निड्ढिता।

सङ्खभेदकक्खन्धकवण्णना निड्ढिता।



## ८. वत्तकखन्धकं

### आगन्तुकवत्तकथावण्णना

३५६-३५७. वत्तकखन्धके उपरिपिट्ठितोति पिट्ठिसङ्घाटस्स उपरिभागतो, द्वारबाहस्स उपरिपदेसतोति अत्थो । विस्सज्जेतब्बन्ति सुक्खापनत्थं आतपे विस्सज्जितब्बं । अभिवादापेतब्बोति तस्स वस्से पुच्छिते यदि दहरो होति, सयमेव वन्दिस्सति, तदा इमिनाव वन्दापितो नाम होति । निल्लोकेतब्बोति ओलोकेतब्बो । यथाभागन्ति पुब्बे पज्जत्तं पदेसभागं अनतिक्कमित्वा । सन्तानकन्ति उण्णनाभिसुत्तं । उल्लोकाति गेहस्स उपरिभागतो पट्ठाय, पठमं उपरिभागो सम्मज्जितब्बोति वुत्तं होति ।

### आवासिकवत्तकथावण्णना

३५९. महाआवासेति महाविहारसदिसे महाआवासे ।

### अनुमोदनवत्तकथावण्णना

३६२. पञ्चमे निसिन्नेति अनुमोदनत्थाय निसिन्ने । उपनिसिन्नकथा नाम बहूसु सन्निपतितेसु परिकथाकथनं ।

### भत्तगवत्तकथावण्णना

३६४. मनुस्सानं परिविसनट्ठानन्ति यत्थ मनुस्सा सपुत्तदारा आवसित्वा देन्ति । हत्थधोवनउदकं सन्धायाति भुत्ताविस्स भोजनावसाने हत्थधोवनउदकं सन्धाय । तेनेवाह “अन्तरा पिपासितेन पन...पे... हत्था न धोवितब्बा”ति । पोत्थकेसु पन “पानीयं पिवित्वा हत्था न धोवितब्बा”ति लिखन्ति, “हत्था धोवितब्बा”ति पाठेन भवितब्बन्ति अम्हाकं खन्ति । अज्जथा “न ताव उदकन्ति इदं हत्थधोवनउदकं सन्धाय वुत्तं”न्ति वत्त्वा “अन्तरा पिपासितेन पना”तिआदिना वुत्तविसेसो न उपलब्धति । अथ मतं “न ताव थेरेन उदकं पटिग्गहेतब्बन्ति इदं किं पानीयपटिग्गहणं सन्धाय वुत्तं, उदाहु हत्थधोवनउदकग्गहणं सन्धायाति आसङ्कानिवत्तनत्थं “इदं हत्थधोवनउदकं सन्धाय वुत्तं”न्तिआदि कथितं”न्ति, तज्ज न, तत्थ आसङ्काय एव असम्भवतो । न हि भगवा “याव अज्जे न भुत्ताविनो होन्ति, ताव पानीयं न पातब्बं”न्ति वक्खतीति सक्का विज्जातुं । यदि चेतं पानीयपटिग्गहणं सन्धाय वुत्तं, “न ताव थेरेन उदकं पटिग्गहेतब्बं”न्ति उदकसद्वप्ययोगो च न कत्तब्बो सिया, अट्ठकथायज्ज “इदं हत्थधोवनउदकं सन्धाय वुत्तं”न्ति वत्त्वा तेन निवत्तितब्बमत्थं दस्सेन्तेन “अन्तरा पिपासितेन पन गले विलग्गामिसेन वा पानीयं पिवितब्बं”न्ति एत्तकमेव वत्तब्बं, “पानीयं पिवित्वा हत्था न धोवितब्बा”ति एवं पन न वत्तब्बन्ति । धुरे निसिन्ना होन्तीति द्वारसमीपे निसिन्ना होन्ति ।

### पिण्डचारिकवत्तकथावण्णना

३६६. परामसतीति गण्हाति । ठपेति वाति “तिट्ठथ, भन्ते”ति वदन्ती ठपेति नाम ।

### आरज्जिकवत्तकथावण्णना

३६७. केनज्ज, भन्ते, युत्तन्ति केन नक्खत्तेन अज्ज चन्दो युत्तोति एवं वदन्तेन नक्खत्तं पुच्छितं होति ।

### सेनासनवत्तकथावण्णना

३६९-३७०. अङ्गणेति अब्भोकासे । न वुड्ढं अनापुच्छाति एत्थ तस्स ओवरके तदुपचारे च आपुच्छितब्बन्ति वदन्ति । भोजनसालादीसुपि एवमेव पटिपज्जितब्बन्ति भोजनसालादीसुपि उद्देसदानादि आपुच्छित्वाव कातब्बन्ति अत्थो ।

### वच्चकुटिवत्तकथावण्णना

३७३-३७४. इदं अतिविवटन्ति इदं ठानं गुम्बादीहि अप्पटिच्छन्नत्ता अतिविय पकासनं । निबद्धगमनत्थायाति अत्तनो निबद्धगमनत्थाय । पुग्गलिकट्टानं वाति अत्तनो विहारं सन्धाय वुत्तं । सेसमेत्थ सुविज्जेय्यमेव ।

इमस्मिं वत्तखन्धके आगतानि आगन्तुकावासिकगमियानुमोदनभत्तगपिण्डचारिकारज्जिक सेनासन जन्ताघर वच्चकुटि उपज्झाचरिय सद्धिविहारिक अन्तेवासिकवत्तानि चुद्दस महावत्तानि नाम, इतो अज्जानि पन कदाचि तज्जनीयकम्मकतादिकालेयेव चरितब्बानि असीति खन्धकवत्तानीति वेदितब्बानि । गण्ठपदेसु पन “इमानियेव चुद्दस महावत्तानि अग्गहितग्गहणेन गहियमानानि असीति खन्धकवत्ताआनी”ति वुत्तं, तं न गहेतब्बं ।

वत्तखन्धकवण्णना निड्ढिता ।

## ९. पातिमोक्खदुपनखन्धकं

### पातिमोक्खुद्देसयाचनकथावण्णना

३८३. पातिमोक्खदुपनखन्धके तदहूति (उदा० अट्ठ० ४५) तस्मिं अहनि तस्मिं दिवसे । उपोसथेति एत्थ उपवसन्ति एत्थाति उपोसथो, उपवसन्तीति सीलेन वा अनसनेन वा उपेता हुत्वा वसन्तीति अत्थो । अयज्झि उपोसथ-सद्धो “अट्ठङ्गसमन्नागतं उपोसथं उपवसामी”तिआदीसु (अ० नि० ३.७१; १०.४६) सीले आगतो । “उपोसथो वा पवारणा वा”तिआदीसु (महाव० १५५) पातिमोक्खुद्देसादिविनयकम्मे । “गोपालकूपोसथो निगण्ठूपोसथो”तिआदीसु (अ० नि० ३.७१) उपवासे । “उपोसथो नाम नागराजा”तिआदीसु (दी० नि० २.२४६; म० नि० ३.२५८) पज्जत्तियं । “अज्जुपोसथो पन्नरसो”तिआदीसु (महाव० १६८) दिवसे । इधापि दिवसेयेव दट्ठब्बो । तस्मा तदहुपोसथेति तस्मिं उपोसथदिवसभूते अहनीति अत्थो । निसिन्नो होतीति महाभिक्षुसङ्घपरिवुतो ओवादपातिमोक्खं उद्दिसितुं उपासिकाय रतनपासादे निसिन्नो होति । निसज्ज पन भिक्षूनं चित्तानि ओलोकेन्तो एकं दुस्सीलपुग्गलं दिस्वा “सचाहं इमस्मिं पुग्गले इध निसिन्नेयेव पातिमोक्खं उद्दिसिस्सामि, सत्तधावस्स मुद्दा फलिस्सती”ति तस्मिं अनुकम्पाय तुण्हीयेव अहोसि ।

अभिवक्कन्ताति अतिक्कन्ता परिक्खीणा । उद्धस्ते अरुणेति उगगते अरुणसीसे । नन्दिमुखियाति तुट्ठिमुखिया । उद्धस्तं अरुणन्ति अरुणुगमनं पत्वापि “उद्दिसतु, भन्ते, भगवा भिक्षूनं पातिमोक्खं”न्ति थेरो भगवन्तं पातिमोक्खुद्देसं याचि तस्मिं काले “न, भिक्षवे, अनुपोसथे उपोसथो कातब्बो”ति (महाव० १८३) सिक्खापदस्स अपज्जत्तत्ता । अपरिसुद्धा, आनन्द, परिसाति तिक्खत्तुं थेरेन पातिमोक्खुद्देसस्स याचितत्ता अनुद्देसस्स कारणं कथेन्तो “असुकपुग्गलो अपरिसुद्धो”ति अवत्वा “अपरिसुद्धा, आनन्द, परिसा”ति आह । कस्मा पन भगवा तियामरत्तिं तथा वीतिनामेसि? ततो पट्टाय ओवादपातिमोक्खं अनुद्दिसितुकामो तस्स वत्थुं पाकटं कातुं ।

अद्वसाति कथं अद्वस । अत्तनो चेतोपरियजाणेन तस्सं परिसति भिक्खूनं चित्तानि परिजानन्तो तस्स पुरिसस्स दुस्सील्यचित्तं पस्सि । यस्मा पन चित्ते दिट्ठे तंसमङ्गीपुग्गलो दिट्ठो नाम होति, तस्मा “अद्वसा खो आयस्मा महामोग्गल्लानो तं पुग्गलं दुस्सील”न्ति वुत्तं । यथेव हि अनागते सत्तसु दिवसेसु पवत्तं परेसं चित्तं चेतोपरियजाणलाभी पजानाति, एवं अतीतेपीति । दुस्सीलन्ति निस्सीलं, सीलविरहितन्ति अत्थो । पापधम्मन्ति दुस्सीलत्ता एव हीनज्झासयताय लामकसभावं । असुचिन्ति अपरिसुद्धेहि कायकम्मादीहि समन्नागतत्ता न सुचिं । सङ्कस्सरसमाचारन्ति किञ्चिदेव असारुप्पं दिस्वा “इदं इमिना कतं भविस्सती”ति एवं परेसं आसङ्कनीयताय सङ्काय सरितब्बसमाचारं । अथ वा केनचिदेव करणीयेन मन्तयन्ते भिक्खू दिस्वा “कच्चि नु खो इमे मया कतकम्मं जानित्वा मन्तेन्ती”ति अत्तनोयेव सङ्काय सरितब्बसमाचारं । लज्जितब्बताय पटिच्छादेतब्बस्स करणतो पटिच्छन्नं कम्मन्तं एतस्साति पटिच्छन्नकम्मन्तं । कुच्छित्तसमणवेसधारिताय न समणन्ति अस्समणं । सलाकग्गहणादीसु “कित्तका समणा”ति गणनाय “अहम्पि समणोम्ही”ति मिच्छापटिज्जाय समणपटिज्जं । असेट्टुचारिताय अब्रह्मचारिं । अज्जे ब्रह्मचारिनो सुनिवत्थे सुपारुते कुसुम्भकपटधरे गामनिगमादीसु पिण्डाय चरित्वा जीविकं कप्पेन्ते दिस्वा अब्रह्मचारी समानो सयम्पि तादिसेन आकारेन पटिपज्जन्तो उपोसथादीसु च सन्दिस्सन्तो “अहम्पि ब्रह्मचारी”ति पटिज्जं देन्तो विय होतीति ब्रह्मचारिपटिज्जं । पूतिना कम्मेन सीलविपत्तिया अन्तो अनुपविट्ठत्ता अन्तोपूतिं । छहि द्वारेहि रागादिकिलेसावस्सवेन तिन्तत्ता अवस्सुतं । सज्जातरागादिकचवरत्ता सीलवन्तेहि छडुतब्बत्ता च कसम्बुजातं । मज्झे भिक्खुसङ्घस्स निसिन्नन्ति सङ्घपरियापन्नो विय भिक्खुसङ्घस्स अन्तो निसिन्नं ।

दिट्ठोसीति “अयं न पकतत्तो”ति भगवता दिट्ठो असि । यस्मा च एवं दिट्ठो, तस्मा नत्थि ते तव भिक्खूहि सद्धिं एककम्मादिसंवासो । यस्मा पन सो संवासो तव नत्थि, तस्मा उट्ठेहि आवुसोति एवमेत्थ पदयोजना वेदितब्बा । ततियम्पि खो सो पुग्गलो तुण्ही अहोसीति अनेकवारं वत्वापि “थेरो सयमेव निब्बिन्नो ओरमिस्सति, इदानि इमेसं पटिपत्तिं जानिस्सामी”ति वा अधिप्पायेन तुण्ही अहोसि । बाहायं गहेत्वाति “भगवता मया च याथावतो दिट्ठो, यावततियं ‘उट्ठेही’ति च वुत्तो न उट्ठाति, इदानिस्स निक्कट्टुनकालो, मा सङ्घस्स उपोसथन्तरायो अहोसी”ति बाहायं अग्गहेसि । बहि द्वारकोट्टुका निक्खामेत्वाति द्वारकोट्टुका द्वारसालतो निक्खामेत्वा, बहीति पन निक्खामितट्ठानदस्सनं । अथ वा बहिद्वारकोट्टुकाति बहिद्वारकोट्टुकतोपि निक्खामेत्वा, न अन्तोद्वारकोट्टुकतो एव । उभयथापि विहारतो बहिकत्वाति अत्थो । सूचिघटिकं दत्वाति अग्गळसूचिज्ज उपरिघटिकज्ज आदहित्वा, सुट्ठु कवाटं थकेत्वाति अत्थो । याव बाहागहणापि नामाति “अपरिसुद्धा, आनन्द, परिसा”ति वचनं सुत्वा एव हि तेन पक्कमितब्बं सिया, एवं अपक्कमित्वा याव बाहागहणापि नाम सो मोघपुरिसो आगमिस्सति, अच्छरियमिदन्ति दस्सेति । इदज्ज गरहणच्छरियमेवाति वेदितब्बं ।

### महासमुदे अट्ठच्छरियकथावण्णना

३८४. अट्ठिमे, भिक्खवे, महासमुदेति (उदा० अट्ठ० ४५) को अनुसन्धि? व्वायं अपरिसुद्धाय परिसाय पातिमोक्खस्स अनुद्देशो, सो इमस्मिं धम्मविनये अच्छरियो अब्भुतो धम्मोति तं अपरेहि सत्तहि अच्छरियअब्भुतधम्मोहि सद्धिं विभजित्वा दस्सेतुकामो पठमं ताव तेसं उपमाभावेन महासमुदे अच्छरियअब्भुतधम्मो दस्सेन्तो सत्था “अट्ठिमे, भिक्खवे, महासमुदे”तिआदिमाह । असुराति देवा विय न सुरन्ति न ईसन्ति न विरोचन्तीति असुरा । सुरा नाम देवा, तेसं पटिपक्खाति वा असुरा, वेपचित्तिपहारादादयो । तेसं भवनं सिनेरुस्स हेट्ठाभागे, ते तत्थ पविसन्ता निक्खमन्ता सिनेरुपादे मण्डपादीनि निम्मिनित्वा कीळन्ताव अभिरमन्ति । सा तत्थ तेसं अभिरति इमे गुणे दिस्वाति आह “ये दिस्वा दिस्वा असुरा महासमुदे अभिरमन्ती”ति । तत्थ अभिरमन्तीति रतिं विन्दन्ति, अनुक्कण्ठमाना वसन्तीति अत्थो ।

**अनुपुब्बनिन्नो**ति आदीनि सब्बानि अनुपटिपाटिया निन्नभावस्सेव वेवचनानि । **न आयतकेनेव पपातो**ति नच्छिन्नतटमहासोब्भो विय आदितो एव पपातो । सो हि तीरदेसतो पट्टाय एकङ्गुलद्वङ्गुलविदत्थिरतनयट्ठिउसभअङ्गुगावुतगावुतअङ्गुयोजनयोजनादिवसेन गम्भीरो हुत्वा गच्छन्तो गच्छन्तो सिनेरुपादमूले चतुरासीतियोजनसहस्सगम्भीरो हुत्वा ठितोति दस्सेति ।

**ठितधम्मो**ति ठितसभावो अवट्ठितसभावो । **कुणपेना**ति येन केनचि हत्थिअस्सादिकळेवरेन । **वाहेती**ति हत्थेन गहेत्वा विय वीचिप्पहारेनेव थले खिपति । **गङ्गा यमुना**ति अनोतत्तदहस्स दक्खिणमुखतो निक्खन्तनदी पञ्चधारा हुत्वा पवत्तद्धाने गङ्गातिआदिना पञ्चधा सङ्गं गता । तत्थ **नदी निन्नगा**तिआदिकं गोत्तं, **गङ्गा यमुना**तिआदिकं नामं । **सवन्नियो**ति या काचि सवमाना सन्दमाना गच्छन्नियो महानदियो वा कुन्नदियो वा । **अप्पेन्ती**ति अल्लीयन्ति ओसरन्ति । **धारा**ति वुट्ठिधारा । **पूरत्तन्ति** पुण्णभावो । महासमुदस्स हि अयं धम्मता — “इमस्मिं काले देवो मन्दो जातो, जालक्खिपादीनि आदाय मच्छकच्छपे गण्हिस्सामी”ति वा “इमस्मिं काले अतिमहन्ता वुट्ठि, लभिस्साम नु खो पिट्ठिपसारणट्ठान”न्ति वा न सक्का वत्तुं । पठमकप्पिककालतो पट्टाय हि तीरं भस्सित्वा सिनेरुमेखलं आहच्च उदकं ठितं, ततो एकङ्गुलमत्तम्पि उदकं नेव हेट्ठा ओतरति, न उद्धं उत्तरति । **एकरसो**ति असम्भिनरसो ।

**मुत्ता**ति खुद्दकमहन्तवट्ठदीघादिभेदा अनेकविधमुत्ता । **मणी**ति रत्तनीलादिभेदो अनेकविधो मणि । **वेळुरियो**ति वंसवण्णसिरीसपुप्फवण्णादिसण्ठानतो अनेकविधो । **सङ्खो**ति दक्खिणावट्ठकतुम्बकुच्छिधमनसङ्खादिभेदो अनेकविधो । **सिला**ति सेतकाळमुग्गवण्णादिभेदा अनेकविधा । **पवाळम्पि** खुद्दकमहन्तरत्तघनरत्तादिभेदं अनेकविधं । **लोहितको** पदुमरागादिभेदो अनेकविधो । **मसारगल्लं** कबरमणि । चित्तफलिकन्तिपि वदन्ति । **महतं भूतानन्ति** महन्तानं सत्तानं । **तिमि तिमिङ्गलो तिमितिमिङ्गलो**ति तिस्सो मच्छजातियो । तिमिं गिलनसमत्थो **तिमिङ्गलो**, तिमिज्ज तिमिङ्गलज्ज गिलनसमत्थो तिमितिमिङ्गलोति वदन्ति । **नागा**ति ऊमिपिट्ठिवासिनोपि विमानट्ठकनागापि ।

### इमस्मिं धम्मविनये अट्ठच्छरियकथावण्णना

**३८५. एवमेव खो**ति किञ्चापि सत्था इमस्मिं धम्मविनये सोळसपि बात्तिसपि ततो भिय्योपि अच्छरियब्भुतधम्मे विभजित्वा दस्सेतुं सक्कोति, उपमाभावेन पन गहितानं अट्ठन्नं अनुरूपवसेन अट्ठेव ते उपमेतब्बधम्मे विभजित्वा दस्सन्तो “एवमेव खो, भिक्खवे, इमस्मिं धम्मविनये अट्ठ अच्छरिया अब्भुता धम्मा”ति आह । तत्थ **अनुपुब्बसिक्खाय** तिस्सो सिक्खा गहिता, **अनुपुब्बकिरियाय** तेरस धुतधम्मा, **अनुपुब्बपटिपदाय** सत्त अनुपस्सना अट्ठारस महाविपस्सना अट्ठतिस आरम्मणविभक्तियो सत्ततिस बोधिपक्खियधम्मा च गहिता । **न आयतकेनेव अज्जापटिवेधो**ति मण्डूकस्स उप्पतित्वा गमनं विय आदितोव सीलपूरणादीनि अकत्वा अरहत्तपटिवेधो नाम नत्थि, पटिपाटिया पन सीलसमाधिपज्जायो पूरेत्वाव अरहत्तप्पत्तीति अत्थो ।

**मम सावका**ति सोतापन्नादिके अरियपुग्गले सन्थाय वदति । **न संवसती**ति उपोसथकम्मादिवसेन संवासं न करोति । **उक्खिपती**ति अपनेति । **आरकावा**ति दूरे एव । **तथागतप्पवेदिते**ति तथागतेन भगवता सावकेसु देसिते अक्खाते पकासिते । **न तेन निब्बानधातुया ऊनत्तं वा पूरत्तं वा**ति असङ्ख्येय्येपि महाकप्पे बुद्धेसु अनुप्पज्जन्तेसु एकसत्तोपि परिनिब्बातुं न सक्कोति, तदापि “तुच्छा निब्बानधातू”ति न सक्का वत्तुं, बुद्धकाले पन एकेकस्मिं समागमे असङ्ख्येय्यापि सत्ता अमत्तं आराधेन्ति, तदापि न सक्का वत्तुं “पूरा निब्बानधातू”ति । **विमुत्तिरसो**ति किलेसेहि विमुच्चनरसो । सब्बा हि सासनसम्पत्ति यावदेव अनुपादाय आसवेहि चित्तस्स विमुत्तीति अत्थो ।

रतनानीति रतिजननद्वेन रतनानि । सतिपट्टानादयो हि भावियमाना पुब्बभागेपि अनेकविधं पीतिपामोज्जं निब्बत्तेन्ति, पगेव अपरभागे । वुत्तज्हेतं —

“यतो यतो सम्मसति, खन्धानं उदयब्बयं ।

लभती पीतिपामोज्जं, अमतं तं विजानत”न्ति ॥ (ध० प० ३७४) ।

लोकीयरतननिमित्तं पन पीतिपामोज्जं न तस्स कलभागमि अगघति । अपिच —

चित्तीकतं महग्घज्ज, अतुलं दुल्लभदस्सनं ।

अनोमसत्तपरिभोगं, रतनन्ति पवुच्चति ॥ (दी० नि० अट्ठ० २.३३) ।

यदि च चित्तीकतादिभावेन रतनं नाम होति, सतिपट्टानादीनज्जेव भूतो रतनभावो । बोधिपक्खियधम्मानज्झि सो आनुभावो, यं सावका सावकपारमीजाणं, पच्चेकसम्बुद्धा पच्चेकबोधिजाणं, सम्मासम्बुद्धा सम्मासम्बोधिं अधिगच्छन्ति आसन्नकारणत्ता । परम्परकारणज्झि दानादिउपनिस्सयोति एवं रतिजननद्वेन चित्तीकतादिअत्थेन च रतनभावो बोधिपक्खियधम्मानं सातिसयो । तेन वुत्तं “तत्रिमानि रतनानि, सेय्यथिदं — चत्तारो सतिपट्टाना”तिआदि ।

आरम्मणे ओक्कन्दित्वा उपट्टानद्वेन पट्टानं, सतियेव पट्टानं सतिपट्टानं । आरम्मणस्स पन कायादिवसेन चतुब्बिधत्ता वुत्तं “चत्तारो सतिपट्टाना”ति । तथा हि कायवेदनाचित्तधम्मेसु सुभसुखनिच्चअत्तसज्जानं पहानतो असुभदुक्खानिच्चानत्तभावगगहनतो च नेसं कायानुपस्सनादिभावो विभत्तो ।

सम्मा पदहन्ति एतेन, सयं वा सम्मा पदहति, पसत्थं सुन्दरं वा पदहनन्ति सम्मप्यधानं, पुग्गलस्स वा सम्मदेव पधानभावकरणतो सम्मप्यधानं, वीरियस्सेतं अधिवचनं । तम्पि अनुप्पन्नुप्पन्नानं अकुसलानं अनुप्पादनपहानवसेन अनुप्पन्नुप्पन्नानं कुसलानं उप्पादनठापनवसेन च चतुकिच्चसाधकत्ता वुत्तं “चत्तारो सम्मप्यधाना”ति ।

इज्झतीति इद्धि, समिज्झति निप्फज्जतीति अत्थो । इज्झन्ति ताय वा सत्ता इद्धा वुद्धा उक्कंसगता होन्तीति इद्धि । पठमेन अत्थेन इद्धि एव पादो इद्धिपादो, इद्धिकोट्टासोति अत्थो । दुतियेन अत्थेन इद्धिया पादो पतिट्ठा अधिगमुपायोति इद्धिपादो । तेन हि उपरूपरिविसेससङ्घातं इद्धिं पज्जन्ति पापुणन्ति । स्वायं इद्धिपादो यस्मा छन्दादिके चत्तारो अधिपतिधम्मे धुरे जेड्डके कत्वा निब्बत्तीयति, तस्मा वुत्तं “चत्तारो इद्धिपादो”ति ।

पञ्चिन्द्रियानीति सद्धादीनि पञ्च इन्द्रियानि । तत्थ अस्सद्धियं अभिभवित्वा अधिमोक्खलक्खणे इन्दुं कारेतीति सद्धा इन्द्रियं । कोसज्जं अभिभवित्वा पग्गहलक्खणे, पमादं अभिभवित्वा उपट्टानलक्खणे, विक्खेपं अभिभवित्वा अविक्खेपलक्खणे, अज्जाणं अभिभवित्वा दस्सनलक्खणे इन्दुं कारेतीति पज्जा इन्द्रियं ।

तानियेव अस्सद्धियादीहि अनभिभवनीयतो अकम्पियद्वेन सम्पयुत्तधम्मेसु थिरभावेन च बलानि वेदितब्बानि ।

सत्त बोज्झङ्गाति बोधिया, बोधिस्स वा अङ्गाति बोज्झङ्गा । या हि एसा धम्मसामग्गी, याय लोकुत्तरमग्गक्खणे उप्पज्जमानाय लीनुद्धच्चपतिट्टानायूहनकामसुखत्तकिलमथानुयोगउच्छेदसस्सताभिनिवेसादीनं अनेकेसं उपद्ववानं पटिपक्खभूताय सतिधम्मविचयवीरियपीतिपस्सद्धिसमाधिउपेक्खासङ्घाताय धम्मसामग्गिया अरियसावको बुज्झति

किलेसनिदाय उट्टहति, चत्तारि वा अरियसच्चाणि पटिविज्झति, निब्बानमेव वा सच्छिकरोतीति “**बोधी**”ति वुच्चति, तस्सा धम्मसामगिसङ्घाताय बोधिया अङ्गाति **बोज्झङ्गा** ज्ञानङ्गमगङ्गादयो विय। योपेस वुत्तप्पकाराय धम्मसामगिया बुज्झतीति कत्वा अरियसावको “**बोधी**”ति वुच्चति, तस्स बोधिस्स वा अङ्गातिपि **बोज्झङ्गा** सेनङ्गरथङ्गादयो विय। तेनाहु पोराणा “बुज्जनकस्स पुग्गलस्स अङ्गाति बोज्झङ्गा”ति (सं० नि० अट्ठ० ३.५.१८२; विभ० अट्ठ० ४६६; पटि० म० अट्ठ० १.१.२५), “बोधाय संवत्तन्तीति बोज्झङ्गा”ति आदिना (पटि० म० २.१७) नयेनपि बोज्झङ्गट्ठो वेदितब्बो।

**अरियो अट्ठङ्गिको मग्गो**ति तंतंमग्गवज्जेहि किलेसेहि आरकत्ता अरियभावकरत्ता अरियफलपटिलाभकरत्ता च **अरियो**। सम्मादिट्ठिआदीनि अट्ठङ्गानि अस्स अत्थि, अट्ठङ्गानियेव वा **अट्ठङ्गिको**। मारेन्तो किलेसे गच्छति, निब्बानत्थिकेहि वा मग्गीयति, सयं वा निब्बानं मग्गतीति **मग्गो**ति एवमेतेसं सतिपट्टानादीनं अत्थविभागो वेदितब्बो।

**सोतापन्नो**ति मग्गसङ्घातं सोतं आपज्जित्वा पापुणित्वा ठितो, सोतापत्तिफलट्ठोति अत्थो। **सोतापत्तिफलसच्छिकिरियाय पटिपन्नो**ति सोतापत्तिफलस्स अत्तपच्चक्खकरणत्थाय पटिपज्जमानो पठममग्गट्ठो, यो अट्ठमकोतिपि वुच्चति। **सकदागामी**ति सकिदेव इमं लोकं पटिसन्धिग्गहणवसेन आगमनसीलो दुतियफलट्ठो। **अनागामी**ति पटिसन्धिग्गहणवसेन कामलोकं अनागमनसीलो ततियफलट्ठो। यो पन सद्धानुसारी धम्मनुसारी एकबीजीति एवमादिको अरियपुग्गलविभागो, सो तेसंयेव भेदोति। सेसं वुत्तनयमेव।

**एतमत्थं विदित्वा**ति एतं अत्तनो धम्मविनये मतकुणपसदिसेन दुस्सीलपुग्गलेन सद्धिं संवासाभावसङ्घातं अत्थं विदित्वा। **इमं उदानन्ति** इमं असंवासारहसंवासारहभावानं कारणपरिदीपनं उदानं उदानेसि।

तत्थ **छन्नमतिवस्सती**ति आपत्तिं आपज्जित्वा पटिच्छादेन्तो अज्जं नवं आपत्तिं

आपज्जति, ततो अपरन्ति एवं आपत्तिवस्सं किलेसवस्सं अतिविय वस्सति। **विवटं नातिवस्सती**ति आपत्तिं आपन्नो तं अप्पटिच्छादेत्वा विवरन्तो सब्रह्मचारीनं पकासेन्तो यथाधम्मं यथाविनयं पटिकरोन्तो देसेन्तो वुट्टहन्तो अज्जं नवं आपत्तिं नापज्जति, तेनस्स तं विवटं पुन आपत्तिवस्सं किलेसवस्सं न वस्सति। यस्मा च एतदेव, तस्मा **छन्नं** छादितं आपत्तिं विवरेथ। **एवं तं नातिवस्सती**ति एवं सन्ते तं आपत्तिं आपज्जनपुग्गलानं अत्तभावं अतिविज्झित्वा किलेसवस्सनेन न वस्सति न तेमेति, एवं सो किलेसेहि अनवस्सुतो परिसुद्धसीलो समाहितो हुत्वा विपस्सनं पट्टपेत्वा सम्मसन्तो अनुक्कमेन निब्बानं पापुणातीति अधिप्पायो।

इमस्मिं धम्मविनये अट्ठच्छरियकथावण्णना निट्ठिता।

### पातिमोक्खसवनारहकथावण्णना

३८६. अथ भगवा चिन्तेसि “इदानीं भिक्खुसङ्घे अब्बुदो जातो, अपरिसुद्धा पुग्गला उपोसथं आगच्छन्ति, न च तथागतो अपरिसुद्धाय परिसाय उपोसथं उद्दिसति, अनुद्दिसन्ते च भिक्खुसङ्घस्स उपोसथो पच्छिज्जति, यन्नूनाहं इतो पट्टाय भिक्खूनज्जेव पातिमोक्खुद्देसं अनुजानेय्य”न्ति, एवं पन चिन्तेत्वा भिक्खूनज्जेव पातिमोक्खुद्देसं अनुजानि। तेन वुत्तं “**अथ खो भगवा...पे०... पातिमोक्खं उद्दिसेय्याथा**”ति। तत्थ **नदानाहन्ति** न इदानीं अहं। उपोसथं न करिस्सामि, पातिमोक्खं न उद्दिसिस्सामीति पच्चेकं न-कारेण सम्बन्धो। दुविधं पातिमोक्खं आणापातिमोक्खं ओवादपातिमोक्खन्ति। तेसु “सुणातु मे भन्ते”ति आदिकं **आणापातिमोक्खं**, तं सावकाव उद्दिसन्ति, न बुद्धा, यं अन्वद्धमासं उद्दिसीयति। “**खन्ती परमं...पे०...**

सब्बपापस्स अकरणं...पे०... अनुपवादो अनुपघातो...पे०... एतं बुद्धान सासन”न्ति (दी० नि० २.९०; ध० प० १८३-१८५) इमा पन तिस्सो गाथा ओवादपातिमोक्खं नाम, तं बुद्धाव उद्दिसन्ति, न सावका । छन्नम्पि वस्सानं अच्चयेन उद्दिसन्ति । दीघायुकबुद्धानज्झि धरमानकाले अयमेव पातिमोक्खुद्देशो, अप्पायुकबुद्धानं पन पठमबोधियंयेव, ततो परं इतरो, तज्ज खो भिक्खू एव उद्दिसन्ति, न बुद्धा । तस्मा अम्हाकम्पि भगवा वीसतिवस्समत्तं इमं ओवादपातिमोक्खं उद्दिसित्वा इमं अन्तरायं दिस्वा ततो परं न उद्दिसि ।

अट्टानन्ति अकरणं । अनवकासोति तस्सेव वेवचनं । कारणज्झि तिट्ठति एत्थ फलं तदायत्तवुत्तितायाति “ठान”न्ति वुच्चति, एवं “अवकासो”तिपि वुच्चति । यन्ति किरियापरामसनं । न च, भिक्खवे, सापत्तिकेन पातिमोक्खं सोतब्बन्तिआदि पदत्थतो सुविज्जेय्यं । विनिच्छयतो पनेत्थ यं वत्तब्बं, तं अट्ठकथाय वुत्तमेव । तत्थ पुरे वा पच्छा वाति जत्तितो पुब्बे वा पच्छा वा ।

### धम्मिकाधम्मिकपातिमोक्खदुपनकथावण्णना

३८७. कतज्ज अकतज्ज उभयं गहेत्वाति यस्स एकन्तेन कतापि अत्थि, अकतापि अत्थि, तस्स तदुभयं गहेत्वा ।

### धम्मिकपातिमोक्खदुपनकथावण्णना

३८९. परिसा वुट्ठातीति यस्मिं वत्थुस्मिं पातिमोक्खं ठपितं, तं वत्थुं अविनिच्छिनित्वा केनचि अन्तरायेन वुट्ठाति ।

३९३. पच्चादियतीति पति आदियति, “अकतं कम्म”न्तिआदिना पुन आरभतीति अत्थो ।

### अत्तादानअङ्गकथावण्णना

३९८. परं चोदेतुं अत्तना आदातब्बं गहेतब्बं अधिकरणं अत्तादानं । तेनाह “सासनं सोधेतुकामो”तिआदि । वस्सारत्तोति वस्सकालो ।

### चोदकेन पच्चवेक्खितब्बधम्मकथावण्णना

३९९. पटिमासितुन्ति परामसितुं । पलिबोधे छिन्दित्वा...पे०... अधिगतं मेत्तचित्तन्ति इमिना अप्पनाप्पत्तं मेत्ताभावनं दस्सेति । तेनेवाह “विक्खम्भनवसेन विहताघात”न्ति ।

### चोदकेन उपट्ठापेतब्बधम्मकथावण्णना

४००. नो दोसन्तरोति एत्थ चित्तपरियायो अन्तर-सद्दोति आह “न दुट्ठचित्तो हुत्वा”ति ।

### चोदकचुदितकपटिसंयुत्तकथावण्णना

४०१. करुणन्ति अप्पनाप्पत्तं करुणज्झानं । करुणापुब्बभागन्ति परिकम्मुपचारवसप्पवत्तं करुणं । मेत्तज्ज मेत्तापुब्बभागज्जाति एत्थापि एसेव नयो । सेसमेत्थ सुविज्जेय्यमेवाति ।

पातिमोक्खट्टपनक्खन्धकवण्णना निद्धिता ।

## १०. भिक्खुनिक्खन्धकं

### महापजापतिगोतमीवत्थुकथावण्णना

४०२. भिक्खुनिक्खन्धके **सक्केसु विहरतीति** पठमगमनेन गन्त्वा विहरति । **महापजापति गोतमीति** एत्थ **गोतमीति** गोत्तं । नामकरणदिवसे पनस्सा लद्धसक्कारा ब्राह्मणा लक्खणसम्पत्तिं दिस्वा “सचे अयं धीतरं लभिस्सति, चक्कवत्तिरज्जो महेसी भविस्सति । सचे पुत्तं लभिस्सति, चक्कवत्तिराजा भविस्सतीति उभयथापि महतीयेवस्सा पजा भविस्सती”ति ब्याकरिंसु, तस्मा पुत्तपजाय चेव धीतुपजाय च महन्तताय “महापजापती”ति नामं अकंसु, इध पन गोत्तेन सद्धिं संसन्दित्वा “महापजापति गोतमी”ति वुत्तं । **येन भगवा तेनुपसङ्कमीति** भगवा कपिलपुरं गन्त्वा पठममेव नन्दं पब्बाजेसि, सत्तमे दिवसे राहुलकुमारं । **चुम्बटककलहे** पन उभयनगरवासिकेसु युद्धत्थाय निक्खन्तेसु सत्था गन्त्वा ते राजानो सज्जापेत्वा **अत्तदण्डसुत्तं** (सु० नि० ९४१ आदयो) कथेसि । राजानो पसीदित्वा अट्टतेय्यसते अट्टतेय्यसते दारके अदंसु । तानि पञ्च कुमारसतानि सत्थु सन्तिके पब्बजिंसु । अथ नेसं पजापतियो सासनं पेसेत्वा अनभिरतिं उप्पादयिंसु । सत्था तेसं अनभिरतिया उप्पन्नभावं जत्वा ते पञ्चसते दहरभिक्खू कुणालदहं नेत्वा अत्तनो कुणालकाले निसिन्नपुब्बे पासाणतले निसीदित्वा **कुणालजातक**कथाय (जा० २.२१.कुणालजातक) तेसं अनभिरतिं विनोदेत्वा सब्बेपि ते सोतापत्तिफले पतिट्ठपेसि, पुन महावनं आनेत्वा अरहत्तफले । तेसं चित्तजाननत्थं पुनपि पजापतियो सासनं पहिणंसु । ते “अभब्बा मयं घरावासस्सा”ति पटिसासनं पहिणंसु । ता “न दानि अम्हाकं परघरं गन्तुं युत्तं, महापजापतिया सन्तिकं गन्त्वा पब्बज्जं अनुजानापेत्वा पब्बजिस्सामा”ति पञ्चसतापि महापजापतिं उपसङ्कमित्वा “अय्ये, अम्हाकं पब्बज्जं अनुजानापेथा”ति आहंसु । महापजापति च ता इत्थियो गहेत्वा येन भगवा तेनुपसङ्कमि, सेतच्छत्तस्स हेट्ठा रज्जो परिनिब्बुतकाले उपसङ्कमीतिपि वदन्तियेव । **पक्कामीति** पुन कपिलपुरमेव पाविसि ।

**यथाभिरन्तं विहरित्वा**ति बोधनेय्यसत्तानं उपनिस्सयं ओलोकेन्तो यथाज्झासयेन विहरित्वा । **चारिकं पक्कामीति** महाजनसङ्गं करोन्तो उत्तमाय बुद्धसिरिया अनोपमेन बुद्धविलासेन अतुरितचारिकं पक्कामि । **सम्बहुलाहि साकियानीहि** सद्धिन्ति अन्तोनिवेसनस्मियेव दसबलं उद्दिस्स पब्बज्जावेसं गहेत्वा तापि पञ्चसता साकियानियो पब्बज्जावेसंयेव गाहापेत्वा सब्बाहिपि ताहि सम्बहुलाहि साकियानीहि सद्धिं । **पक्कामीति** गमनं अभिनीहरि । गमनाभिनीहरणकाले पनस्सा “सुकुमारा राजित्थियो पदसा गन्तुं न सक्खिस्सन्ती”ति साकियकोलियराजानो सुवण्णसिविकायो उपट्ठापयिंसु, ता पन “याने आरुह गच्छन्तीहि सत्थरि अगारवो कतो होती”ति एकपण्णासयोजनिकं मगं पदसाव पटिपज्जिंसु । राजानोपि पुरतो च पच्छतो च आरक्खं संविदहापेत्वा तण्डुलसप्पितेलादीनं सकटानि पूरेत्वा “गतगतट्ठाने आहारं पटियादेथा”ति पुरिसे पेसयिंसु । **सूनेहि पादेहीति** तासज्हि सुखुमालत्ता पादेसु एको फोटो उट्ठेति, एको भिज्जति, उभो पादा कटकट्टिसम्परिकिण्णा विय हुत्वा उद्धुमाता । तेन वुत्तं “सूनेहि पादेही”ति । **बहिद्वारकोट्टके**ति द्वारकोट्टकस्स बहि । कस्मा पनेवं ठिताति? एवं किरस्सा अहोसि “अहं तथागतेन अनुज्जाता सयमेव पब्बज्जावेसं अग्गहेसि, एवं गहितभावो च पन मे सकलजम्बुदीपे पाकटो जातो, सचे सत्था पब्बज्जं अनुजानिस्सति, इच्चेतं कुसलं । सचे नानुजानिस्सति, महती गरहा भविस्सती”ति विहारं पविसितुं असक्कोन्ती रोदमाना अट्ठासि । **किं नु त्वं गोतमीति** किं नु राजकुलानं विपत्ति उप्पन्ना, केन नु त्वं कारणेन एवं विवण्णभावं पत्ता सूनेहि पादेहि...पे०... ठिताति ।



अञ्जेनपि परियायेनाति अञ्जेनपि कारणेन । आपादिकाति संवट्टिका, तुम्हाकं हत्थपादेसु हत्थपादकिच्चं असाधेन्तेसु हत्थे च पादे च वट्ठेत्वा पटिजगिकाति अत्थो । पोसिकाति दिवसस्स द्वे तयो वारे नहापेत्वा भोजेत्वा पायेत्वा तुम्हे पोसेसि । थज्जं पायेसीति नन्दकुमारो किर बोधिसत्ततो कतिपाहेनेव दहरतरो । तस्मिं जाते महापजापति अत्तनो पुत्तं धातीनं दत्वा सयं बोधिसत्तस्स धातिकिच्चं साधयमाना अत्तनो थज्जं पायेसि । तं सन्धाय थेरो एवमाह । साधु भन्तेति “बहुकारा”तिआदीहि तस्सा गुणं कथेत्वा पुन पब्बज्जं याचन्तो एवमाह ।

महापजापतिगोतमीवत्थुकथावण्णना निट्ठिता ।

### अट्टगरुधम्मकथावण्णना

४०३. सत्थापि “इत्थियो नाम परित्तसद्भा, एकायाचितमत्तेयेव पब्बज्जाय अनुज्जाताय न मम सासनं गरुं कत्वा गण्हिस्सन्ती”ति तिक्खत्तुं पटिक्खित्वा इदानीं गरुं कत्वा गाहापेतुकामताय “सचे, आनन्द, महापजापति गोतमी अट्ट गरुधम्मे पटिग्गण्हाति, सावस्सा होतु उपसम्पदा”तिआदिमाह । तत्थ सावस्साति सा एव अस्सा पब्बज्जापि उपसम्पदापि होतु ।

तदट्टपसम्पन्नस्साति तं दिवसम्पि उपसम्पन्नस्स । अभिवादनं पच्चुट्ठानं अज्जलिकम्मं सामीचिकम्मं कातब्बन्ति मानातिमानं अकत्वा पञ्चपतिट्ठितेन अभिवादनं, आसना उट्ठाय पच्चुग्गमनवसेन पच्चुट्ठानं, दसनखे समोधानेत्वा अज्जलिकम्मं, आसनपज्जापनबीजनादिकं अनुच्छविककम्मसङ्घातं सामीचिकम्मञ्च कत्तब्बं । अभिक्खुके आवासेति यत्थ वसन्तिया अनन्तरायेन ओवादत्थाय उपसङ्कमनारहे ठाने ओवाददायको आचरियो नत्थि, अयं अभिक्खुको आवासो नाम, एवरूपे आवासे वस्सं न उपगन्तब्बं । अन्वद्धमासन्ति अनुपोसथिकं । ओवादूपसङ्कमनन्ति ओवादत्थाय उपसङ्कमनं । दिट्ठेनाति चक्खुना दिट्ठेन । सुतेनाति सोतेन सुतेन । परिसङ्कायाति दिट्ठसुतवसेन परिसङ्कितेन । गरुधम्मन्ति गरुकं सङ्गादिसेसापत्तिं । पक्खमानत्तन्ति अनूनानि पन्नरस दिवसानि मानत्तं । छसु धम्मसूति विकालभोजनच्छट्ठेसु सिक्खापदेसु । सिक्खितसिक्खायाति एकसिक्खम्पि अखण्डं कत्वा पूरितसिक्खाय ।

न अक्कोसितब्बो न परिभासितब्बोति दसन्नं अक्कोसवत्थूनं अज्जतरेन अक्कोसवत्थुना न अक्कोसितब्बो, भयुपदंसनाय कायचि परिभासाय न परिभासितब्बो । ओवटो भिक्खुनीनं भिक्खूसु वचनपथोति ओवादानुसासनिधम्मकथासङ्घातो वचनपथो भिक्खुनीनं भिक्खूसु ओवटो पिहितो, न भिक्खुनिया कोचि भिक्खु ओवदितब्बो वा अनुसासितब्बो वा, “भन्ते पोराणकत्थेरा इदञ्चिदञ्च वत्तं पूरयिंसू”ति एवं पन पवेणिवसेन कथेतुं वट्ठति । अनोवटो भिक्खूनं भिक्खुनीसूति भिक्खूनं पन भिक्खुनीसु वचनपथो अनिवारितो, यथारुचिया ओवदन्तु अनुसासन्तु धम्मकथं कथेन्तूति अयमेत्थ सङ्खेपो, वित्थारतो पनेसा गरुधम्मकथा महाविभङ्गे वुत्तनयेनेव वेदितब्बा ।

इमे पन अट्ट गरुधम्मे सत्थु सन्तिके उग्गहेत्वा थेरेन अत्तनो आरोचियमाने सुत्वा महापजापतिया तावमहन्तं दोमनस्सं खणेन पटिप्पस्सम्भि । अनोतत्तदहतो आहटेन सीतुदकस्स घटसतेन मत्थके परिसित्ता विय विगतपरिळाहा अत्तमना हुत्वा गरुधम्मपटिग्गहणेन उप्पन्नपीतिपामोज्जं आवि करोन्ती “सेय्यथापि, भन्ते”तिआदिकं उदानं उदानेसि । तत्थ दहरोति तरुणो । युवाति योब्बज्जभावे ठितो । मण्डनकजातिकोति अलङ्कारसभावो । तत्थ कोचि तरुणोपि युवा न होति यथा अतितरुणो । कोचि युवापि मण्डनकजातिको न होति यथा उपसन्तसभावो आलसियब्यसनादीहि वा अभिभूतो, इध पन दहरो चेव युवा च मण्डनकजातिको च अधिप्पेतो, तस्मा एवमाह । उप्पलादीनि लोकसम्मत्तत्ता वुत्तानि । इतो परं यं यं

वत्तब्बं, तं तं अट्ठकथायं दस्सितमेव ।

तत्थ मातुगामस्स पब्बजितत्ताति इदं पञ्चवस्ससततो उद्धं अट्ठत्वा पञ्चसुयेव वस्ससतेसु सद्धम्मट्ठितिया कारणनिदस्सनं । पटिसम्भिदापभेदप्पत्तखीणासववसेनेव वुत्तन्ति एत्थ “पटिसम्भिदापत्तखीणासववगहणेन झानानिपि गहितानेव होन्ति । न हि निज्झानकानं सव्वप्पकारसम्पत्ति इज्झती”ति गण्ठपदेसु वुत्तं । सुक्खविपस्सकखीणासववसेन वस्ससहस्सन्ति आदिना च यं वुत्तं । तं खन्धकभाणकानं मतेन वुत्तन्ति वेदितब्बं । दीघनिकायट्ठकथायं (दी० नि० अट्ठ० ३.१६१) पन एवं वुत्तं —

“पटिसम्भिदापत्तेहि वस्ससहस्सं अट्ठासि, छळभिज्जेहि वस्ससहस्सं, तेविज्जेहि वस्ससहस्सं, सुक्खविपस्सकेहि वस्ससहस्सं, पातिमोक्खेन वस्ससहस्सं अट्ठासी”ति ।

अङ्गुत्तरनिकायट्ठकथायम्पि (अ० नि० अट्ठ० १.१.१३०) —

“बुद्धानज्झि परिनिब्बानतो वस्ससहस्समेव पटिसम्भिदा निब्बत्तेतुं सक्कोन्ति, ततो परं छ अभिज्जा, ततो तापि निब्बत्तेतुं असक्कोन्ता तिस्सो विज्जा निब्बत्तेन्ति, गच्छन्ते गच्छन्ते काले तापि निब्बत्तेतुं असक्कोन्ता सुक्खविपस्सका होन्ति । एतेनेव उपायेन अनागामिनो सकदागामिनो सोतापन्ना”ति —

वुत्तं ।

संयुत्तनिकायट्ठकथायं पन (सं० नि० अट्ठ० २.३.१५६) —

“पठमबोधियज्झि भिक्खू पटिसम्भिदापत्ता अहेसुं । अथ काले गच्छन्ते पटिसम्भिदा पापुणितुं न सक्खिंसु, छळभिज्जा अहेसुं, ततो छ अभिज्जा पत्तुं असक्कोन्ता तिस्सो विज्जा पापुणिसु । इदानि काले गच्छन्ते तिस्सो विज्जा पापुणितुं असक्कोन्ता आसवक्खयमत्तं पापुणिस्सन्ति, तम्पि असक्कोन्ता अनागामिफलं, तम्पि असक्कोन्ता सकदागामिफलं, तम्पि असक्कोन्ता सोतापत्तिफलं, गच्छन्ते काले सोतापत्तिफलम्पि पत्तुं न सक्खिस्सन्ती”ति —

वुत्तं ।

यस्मा चेत्तं सव्वं अज्जमज्जपटिविरुद्धं, तस्मा तेसं तेसं भाणकानं मतमेव आचरियेन तत्थ तत्थ दस्सितन्ति गहेतब्बं । अज्जथा हि आचरियस्सेव पुब्बापरविरोधप्पसङ्गो सियाति ।

तानियेवाति तानियेव पञ्च वस्ससहस्सानि । परियत्तिमूलकं सासनन्ति आह “न हि परियत्तिया असति पटिवेधो अत्थी”ति आदि । परियत्तिया हि अन्तरहिताय पटिपत्ति अन्तरधायति, पटिपत्तिया अन्तरहिताय अधिगमो अन्तरधायति । किंकारणा? अयज्झि परियत्ति पटिपत्तिया पच्चयो होति, पटिपत्ति अधिगमस्स, इति पटिपत्तितोपि परियत्तियेव पमाणं । तत्थ पटिवेधो च पटिपत्ति च होतिपि न होतिपि । एकस्मिज्झि काले पटिवेधकरा भिक्खू बहू होन्ति, “एस भिक्खु पुथुज्जनो”ति अङ्गुलिं पसारत्वा दस्सेतब्बो होति, इमस्मिंयेव दीपे एकवारं पुथुज्जनभिक्खु नाम नाहोसि । पटिपत्तिपूरकापि कदाचि बहू होन्ति, कदाचि अप्पा, इति पटिवेधो च पटिपत्ति च होतिपि न होतिपि । सासनट्ठितिया पन परियत्तियेव पमाणं । पण्डितो हि

तेपिटकं सुत्वा द्वेपि पूरेति । यथा अम्हाकं बोधिसत्तो आळारस्स सन्तिके पञ्चाभिज्जा सत्त च समापत्तियो निब्बत्तेत्वा नेवसज्जानासज्जायतनसमापत्तिया परिकम्पं पुच्छि, सो “न जानामी”ति आह, ततो उदकस्स सन्तिकं गन्त्वा अधिगतविसेसं संसन्दित्वा नेवसज्जानासज्जायतनस्स परिकम्पं पुच्छि, सो आचिक्खि, तस्स वचनसमनन्तरमेव महासत्तो तं सम्पादेसि, एवमेव पञ्जवा भिक्खु परियत्तिं सुत्वा द्वेपि पूरेति, तस्मा परियत्तिया ठिताय सासनं ठितं होति । यथापि महतो तळाकस्स पाळिया थिराय उदकं न ठस्सतीति न वत्तब्बं, उदके सति पदुमादीनि पुष्फानि न पुष्फिस्सन्तीति न वत्तब्बं, एवमेव महातळाकस्स थिरपाळिसदिसे तेपिटके बुद्धवचने सति महातळाके उदकसदिसा पटिपत्तिपूरका कुलपुत्ता नत्थीति न वत्तब्बं, तेसु सति महातळाके पदुमादीनि पुष्फानि विय सोतापन्नादयो अरियपुग्गला नत्थीति न वत्तब्बं । एवं एकन्ततो परियत्तियेव पमाणं ।

**परियत्तिया अन्तरहितायाति एत्थ परियत्तीति** (अ० नि० अट्ठ० १.१.१३०) तेपिटकं बुद्धवचनं साट्ठकथा पाळि । याव सा तिट्ठति, ताव परियत्ति परिपुण्णा नाम होति । गच्छन्ते गच्छन्ते काले कलियुगराजानो अधम्मिका होन्ति, तेसु अधम्मिकेसु तेसम्पि अमच्चादयो अधम्मिका होन्ति, ततो रट्ठजनपदवासिनोति तेसं अधम्मिकताय न देवो सम्मा वस्सति, ततो सस्सानि न सम्पज्जन्ति, तेसु असम्पज्जन्तेसु पच्चयदायका भिक्खुसङ्घस्स पच्चये दातुं न सक्कोन्ति, भिक्खू पच्चयेहि किलमन्ता अन्तेवासिके सङ्गहेतुं न सक्कोन्ति । गच्छन्ते गच्छन्ते काले परियत्ति परिहायति, अत्थवसेन धारेतुं न सक्कोन्ति, पाळिवसेनेव धारेन्ति । ततो काले गच्छन्ते पाळिमि सकलं धारेतुं न सक्कोन्ति, पठमं अभिधम्मपिटकं परिहायति, परिहायमानं मत्थकतो पट्टाय परिहायति । पठममेव हि महापकरणं परिहायति, तस्मिं परिहीने यमकं, कथावत्थु, पुग्गलपज्जत्ति, धातुकथा, विभङ्गो, धम्मसङ्गहोति ।

एवं अभिधम्मपिटके परिहीने मत्थकतो पट्टाय सुत्तन्तपिटकं परिहायति । पठमज्झि अङ्गुत्तरनिकायो परिहायति, तस्मिम्पि पठमं एकादसकनिपातो...पे०... ततो एककनिपातोति । एवं अङ्गुत्तरनिकाये परिहीने मत्थकतो पट्टाय संयुत्तनिकायो परिहायति । पठमज्झि महावग्गो परिहायति, ततो सळायतनवग्गो, खन्धकवग्गो, निदानवग्गो, सगाथावग्गोति । एवं संयुत्तनिकाये परिहीने मत्थकतो पट्टाय मज्झिमनिकायो परिहायति । पठमज्झि उपरिपण्णासको परिहायति, ततो मज्झिमपण्णासको, ततो मूलपण्णासकोति । एवं मज्झिमनिकाये परिहीने मत्थकतो पट्टाय दीघनिकायो परिहायति । पठमज्झि पाथिकवग्गो परिहायति, ततो महावग्गो, ततो सीलक्खन्धवग्गोति । एवं दीघनिकाये परिहीने सुत्तन्तपिटकं परिहीनं नाम होति । विनयपिटकेन सद्धिं जातकमेव धारेन्ति । विनयपिटकज्झि लज्जिनो धारेन्ति, लाभकामा पन “सुत्तन्ते कथितेपि सल्लक्खेन्ता नत्थी”ति जातकमेव धारेन्ति । गच्छन्ते काले जातकम्पि धारेतुं न सक्कोन्ति । अथ नेसं पठमं वेस्सन्तरजातकं परिहायति, ततो पटिलोमक्कमेन पुण्णकजातकं, महानारदजातकन्ति परियोसाने अपण्णकजातकं परिहायति, विनयपिटकमेव धारेन्ति ।

गच्छन्ते काले तम्पि मत्थकतो पट्टाय परिहायति । पठमज्झि परिवारो परिहायति, ततो खन्धको, भिक्खुनीविभङ्गो, महाविभङ्गोति अनुक्कमेन उपोसथक्खन्धकमत्तमेव धारेन्ति । तदापि परियत्ति अनन्तरहिताव होति । याव पन मनुस्सेसु चतुप्पदिकगाथापि पवत्तति, ताव परियत्ति अनन्तरहिताव होति । यदा सद्धो पसन्नो राजा हत्थिक्खन्धे सुवण्णचङ्कोटकम्हि सहस्सत्थविकं ठपापेत्वा “बुद्धेहि कथितं चतुप्पदिकं गाथं जानन्तो इमं सहस्सं गण्हतू”ति नगरे भेरिं चरापेत्वा गण्हनकं अलभित्वा “एकवारं चरापिते नामं सुणन्तापि होन्ति असुणन्तापी”ति यावततियं चरापेत्वा गण्हनकं अलभित्वा राजपुरिसा सहस्सत्थविकं पुन राजकुलं पवेसेन्ति, तदा परियत्ति अन्तरहिता नाम होति ।

**चिरं पवत्तिस्सतीति** परियत्तिया अन्तरहितायपि लिङ्गमत्तं अद्धानं पवत्तिस्सति । कथं? गच्छन्ते गच्छन्ते हि काले चीवरग्गहणं पत्तग्गहणं समिञ्जनपसारणं आलोकितविलोकितं न पासादिकं होति, निगण्ठसमणा विय अलाबुपत्तं भिक्खू पत्तं अग्गबाहाय परिक्षिपित्वा आदाय विचरन्ति, एत्तावतापि लिङ्गं अनन्तरहितमेव होति । गच्छन्ते पन काले अग्गबाहतो ओतारेत्वा हत्थेन वा सिक्काय वा ओलम्बेत्वा विचरन्ति, चीवरम्पि रजनसारुपं अकत्वा ओट्टुट्टिवण्णं कत्वा रजन्ति । गच्छन्ते काले रजनम्पि न होति, दसच्छिन्दनं ओवट्टिकाविज्झनं कप्पमत्तञ्च कत्वा वळञ्जन्ति, पुन ओवट्टिकं विज्झित्वा कप्पं न करोन्ति । ततो उभयम्पि अकत्वा दसा छेत्वा परिब्बाजका विय चरन्ति । गच्छन्ते काले “को इमिना अम्हाकं अत्थो”ति खुद्दकं कासावखण्डं हत्थे वा गीवायं वा बन्धन्ति, केसेसु वा अल्लीयापेन्ति, दारभरणं करोन्ता कसित्वा वपित्वा जीविकं कप्पेत्वा विचरन्ति, तदा दक्खिणं देन्तो जनो सङ्गं उद्दिस्स एतेसम्पि देति । इदं सन्धाय भगवता वुत्तं “भविस्सन्ति खो पनानन्द, अनागतमद्धानं गोत्रभुनो कासावकण्ठा दुस्सीला पापधम्मा, तेसु दुस्सीलेसु सङ्गं उद्दिस्स दानं दस्सन्ति, तदापाहं, आनन्द, सङ्गगतं दक्खिणं असङ्ख्येय्यं अप्पमेय्यं वदामी”ति (म० नि० ३.३८०) । ततो गच्छन्ते काले नानाविधानि कम्मनि करोन्ता “पपञ्चो एस, किं इमिना अम्हाक”न्ति कासावखण्डं छिन्दित्वा अरञ्जे खिपन्ति, तस्मिं काले लिङ्गं अन्तरहितं नाम होति । कस्सपदसबलस्स किर कालतो पट्टाय योनकानं सेतवत्थानि पारुपित्वा चरणचारित्तं जातं । एवं परियत्तिया अन्तरहितायपि लिङ्गमत्तं चिरं पवत्तिस्सतीति वेदितव्वं ।

अट्ठगरुधम्मकथावण्णना निट्ठिता ।

### भिक्षुनीउपसम्पन्नानुजाननकथावण्णना

**४०४-४०५. यदग्गेनाति** यं दिवसं आदिं कत्वा । **तदेवाति** तस्मिञ्जेव दिवसे । **अनुज्जत्तियाति** अनुज्जाय । **एकाहं, भन्ते आनन्द, भगवन्तं वरं याचामीति** “एवमेव खो अहं, भन्ते आनन्द, इमे अट्ठ गरुधम्मे पटिग्गण्हामि यावजीवं अनतिक्कमनीये”ति पटिजानित्वा इदानीं कस्मा वरं याचतीति चे? परूपवादविवज्जनत्थं । एवञ्चि केचि वदेय्युं “महापजापतिया पठमं सम्पटिच्छित्ता भिक्खून् भिक्खुनीनञ्च यथावुट्ठुं अभिवादनं नाहोसि, सा चे वरं याचेय्य, भगवा अनुजानेय्या”ति ।

**४०६. सरागायाति** सरागभावाय कामरागभवरागपरिबूहनाय । **सञ्जोगायाति** वट्टे संयोजनत्थाय । **आचयायाति** वट्टस्स वट्टनत्थाय । **महिच्छतायाति** महिच्छभावाय । **असन्तुट्ठियाति** असन्तुट्ठिभावाय । **सङ्गणिकायाति** किलेससङ्गणगणसङ्गणविहाराय । **कोसज्जायाति** कुसीतभावाय । **दुब्भरतायाति** दुप्पोसताय । **विरागायाति** सकलवट्टतो विरज्जनत्थाय । **विसञ्जोगायाति** कामरागादीहि विसंयुज्जनत्थाय । **अपचयायाति** सब्बस्सपि वट्टस्स अपचयत्थाय, निब्बानायाति अत्थो । **अप्पिच्छतायाति** पच्चयप्पिच्छतादिवसेन सब्बसो इच्छापगमाय । **सन्तुट्ठियाति** द्वादसविधसन्तुट्ठिभावाय । **पविवेकायाति** पविवित्तभावाय कायविवेकादितदङ्गविवेकादिविवेकसिद्धिया । **वीरियारम्भायाति** कायिकस्स चेव चेतसिकस्स च वीरियस्स पग्गणहनत्थाय । **सुभरतायाति** सुखपोसनत्थाय । एवं यो परियत्तिधम्मो उग्गहणधारणपरिपुच्छामनसिकारवसेन योनिसो पटिपज्जन्तस्स सरागादिभावपरिवज्जनस्स कारणं हुत्वा विरागादिभावाय संवत्ति, एकंसतो **एसो धम्मो, एसो विनयो** सम्मदेव अपायादीसु अपतनवसेन धारणतो किलेसानं विनयनतो, सत्थु सम्मासम्बुद्धस्स ओवादानुसिद्धिभावतो **एतं सत्थुसासनन्ति धारेय्यासि** जानेय्यासि, अवबुज्जेय्यासीति अत्थो । इमस्मिं सुत्ते पठमवारेन वट्ठं, दुतियवारेन विवट्ठं कथितं ।

**४०९-४१०. विमानेत्वाति** अपरज्झित्वा । **कम्मप्पत्तायोपीति** कम्मरहापि । **आपत्तिगामिनियोपीति**

आपत्तिआपन्नायोपि । वृत्तनयेनेव कारेतब्बतं आपज्जन्तीति तथाकरणस्स पटिक्खित्तत्ता दुक्कटेन कारेतब्बतं आपज्जन्ति ।

४१३-५. द्वे तिस्सो भिक्खुनियोति द्वीहि तीहि भिक्खुनीहि । न आरोचेन्तीति पातिमोक्खुद्देसकस्स न आरोचेन्ति । न पच्चाहरन्तीति भिक्खुनीनं न पच्चाहरन्ति । विसेसकन्ति वत्तभङ्गं ।

४२०. तेन च भिक्खु निमन्तेतब्बोति सामीचिदस्सनमेतं, न पन अनिमन्तिया आपत्ति ।

४२५. तयो निस्सयेति सेनासननिस्सयं अपनेत्वा अपरे तयो निस्सये । रुक्खमूलसेनासनज्झि सा न लभति ।

४२८. अनुवादं पट्टपेन्तीति इस्सरियं पवत्तेन्ति ।

४३०. भिक्खुदूतेन उपसम्पादेन्तीति भिक्खुयेव दूतो भिक्खुदूतो, तेन भिक्खुदूतेन, भिक्खुदूतं कत्वा उपसम्पादेन्तीति अत्थो ।

४३१. न सम्मतीति नप्पहोति । नवकम्मन्ति नवकम्मं कत्वा “एत्तकानि वस्सानि वसतू”ति अपलोकेत्वा सङ्घिकभूमिदानं ।

४३२. सन्निसिन्नगब्भाति पतिट्ठितगब्भा ।

४३४. पब्बज्जप्पि न लभतीति तित्थायतनसङ्कन्ताय अभब्बभावूपगमनतो न लभति । इदं ओदिस्स अनुज्जातं वट्ठतीति एकतो वा उभतो वा अवस्सवे सतिपि ओदिस्स अनुज्जातत्ता वट्ठति । सेसमेत्थ पाळितो अट्ठकथातो च सुविज्जेय्यमेवाति ।

भिक्खुनीउपसम्पन्नानुजाननकथावण्णना निट्ठिता ।

भिक्खुनिक्खन्धकवण्णना निट्ठिता ।

## ११. पञ्चसतिकक्खन्धकं

### सङ्गीतिनिदानकथावण्णना

४३७. पञ्चसतिकक्खन्धके पावाय कुसिनारन्ति (दी० नि० अट्ठ० २.२३१) पावानगरे पिण्डाय चरित्वा कुसिनारं गमिस्सामीति अद्धानमग्गप्पटिपन्नो । मन्दारवपुष्पं गहेत्वाति महाचाटिप्पमाणं पुष्पं आगन्तुकदण्डके ठपेत्वा छत्तं विय गहेत्वा । अद्दसं खोति आगच्छन्तं दूरतोव अद्दसं । दिस्वा च पन “पुच्छिस्सामि नं भगवतो पवत्ति”न्ति चित्तं उप्पादेत्वा “सचे खो पन निसिन्नकोव पुच्छिस्सामि, सत्थरि अगारवो कतो भविस्सती”ति उट्ठित्वा ठितट्ठानतो अपक्कम्म छद्दन्तो नागराजा मणिचम्मं विय दसबलदत्तियं मेघवण्णपंसुकूलचीवरं पारुपित्वा दसनखसमोधानसमुज्जलं अज्जलिं सिरस्मिं पतिट्ठापेत्वा सत्थरि कतेन गारवेन आजीवकस्स अभिमुखो हुत्वा “अपावुसो अम्हाकं सत्थारं जानासी”ति आह । किं पन

सत्थु परिनिब्बानं जानन्तो पुच्छि अजानन्तोति? आवज्जनप्पटिबद्धं खीणासवानं जाननं। अनावज्जितत्ता पनेस अजानन्तो पुच्छीति एके। थेरो समापत्तिबहुलो रत्तिट्ठानदिवाट्ठानलेणमण्डपादीसु निच्चं समापत्तिफलेनेव यापेति। कुलसन्तकम्पि गामं पविसित्वा द्वारे समापज्जित्वा समापत्तितो वुट्ठितोव भिक्खं गण्हाति। थेरो किर “इमिना मे पच्छिमेन अत्तभावेन महाजनानुगहं करिस्सामि, ये मय्हं भिक्खं वा देन्ति, गन्धमालादीहि वा सक्कारं करोन्ति, तेसं तं महप्फलं होतू”ति एवं करोति। तस्मा समापत्तिबहुलताय न जानि। इति अजानन्तोव पुच्छीति वदन्ति, तं न गहेतब्बं। न हेत्थ अजाननकारणं अत्थि। अभिलक्खितं सत्थु परिनिब्बानं अहोसि दससहस्सिलोकधातुकम्पनादीहि निमित्तेहि। थेरस्स पन परिसाय केहिचि भिक्खूहि भगवा दिट्ठपुब्बो, केहिचि न दिट्ठपुब्बो। तत्थ येहि दिट्ठपुब्बो, तेपि पस्सितुकामाव। येहिपि अदिट्ठपुब्बो, तेपि पस्सितुकामाव। तत्थ येहि न दिट्ठपुब्बो, ते अभिदस्सनकामताय गन्त्वा “कुहिं भगवा”ति पुच्छन्ता “परिनिब्बुतो”ति सुत्वा सन्धारेतुं न सक्खिस्सन्ति। चीवरं छट्ठेत्वा एकवत्था वा दुन्निवत्था वा उरानि पटिपिसन्ता परोदिस्सन्ति। तत्थ मनुस्सा “महाकस्सपेन सद्धिं आगतपंसुकूलिका सयम्पि इत्थियो विय परोदन्ति, ते किं अम्हे समस्सासेन्ती”ति मय्हं दोसं दस्सन्ति। इदं पन सुज्जं महारज्जं, इध यथा तथा रोदन्तेसु दोसो नत्थि। पुरिमतरं सुत्वा नाम सोकोपि तनुको होतीति भिक्खूनं सत्तुप्पादलाभत्थं जानन्तोव पुच्छि।

**अज्ज सत्ताहपरिनिब्बुतो**ति अज्ज दिवसतो पटिलोमतो सत्तमे अहनि परिनिब्बुतो। **ततो मे** इदन्ति ततो समणस्स गोतमस्स परिनिब्बुतट्ठानतो। **अवीतरागा**ति पुथुज्जना चेव सोतापन्नसकदागामिनो च। तेसज्झि दोमनस्सं अप्पहीनं, तस्मा तेपि बाहा पगग्ह कन्दन्ति, उभो हत्थे सीसे ठपेत्वा रोदन्ति। **छिन्नपातं पपतन्ती**ति छिन्नानं पातो विय छिन्नपातो, तं छिन्नपातं, भावनपुंसकनिद्वेसोयं, मज्झे छिन्ना विय हुत्वा यतो वा ततो वा पतन्तीति अत्थो। **आवट्टन्ती**ति अभिमुखभावेन वट्टन्ति। यत्थ पतिता, ततो कतिपयरतनट्ठानं वट्टनवसेनेव गन्त्वा पुन यथापतितमेव ठानं वट्टनवसेन आगच्छन्ति। **विवट्टन्ती**ति यत्थ पतिता, ततो निवट्टन्ति, पतितट्ठानतो परभागं वट्टमाना गच्छन्तीति अत्थो। अपिच पुरतो वट्टनं **आवट्टनं**, पस्सतो पच्छतो च वट्टनं **विवट्टनं**। तस्मा द्वे पादे पसारित्वा सकिं पुरतो सकिं पच्छतो सकिं वामतो सकिं दक्खिणतो सम्परिवट्टमानापि आवट्टन्ति विवट्टन्तीति वुच्चन्ति। **वीतरागा**ति पहीनदोमनस्सा इट्ठानिट्ठेसु निब्बिकारताय सिलाथम्भसदिसा अनागामिखीणासवा। कामज्झि दोमनस्से असतिपि एकच्चो रागो होतियेव, रागे पन असति दोमनस्सस्स असम्भवोयेव। तदेकट्ठभावतो हि रागप्पहानेन पहीनदोमनस्सा वुत्ता, न खीणासवा एव।

**सब्बेहेव पियेही**ति आदीसु पियायितब्बतो **पियेहि** मनवट्टनतो **मनापेहि** मातापिताभाताभगिनीआदिकेहि। **नानाभावो**ति जातिया नानाभावो, जातिअनुरूपगमनेन विसुं भावो, असम्बद्धभावोति अत्थो। **विनाभावो**ति मरणेन विनाभावो, चुतिया तेनत्तभावेन अपुनपवत्तनतो विप्पयोगोति अत्थो। **अज्जथाभावो**ति भवेन अज्जथाभावो, भवन्तरगगहणेन “कामावचरसत्तो रूपावचरो होती”ति आदिना तत्थापि “मनुस्सो देवो होती”ति आदिना च पुरिमाकारतो अज्जाकारताति अत्थो। **तन्ति** तस्मा। **कुतेत्थ लब्भा**ति कुतो कुहिं कस्मिं नाम ठाने एत्थ एतस्मिं खन्धप्पवत्ते यं तं जातं... पे०... मा पलुज्जीति लब्धुं सक्का, न सक्का एव तादिसस्स कारणस्स अभावतो। इदं वुत्तं होति — यस्मा सब्बेहेव पियेहि मनापेहि नानाभावो, तस्मा दस पारमियो पूरेत्वापि सम्बोधिं पत्वापि धम्मचक्कं पवत्तेत्वापि यमकपाटिहारियं दस्सेत्वापि देवोरोहणं कत्वापि यं तं जातं भूतं सङ्कतं पलोकधम्मं, तच्च तथागतस्सपि सरीरं मा पलुज्जीति नेतं ठानं विज्जति, रोदन्तेनपि कन्दन्तेनपि न सक्का तं कारणं लब्धुन्ति।

**तेन खो पनावुसो, समयेन सुभदो नाम वुट्ठपब्बजितो**ति आदीसु यं वत्तब्बं, तं **निदानवण्णनायं** (सारत्थ० टी० १.पठममहासङ्गीतिकथा) वुत्तनयमेव।

सङ्गीतिनिदानकथावण्णना निड्ढिता ।

### खुद्धानुखुद्दकसिक्खापदकथावण्णना

**४४१. समूहनेय्याति** आकङ्खमानो समूहनतु, यदि इच्छति, समूहनेय्याति अत्थो । कस्मा पन “समूहनथा”ति एकंसेनेव अवत्वा “आकङ्खमानो समूहनेय्या”ति विकप्पवचनेनेव भगवा ठपेसीति? महाकस्सपस्स जाणबलस्स दिट्ठत्ता । पस्सति हि भगवा “समूहनथाति वुत्तेपि सङ्गीतिकाले कस्सपो न समूहनिस्सती”ति, तस्मा विकप्पेनेव ठपेसि । यदि असमूहननं दिट्ठं, तदेव च इच्छितं, अथ कस्मा भगवा “आकङ्खमानो समूहनतू”ति अवोचाति? तथारूपपुग्गलज्झासयवसेन । सन्ति हि केचि खुद्धानुखुद्दकानि सिक्खापदानि समादाय वत्तितुं अनिच्छन्ता, तेसं तथा अवुच्चमाने भगवति विघातो उप्पज्जेय्य, तं तेसं भविस्सति दीघरत्तं अहिताय दुक्खाय । तथा पन वुत्ते तेसं विघातो न उप्पज्जेय्य, अम्हाकमेवायं दोसो, यतो अम्हेसुयेव केचि समूहननं न इच्छन्तीति । केचि “सकलस्स पन सासनस्स सङ्घायत्तभावकरणत्थं तथा वुत्त”न्ति वदन्ति । यं किञ्चि सत्थारा सिक्खापदं पज्जत्तं, तं समणा सक्कपुत्तिया सिरसा सम्पटिच्छित्वा जीवितं विय रक्खन्ति । तथा हि ते “खुद्धानुखुद्दकानि सिक्खापदानि आकङ्खमानो सङ्घो समूहनतू”ति वुत्तेपि न समूहनिंसु । अज्जदत्थु पुरतो विय तस्स अच्चयेपि रक्खिंसुयेवाति सत्थु सासनस्स सङ्घस्स च महन्तभावदस्सनत्थम्पि तथा वुत्तन्ति दट्ठब्बं । तथा हि आयस्मा आनन्दो अज्जेपि वा भिक्खू “कतमं पन, भन्ते, खुद्दकं, कतमं अनुखुद्दक”न्ति न पुच्छिंसु समूहनज्झासयस्सेव अभावतो, तेनेव एकसिक्खापदम्पि अपरिच्चजित्वा सब्बेसं अनुगहेतब्बभावदस्सनत्थं “चत्तारि पाराजिकानि ठपेत्वा अवसेसानि खुद्धानुखुद्दकानी”ति आदिमाहंसु । एवञ्चि वदन्तेहि “खुद्धानुखुद्दका इमे नामा”ति अविनिच्छितत्ता सब्बेसं अनुगहेतब्बभावो दस्सितो होति ।

**४४२. अथ खो आयस्मा महाकस्सपो सङ्घं जापेसीति** एत्थ पन केचि वदन्ति “भन्ते नागसेन, कतमं खुद्दकं, कतमं अनुखुद्दकन्ति मिलिन्दरज्जा पुच्छिते ‘दुक्कटं महाराज, खुद्दकं, दुब्भासितं अनुखुद्दक’न्ति (मि० प० ४.२.१) वुत्तत्ता नागसेनत्थेरो खुद्धानुखुद्दकं जानि, महाकस्सपत्थेरो पन तं अजानन्तो ‘सुणातु मे आवुसो’ति आदिना कम्मवाचं सावेसी”ति, न तं एवं गहेतब्बं । नागसेनत्थेरो हि परेसं वादपथोपच्छेदनत्थं सङ्गीतिकाले धम्मसङ्गाहकमहात्थेरेहि गहितकोट्टासेसु अन्तिमकोट्टासमेव गहेत्वा मिलिन्दराजानं सज्जापेसि, महाकस्सपत्थेरो पन एकसिक्खापदम्पि असमूहनितुकामताय तथा कम्मवाचं सावेसि ।

तत्थ **गिहिगतानीति** गिहिपटिसंयुत्तानीति वदन्ति । गिहीसु गतानि, तेहि जातानि **गिहिगतानीति** एवं पनेत्थ अत्थो दट्ठब्बो । धूमकालो एतस्साति **धूमकालिकं** चित्तकधूमवूपसमतो परं अप्पवत्तनतो । **अप्पज्जत्तन्ति** आदीसु (दी० नि० अट्ठ० २.१३६; अ० नि० अट्ठ० ३.७.२३) नवं अधम्मिकं कतिकवत्तं वा सिक्खापदं वा बन्धन्ता **अप्पज्जत्तं पज्जपेन्ति** नाम पुराणसन्थतवत्थुस्मिं सावत्थियं भिक्खू विय । उद्धम्मं उब्बिनयं सासनं दीपेन्ता **पज्जत्तं समुच्छिन्दन्ति** नाम वस्ससतपरिनिब्बुते भगवति वेसालिका वज्जिपुत्तका विय । खुद्धानुखुद्दका पन आपत्तियो सञ्चिच्च वीतिक्कमन्ता **यथापज्जत्तेसु सिक्खापदेसु समादाय न वत्तन्ति** नाम अस्सजिपुनब्बसुका विय । नवं पन कतिकवत्तं वा सिक्खापदं वा अबन्धन्ता, धम्मतो विनयतो सासनं दीपेन्ता, खुद्धानुखुद्दकम्पि च सिक्खापदं असमूहनन्ता **अप्पज्जत्तं न पज्जपेन्ति, पज्जत्तं न समुच्छिन्दन्ति, यथापज्जत्तेसु सिक्खापदेसु समादाय वत्तन्ति** नाम आयस्मा उपसेनो विय आयस्मा यसो काकण्डकपुत्तो विय च ।

**४४३. भगवता ओळारिके निमित्ते कयिरमानेति** वेसालिं निस्साय चापाले चेतिये विहरन्तेन भगवता —

“रमणीया, आनन्द, वेसाली, रमणीयं उदेनचेतियं, रमणीयं गोतमकचेतियं, रमणीयं सत्तम्बचेतियं, रमणीयं बहुपुत्तचेतियं, रमणीयं सारन्ददचेतियं, रमणीयं चापालचेतियं। यस्स कस्सचि, आनन्द, चत्तारो इद्धिपादा भाविता बहुलीकता यानीकता वत्थुकता अनुद्धिता परिचिता सुसमारद्धा, सो आकङ्खमानो कप्पं वा तिट्ठेय्य कप्पावसेसं वा। तथागतस्स खो पन, आनन्द, चत्तारो इद्धिपादा भाविता बहुलीकता यानीकता वत्थुकता अनुद्धिता परिचिता सुसमारद्धा, सो आकङ्खमानो, आनन्द, तथागतो कप्पं वा तिट्ठेय्य कप्पावसेसं वा”ति (दी० नि० २.१६६) —

एवं ओळारिके निमित्ते कयिरमाने।

**मारेन परियुद्धितचित्तोति** मारेन अज्झोत्थटचित्तो। मारो हि यस्स सब्बेन सब्बं द्वादस विपल्लासा अप्पहीना, तस्स चित्तं परियुद्धाति। थेरस्स च चत्तारो विपल्लासा अप्पहीना, तेनस्स मारो चित्तं परियुद्धासि। सो पन चित्तपरियुद्धानं करोन्तो किं करोतीति? भेरवं रूपारम्मणं वा दस्सेति, सद्धारम्मणं वा सावेति, ततो सत्ता तं दिस्वा वा सुत्वा वा सतिं विस्सज्जेत्वा विवटमुखा होन्ति, तेसं मुखेन हत्थं पवेसेत्वा हृदयं मदति, ततो विसज्जाव हुत्वा तिट्ठन्ति। थेरस्स पनेस मुखेन हत्थं पवेसेतुं किं सक्खिस्सति, भेरवारम्मणं पन दस्सेसि, तं दिस्वा थेरो निमित्तोभासं न पटिविज्झि।

खुद्धानुखुद्दकसिक्खापदकथावण्णना निद्धिता।

### ब्रह्मदण्डकथावण्णना

४४५. उज्जवनिकायाति पटिसोतगामिनिया। रजोहरणन्ति रजोपुच्छनी। न कुलवं गमेन्तीति निरत्थकविनासनं न गमेन्ति। कुच्छितो लवो कुलवो, अनयविनासोति वुत्तं होति। “धम्मविनयसङ्गीतिया”ति वत्तब्बे सङ्गीतिया विनयप्पधानत्ता “विनयसङ्गीतिया”ति वुत्तं। विनयप्पधाना सङ्गीति विनयसङ्गीति। सेसमेत्थ सुविज्जेय्यमेवाति।

पञ्चसतिकक्खन्धकवण्णना निद्धिता।

## १२. सत्तसतिकक्खन्धकं

### दसवत्थुकथावण्णना

४४६. सत्तसतिकक्खन्धके निक्खित्तमणिसुवण्णाति रूपियसिक्खापदेनेव पटिक्खित्तमणिसुवण्णा। तत्थ मणिग्गहणेन सब्बं दुक्कटवत्थु, सुवण्णग्गहणेन सब्बं पाचित्तियवत्थु गहितं होति। भिक्खग्गेनाति भिक्खुगणनाय।

४४७. उपक्विकलेसाति विरोचितुं अदत्त्वा उपक्विकलिद्वुभावकरणेन उपक्विकलेसा। महिकाति हिमं। धूमो च रजो च धूमरजो। एत्थ पुरिमा तयो असम्पत्तउपक्विकलेसा, राहु पन सम्पत्तउपक्विकलेसवसेन कथितोति वेदितब्बो। समणब्राह्मणा न तपन्ति न भासन्ति न विरोचन्तीति गुणपतापेन न तपन्ति गुणोभासेन न भासन्ति गुणविरोचनेन न विरोचन्ति। सुरामेरयपाना अप्पटिविरताति पञ्चविधाय सुराय चतुब्बिधस्स च मेरयस्स पानतो अविरता।

अविज्जानिवुट्ठाति अविज्जाय निवारिता पिहिता। पियरूपाभिनन्दिनोति पियरूपं सातरूपं अभिनन्दमाना तुस्समाना। सादियन्तीति गणहन्ति। अविद्वसूति अन्धबाला। सरजाति सकिलेसरजा। मगाति मिगसदिसा। तस्मिं तस्मिं



विसये भवे वा नेतीति नेत्ति, तण्हायेतं अधिवचनं । ताय सह वत्तन्तीति **सनेत्तिका** ।

**४४८. तं परिसं एतदवोचाति** (सं० नि० अट्ट० ३.४.३६२) तस्स किर एवं अहोसि “कुलपुत्ता पब्बजन्ता पुत्तदारज्वेव जातरूपरजतज्व पहायेव पब्बजन्ति, न च सक्का यं पहाय पब्बजिता तं एतेहि गाहेतु”न्ति नयग्गाहे ठत्वा एतं “**मा अय्या**”तिआदिवचनं अवोच । **एकंसेनेतन्ति** एतं पञ्चकामगुणकप्पनं “अस्समणधम्मो असक्क्यपुत्तियधम्मो”ति एकंसेन धारेय्यासि ।

**तिणन्ति** सेनासनच्छदनतिणं । **परियेसितब्बन्ति** तिणच्छदने वा इट्ठकच्छदने वा गेहे पलुज्जन्ते येहि तं कारितं, तेसं सन्तिकं गन्त्वा “तुम्हेहि कारितं सेनासनं ओवस्सति, न सक्का तत्थ वसितु”न्ति आचिक्खितब्बं । मनुस्सा सक्कोन्ता करिस्सन्ति, असक्कोन्ता “तुम्हे वट्ठकी गहेत्वा कारापेथ, मयं ते सज्जापेस्सामा”ति वक्खन्ति । एवं वुत्ते कारेत्वा तेसं आचिक्खितब्बं, मनुस्सा वट्ठकीनं दातब्बं दस्सन्ति । सचे आवाससामिका नत्थि, अज्जेसम्पि भिक्खाचारवत्तेन आरोचेत्वा कारेतुं वट्ठति । इमं सन्धाय “परियेसितब्ब”न्ति वुत्तं ।

**दारूति** सेनासने गोपानसिआदीसु पलुज्जमानेसु तदत्थाय दारु परियेसितब्बं । **सकटन्ति** गिहिविकटं वा तावकालिकं वा कत्वा सकटं परियेसितब्बं । न केवलज्च सकटमेव, अज्जम्पि वासिफरसुकुदालादिउपकरणं एवं परियेसितुं वट्ठति । **पुरिसोति** हत्थकम्मवसेन पुरिसो परियेसितब्बो । यं कज्जि हि पुरिसं “हत्थकम्मं आवुसो दस्ससी”ति वत्वा “दस्सामि भन्ते”ति वुत्ते “इमस्मिं इदज्जिदज्ज करोही”ति यं इच्छति, तं कारेतुं वट्ठति । न त्वेवाहं गामणि केनचि परियायेनाति जातरूपरजतं पनाहं केनचिपि कारणेन परियेसितब्बन्ति न वदामि ।

**४४९. पापकं कतन्ति असुन्दरं कतं ।**

**४५०. अहोगङ्गोति** तस्स पब्बतस्स नामं ।

**४५१. पटिकच्चेव गच्छेय्यन्ति** यत्थ तं अधिकरणं वूपसमेतुं भिक्खू सन्निपतन्ति, तत्थ पठममेव गच्छेय्यं । **सम्भावेसुन्ति** पापुणिसु ।

**४५२. अलोणकं भविस्सतीति** अलोणकं भत्तं वा ब्यज्जनं वा भविस्सति । **आसुताति** सब्बसम्भारसज्जिता । “असुत्ता”ति वा पाठो ।

**४५३. उज्जविसूति** नावं आरुह पटिसोतेन गच्छिंसु । **पाचीनकाति** पाचीनदेसवासिनो ।

**४५४. ननु त्वं आवुसो वुट्ठो वीसतिवस्सोसीति** ननु त्वं आवुसो वीसतिवस्सो, न निस्सयपटिबद्धो, कस्मा तं थेरो पणामेतीति दीपेन्ति । **गरुनिस्सयं गणहामाति** किञ्चापि मयं महल्लका, एतं पन थेरं गरुं कत्वा वसिस्सामाति अधिप्पायो ।

**४५५. मेत्ताय** रूपावचरसमाधिमत्तभावतो “**कुल्लकविहारेना**”ति वुत्तं, खुद्दकेन विहारेनाति अत्थो, खुद्दकता चस्स अगम्भीरभावतोति आह “**उत्तानविहारेना**”ति । **सुज्जताविहारेनाति** सुज्जतामुखेन अधिगतफलसमापत्तिं सन्धाय वुत्तं ।

**४५७. सुत्तविभङ्गेति** पदभाजनीये । **तेन सद्धिन्ति** पुरेपटिगहितलोणेन सद्धिं । **न हि एत्थ यावजीविकं**

तदहुपटिगगहितन्ति “कप्पति सिङ्गिलोणकप्पो”ति एत्थ वुत्तसिङ्गिलोणं सन्धाय वुत्तं । तज्झि पुरे पटिगगहेत्वा सिङ्गेन परिहटं न तदहुपटिगगहितं । यावकालिकमेव तदहुपटिगगहितन्ति सिङ्गिलोणेन मिस्सेत्वा भुज्जितब्बं अलोणामिसं सन्धाय वुत्तं । उपोसथसंयुत्तेति उपोसथपटिसंयुत्ते, उपोसथक्खन्धकेति वुत्तं होति । अतिसरणं अतिसारो, अतिक्कमो । विनयस्स अतिसारो विनयातिसारो । तं पमाणं करोन्तस्साति दसाय सद्धिं निसीदने यं पमाणं वुत्तं, दसाय विना तं पमाणं करोन्तस्स । सेसमेत्थ सुविज्जेय्यमेव ।

सत्तसतिकक्खन्धकवण्णना निट्ठिता ।

द्विवग्गसङ्गहाति चूळवग्गमहावग्गसङ्गहातेहि द्वीहि वग्गेहि सङ्गहिता । द्वावीसतिपभेदनाति महावग्गे दस, चूळवग्गे द्वादसाति एवं द्वावीसतिपभेदा । सासनेति सत्थुसासने । ये खन्धका वुत्ताति योजेतब्बं ।

इति समन्तपासादिकाय विनयट्ठकथाय सारत्थदीपनियं

चूळवग्गवण्णना निट्ठिता ।

॥ नमो तस्स भगवतो अरहतो सम्मासम्बुद्धस्स ॥

## परिवार-टीका

### सोळसमहावारो

#### पज्जत्तिवारवण्णना

विसुद्धपरिवारस्साति सब्बसो परिसुद्धखीणासवपरिवारस्स । धम्मक्खन्धसरीरस्साति सीलसमाधिपज्जाविमुत्तिविमुत्तिजाणदस्सनसङ्घातधम्मक्खन्धसरीरस्स सासनेति सम्बन्धो । तस्साति “परिवारो”ति यो सङ्गहं आरुळ्हो, तस्स । पुब्बागतं नयन्ति पुब्बे आगतं विनिच्छयं ।

१. पकतत्थपटिनिद्वेसो त-सद्दोति तस्स “भगवता”ति आदीहि पदेहि समानाधिकरणभावेन वुत्तत्थस्स याय विनयपज्जत्तिया भगवा पकतो अधिकतो सुपाकटो च, तं विनयपज्जत्तिं सद्धिं याचनाय अत्थभावेन दस्सेन्तो “यो सो... पे०... विनयपज्जत्तिं पज्जपेसी”ति आह । तत्थ विनयपज्जत्तिन्ति विनयभूतं पज्जत्तिं ।

“जानता पस्सता”ति इमेसं पदानं विनयस्स अधिकतत्ता तत्थ वुत्तनयेन ताव अत्थं योजेत्वा इदानीं सुत्तन्तनयेन दस्सेन्तो सतिपि जाणदस्सन-सद्धानं पज्जावेवचनभावे तेन तेन विसेसेन तेसं विसयविसेसपवत्तिदस्सनत्थं विज्जत्तयवसेन अभिज्जानावरणजाणवसेन सब्बज्जुतज्जाणमंसचक्खुवसेन पटिवेधदेसनाजाणवसेन च अत्थं योजेत्वा दस्सेन्तो “अपिचा”ति आदिमाह । तत्थ पुब्बेनिवासादीहीति पुब्बेनिवासासवक्खयजाणेहि । पटिवेधपज्जायाति अरियमग्गपज्जाय । देसनापज्जाय पस्सताति देसेतब्बधम्मानं देसेतब्बप्पकारं बोधनेय्यपुग्गलानञ्च आसयानुसयचरिताधिमुत्तिआदिभेदं धम्मं देसनापज्जाय याथावतो पस्सता । अरहताति अरीनं, अरानञ्च हतत्ता, पच्चयादीनञ्च अरहत्ता अरहता । सम्मासम्बुद्धेनाति सम्मा सामञ्च सच्चानं बुद्धत्ता सम्मासम्बुद्धेन । अथ वा

अन्तरायिकधम्मे जानता, नित्यानिकधम्मे पस्सता, किलेसारीनं हतत्ता अरहता, सम्मा सामं सब्बधम्मानं बुद्धत्ता सम्मासम्बुद्धेनाति एवं चतुवेसारज्जवसेनपेत्थ योजना वेदितब्बा ।

अपिच ठानाट्टानादिविभागं जानता, यथाकम्मूपगे सत्ते पस्सता, सवासनआसवानं छिन्नत्ता अरहता, अभिज्जेय्यादिभेदे धम्मे अभिज्जेय्यादितो अविपरीतावबोधतो सम्मासम्बुद्धेन । अथ वा तीसु कालेसु अप्पटिहतजाणताय जानता, कायकम्मादिवसेन तिण्णम्पि कम्मानं जाणानुपरिवत्तितो सम्मा कारिताय पस्सता, दवादीनं अभावसाधिकाय पहानसम्पदाय अरहता, छन्दादीनं अहानिहेतुभूताय अक्खयपटिभानसाधिकाय सब्बज्जुताय सम्मासम्बुद्धेनाति एवं दसबलअट्टारसावेणिकबुद्धधम्मवसेनपि योजना कातब्बा ।

२. पुच्छाविस्सज्जनेति पुच्छाय विस्सज्जने । एत्थाति एतस्मिं पुच्छाविस्सज्जने । मज्झिमदेसेयेव पज्जतीति तस्मिंयेव देसे यथावुत्तवत्थुवीतिककमे आपत्तिसम्भवतो । विनीतकथाति विनीतवत्थुकथा, अयमेव वा पाठो ।

कायेन पन आपत्तिं आपज्जतीति पुब्बभागे सेवनचित्तं अङ्गं कत्वा कायद्वारसङ्घातविज्जत्तिं जनयित्वा पवत्तचित्तुप्पादसङ्घातं आपत्तिं आपज्जति । किञ्चापि हि चित्तेन समुट्ठापिता विज्जत्ति, तथापि चित्तेन अधिप्पेतस्स अत्थस्स कायविज्जत्तिया साधितत्ता “कायद्वारेन आपत्तिं आपज्जती”ति वुच्चति । इममत्थं सन्धायाति आपन्नाय आपत्तिया अनापत्तिभावापादनस्स असक्कुणेय्यतासङ्घातमत्थं सन्धाय, न भण्डनादिवूपसमं ।

३. पोरणकेहि महाथेरेहीति सीहळदीपवासीहि महाथेरेहि । ठपिताति पोत्थकसङ्गहारोहनकाले ठपिता । चतुत्थसङ्कीतिसदिसा हि पोत्थकारोहसङ्कीति । उभतोविभङ्गे द्वत्तिस वारा सुविज्जेय्याव ।

## समुट्ठानसीसवण्णना

२५७. समुट्ठानकथाय पन करुणासीतलभावेन चन्दसदिसत्ता “बुद्धचन्दे”ति वुत्तं, किलेसतिमिरपहानतो “बुद्धादिच्चे”ति वुत्तं । पिटके तीणि देसयीति यस्मा ते देसयन्ति, तस्मा अङ्गिरसोपि पिटकानि तीणि देसयि । तानि कतमानीति आह “सुत्तन्त”न्तिआदि । महागुणन्ति महानिसंसं । एवं नीयति सद्धम्मो, विनयो यदि तिड्ढतीति यदि विनयपरियत्ति अनन्तरहिता तिड्ढति पवत्तति, एवं सति पटिपत्तिपटिवेधसद्धम्मो नीयति पवत्तति । विनयपरियत्ति पन कथं तिड्ढतीति आह “उभतोचा”तिआदि । परिवारेन गन्थिता तिड्ढन्तीति योजेतब्बं । तस्सेव परिवारस्साति तस्मिंयेव परिवारे ।

नियतकतन्ति कतनियतं, नियमितन्ति अत्थो । अज्जेहि सद्धिन्ति सेससिक्खापदेहि सद्धि । असम्भिन्नसमुट्ठानानीति असङ्करसमुट्ठानानि ।

तस्मा सिक्खेति यस्मा विनये सति सद्धम्मो तिड्ढति, विनयो च परिवारेन गन्थितो तिड्ढति, परिवारे च समुट्ठानादीनि दिस्सन्ति, तस्मा सिक्खेय्य परिवारं, उग्गण्हेय्याति अत्थो ।

आदिप्पि ताव पुरिमनयेति “छन्नं आपत्तिसमुट्ठानानं कतिहि समुट्ठानेहि समुट्ठातीति एकेन समुट्ठानेन समुट्ठाति, कायतो च चित्ततो च समुट्ठाती”तिआदिना (परि० १८७) पज्जत्तिवारे सकिं आगतनयं सन्धायेतं वुत्तं ।

२५८. नानुबन्धे पवत्तिनिन्ति “या पन भिक्खुनी वुट्ठापितं पवत्तिनिं द्वे वस्सानि नानुबन्धेय्या”ति (पाचि० ११११)

वृत्तसिक्खापदं ।

२७०. अकतन्ति अज्जेहि अमिस्सीकतं, नियतसमुद्धानन्ति वृत्तं होति ।

## अन्तरपेय्यालं

### कतिपुच्छावारवण्णना

२७१. वेरं मणतीति रागादिवेरं मणति विनासेति । एतायाति विरतिया । निव्यानन्ति मग्गं । कायपागब्बियन्ति कायपागब्बियवसेन पवत्तं कायदुच्चरितं ।

२७४. सारणीयाति सरितब्बयुत्ता अनुस्सरणारहा अद्धाने अतिक्कन्तेपि न सम्मुस्सितब्बा । मिज्जति सिनिह्ति एतायाति मेत्ता, मित्तभावो । मेत्ता एतस्स अत्थीति मेत्तं कायकम्मं, तं पन यस्मा मेत्तासहगतचित्तसमुद्धानं, तस्मा वृत्तं “मेत्तचित्तेन कतं कायकम्म”न्ति । आवीति पकासं । पकासभावो चेत्थ यं उद्दिस्स तं कायकम्मं करीयति, तस्स सम्मुखभावतोति आह “सम्मुखा”ति । रहोति अपकासं । अपकासता च यं उद्दिस्स तं कम्मं करीयति, तस्स अपच्चक्खभावतोति आह “परम्मुखा”ति । उभयेहीति नवकेहि थेरेहि च । पियं पियायितब्बं करोतीति पियकरणो । गरुं गरुद्धानियं करोतीति गरुकरणो । सङ्गहायाति सङ्गहवत्थुविसेसभावतो सब्रह्मचारीनं सङ्गहणत्थाय । अविवादायाति सङ्गहवत्थुभावतो एव न विवादाय । सति च अविवादहेतुभूतसङ्गहकत्ते तेसं वसेन सब्रह्मचारीनं समग्गभावो भेदाभावो सिद्धोयेवाति आह “समग्गभावाया”तिआदि ।

पग्गह वचनन्ति केवलं “देवो”ति अवत्वा “देवत्थेरो”ति गुणेहि थिरभावजोतनं पग्गणिहत्वा उच्चं कत्वा वचनं । ममत्तबोधनवचनं ममायनवचनं । एकन्ततिरोक्खस्स मनोकम्मस्स सम्मुखता नाम विज्जत्तिसमुद्धानपनवसेनेव होति, तज्ज खो लोके कायकम्मन्ति पाकटं पज्जातं हत्थविकारादिं अनामसित्वायेव दस्सेन्तो “नयनानि उम्मीलेत्वा”तिआदिमाह । कामज्चेत्थ मेत्तासिनेहसिनिद्धानं नयनानं उम्मीलना पसन्नेन मुखेन ओलोकनज्ज मेत्तं कायकम्ममेव, यस्स पन चित्तस्स वसेन नयनानं मेत्तासिनेहसिनिद्घता मुखस्स च पसन्नता, तं सन्धाय वृत्तं “मेत्तं मनोकम्मं नामा”ति ।

इमानि (दी० नि० अट्ठ० २.१४१; म० नि० अट्ठ० १.४९२; अ० नि० अट्ठ० ३.६.११) च मेत्तकायकम्मादीनि पाळियं भिक्खूनं वसेन आगतानि गिहीसुपि लब्धन्तियेव । भिक्खूनज्हि मेत्तचित्तेन आचरियुपज्झायवत्तादिआभिसमाचारिकधम्मपूरणं मेत्तं कायकम्मं नाम । सब्बज्ज अनवज्जकायकम्मं आभिसमाचारिककम्मन्तो गधमेवाति वेदितब्बं । गिहीनं चेतियवन्दनत्थाय बोधिवन्दनत्थाय सङ्गनिमन्तनत्थाय गमनं, गामं वा पिण्डाय पविट्ठे भिक्खू दिस्वा पच्चुगमनं, पत्तपटिग्गहणं, आसनपज्जापनं, अनुगमनन्ति एवमादिकं मेत्तं कायकम्मं नाम । भिक्खूनं मेत्तचित्तेन आचारपज्जत्तिसिक्खापन कम्मद्धानकथन धम्मदेसना परिपुच्छन अट्ठकथाकथनवसेन पवत्तियमानं तेपिटकम्पि बुद्धवचनं मेत्तं वचीकम्मं नाम । गिहीनं “चेतियवन्दनत्थाय गच्छाम, बोधिवन्दनत्थाय गच्छाम, धम्मस्सवनं करिस्साम, दीपमालापुष्पपूजं करिस्साम, तीणि सुचरितानि समादाय वत्तिस्साम, सलाकभत्तादीनि दस्साम, वस्सावासिकं दस्साम, अज्ज सङ्गस्स चत्तारो पच्चये दस्साम, सङ्गं निमन्तेत्वा खादनीयादीनि संविदहथ, आसनानि पज्जपेथ, पानीयं उपट्ठापेथ, सङ्गं पच्चुगन्त्वा आनेथ, पज्जत्तासने निसीदापेथ, छन्दजाता उस्साहजाता वेय्यावच्चं करोथा”तिआदिकथनकाले मेत्तं वचीकम्मं नाम । भिक्खूनं पातोव उट्ठाय सरीरपटिजग्नं चेतियङ्गणवत्तादीनि च कत्वा

विवित्तासने निसीदित्वा “इमस्मिं विहारे भिक्खू सुखी होन्तु अवेरा अब्यापज्जा”ति चिन्तनं मेत्तं मनोकम्मं नाम ।  
गिहीनं “अय्या सुखी होन्तु अवेरा अब्यापज्जा”ति चिन्तनं मेत्तं मनोकम्मं नाम ।

लाभाति चीवरादयो लद्धपच्चया । धम्मिकाति कुहनादिभेदं मिच्छाजीवं वज्जेत्वा धम्मेन समेन भिक्खाचरियवत्तेन  
उप्पन्ना । अन्तमसो पत्तपरियापन्नमत्तम्पीति पच्छिमकोटिया पत्ते परियापन्नं पत्तस्स अन्तोगतं  
द्वत्तिकटच्छुभिक्खामत्तम्पि । देय्यं दक्खिण्येय्यञ्च अप्पटिविभत्तं कत्वा भुज्जतीति अप्पटिविभत्तभोगी । एत्थ हि द्वे  
पटिविभत्तानि नाम आमिसपटिविभत्तं पुग्गलपटिविभत्तञ्च । तत्थ “एत्तकं दस्सामि, एत्तकं न दस्सामी”ति एवं चित्तेन  
विभजनं आमिसपटिविभत्तं नाम । “असुकस्स दस्सामि, असुकस्स न दस्सामी”ति एवं चित्तेन विभजनं पन  
पुग्गलपटिविभत्तं नाम । तदुभयम्पि अकत्वा यो अप्पटिविभत्तं भुज्जति, अयं अप्पटिविभत्तभोगी नाम । तेनाह “नेव  
आमिसं पटिविभजित्वा भुज्जती”तिआदि । अदातुम्पीति पि-सद्धेन दातुम्पि वट्टतीति दस्सेति । दानज्झि नाम न कस्सचि  
निवारितं, तेन दुस्सीलस्सपि अत्थिकस्स सति सम्भवे दातब्बं, तच्च खो करुणायनवसेन, न वत्तपूरणवसेन ।  
सारणीयधम्मपूरकस्स अप्पटिविभत्तभोगिताय “सब्बेसं दातब्बमेवा”ति वुत्तं । गिलानादीनं पन ओदिस्सकं कत्वा दानं  
अप्पटिविभागपक्खिकं “असुकस्स न दस्सामी”ति पटिक्खेपस्स अभावतो । ब्यतिरेकप्पधानो हि पटिविभागो । तेनाह  
“गिलानगिलानुपट्टाक...पे०... विचेय्य दातुम्पि वट्टती”ति ।

साधारणभोगीति एत्थ साधारणभोगिनो इदं लक्खणं — यं यं पणीतं लभति, तं तं नेव लाभेन लाभं निजिगीसनमुखेन  
गिहीनं देति अत्तनो आजीवसुद्धिं रक्खमानो, न अत्तनाव परिभुज्जति “मय्हं असाधारणभोगिता मा होतू”ति । तं  
पटिग्गहन्तो च “सद्धेन साधारणं होतू”ति गहेत्वा घण्टिं पहरित्वा परिभुज्जितब्बं सङ्गसन्तकं विय पस्सति । इमिना च  
तस्स लाभस्स तीसुपि कालेसु साधारणतो ठपनं दस्सितं । “तं पटिग्गहन्तो च सद्धेन साधारणं होतू”ति इमिना  
पटिग्गहणकालो दस्सितो, “गहेत्वा...पे०... पस्सती”ति इमिना पटिग्गहितकालो । तदुभयं पन तादिसेन पुब्बभागेन विना न  
होतीति अत्थसिद्धो पुरिमकालो । तयिदम्पि पटिग्गहणतो पुब्बेवस्स होति “सद्धेन साधारणं होतूति पटिग्गहेस्सामी”ति,  
पटिग्गहन्तस्स होति “सद्धेन साधारणं होतूति पटिग्गहामी”ति, पटिग्गहेत्वा होति “सद्धेन साधारणं होतूति पटिग्गहितं  
मया”ति एवं तिलक्खणसम्पन्नं कत्वा लद्धलाभं ओसानलक्खणं अविकोपेत्वा परिभुज्जन्तो साधारणभोगी  
अप्पटिविभत्तभोगी च होति ।

इमं (दी० नि० अट्ठ० २.१४१; म० नि० अट्ठ० १.४९२; अ० नि० अट्ठ० ३.६.११) पन सारणीयधम्मं को पूरेति, को न  
पूरेति? दुस्सीलो ताव न पूरेति । न हि तस्स सन्तकं सीलवन्तो गणहन्ति । परिसुद्धसीलो पन वत्तं अखण्डेन्तो पूरेति । तत्रिदं  
वत्तं — यो ओदिस्सकं कत्वा मातु वा पितु वा आचरियुपज्झायादीनं वा देति, सो दातब्बं देतु, सारणीयधम्मो पनस्स न  
होति, पलिबोधजगनं नाम होति । सारणीयधम्मो हि मुत्तपलिबोधस्सेव वट्टति । तेन पन ओदिस्सकं देन्तेन  
गिलानगिलानुपट्टाकआगन्तुकगमिकानञ्चेव नवपब्बजितस्स च सङ्गाटिपत्तगहणं अजानन्तस्स दातब्बं । एतेसं दत्त्वा  
अवसेसं थेरासनतो पट्टाय थोकं थोकं अदत्त्वा यो यत्तकं गणहाति, तस्स तत्तकं दातब्बं । अवसिट्ठे असति पुन पिण्डाय  
चरित्वा थेरासनतो पट्टाय यं यं पणीतं, तं तं दत्त्वा सेसं भुज्जितब्बं ।

अयं पन सारणीयधम्मो सारणीयधम्मपूरणविधिम्हि सुसिक्खिताय परिसाय सुपूरो होति । सुसिक्खिताय हि परिसाय  
यो अज्जतो लभति, सो न गणहाति । अज्जतो अलभन्तोपि पमाणयुत्तमेव गणहाति, न अतिरेकं । अयञ्च पन सारणीयधम्मो  
एवं पुनप्पुनं पिण्डाय चरित्वा लद्धं लद्धं देन्तस्सपि द्वादसहि वस्सेहि पूरति, न ततो ओरं । सचे हि द्वादसमेपि वस्से

सारणीयधम्मपूरको पिण्डपातपूरं पत्तं आसनसालायं ठपेत्वा नहायितुं गच्छति, सङ्कथ्येरो च “कस्सेसो पत्तो”ति वत्वा “सारणीयधम्मपूरकस्सा”ति वुत्ते “आहरथ न”न्ति सब्बं पिण्डपातं विचारेत्वा भुज्जित्वाव रित्तपत्तं ठपेति । अथ सो भिक्खु रित्तपत्तं दिस्वा “मय्हं अनवसेसेत्वाव परिभुज्जिंसू”ति दोमनस्सं उप्पादेति, सारणीयधम्मो भिज्जति, पुन द्वादस वस्सानि पूरेतब्बो होति । तित्थियपरिवाससदिसो हेस, सकिं खण्डे जाते पुन पूरेतब्बोव । यो पन “लाभा वत मे, सुलद्धं वत मे, यस्स मे पत्तगतं अनापुच्छाव सब्रह्मचारिनो परिभुज्जन्ती”ति सोमनस्सं जनेति, तस्स पुण्णो नाम होति ।

एवं पूरितसारणीयधम्मस्स पन नेव इस्सा, न मच्छरियं होति, मनुस्सानं पियो होति सुलभपच्चयो, पत्तगतमस्स दिव्यमानम्पि न खीयति, भाजनीयभण्डद्वाने अगगभण्डं लभति, भये वा छातके वा सम्पत्ते देवता उस्सुक्कं आपज्जन्ति ।

तत्रिमानि वत्थूनि — लेणगिरिवासी तिससत्थेरो किर महाखीरगामं उपनिस्साय वसति । पज्जासमत्ता थेरा नागदीपं चेतियवन्दनत्थाय गच्छन्ता खीरगामे पिण्डाय चरित्वा किज्चि अलद्धा निक्खमिंसु । थेरो पविसन्तो ते दिस्वा पुच्छि “लद्धं, भन्ते”ति । विचरिम्ह, आवुसोति । सो अलद्धभावं जत्वा आह “भन्ते, यावाहं आगच्छामि, ताव इधेव होथा”ति । मयं, आवुसो, पज्जास जना पत्ततेमनमत्तम्पि न लभिम्हाति । भन्ते, नेवासिका नाम पटिबला होन्ति, अलभन्तापि भिक्खाचारमगगसभागं जानन्तीति । थेरा आगमिंसु । थेरो गामं पाविसि । धुरगेहेयेव महाउपासिका खीरभत्तं सज्जेत्वा थेरं ओलोकयमाना ठिता थेरस्स द्वारं सम्पत्तस्सेव पत्तं पूरेत्वा अदासि । सो तं आदाय थेरानं सन्तिकं गन्त्वा “गण्हथ, भन्ते”ति सङ्कथ्येरं आह । थेरो “अम्हेहि एत्तकेहि किज्चि न लद्धं, अयं सीधमेव गहेत्वा आगतो, किं नु खो”ति सेसानं मुखं ओलोकेसि । थेरो ओलोकनाकारेनेव जत्वा “भन्ते, धम्मेन समेन लद्धो पिण्डपातो, निक्कुक्कुच्चा गण्हथा”ति आदितो पट्टाय सब्बेसं यावदत्थं दत्वा अत्तनापि यावदत्थं भुज्जि । अथ नं भत्तिकच्चावसाने थेरा पुच्छिंसु “कदा, आवुसो, लोकुत्तरधम्मं पटिविज्झी”ति? नत्थि मे, भन्ते, लोकुत्तरधम्मोति । ज्ञानलाभीसि आवुसोति? एतम्पि मे, भन्ते, नत्थीति । ननु, आवुसो, पाटिहारियन्ति? सारणीयधम्मो मे, भन्ते, पूरितो, तस्स मे पूरितकालतो पट्टाय सचेपि भिक्खुसतसहस्सं होति, पत्तगतं न खीयतीति । साधु साधु सप्पुरिस अनुच्छविकमिदं तुहन्ति । इदं ताव **पत्तगतं न खीयतीति** एत्थ वत्थु ।

अयमेव पन थेरो चेतियपब्बते गिरिभण्डमहापूजाय दानद्वानं गन्त्वा “इमस्मिं दाने किं वरभण्ड”न्ति पुच्छि । द्वे साटका, भन्तेति । एते मय्हं पापुणिस्सन्तीति । तं सुत्वा अमच्चो रज्जो आरोचेसि “एको दहरो एवं वदती”ति । “दहरस्स एवं चित्तं, महाथेरानं पन सुखुमा साटका वट्टन्ती”ति वत्वा “महाथेरानं दस्सामी”ति ठपेसि । तस्स भिक्खुसङ्घे पटिपाटिया ठिते देन्तस्स मत्थके ठपितापि ते साटका हत्थं नारोहन्ति, अज्जेव आरोहन्ति । दहरस्स दानकाले पन हत्थं आरुळ्हा । सो तस्स हत्थे ठपेत्वा अमच्चस्स मुखं ओलोकेत्वा दहरं निसीदापेत्वा दानं दत्वा सङ्घं विस्सज्जेत्वा दहरस्स सन्तिके निसीदित्वा “भन्ते, इमं धम्मं कदा पटिविज्झित्था”ति आह । सो परियायेनपि असन्तं अवदन्तो “नत्थि मय्हं, महाराज, लोकुत्तरधम्मो”ति आह । ननु, भन्ते, पुब्बेव अवचुत्थाति । आम महाराज, सारणीयधम्मपूरको अहं, तस्स मे धम्मस्स पूरितकालतो पट्टाय भाजनीयद्वाने अगगभण्डं पापुणातीति । “साधु साधु भन्ते, अनुच्छविकमिदं तुम्हाक”न्ति वन्दित्वा पक्कामि । इदं **भाजनीयद्वाने अगगभण्डं पापुणातीति** एत्थ वत्थु ।

चण्डालतिससभयेन पन भातरगामवासिनो नागत्थेरिया अनारोचेत्वाव पलायिंसु । थेरी पच्चूससमये “अति विय अप्पनिग्घोसो गामो, उपधारेथ तावा”ति दहरभिक्खुनियो आह । ता गन्त्वा सब्बेसं गतभावं जत्वा आगम्म थेरिया आरोचेसुं । सा सुत्वा “मा तुम्हे तेसं गतभावं चिन्तयित्थ, अत्तनो उद्देसपरिपुच्छायोनि सोमनसिकारे सुयेव योगं करोथा”ति वत्वा भिक्खाचारवेलायं पारुपित्वा अत्तद्वादसमा गामद्वारे निग्रोधमूले अट्ठासि । रुक्खे अधिवत्था देवता द्वादसन्नम्पि

भिक्षुनीनं पिण्डपातं दत्वा “अय्ये अज्जत्थ मा गच्छथ, निच्चं इधेव एथा”ति आह । थेरिया पन कनिट्टभाता नागत्येरो नाम अत्थि, सो “महन्तं भयं, न सक्का यापेतुं, परतीरं गमिस्सामी”ति अत्तद्वादसमो अत्तनो वसनट्ठाना निक्खन्तो “थेरिं दिस्वा गमिस्सामी”ति भातरगामं आगतो । थेरी “थेरा आगता”ति सुत्वा तेसं सन्तिकं गन्त्वा “किं अय्या”ति पुच्छि । सो तं पवत्तिं आचिक्खि । सा “अज्ज एकदिवसं विहारे वसित्वा स्वेव गमिस्सथा”ति आह । थेरा विहारं आगमंसु ।

थेरी पुनदिवसे रुक्खमूले पिण्डाय चरित्वा थेरं उपसङ्गमित्वा “इमं पिण्डपातं परिभुज्जथा”ति आह । थेरो “वट्टिस्सति थेरी”ति वत्वा तुण्ही अट्ठासि । धम्मिको तात पिण्डपातो, कुक्कुच्चं अकत्वा परिभुज्जथाति । वट्टिस्सति थेरीति । सा पत्तं गहेत्वा आकासे खिपि । पत्तो आकासे अट्ठासि । थेरो “सत्ततालमत्ते ठितम्पि भिक्षुनीभत्तमेव थेरी”ति वत्वा “भयं नाम सब्बकालं न होति, भये वूपसन्ते अरियवंसं कथयमानो ‘भो पिण्डपातिक भिक्षुनीभत्तं भुज्जित्वा वीतिनामयित्था’ति चित्तेन अनुवदियमानो सन्थम्भितुं न सक्खिस्सामि, अप्पमत्ता होथ थेरियो”ति मग्गं आरुहि । रुक्खदेवतापि “सचे थेरो थेरिया हत्थतो पिण्डपातं परिभुज्जिस्सति, न नं निवत्तेस्सामि, सचे न परिभुज्जिस्सति, निवत्तेस्सामी”ति चिन्तयमाना ठत्वा थेरस्स गमनं दिस्वा रुक्खा ओरुह “पत्तं, भन्ते, देथा”ति पत्तं गहेत्वा थेरं रुक्खमूलंयेव आनेत्वा आसनं पज्जपेत्वा पिण्डपातं दत्वा कतभत्तकिच्चं पटिज्जं कारेत्वा द्वादस भिक्षुनियो द्वादस च भिक्षू सत्त वस्सानि उपट्ठहि । इदं देवता उस्सुक्कं आपज्जन्तीति एत्थ वत्थु । तत्र हि थेरी सारणीयधम्मपूरिका अहोसि ।

नत्थि एतेसं खण्डन्ति **अखण्डानि**, तं पन नेसं खण्डं दस्सेतुं “**यस्सा**”तिआदि वुत्तं । तत्थ उपसम्पन्नसीलानं उद्देसक्कमेन आदिअन्ता वेदितब्बा । तेनाह “**सत्तसू**”तिआदि । अनुपसम्पन्नसीलानं पन समादानक्कमेनपि आदिअन्ता लब्धन्ति । **परियन्ते छिन्नसाटको वियाति** वत्थन्ते दसन्ते वा छिन्नवत्थं विय । विसदिसुदाहरणज्चेतं “अखण्डानी”ति इमस्स अधिकतत्ता । एवं सेसानिपि उदाहरणानि । **खण्डन्ति खण्डवन्तं, खण्डितं वा । छिदन्ति**आदीसुपि एसेव नयो । विसभागवण्णेन गावी वियाति सम्बन्धो । विसभागवण्णेन उपट्ठं ततियभागं वा सम्भिन्नवण्णं **सबलं**, विसभागवण्णेहेव पन बिन्दूहि अन्तरन्तरा विमिस्सं **कम्मासं** । अयं इमेसं विसेसो ।

**भुजिस्सभावकरणतो**ति तण्हादासब्बतो मोचेत्वा भुजिस्सभावकरणतो । सीलस्स च तण्हादासब्बतो मोचनं विवट्ठूपनिस्सयभावापादनं, तेनस्स विवट्ठूपनिस्सयता दस्सिता । “भुजिस्सभावकरणतो”ति च इमिना भुजिस्सकरणानि **भुजिस्सानी**ति उत्तरपदलोपेनायं निद्देसोति दस्सेति । यस्मा च तंसमङ्गीपुग्गलो सेरी सयंवसी भुजिस्सो नाम होति, तस्मापि भुजिस्सानि । सुपरिसुद्धभावेन पासंसत्ता **विज्जुपसत्थानि** । अविज्जूनं पसंसाय अप्पमाणभावतो विज्जूगहणं कतं । **तण्हादिट्ठीहि अपरामट्ठत्ता**ति “इमिनाहं सीलेन देवो वा भविस्सामि देवज्जतरो वा”ति तण्हापरामासेन “इमिनाहं सीलेन देवो हुत्वा तत्थ निच्चो धुवो सस्सतो भविस्सामी”ति दिट्ठिपरामासेन च अपरामट्ठत्ता । अथ वा “अयं ते सीलेसु दासो”ति चतूसु विपत्तीसु यं वा तं वा विपत्तिं दस्सेत्वा “इमं नाम त्वं आपन्नपुब्बो”ति केनचि परामट्ठं अनुद्धंसेतुं असक्कुण्येयत्ता **अपरामट्ठानी**ति एवमेत्थ अत्थो दट्ठब्बो । सीलं नाम अविष्पटिसारादिपारम्परियेन यावदेव समाधिसम्पादनत्थन्ति आह “**समाधिसंवत्तनिकानी**”ति । समाधिसंवत्तनप्ययोजनानि **समाधिसंवत्तनिकानि** ।

समानभावो सामज्जं, परिपुण्णचतुपारिसुद्धिभावेन मज्झे भिन्नसुवण्णस्स विय भेदाभावतो सीलेन सामज्जं सीलसामज्जं, तं गतो उपगतोति **सीलसामज्जगतो** । तेनाह “**समानभावूपगतसीलो**”ति, सीलसम्पत्तिया समानभावं उपगतसीलो सभागवुत्तिकोति अत्थो । सोतापन्नादीनज्हि सीलं समुदन्तरेपि देवलोकेपि वसन्तानं अज्जेसं सोतापन्नादीनं सीलेन समानमेव होति, नत्थि मग्गसीले नानत्तं । कामज्हि पुथुज्जनानम्पि चतुपारिसुद्धिसीले नानत्तं न सिया, तं पन न

एकन्तिकन्ति इध नाधिपेतं, मग्गसीलं पन एकन्तिकं नियतभावतोति तमेव सन्धाय “यानि तानि सीलानी”तिआदि वुत्तं ।

यायन्ति या अयं मय्हेव तुम्हाकञ्च पच्चक्खभूता । दिट्ठीति मग्गसम्मादिट्ठि । निद्दोसाति निद्दुतदोसा, समुच्छिन्नरागादिपापधम्माति अत्थो । निव्यातीति वट्टदुक्खतो निस्सरति निगच्छति । सयं नियन्तीयेव हि तंमग्गसमङ्गीपुग्गलं वट्टदुक्खतो निव्यापेतीति वुच्चति । या सत्थु अनुसिद्धि, तं करोतीति तक्करो, तस्स, यथानुसिद्धं पटिपज्जनकस्साति अत्थो । दिट्ठिसामञ्जगतोति सच्चसम्पटिवेधेन समानदिट्ठिभावं उपगतो ।

कतिपुच्छावारवण्णना निट्ठिता ।

### छआपत्तिसमुद्धानवारकथावण्णना

२७६. पठमेन आपत्तिसमुद्धानेनातिआदि सब्बं उद्देसनिद्देसादिवसेन पवत्तपाळिं अनुसारेनेव सक्का विज्जातुं ।

### समथभेदं

### अधिकरणपरियायवारकथावण्णना

२९३. लोभो पुब्बङ्गमोतिआदीसु पन लोभहेतु विवदनतो “लोभो पुब्बङ्गमो”ति वुत्तं । एवं सेसेसुपि । ठानानीति कारणानि । तिट्ठन्ति एत्थाति ठानं । के तिट्ठन्ति? विवादाधिकरणादयो । वसन्ति एत्थाति वत्थु । भवन्ति एत्थाति भूमि । कुसलाकुसलाब्याकतचित्तसमङ्गिनो विवदनतो “नव हेतू”ति वुत्तं । द्वादस मूलानीति “कोधनो होति उपनाही”तिआदीनि द्वादस मूलानि ।

२९४-२९५. इमानेव द्वादस कायवाचाहि सद्धिं “चुद्दस मूलानी”ति वुत्तानि । सत्त आपत्तिक्खन्धा ठानानीति एत्थ आपत्तिं आपज्जित्वा पटिच्छादेन्तस्स या आपत्ति, तस्सा पुब्बे आपन्ना आपत्तियो ठानानीति वेदितब्बं । “नत्थि आपत्ताधिकरणं कुसल”न्ति वचनतो आपत्ताधिकरणे अकुसलाब्याकतवसेन छ हेतू वुत्ता । कुसलचित्तं पन अङ्गं होति, न हेतु ।

२९६. चत्तारि कम्मानि ठानानीति एत्थ “एवं कत्तब्ब”न्ति इतिकत्तब्बतादस्सनवसेन पवत्तपाळि कम्मं नाम, यथाठितपाळिवसेन करोन्तानं किरिया किच्चाधिकरणं नाम । जत्तिजत्तिदुतियजत्तिचतुत्थकम्मानि जत्तितो जायन्ति, अपलोकनकम्मं अपलोकनतोवाति आह “जत्तितो वा अपलोकनतो वा”ति । किच्चाधिकरणं एकेन समथेन सम्मति, सम्पज्जतीति अत्थो । तेहि समेतब्बत्ता “विवादाधिकरणस्स साधारणा”ति वुत्तं ।

### तब्भागियवारकथावण्णना

२९८. विवादाधिकरणस्स तब्भागियाति विवादाधिकरणस्स वूपसमतो तप्पक्खिका ।

### समथा समथस्स साधारणवारकथावण्णना



२९९. एकं अधिकरणं सब्बे समथा एकतो हुत्वा समेतुं सक्कोन्ति न सक्कोन्तीति पुच्छन्तो “समथा समथस्स साधारणा, समथा समथस्स असाधारणा”ति आह । येभ्यसिकाय समनं सम्मुखाविनयं विना न होतीति आह “येभ्यसिका सम्मुखाविनयस्स साधारणा”ति । सतिविनयादीहि समनस्स येभ्यसिकाय किच्चं नत्थीति आह “सतिविनयस्स... पे०... असाधारणा”ति । एवं सेसेसुपि । तब्भागियवारेपि एसेव नयो ।

### विनयवारकथावण्णना

३०२. सब्बेसम्पि समथानं विनयपरियायो लब्भतीति “विनयो सम्मुखाविनयो”ति आदिना विनयवारो उद्धटो । सिया न सम्मुखाविनयोति एत्थ सम्मुखाविनयं ठपेत्वा सतिविनयादयो सेससमथा अधिप्पेता । एस नयो सेसेसुपि ।

### कुसलवारकथावण्णना

३०३. सङ्गस्स सम्मुखा पटिज्जाते तं पटिजाननं सङ्गसम्मूखता नाम । तस्स पटिजाननचित्तं सन्धाय “सम्मूखाविनयो कुसलो”ति आदि वुत्तन्ति वदन्ति । नत्थि सम्मुखाविनयो अकुसलोति धम्मविनयपुग्गलसम्मूखताहि तिवङ्गिको सम्मुखाविनयो एतेहि विना नत्थि । तत्थ कुसलचित्तेहि करणकाले कुसलो, अरहन्तेहि करणकाले अब्बाकतो । एतेसं सङ्गसम्मूखतादीनं अकुसलपटिपक्खत्ता अकुसलस्स सम्भवो नत्थि, तस्मा “नत्थि सम्मुखाविनयो अकुसलो”ति वुत्तं । “येभ्यसिका अधम्मवादीहि वूपसमनकाले, धम्मवादीनम्पि अधम्मवादिमिह सलाकग्गाहापके जाते अकुसला । सतिविनयो अनरहतो सञ्चिच्च सतिविनयदाने अकुसलो । अमूळहविनयो अनुम्मत्तकस्स दाने, पटिज्जातकरणं मूळहस्स अजानतो पटिज्जाय करणे, तस्सपापियसिका सुद्धस्स करणे, तिणवत्थारकं महाकलहे सञ्चिच्च करणे च अकुसलं । सब्बत्थ अरहतो वसेनेव अब्बाकत”न्ति सब्बमेतं गण्ठपदेसु वुत्तं ।

### समथवारविस्सज्जनावारकथावण्णना

३०४-३०५. यत्थ येभ्यसिका लब्भति, तत्थ सम्मुखाविनयो लब्भतीति आदि पुच्छा । यस्मिं समये सम्मुखाविनयेन चाति आदि तस्सा विस्सज्जनं, यस्मिं समये सम्मुखाविनयेन च येभ्यसिकाय च अधिकरणं वूपसम्मति, तस्मिं समये यत्थ येभ्यसिका लब्भति, तत्थ सम्मुखाविनयो लब्भतीति एवं सब्बत्थ सम्बन्धो । यत्थ पटिज्जातकरणं लब्भति, तत्थ सम्मुखाविनयो लब्भतीति एत्थ एकं वा द्वे वा बहू वा भिक्खू “इमं नाम आपत्तिं आपन्नोसी”ति पुच्छिते सति “आमा”ति पटिजानने द्वेपि पटिज्जातकरणसम्मूखाविनया लब्भन्ति । तत्थ “सङ्गसम्मूखता धम्मविनयपुग्गलसम्मूखता”ति एवं वुत्तसम्मूखाविनये सङ्गस्स पुरतो पटिज्जातं चे, सङ्गसम्मूखता । तत्थेव देसितं चे, धम्मविनयसम्मूखतायोपि लब्धा होन्ति । अथ विवदन्ता अज्जमज्जं पटिजानन्ति चे, पुग्गलसम्मूखता । तस्सेव सन्तिके देसितं चे, धम्मविनयसम्मूखतायोपि लब्धा होन्ति । एकस्सेव वा एकस्स सन्तिके आपत्तिदेसनकाले “पस्ससि, पस्सामी”ति वुत्ते तत्थ धम्मविनयपुग्गलसम्मूखतासज्जितो सम्मुखाविनयो च पटिज्जातकरणञ्च लब्धं होति ।

### संसट्ठवारकथावण्णना

३०६. अधिकरणानं वूपसमोव समथो नाम, तस्मा अधिकरणेन विना समथा नत्थीति आह “मा हेवन्तिस्स वचनीयो... पे०... विनिब्भुजित्वा नानाकरणं पज्जापेतु”न्ति ।

### समथाधिकरणवारकथावण्णना

३०९-३१०. समथा समथेहि सम्मन्तीतिआदि पुच्छा । सिया समथा समथेहि सम्मन्तीतिआदि विस्सज्जनं । तत्थ समथा समथेहि सम्मन्तीति एत्थ सम्मन्तीति सम्पज्जन्ति, अधिकरणा वा पन सम्मन्ति वूपसमं गच्छन्ति, तस्मा येभुय्यसिका सम्मुखाविनयेन सम्मतीति एत्थ सम्मुखाविनयेन सद्धिं येभुय्यसिका सम्पज्जति, न सतिविनयादीहि सद्धिं तेसं तस्सा अनुपकारत्ताति एवमत्थो दट्ठब्बो ।

३११. “सम्मुखाविनयो विवादाधिकरणेन सम्मती”ति पाठो । “सम्मुखाविनयो न केनचि सम्मती”ति हि अवसाने वुत्तत्ता सम्मुखाविनयो सयं समथेन वा अधिकरणेन वा समेतब्बो न होति ।

३१३. विवादाधिकरणं...पे०... किच्चाधिकरणेन सम्मतीति एत्थ “सुणातु मे भन्ते ...पे०... पठमं सलाकं निक्खिपामी”ति एवं विवादाधिकरणं किच्चाधिकरणेन सम्मतीति दट्ठब्बं ।

### समुट्ठापनवारकथावण्णना

३१४. विवादाधिकरणं न कतमं अधिकरणं समुट्ठापेतीति “नायं धम्मो”ति वुत्तमत्तेनेव किञ्चि अधिकरणं न समुट्ठापेतीति अत्थो ।

### भजतिवारकथावण्णना

३१८-९. कतमं अधिकरणं परियापन्नन्ति कतमाधिकरणपरियापन्नं, अयमेव वा पाठो । विवादाधिकरणं विवादाधिकरणं भजतीति पठमुप्पन्नविवादं पच्छा उप्पन्नो भजति । विवादाधिकरणं द्वे समथे भजतीति “मं वूपसमेतुं समत्था तुम्हे”ति वदन्तं विय भजति । द्वीहि समथेहि सङ्गहितन्ति “मयं तं वूपसमेस्सामा”ति वदन्तेहि विय द्वीहि समथेहि सङ्गहितं ।

### खन्धकपुच्छावारो

### पुच्छाविस्सज्जनावण्णना

३२०. निदानेन च निद्वेसेन च सद्धिन्ति एत्थ निदानेनाति सिक्खापदपञ्जत्तिदेससङ्घातेन निदानेन । निद्वेसेनाति पुग्गलादिनिद्वेसेन । उभयेनपि तस्स तस्स सिक्खापदस्स वत्थु दस्सितं, तस्मा वत्थुना सद्धिं खन्धकं पुच्छिस्सामीति अयमेत्थ अत्थो । तत्थाति तस्मिं उपसम्पदक्खन्धके । उत्तमानि पदानि वुत्तानीति “न, भिक्खवे, ऊनवीसतिवस्सो पुग्गलो उपसम्पादेतब्बो”तिआदिना (महाव० ९९, १२४) नयेन उत्तमपदानि वुत्तानि । चम्मसंयुत्तेति चम्मक्खन्धके ।

### एकुत्तरिकनयो

### एककवारवण्णना

३२१. मूलविसुद्धिया अन्तरापत्तीति अन्तरापत्तिं आपज्जित्वा मूलायपटिकस्सनं कत्वा ठितेन आपन्ना ।

“अग्घविसुद्धिया अन्तरापत्तीति सम्बहुला आपत्तियो आपज्जित्वा तासु सब्बचिरपटिच्छन्नवसेन अग्घसमोधानं गहेत्वा वसन्तेन आपन्नापत्ती”ति गण्ठपदेसु वुत्तं । सउस्साहेनेव चित्तेनाति “पुनपि आपज्जिस्सामी”ति सउस्साहेनेव चित्तेन । भिक्खुनीनं अट्ठवत्थुकाय वसेन चेतं वुत्तं । तेनेवाह “अट्ठमे वत्थुस्मिं भिक्खुनिया पाराजिकमेव होती”ति । “धम्मिकस्स पटिस्सवस्स असच्चापने”ति वुत्तत्ता अधम्मिकपटिस्सवस्स विसंवादे दुक्कटं न होति । “तुम्हे विब्भमथा”ति हि वुत्ते सुद्धचित्तो “साधू”ति पटिस्सुणित्वा सचे न विब्भमति, अनापत्ति । एवं सब्बत्थ । पञ्चदससु धम्मेसूति “कालेन वक्खामि, नो अकालेना”ति आदिना वुत्तपञ्चदसधम्मेसु । आपत्तिं आपज्जितुं भब्बताय भब्बापत्तिका ।

एककवारवण्णना निड्ढिता ।

### दुकवारवण्णना

३२२. दुकेसु निदहनेति आतपे अतिचिरं ठपेत्वा निदहने । वत्थुसभागं देसेन्तो देसेन्तो आपज्जति, आपन्नं आपत्तिं न देसेस्सामीति धुरं निक्खिपन्तो न देसेन्तो आपज्जति । रोमजनपदे जातं रोमकं । पक्कालकन्ति यवक्खारं । अनुज्जातलोणत्ता लोणानिपि दुकेसु वुत्तानि ।

दुकवारवण्णना निड्ढिता ।

### तिकवारवण्णना

३२३. तिकेसु वचीसम्पयुत्तं कायकिरियं कत्वाति कायेन निपच्चकारं कत्वा । मुखालम्बरकरणादिभेदोति मुखभेरिवादानादिप्पभेदो । यस्स सिक्खापदस्स वीतिक्कमे कायसमुद्धाना आपत्तियो, तं कायद्वारे पञ्चत्तसिक्खापदं । उपघातेतीति विनासेति । न आदातब्बन्ति “इमस्मा विहारा परम्पि मा निक्खम, विनयधरानं वा सन्तिकं आगच्छ विनिच्छयं दातु”न्ति वुत्ते तस्स वचनं न गहेतब्बन्ति अत्थो ।

अकुसलानि चेव मूलानि चाति अकोसल्लसम्भूतद्वेन एकन्ताकुसलभावतो अकुसलानि, अत्तना सम्पयुत्तधम्मानं सुप्पतिट्ठितभावसाधनतो मूलानि, न अकुसलभावसाधनतो । न हि मूलतो अकुसलानं अकुसलभावो, कुसलादीनं वा कुसलादिभावो । तथा च सति मोमूहचित्तद्वयमोहस्स अकुसलभावो न सिया ।

दुट्ठु चरितानीति पच्चयतो सम्पयुत्तधम्मतो पवत्तिआकारतो च न सुट्ठु असम्मापवत्तितानि । विरूपानीति बीभच्छानि सम्पति आयतिज्ज अनिड्ठरूपत्ता । सुट्ठु चरितानीति आदीसु वुत्तविपरियायेन अत्थो वेदितब्बो । द्वेपि चेते तिका पण्णत्तिया वा कम्मपथेहि वा कथेतब्बा । पण्णत्तिया ताव कायद्वारे पञ्चत्तसिक्खापदस्स वीतिक्कमो कायदुच्चरितं, अवीतिक्कमो कायसुचरितं । वचीद्वारे पञ्चत्तसिक्खापदस्स वीतिक्कमो वचीदुच्चरितं, अवीतिक्कमो वचीसुचरितं । उभयत्थ पञ्चत्तसिक्खापदस्स वीतिक्कमो मनोदुच्चरितं मनोद्वारे पञ्चत्तसिक्खापदस्स अभावतो । तथिदं द्वारद्वये अकिरियसमुद्धानाय आपत्तिया वसेन वेदितब्बं । यथावुत्ताय आपत्तिया अवीतिक्कमोव मनोसुचरितं । अयं पण्णत्तिकथा ।

पाणातिपातादयो पन तिस्सो चेतना कायद्वारे वचीद्वारेपि उप्पन्ना कायदुच्चरितं द्वारन्तरे उप्पन्नस्सपि कम्मस्स सनामापरिच्चागतो येभ्युवुत्तिया तब्बहुलवुत्तिया च । तेनाहु अट्ठकथाचरिया —

“द्वारे चरन्ति कम्मनि, न द्वारा द्वारचारिनो ।

तस्मा द्वारेहि कम्मनि, अज्जमज्जं ववत्थिता”ति ॥ (ध० स० अट्ठ० कामावचरकुसल द्वारकथा, कायकम्मद्वार)  
।

तथा चतस्सो मुसावादादिचेतना कायद्वारेपि वचीद्वारेपि उप्पन्ना वचीदुच्चरितं, अभिज्झा ब्यापादो मिच्छादिट्ठीति तयो मनोकम्मभूताय चेतनाय सम्पयुत्तधम्मा मनोदुच्चरितं, कायवचीकम्मभूताय पन चेतनाय सम्पयुत्ता अभिज्झादयो तंतंपक्खिका वा होन्ति अब्बोहारिका वा । पाणातिपातादीहि विरमन्तस्स उप्पन्ना तस्सो चेतनापि विरतियोपि कायसुचरितं कायिकस्स वीतिक्कमस्स अकरणवसेन पवत्तनतो । कायेन पन सिक्खापदानं समादियमाने सीलस्स कायसुचरितभावे वत्तब्बमेव नत्थि । मुसावादादीहि विरमन्तस्स चतस्सो चेतनापि विरतियोपि वचीसुचरितं वाचसिकस्स वीतिक्कमस्स अकरणवसेन पवत्तनतो । अनभिज्झा अब्यापादो सम्मादिट्ठीति तयो चेतनासम्पयुत्तधम्मा मनोसुचरितन्ति अयं कम्मपथकथा ।

तिकवारवण्णना निट्ठिता ।

### चतुक्कवारवण्णना

३२४. चतुक्केसु अनरियवोहाराति अनरियानं लामकानं वोहारा संवोहारा अभिलापवाचा । अरियवोहाराति अरियानं सप्पुरिसानं वोहारा । दिट्ठुवादिताति “दिट्ठं मया”ति एवंवादिता । एत्थ च तंतंसमुट्ठापकचेतनावसेन अत्थो वेदितब्बो ।

पठमकप्पिकेसु पठमं पुरिसलिङ्गमेव उप्पज्जतीति आह “पठमं उप्पन्नवसेना”ति । पुरिमं पुरिसलिङ्गं पजहतीति यथावुत्तेनत्थेन पुब्बङ्गमभावतो पुरिमसङ्घातं पुरिसलिङ्गं जहति । सतं तिसज्ज सिक्खापदानीति तिसाधिकानि सतं सिक्खापदानि ।

भिक्षुस्स च भिक्षुनिया च चतूसु पाराजिकेसूति साधारणसुयेव चतूसु पाराजिकेसु । पठमो पज्जोति “अत्थि वत्थुनानत्तता, नो आपत्तिनानत्तता”ति अयं पज्जो । “अत्थि आपत्तिसभागता, नो वत्थुसभागता”ति अयं इध दुतियो नाम ।

अनापत्तिवस्सच्छेदस्साति नत्थि एतस्मिं वस्सच्छेदे आपत्तीति अनापत्तिवस्सच्छेदो, तस्स, अनापत्तिकस्स वस्सच्छेदस्साति अत्थो । मन्ताभासाति मतिया उपपरिक्खित्वा भासनतो असम्फप्पलापवाचा इध “मन्ताभासा”ति वुत्ता ।

नवमभिक्षुनितो पट्ठाय उपज्झायापि अभिवादनारहा नो पच्चुट्ठानारहाति यस्मा “अनुजानामि, भिक्षवे, भत्तगो अट्ठन्नं भिक्षुनीनं यथावुट्ठं अवसेसानं यथागतिक”न्ति वदन्तेन भगवता भत्तगो आदितो पट्ठाय अट्ठन्नंयेव भिक्षुनीनं यथावुट्ठं अनुज्जातं, अवसेसानं आगतपटिपाटिया, तस्मा नवमभिक्षुनितो पट्ठाय सचे उपज्झायापि भिक्षुनी पच्छा आगच्छति, न पच्चुट्ठानारहा, यथानिसिन्नाहियेव सीसं उक्खिपित्वा अभिवादेतब्बत्ता अभिवादनारहा । आदितो निसिन्नासु पन अट्ठसु या अब्भन्तरिमा अज्जा वुट्ठतरा आगच्छति, सा अत्तनो नवकतरं वुट्ठापेत्वा निसीदितुं लभति । तस्मा सा ताहि अट्ठहि भिक्षुनीहि पच्चुट्ठानारहा । या पन अट्ठहिपि नवकतरा, सा सचेपि सट्ठिवस्सा होति, आगतपटिपाटियाव निसीदितुं लभति ।

इध न कप्पन्तीति वदन्तीति पच्चन्तिमजनपदेसु ठत्वा “इध न कप्पन्ती”ति वदन्तो विनयातिसारदुक्कटं आपज्जति । कप्पियहि “न कप्पती”ति वदन्तो पज्जत्तं समुच्छिन्दति नाम । इध कप्पन्तीति आदीसुपि एसेव नयो ।

चतुक्कवारवण्णना निट्ठिता ।

### पज्जकवारवण्णना

३२५. पज्जकेसु “निमन्तितो सभत्तो समानो सन्तं भिक्खुं अनापुच्छा”ति (पाचि० २९४-२९७) वचनतो अकप्पियनिमन्तनं सादियन्तस्सेव अनामन्तचारो न वट्ठतीति “पिण्डपातिकस्स कप्पन्ती”ति वुत्तं । गणभोजनादीसुपि एसेव नयो । अधिट्ठित्वा भोजनन्ति “गिलानसमयो”ति आदिना आभोगं कत्वा भोजनं । अविकप्पनाति “मय्हं भत्तपच्चासं इत्थन्नामस्स दम्मी”ति एवं अविकप्पना ।

अयसतो वा गरहतो वाति एत्थ परम्मुखा अगुणवचनं अयसो । सम्मुखा गरहा । वियसतीति ब्यसनं, हितसुखं खिपति विद्धंसेतीति अत्थो । जातीनं ब्यसनं जातिब्यसनं, चोररोगभयादीहि जातिविनासोति अत्थो । भोगानं ब्यसनं भोगब्यसनं, राजचोरादिवसेन भोगविनासोति अत्थो । रोगो एव ब्यसनं रोगब्यसनं । रोगो हि आरोग्यं ब्यसति विनासेतीति ब्यसनं । सीलस्स ब्यसनं सीलब्यसनं, दुस्सील्यस्सेतं नामं । सम्मादिट्ठिं विनासयमाना उप्पन्ना दिट्ठियेव ब्यसनं दिट्ठिब्यसनं । जातिसम्पदाति जातीनं सम्पदा पारिपूरि बहुभावो । भोगसम्पदायपि एसेव नयो । आरोग्यस्स सम्पदा आरोग्यसम्पदा । पारिपूरि दीघरत्तं अरोगता । सीलदिट्ठिसम्पदासुपि एसेव नयो ।

वत्तं परिच्छिन्दीति तस्मिं दिवसे कातब्बवत्तं निट्ठापेसि । अट्ठ कप्पे अनुस्सरीति आदिना तस्मिं खणे ज्ञानं निब्बत्तेत्वा पुब्बेनिवासजाणं निब्बत्तेसीति दीपेति । जत्तिया कम्मप्पत्तो हुत्वाति जत्तिया ठपिताय अनुस्सावनकम्मप्पत्तो हुत्वाति अत्थो ।

मन्दत्ता मोमूहत्ताति नेव समादानं जानाति, न आनिसंसं, अत्तनो पन मन्दत्ता मोमूहत्ता अज्जाणेनेव आरज्जिको होति । पापिच्छो इच्छापकतोति “अरज्जे मे विहरन्तस्स ‘अयं आरज्जिको’ति चतुप्पच्चयसक्कारं करिस्सन्ति, ‘अयं भिक्खु लज्जी पविवित्तो’ति आदीहि च गुणेहि सम्भावेस्सन्ती”ति एवं पापिकाय इच्छाय ठत्वा ताय एव इच्छाय अभिभूतो हुत्वा आरज्जिको होतीति अत्थो । तेनाह “अरज्जवासेन पच्चयलाभं पत्थयमानो”ति । उम्मादवसेन अरज्जं पविसित्वा विहरन्तो उम्मादा चित्तक्खेपा आरज्जिको नाम होति । वण्णितन्ति इदं आरज्जिकङ्गं नाम बुद्धेहि बुद्धसावकेहि च वण्णितं पसत्थन्ति आरज्जिको होति ।

पज्जकवारवण्णना निट्ठिता ।

### छक्कवारवण्णना

३२६. छक्केसु छब्बस्सपरमता धारेतब्बन्ति पदभाजनं दस्सितं । सेसं उत्तानमेव ।

छक्कवारवण्णना निट्ठिता ।

### सत्तकवारवण्णना

३२७. सत्तकेसु छक्के वुत्तानियेव सत्तकवसेन योजेतब्बानीति छक्के वुत्तचुद्धसपरमानि द्विधा कत्वा द्विन्नं सत्तकानं वसेन योजेतब्बानि ।

आपत्तिं जानातीति आपत्तियेव “आपत्ती”ति जानाति । सेसपदेसुपि एसेव नयो । आभिचेतसिकानन्ति एत्थ (म० नि० अट्ट० १.६६) अभिचेतोति पाकतिककामावचरचित्तेहि सुन्दरताय पटिपक्खतो विसुद्धत्ता च अभिक्कन्तं विसुद्धचित्तं वुच्चति, उपचारज्झानचित्तस्सेतं अधिवचनं । अभिचेतसि जातानि आभिचेतसिकानि, अभिचेतोसन्निस्सितानीति वा आभिचेतसिकानि । दिट्ठधम्मसुखविहारानन्ति दिट्ठधम्मे सुखविहारानं । दिट्ठधम्मोति पच्चक्खो अत्तभावो वुच्चति, तत्थ सुखविहारभूतानन्ति अत्थो । रूपावचरज्झानानमेतं अधिवचनं । तानि हि अप्पेत्वा निसिन्ना झायिनो इमस्मिञ्जेव अत्तभावे असंकिलिट्ठं नेक्खम्मसुखं विन्दन्ति, तस्मा “दिट्ठधम्मसुखविहारानी”ति वुच्चन्ति । निकामलाभीति निकामेन लाभी, अत्तनो इच्छावसेन लाभी, इच्छित्तिच्छितक्खणे समापज्जितुं समत्थोति वुत्तं होति । अकिच्छलाभीति सुखेनेव पच्चनीकधम्मे विक्खम्भेत्वा समापज्जितुं समत्थोति वुत्तं होति । अकसिरलाभीति अकसिरानं लाभी विपुलानं, यथापरिच्छेदेनेव वुट्ठातुं समत्थोति वुत्तं होति । एकच्चो हि लाभीयेव होति, न पन सक्कोति इच्छित्तिच्छितक्खणे समापज्जितुं । एकच्चो सक्कोति तथा समापज्जितुं, पारिपन्थिके पन किच्छेन विक्खम्भेति । एकच्चो तथा च समापज्जति, पारिपन्थिके च अकिच्छेनेव विक्खम्भेति, न सक्कोति कालमाननाळिकयन्तं विय यथापरिच्छेदेयेव वुट्ठातुं ।

आसवानं खयाति अरहत्तमग्गेन सब्बकिलेसानं खया । अनासवन्ति आसवविरहितं । चेतोविमुत्तिं पज्जाविमुत्तिन्ति एत्थ चेतो-वचनेन अरहत्तफलसम्पयुत्तो समाधि, पज्जा-वचनेन तंसम्पयुत्ता च पज्जा वुत्ता । तत्थ च समाधि रागतो विमुत्तत्ता चेतोविमुत्ति, पज्जा अविज्जाय विमुत्तत्ता पज्जाविमुत्तीति वेदितब्बा । वुत्तज्हेतं भगवता “यो हिस्स, भिक्खवे, समाधि, तदस्स समाधिन्द्रियं (सं० नि० ५.५२०) । या हिस्स, भिक्खवे, पज्जा, तदस्स पज्जिन्द्रियं (सं० नि० ५.५१६) । इति खो, भिक्खवे, रागविरागा चेतोविमुत्ति अविज्जाविरागा पज्जाविमुत्ती”ति (अ० नि० २.३२) । अपिचेत्थ समथफलं चेतोविमुत्ति, विपस्सनाफलं पज्जाविमुत्तीति वेदितब्बाति । दिट्ठेव धम्मेति इमस्मिंयेव अत्तभावे । सयं अभिज्जा सच्छिक्त्वाति अत्तनायेव पज्जाय पच्चक्खं कत्वा, अपरप्पच्चयेन जत्वाति अत्थो । सुतमयजाणादिना विय परप्पच्चयतं नयग्गाहज्ज मुञ्चित्वा परतोघोसानुगतभावनाधिगमभूताय अत्तनोयेव पज्जाय पच्चक्खं कत्वा, न सयम्भूजाणभूतायाति अधिप्पायो । उपसम्पज्ज विहरतीति पापुणित्वा सम्पादेत्वा विहरति ।

सत्तकवारवण्णना निड्डिता ।

### अट्ठकवारवण्णना

३२८. अट्ठकेसु अट्ठानिसंसे सम्पस्समानेनाति —

“इध पन, भिक्खवे, भिक्खु आपत्तिं आपन्नो होति, सो तस्सा आपत्तिया अनापत्तिदिट्ठि होति, अज्जे भिक्खू तस्सा आपत्तिया आपत्तिदिट्ठिनो होन्ति, ते चे, भिक्खवे, भिक्खू तं भिक्खुं एवं जानन्ति ‘अयं खो आयस्मा बहुस्सुतो आगतागमो धम्मधरो विनयधरो मातिकाधरो पण्डितो ब्यत्तो मेधावी लज्जी कुक्कुच्चको सिक्खाकामो, सचे मयं इमं भिक्खुं आपत्तिया अदस्सने उक्खिपिस्साम, न मयं इमिना भिक्खुना सद्धिं उपोसथं करिस्साम, विना

इमिना भिक्खुना उपोसथं करिस्साम, भविस्सति सङ्घस्स ततोनिदानं भण्डनं कलहो विग्गहो विवादो सङ्घभेदो सङ्घराजि सङ्घववत्थानं सङ्घनानाकरणं'न्ति, भेदगरुकेहि, भिक्खवे, भिक्खूहि न सो भिक्खु आपत्तिया अदस्सने उक्खिपितब्बो'ति (महाव० ४५३) —

आदिना वुत्तअट्टानिसंसे सम्पस्समानेन । तेन हि सद्धिं उपोसथादिअकरणं आदीनवो भेदाय संवत्तनतो, करणं आनिसंसो सामगिया संवत्तनतो । तस्मा एते अट्टानिसंसे सम्पस्समानेन न सो भिक्खु उक्खिपितब्बोति अत्थो ।

दुतियअट्टकेपि अट्टानिसंसे सम्पस्समानेनाति —

“इध पन, भिक्खवे, भिक्खु आपत्तिं आपन्नो होति, सो तस्सा आपत्तिया अनापत्तिदिट्ठि होति, अज्जे भिक्खू तस्सा आपत्तिया आपत्तिदिट्ठिनो होन्ति, सो चे, भिक्खवे, भिक्खु ते भिक्खू एवं जानाति ‘इमे खो आयस्मन्तो बहुस्सुता आगतागमा धम्मधरा विनयधरा मातिकाधरा पण्डिता ब्यत्ता मेधाविनो लज्जिनो कुक्कुच्चका सिक्खाकामा, नालं ममं वा कारणा अज्जेसं वा कारणा छन्दा दोसा मोहा भया अगतिं गन्तुं, सचे मं इमे भिक्खू आपत्तिया अदस्सने उक्खिपिस्सन्ति, न मया सद्धिं उपोसथं करिस्सन्ति, विना मया उपोसथं करिस्सन्ति, भविस्सति सङ्घस्स ततोनिदानं भण्डनं कलहो विग्गहो विवादो सङ्घभेदो सङ्घराजि सङ्घववत्थानं सङ्घनानाकरणं'न्ति, भेदगरुकेन, भिक्खवे, भिक्खुना परेसम्पि सद्भाय सा आपत्ति देसेतब्बा’ति (महाव० ४५३)

आदिना वुत्तअट्टानिसंसे सम्पस्समानेनाति अत्थो ।

**पाळियं आगतेहि सत्तहीति** “पुब्बेवस्स होति ‘मुसा भणिस्स’न्ति, भणन्तस्स होति ‘मुसा भणामी’ति, भणितस्स होति ‘मुसा मया भणित’न्ति विनिधाय दिट्ठिं, विनिधाय खन्तिं, विनिधाय रुचिं, विनिधाय भाव’न्ति (पारा० २२०) एवमागतेहि सत्तहि ।

**अब्रह्मचरियाति** असेट्टचरियतो । रत्तिं न भुज्जेय्य विकालभोजनन्ति उपोसथं उपवुत्थो रत्तिभोजनज्ज दिवाविकालभोजनज्ज न भुज्जेय्य । मज्जे छमायं व सयेथ सन्थतेति कप्पियमज्जे वा सुधादिपरिकम्मकताय भूमियं वा तिणपण्णपलालादीनि सन्थरित्वा कते सन्थते वा सयेथाति अत्थो । एतज्झि अट्टङ्गीकमाहुपोसथन्ति एतं पाणातिपातादीनि असमाचरन्तेन उपवुत्थउपोसथं अट्टहि अङ्गेहि समन्नागतत्ता “अट्टङ्गिक”न्ति वदन्ति ।

“अकप्पियकतं होति अप्पटिग्गहितक”न्ति आदयो अट्ट अनतिरित्ता नाम । सप्पिआदि अट्टमे अरुणुग्गमने निस्सगियं होति । अट्टकवसेन योजेत्वा वेदितब्बानीति पुरिमानि अट्ट एकं अट्टकं, ततो एकं अपनेत्वा सेसेसुपि एकेकं पक्खिपित्वाति एवमादिना नयेन अज्जानिपि अट्टकानि कातब्बानीति अत्थो ।

अट्टकवारवण्णना निड्डिता ।

**नवकवारवण्णना**

३२९. नवकेसु आघातवत्थूनीति (दी० नि० अट्ट० ३.३४०; अ० नि० अट्ट० ३.९.२९) आघातकारणानि ।

**आघातपटिविनयानीति** आघातस्स पटिविनयकारणानि । तं कुतेत्थ लब्भाति “तं अनत्थचरणं मा अहोसी”ति एतस्मिं पुग्ले कुतो लब्भा केन कारणेन सक्का लब्धुं । “परो नाम परस्स अत्तनो चित्तरुचिया अनत्थं करोती”ति एवं चिन्तेत्वा आघातं पटिविनोदेति । अथ वा सचाहं पटिक्कोपं करेय्यं, तं कोपकरणं एत्थ पुग्ले कुतो लब्भा, केन कारणेन लब्धब्बं निरत्थकभावतोति अत्थो । कम्मस्सका हि सत्ता, ते कस्स रुचिया दुक्खिता सुखिता वा भवन्ति, तस्मा केवलं तस्मिं मय्हं कुज्झनमत्तमेवाति अधिप्पायो । अथ वा तं कोपकरणं एत्थ पुग्ले कुतो लब्भा परमत्थतो कुज्झितब्बस्स कुज्झनकस्स च अभावतो । सङ्खारमत्तज्हेतं यदिदं खन्धपञ्चकं यं “सत्तो”ति वुच्चति, ते च सङ्खारा इत्तरकाला खणिका, कस्स को कुज्झतीति अत्थो । “कुतो लाभा”तिपि पाठो, सचाहं एत्थ कोपं करेय्यं, तस्मिं मे कोपकरणे कुतो लाभा, लाभा नाम के सियुं अज्जत्र अनत्थुप्पत्तितोति अत्थो । इमस्मिञ्च अत्थे तन्ति निपातमत्तमेव होति ।

**तण्हं पटिच्चाति** (दी० नि० अट्ठ० २.१०३; अ० नि० अट्ठ० ३.९.२३) द्वे तण्हा एसनतण्हा एसिततण्हा च । याय तण्हाय अजपथसङ्कुपथादीनि पटिपज्जित्वा भोगे एसति गवेसति, अयं **एसनतण्हा** नाम । या तेसु एसितेसु गवेसितेसु पटिलद्धेसु तण्हा, अयं **एसिततण्हा** नाम । इध एसिततण्हा दट्ठब्बा । **परियेसनाति** रूपादिआरम्भणपरियेसना । सा हि एसनतण्हाय सति होति । **लाभोति** रूपादिआरम्भणप्पटिलाभो । सो हि परियेसनाय सति होति । **विनिच्छयो** पन जाणतण्हादिट्ठिवितक्कवसेन चतुब्बिधो । तत्थ “सुखविनिच्छयं जज्जा, सुखविनिच्छयं जत्वा अज्जत्तं सुखमनुयुज्जेय्या”ति (म० नि० ३.३२३) अयं **जाणविनिच्छयो** । “विनिच्छयोति द्वे विनिच्छया तण्हाविनिच्छयो च दिट्ठिविनिच्छयो चा”ति (महानि० १०२) एवं आगतानि अट्ठसततण्हाविचरितानि **तण्हाविनिच्छयो** । द्वासट्ठि दिट्ठियो **दिट्ठिविनिच्छयो** । “छन्दो खो, देवानमिन्द, वितक्कनिदानो”ति (दी० नि० २.३५८) इमस्मिं पन सुत्ते इध **विनिच्छयोति** वुत्तो **वितक्को**येव आगतो । लाभं लभित्वा हि इट्ठानिट्ठं सुन्दरासुन्दरञ्च वितक्केन विनिच्छिनाति “एत्तकं मे रूपायस्स भविस्सति, एत्तकं सद्धारम्मणत्थाय, एत्तकं मय्हं भविस्सति, एत्तकं परस्स, एत्तकं परिभुज्जिस्सामि, एत्तकं निदहिस्सामी”ति । तेन वुत्तं “**लाभं पटिच्च विनिच्छयो**”ति ।

**छन्दरागोति** एवं अकुसलवितक्केन वितक्किते वत्थुस्मिं दुब्बलरागो च बलवरागो च उप्पज्जति । **अज्झोसानन्ति** “अहं, मम”न्ति बलवसन्निट्ठानं । **परिग्गहोति** तण्हादिट्ठिवसेन परिग्गहकरणं । **मच्छरियन्ति** परेहि साधारणभावस्स असहनता । तेनेवस्स पोराणा एवं वचनत्थं वदन्ति “इदं अच्छरियं मय्हेव होतु, मा अज्जस्स अच्छरियं होतूति पवत्तता मच्छरियन्ति वुच्चती”ति । **आरक्खोति** द्वारपिदहनमज्जूसागोपनादिवसेन सुट्ठु रक्खणं । अधि करोतीति **अधिकरणं**, कारणस्सेतं नामं । **आरक्खाधिकरणन्ति** भावनपुंसकं, आरक्खहेतूति अत्थो । दण्डादानादीसु परनिसेधनत्थं दण्डस्स आदानं **दण्डादानं** । एकतोधारादिनो सत्थस्स आदानं **सत्थादानं** । **कलहोति** कायकलहोपि वाचाकलहोपि । पुरिमो पुरिमो विरोधो **विग्गहो**, पच्छिमो पच्छिमो **विवादो** । तुवं तुवन्ति अगारववसेन “**तुवं तुव**”न्ति वचनं ।

**अधिट्ठितकालतो पट्टाय न विकप्पेतब्बानीति** विकप्पेन्तेन अधिट्ठानतो पुब्बे वा

विकप्पेतब्बं, विजहिताधिट्ठानं वा पच्छाविकप्पेतब्बं । अविजहिताधिट्ठानं पन न विकप्पेतब्बन्ति अधिप्पायो । **दुक्कटवसेन वुत्तानीति** “वग्गं भिक्खुनिसङ्गं वग्गसज्जी ओवदती”तिआदिना (पाचि० १५०) नयेन अधम्मकम्मे द्वे नवकानि दुक्कटवसेन वुत्तानि ।

नवकवारवण्णना निट्ठिता ।



### दसकवारवण्णना

**३३०.** दसकेसु नत्थि दिन्नन्तिआदिवसेन वेदितब्बाति “नत्थि दिन्नं, नत्थि यिट्ठं, नत्थि हुतं, नत्थि सुकतदुक्कटानं कम्मानं फलं विपाको, नत्थि अयं लोको, नत्थि परो लोको, नत्थि माता, नत्थि पिता, नत्थि सत्ता ओपपातिका, नत्थि लोके समणब्राह्मणा सम्मग्गता सम्मापटिपन्ना, ये इमञ्च लोकं परञ्च लोकं सयं अभिज्जा सच्छिक्त्वा पवेदेन्ती”ति (म० नि० २.९४, २२५; ३.९१, ११६; सं० नि० ३.२१०) एवमागतं सन्धाय वुत्तं। **सस्सतो लोकोतिआदिवसेनाति** “सस्सतो लोकोति वा, असस्सतो लोकोति वा, अन्तवा लोकोति वा, अनन्तवा लोकोति वा, तं जीवं तं सरीरन्ति वा, अज्जं जीवं अज्जं सरीरन्ति वा, होति तथागतो परं मरणाति वा, न होति तथागतो परं मरणाति वा, होति च न च होति तथागतो परं मरणाति वा, नेव होति न न होति तथागतो परं मरणाति वा”ति (म० नि० १.२६९) एवमागतं सङ्गणहाति।

**मिच्छादिट्ठिआदयो मिच्छाविमुत्तिपरियोसानाति** “मिच्छादिट्ठि मिच्छासङ्कप्पो मिच्छावाचा मिच्छाकम्मन्तो मिच्छाआजीवो मिच्छावायामो मिच्छासति मिच्छासमाधि मिच्छाजाणं मिच्छाविमुत्ती”ति (विभ० ९७०) एवमागतं सन्धाय वदति। तत्थ **मिच्छाजाणन्ति** पापकिरियासु उपायचिन्तावसेन पापकं कत्वा “सुकतं मया”ति पच्चवेक्खणाकारेण च उप्पन्नो मोहो। **मिच्छाविमुत्तीति** अविमुत्तस्सेव सतो विमुत्तिसज्जिता। **समथक्खन्धके निट्ठिडाति** “ओरमत्तकं अधिकरणं होति, न च गतिगतं, न च सरितसारित”न्तिआदिना (चूळव० २०४) निट्ठिडा। समथक्खन्धके वुत्तेहि समन्नागतो होतीति सम्बन्धो। मातुरक्खितादयो **दस इत्थियो**। धनक्कीतादयो **दस भरियायो**।

दसकवारवण्णना निट्ठिता।

### एकादसकवारवण्णना

**३३१.** एकादसकेसु न वोदायन्तीति न पकासन्ति। **सुयुत्तयानसदिसाय कतायाति** इच्छितिच्छितकाले सुखेन पवत्तेतब्बत्ता युत्तयानं विय कताय। **यथा पतिट्ठा होतीति** सम्पत्तीनं यथा पतिट्ठा होति। **अनु अनु पवत्तितायाति** भावनाबहुलीकारेहि अनु अनु पवत्तिताय।

**सुखं सुपतीति**आदीसु (अ० नि० अट्ठ० ३.११.१५; विसुद्धि १.२५८) यथा सेसजना सम्परिवत्तमाना काकच्छमाना दुक्खं सुपन्ति, एवं असुपित्वा सुखं सुपति, निदं ओक्कन्तोपि समापत्तिं समापन्नो विय होति। **सुखं पटिबुज्झतीति** यथा अज्जे नित्थुनन्ता विजम्भन्ता सम्परिवत्तन्ता दुक्खं पटिबुज्झन्ति, एवं अप्पटिबुज्झित्वा विकसमानमिव पदुमं सुखं निब्बिकारं पटिबुज्झति। अनुभूतपुब्बवसेन देवतूपसंहारवसेन चस्स भद्दकमेव सुपिनं होति, न पापकन्ति आह “**पापकमेव न पस्सती**”तिआदि। धातुक्खोभहेतुकम्पि चस्स बहुलं भद्दकमेव सिया येभ्य्येन चित्तजरूपानुगुणताय उतुआहारजरूपानं। तत्थ **पापकमेव न पस्सतीति** यथा अज्जे अत्तानं चोरेहि सम्परिवारितं विय, वाळेहि उपद्दुतं विय, पपाते पतन्तं विय च पस्सन्ति, एवं पापकमेव सुपिनं न पस्सति। **भद्रकं पन वुट्ठिकारणभूतं पस्सतीति** चेतियं वन्दन्तो विय, पूजं करोन्तो विय, धम्मं सुणन्तो विय च होति।

**मनुस्सानं पियो होतीति** उरे आमुक्कमुत्ताहारो विय, सीसे पिळन्धमाला विय च मनुस्सानं पियो होति मनापो। **अमनुस्सानं पियो होतीति** यथेव च मनुस्सानं पियो, एवं अमनुस्सानम्पि पियो होति विसाखत्थेरो विय। **नास्स अग्गि वा विसं वा सत्थं वा कमतीति** मेत्ताविहारिस्स काये उत्तराय उपासिकाय विय अग्गि वा, संयुत्तभाणकचूळसीवत्थेरस्सेव

विसं वा, संकिच्चसामणेरस्सेव सत्थं वा न कमति न पविसति, नास्स कायं विकोपेतीति वुत्तं होति । धेनुवत्थुम्पि चेत्थ कथयन्ति, एका किर धेनु वच्छकस्स खीरधारं मुञ्चमाना अट्टासि । एको लुद्धको “तं विज्झिस्सामी”ति हत्थेन सम्परिवत्तेत्वा दीघदण्डकं सत्तिं मुञ्चि । सा तस्सा सरीरं आहच्च तालपण्णं विय विवट्टमाना गता, नेव उपचारबलेन न अप्पनाबलेन, केवलं पन वच्छके बलवहितचित्तताय । एवं महानुभावा मेत्ता । **खिप्पं समाधियतीति** केनचि परिपन्थेन परिहीनज्झानस्स ब्यापादस्स दूरसमनुस्सरितभावतो खिप्पमेव समाधियति । **मुखवण्णो विप्पसीदतीति** बन्धना पमुत्ततालपक्कं विय चस्स विप्पसन्नवण्णं मुखं होति । **असम्मूळ्हो कालं करोतीति** मेत्ताविहारिनो सम्मोहमरणं नाम नत्थि, असम्मूळ्होव निदं ओक्कमन्तो विय कालं करोति ।

एकादसकवारवण्णना निट्ठिता ।

एकुत्तरिकनयवण्णना निट्ठिता ।

## उपोसथादिपुच्छाविस्सज्जनावण्णना

३३२. “सङ्गं, भन्ते, पवारेमीतिआदि पवारणाकथा नामा”ति गण्ठपदेसु वुत्तं ।

### अत्थवसपकरणवण्णना

३३४. **पठमपाराजिकवण्णनायमेव वुत्तन्ति** “सङ्गसुट्ठताया”तिआदीनं अत्थवण्णनं सन्थाय वुत्तं । **दसक्खत्तुं योजनाय पदसतं वुत्तन्ति** एकमूलकनये दसक्खत्तुं योजनाय कताय सङ्गलिकनये वुत्तपदेहि सङ्घि पदसतं वुत्तन्ति एवमत्थो गहेतब्बो । अज्जथा एकमूलके एव नये न सक्का पदसतं लब्धुं । एकमूलकनयेहि पुरिमपच्छिमपदानि एकतो कत्वा एकेकस्मिं वारे नव नव पदानि वुत्तानीति दसक्खत्तुं योजनाय नवुति पदानियेव लब्धन्ति । तस्मा तानि नवुति पदानि सङ्गलिकनये बद्धचक्कवसेन योजिते दस पदानि लब्धन्तीति तेहि सङ्घि पदसतन्ति सक्का वत्तुं । इतो अज्जथा पन उभोसुपि नयेसु विसुं विसुं अत्थसतं धम्मसतञ्च यथा लब्धति, तथा पठमपाराजिकसंवण्णनायमेव अम्हेहि दस्सितं, तं तत्थ वुत्तनयेनेव गहेतब्बं । पुरिमपच्छिमपदानि एकत्तेन गहेत्वा “पदसत”न्ति वुत्तत्ता “तत्थ पच्छिमस्स पच्छिमस्स पदस्स वसेन अत्थसतं, पुरिमस्स पुरिमस्स वसेन धम्मसत”न्ति वुत्तं । तस्मिं पदसते “सङ्गसुट्ठ”तिआदिना वुत्तपुरिमपदानं वसेन धम्मसतं, “सङ्गफासू”तिआदिना वुत्तपच्छिमपदानं वसेन अत्थसतन्ति अधिप्पायो ।

महावग्गवण्णना निट्ठिता ।

## पठमगाथासङ्गणिकं

### सत्तनगरेसु पज्जत्तसिक्खापदवण्णना

३३५. **अट्ठुसतानीति** तीणि सतानि पज्जासञ्च सिक्खापदानि । **विग्गहन्ति** मनुस्सविग्गहं । **अतिरेकन्ति** दसाहपरमं अतिरेकचीवरं । **काळकन्ति** “सुद्धकाळकान”न्ति वुत्तकाळकं । **भूतन्ति** भूतारोचनं । **परम्परभत्तन्ति** परम्परभोजनं । **भिक्षुनीसु च अक्कोसोति** “या पन भिक्षुनी भिक्षुं अक्कोसेय्य वा परिभासेय्य वा”ति (पाचि० १०२९)

वुत्तसिक्खापदं। **अन्तरवासकन्ति** अज्जातिकाय भिक्खुनिया चीवरपटिग्गणहनं। **रूपियन्ति** रूपियसंवोहारं। **सुत्तन्ति** “सामं सुत्तं विज्जापेत्वा तन्तवायेही”ति (पारा० ६३७) वुत्तसिक्खापदं। **उज्झापनकेति** उज्झापनके खिख्यनके पाचित्तियं। **पाचितपिण्डन्ति** भिक्खुनीपरिपाचितं। **चीवरं दत्त्वाति** “समग्गेन सङ्गेन चीवरं दत्त्वा”ति (पाचि० ४८५) वुत्तसिक्खापदं। **वोसासन्तीति** “भिक्खू पनेव कुलेसु निमन्तिता भुज्जन्ति, तत्र चेसा भिक्खुनी”ति (पाचि० ५५८) वुत्तपाटिदेसनीयं। **गिरग्गन्ति** “या पन भिक्खुनी नच्चं वा गीतं वा”ति (पाचि० ८३४) वुत्तसिक्खापदं। **चरियाति** “अन्तोवस्सं चारिकं चरेय्या”ति (पाचि० ९७०) च, “वस्संवुत्था चारिकं न पक्कमेय्या”ति (पाचि० ९७४) च वुत्तसिक्खापदद्वयं। **छन्ददानेनाति** पारिवासिकेन छन्ददानेन।

**पाराजिकानि चत्तारीति** भिक्खुनीनं चत्तारि पाराजिकानि। **कुटीति** कुटिकारसिक्खापदं। **कोसियन्ति** कोसियमिस्सकसिक्खापदं। **सेय्याति** अनुपसम्पन्नेन सहसेय्यसिक्खापदं। **खणनेति** पथवीखणनं। **गच्छ देवतेति** भूतगामसिक्खापदं। **सिज्जन्ति** सप्पाणकउदकसिज्जनं। **महाविहारोति** महल्लकविहारो। **अज्जन्ति** अज्जवादकं। **द्वारन्ति** याव द्वारकोसा। **सहधम्मोति** सहधम्मिकं वुच्चमानो। **पयोपानन्ति** सुरुसुरुकारकं। **एळकलोमानीति** एळकलोमधोवापनं। **पत्तोति** ऊनपज्जबन्धनपत्तो। **ओवादोति** भिक्खुनुपस्सयं उपसङ्कमित्वा ओवादो। **भेसज्जन्ति** तदुत्तरिभेसज्जविज्जापनं। **सूचीति** अट्ठिमयादिसूचिघरं। **आरज्जिकोति** “यानि खो पन तानि आरज्जिकानि सेनासनानी”ति आदिना (पाचि० ५७०) वुत्तपाटिदेसनीयं। **ओवादोति** “या पन भिक्खुनी ओवादाय वा संवासाय वा न गच्छेय्या”ति (पाचि० १०५५) वुत्तसिक्खापदं।

**पाराजिकानि चत्तारीति** आदिना छसु नगरेसु पज्जत्तं एकतो सम्पिण्डित्वा सावत्थिया पज्जत्तं विसुं गणेत्वा सब्बानेव सिक्खापदानि द्वीहि रासीहि सङ्गणहाति।

सत्तनगरेसु पज्जत्तसिक्खापदवण्णना निट्ठिता।

### चतुर्विपत्तिवण्णना

**३३६. एकत्तिस गरुका** नाम उभतो अट्ठ पाराजिका, भिक्खूनं तेरस, भिक्खुनीनं दस सङ्गादिसेसा। **अट्ठेत्थ अनवसेसाति** एतेसु यथावुत्तगरुकेसु साधारणासाधारणवसेन अट्ठ पाराजिका अनवसेसा नाम।

### असाधारणादिवण्णना

**३३८.** “धोवनज्ज पटिग्गहो”ति गाथा अट्ठकथाचरियानं। तत्थ **धोवनज्ज पटिग्गहोति** अज्जातिकाय भिक्खुनिया चीवरधोवापनं चीवरपटिग्गहणज्ज। **कोसेय्य...पे०... द्वे लोमाति** एळकलोमवग्गे आदितो सत्त सिक्खापदानि वुत्तानि। **वस्सिकाति** वस्सिकसाटिकसिक्खापदं। **आरज्जकेन चाति** सासङ्कसिक्खापदं वुत्तं। **पणीतन्ति** पणीतभोजनविज्जन्ति। **ऊनन्ति** ऊनवीसतिवस्ससिक्खापदं। **निसीदने च या सिक्खा, वस्सिका या च साटिकाति** निसीदनवस्सिकसाटिकानं पमाणातिक्कमो।

आपत्तिक्खन्था चेव उपोसथादीनि च “पाराजिकसङ्गादिसेसा”ति आदिना विभत्तत्ता “**विभत्तियो**”ति वुत्तानि। **तेवीसति** सङ्गादिसेसाति भिक्खुनीनं आगतानि दस, भिक्खूनं तेरसाति तेवीसति। **द्वेचत्तालीस निस्सगियाति** आदीसुपि एसेव नयो। **द्वीहि...पे०... किच्चं एकेन सम्मतीति** द्वीहि विवादाधिकरणं, चतूहि अनुवादाधिकरणं, तीहि आपत्ताधिकरणं,

एकेन किच्चाधिकरणं सम्मतीति अत्थो ।

३३९. निरङ्कतोति सङ्गम्हा अपसारितो ।

## अधिकरणभेदवण्णना

३४०. यस्मा अधिकरणं उक्कोटेन्तो समथप्पत्तमेव उक्कोटेति, तस्मा “विवादाधिकरणं उक्कोटेन्तो कति समथे उक्कोटेती”तिआदि वुत्तं ।

३४१. पाळिमुत्तकविनिच्छयेनेवाति विनयलक्खणं विना केवलं धम्मदेसनामत्तवसेनेवाति अत्थो । येनापि विनिच्छयेनाति पाळिमुत्तकविनिच्छयमेव सन्धाय वुत्तं । खन्धकतो च परिवारतो च सुत्तेनाति खन्धकपरिवारतो आनीतसुत्तेन । निज्झापेन्तीति पज्जापेन्ति ।

३४२. किच्चं निस्साय उप्पज्जनककिच्चानन्ति पुब्बे कतउक्खेपनीयादिकिच्चं निस्साय उप्पज्जनककिच्चानं । कीदिसानं? यावततियसमनुभासनादीनं ।

३४३. तं हीति तं विवादाधिकरणं ।

३४४. अधिकरणेषु येन अधिकरणेन सम्मन्ति, तं दस्सेतुं वुत्तन्ति यदा अधिकरणेहि सम्मन्ति, तदा किच्चाधिकरणेनेव सम्मन्ति, न अज्जेहि अधिकरणेहीति दस्सनत्थं वुत्तन्ति अधिप्पायो ।

३५३. “सत्तन्नं समथानं कतमे छत्तिंस समुट्ठाना”ति पुच्छित्वापि “कम्मस्स किरिया करण”न्तिआदिना सम्मुखाविनयस्स समुट्ठानानि अविभजित्वाव सतिविनयादीनं छन्नज्जेव छ समुट्ठानानि विभत्तानि, तं कस्माति आह “किञ्चापि सत्तन्नं समथानं”न्तिआदि । सतिविनयादीनं विय सङ्गसम्मुखतादीनं किच्चयता नाम नत्थीति आह “कम्मसङ्गहाभावेना”ति ।

## दुतियगाथासङ्गणिकवण्णना

३५९. मन्तग्गहणन्ति अज्जमज्जं संसन्दनं । अनु अनु सन्धानं अनुसन्धितन्ति भावसाधनो अनुसन्धितसद्दोति आह “अनुसन्धितन्ति कथानुसन्धी”ति ।

## सङ्गामद्वयवण्णना

३६५. ठाननिसज्जवत्तादिनिस्सिताति “एवं ठातब्बं, एवं निसीदितब्बं”न्ति एवमादिका । सज्जाजननत्थन्ति चुदितकचोदकानं सज्जुप्पादनत्थं । अनुयोगवत्तं कथापेत्वाति “किं अनुयोगवत्तं जानासी”ति पुच्छित्वा तेनेव कथापेत्वा ।

३७५. नीलादिवण्णावण्णवसेनाति नीलादिवण्णवसेन आरोग्यत्थादिवण्णवसेन च ।

## कथिनभेदवण्णना

४०४. पुरेजातपच्चये पनेस उद्दिट्ठधम्मेषु एकधम्मम्पि न लभतीति एस उदकाहरणादिपयोगो अत्तनो पुरेजातपच्चयभावे पुब्बकरणवसेन उद्दिट्ठेषु धोवनादिधम्मेषु एकधम्मम्पि न लभति अत्तनो पुरेजातस्स पुब्बकरणसङ्गहितस्स धम्मस्स नत्थिताय ।

४१२. रूपादीसु धम्मेषूति वण्णगन्धादीसु सुद्धट्ठकधम्मेषु ।

४१६. पुरिमा द्वेति इमस्मिं अधिकारे पठमं वुत्ता अन्तरुब्भारसहुब्भारा, न पक्कमनन्तिकादयो द्वे उद्भारा ।

## उपालिपञ्चकवण्णना

४२०-४२१. ओमद्वकारकोति ओमद्वित्वा अभिभवित्वा कारको । उपत्थम्भो न दातब्बोति सामग्गिविनासाय अनुबलं न दातब्बं । दिट्ठाविकम्मम्पि कत्वाति “न मेतं खमती”ति दिट्ठं आवि कत्वापि ।

### वोहारवग्गवण्णना

४२४. कायप्पयोगेन आपज्जितब्बा कायप्पयोगा । वचीपयोगेन आपज्जितब्बा वचीपयोगा । नवसु ठानेसूति ओसारणादीसु नवसु ठानेसु । द्वीसु ठानेसूति जत्तिदुतियजत्तिचतुत्थकम्मेषु । तस्माति यस्मा महाअट्ठकथायं वुत्तनयेन उभतोविभङ्गा असङ्गहिता, तस्मा । यं कुरुन्दियं वुत्तं, तं गहेतब्बन्ति सम्बन्धो ।

### दिट्ठाविकम्मवग्गवण्णना

४२५. “चतूहि पञ्चही”ति वचनतो द्वीहि वा तीहि वा एकतो देसेतुं वट्ठति, ततो परं न वट्ठति । माळकसीमायाति खण्डसीमाय । अविप्पवाससीमायाति महासीमाय ।

### मुसावादवग्गवण्णना

४४४. परियायेन जानन्तस्स वुत्तमुसावादोति यस्स कस्सचि जानन्तस्स परियायेन वुत्तमुसावादोति अत्थो ।

४४६. अनुयोगो न दातब्बोति तेन वुत्तं अनादियित्वा तुण्ही भवितब्बन्ति अत्थो ।

### भिक्षुनोवादवग्गवण्णना

४५४. एकूनवीसतिभेदायाति मग्गपच्चवेक्खणादिवसेन एकूनवीसतिभेदाय ।

### अधिकरणवूपसमवग्गवण्णना

४५८. पञ्चहि कारणेहीति इदं अत्थनिप्फादनकानि तेसं पुब्बभागानि च कारणभावसामञ्जेन एकज्झं गहेत्वा वुत्तं,

न पन सब्बेसं पञ्चन्नं समानयोगखेमत्ता । अनुस्सावनेनाति भेदस्स अनुरूपसावनेन । यथा भेदो होति, एवं भिन्दितब्बानं भिक्खूनं अत्तनो वचनस्स सावनेन विज्जापनेनाति अत्थो । तेनाह “ननु तुम्हे”तिआदि । कण्णमूले वचीभेदं कत्वाति एतेन पाकटं कत्वा भेदकरवत्थुदीपनं वोहरणं । तत्थ अत्तना विनिच्छित्तमत्तं रहस्सवसेन विज्जापनं अनुस्सावनन्ति दस्सेति । कम्ममेव उद्देशो वा पमाणन्ति तेहि सङ्गभेदसिद्धितो पमाणं, इतरे पन तेसं सम्भारभूता । तेनाह “वोहारा”तिआदि । तत्थाति वोहरणे ।

### कथिनत्थारवग्गवण्णना

४६७. अन्तरा वुत्तकारणेनाति “तज्झि वन्दन्तस्स मज्जपादादीसुपि नलाटं पटिहज्जेय्या”तिआदिना वुत्तकारणेन ।

### समुद्धानवण्णना

४७०. पुब्बे वुत्तमेवाति सहसेय्यादिपण्णत्तिवज्जं । इतरन्ति सचित्तकं । भिसापनादीनि कत्वाति भिसापनादिना आपत्तिं आपज्जित्वाति अधिप्पायो ।

## अपरदुतियगाथासङ्गणिकं

### कायिकादिआपत्तिवण्णना

४७४. विनये गरुका विनयगरुका । किञ्चापि इदं द्वीसु गाथासु आगतं, अज्जेहि पन मिस्सेत्वा वुत्तभावतो नानाकरणं पच्चेतब्बं ।

### देसनागामिनियादिवण्णना

४७५. द्वे संवासकभूमियोति एत्थ भूमीति अवत्था । अङ्गहीनता कारणवेकल्लवसेनपि वेदितब्बाति आह “अपिचेत्था”तिआदि । एस नयोति “अपिचेत्था”तिआदिना वुत्तनयो । वनप्पत्तिं छिन्दन्तस्स पाराजिकन्ति अदिन्नादाने वनप्पत्तिकथाय आगतं परसन्तकं सन्धाय वुत्तं । विस्सट्ठिछुट्ठेति सुक्कविस्सट्ठिया मोचने । दुक्कटा कत्ताति दुक्कटं वुत्तं । पठमसिक्खापदम्हियेवाति भिक्खुनोवादकवग्गस्स पठमसिक्खापदेयेव । आमकधज्जं विज्जापेत्वा भुज्जन्तिया पुब्बपयोगे दुक्कटं, अज्झोहारे पाचित्तियं ।

### पाचित्तियवण्णना

४७६. अब्भुण्हसीलोति अभिनवसीलो ।

४७८. असुत्तकन्ति सुत्तविरहितं, सुत्ततो अपनीतं नत्थीति अत्थो ।

### सेदमोचनगाथा

## अविष्पवासादिपञ्चवण्णना

४७९. सेदमोचनगाथासु तहिनति तस्मिं पुगगले । “अकप्पियसम्भोगो नाम मेथुनधम्मादी”ति गण्ठपदेसु वुत्तं । एसा पञ्हा कुसलेहि चिन्तिताति लिङ्गविपल्लासवसेनेतं वुत्तं, एसो पञ्हो कुसलेहि चिन्तितोति अत्थो ।

दसाति अवन्दिये दस । एकादसाति पण्डकादयो एकादस । उब्भक्खके न वदामीति इमिना मुखे मेथुनधम्माभावं दीपेति । अधोनाभिं विवज्जियाति इमिना वच्चमग्गपस्सावमग्गोसु ।

गामन्तरपरियापन्नं नदीपारं ओक्कन्तभिक्षुनिं सन्धायाति एत्थ नदी भिक्षुनिया गामपरियापन्ना, परतीरं गामन्तरपरियापन्नं । तत्थ परतीरे पठमलेडुपातप्पमाणो गामूपचारो नदीपरियन्तेन परिच्छिन्नो, तस्मा परतीरे रतनमत्तम्पि अरज्जं नत्थि, परतीरज्ज तिणादीहि पटिच्छन्नत्ता दस्सनूपचारविरहितं करोति । तत्थ अत्तनो गामे आपत्ति नत्थि, परतीरे पन पठमलेडुपातसङ्घाते गामूपचारेयेव पादं ठपेति । अन्तरे अभिधम्मे वुत्तनयेन अरज्जभूतं सकगामं अतिक्कमति नाम, तस्मा गणम्हा ओहीयना नाम होतीति वेदितब्बं ।

भिक्षूनां सन्तिके एकतोउपसम्पन्ना नाम महापजापतिपमुखा पञ्चसतसाकिनियो भिक्षुनियो । महापजापतिपि हि आनन्दत्थेरेन दिन्नओवादस्स पटिग्गहितत्ता भिक्षूनां सन्तिके उपसम्पन्ना नाम ।

## पाराजिकादिपञ्चवण्णना

४८०. सह दुस्सेन मेथुनवीतिक्कमस्स सक्कुण्यय्यताय “दुस्सकुटिआदीनि सन्धाया”ति वुत्तं । लिङ्गपरिवत्तं सन्धाय वुत्ताति “लिङ्गपरिवत्ते सति पटिग्गहणस्स विजहनतो सामं गहेत्वा भुज्जितुं न वट्ठती”ति लिङ्गपरिवत्तनं सन्धाय वुत्ता ।

४८१. सुप्पतिट्ठितनिग्रोधसदिसन्ति योजनद्वियोजनादिपरमं महानिग्रोधं सन्धाय वुत्तं ।

सेदमोचनगाथावण्णना निट्ठिता ।

## पञ्चवग्गो

### कम्मवग्गवण्णना

४८३. कम्मवग्गे उम्मत्तकस्स भिक्षुनो उम्मत्तकसम्मुति उम्मत्तके याचित्वा गते असम्मुखापि दातुं वट्ठति, तत्थ निसिन्नेपि न कुप्पति नियमाभावतो । असम्मुखा कते पन दोसाभावं दस्सेतुं “असम्मुखाकतं सुकतं होती”ति वुत्तं । दूतेन उपसम्पदा पन सम्मुखा कातुं न सक्का कम्मवाचानानत्तसम्भवतो । पत्तनिककुज्जनादयो हत्थपासतो अपनीतमत्तेपि कातुं वट्ठन्ति । सङ्गसम्मुखतातिआदीसु यावतिका भिक्षू कम्मप्पत्ता, ते आगता होन्ति, छन्दारहानं छन्दो आहटो होति, सम्मुखीभूता न पटिक्कोसन्ति, अयं सङ्गसम्मुखता । येन धम्मेन येन विनयेन येन सत्थुसासनेन सङ्गो कम्मं करोति, अयं धम्मसम्मुखता । तत्थ धम्मोति भूतं वत्थु । विनयोति चोदना चेव सारणा च । सत्थुसासनं नाम जत्तिसम्पदा चेव अनुस्सावनसम्पदा च । यस्स सङ्गो कम्मं करोति, तस्स सम्मुखभावो पुगगलसम्मुखता । कत्तिकमासस्स पवारणमासत्ता

“ठपेत्वा कत्तिकमास”न्ति वृत्तं। पच्चुक्कट्ठित्वा ठपितदिवसो चाति काळपक्खे चातुद्दसिं वा पन्नरसिं वा सन्धाय वृत्तं। द्वे च पुण्णमासियोति पठमपच्छिमवस्सूपगतानं वसेन वृत्तं।

४८५. ठानकरणानि सिथिलानि कत्वा उच्चारेतब्बं अक्खरं सिथिलं, तानियेव धनितानि असिथिलानि कत्वा उच्चारेतब्बं अक्खरं धनितं। द्विमत्तकालं दीघं, एकमत्तकालं रस्सं। दसधा व्यञ्जनबुद्धिया पभेदोति एवं सिथिलादिवसेन व्यञ्जनबुद्धिया अक्खरुप्पादकचित्तस्स दसप्पकारेण पभेदो। सब्बानि हि अक्खरानि चित्तसमुद्धानानि यथाधिप्पेतत्थव्यञ्जनतो व्यञ्जनानि च। संयोगो परो एतस्माति संयोगपरो, न संयोगपरो असंयोगपरो। आयस्मतो बुद्धरक्खितथेरस्स यस्स न खमतीति एत्थ त-कार न-कारसहिताकारो असंयोगपरो। करणानीति कण्ठादीनि।

४८६. अनुक्खित्ता पाराजिकं अनापन्ना च पकतत्ताति आह “पकतत्ता अनुक्खित्ता”तिआदि। तत्थ अनिस्सारिताति पुरिमपदस्सेव वेवचनं। परिसुद्धसीलाति पाराजिकं अनापन्ना। न तेसं छन्दो वा पारिसुद्धि वा एतीति तीसु द्वीसु वा निसिन्नेसु एकस्स वा द्विन्नं वा छन्दपारिसुद्धि आहटापि अनाहटाव होतीति अधिप्पायो।

### अपलोकनकम्मकथावण्णना

४९५-४९६. कायसम्भोगसामग्गीति सहसेय्यपटिगहणादि। सो रतोति सुभे रतो। सुट्ठु ओरतोति वा सोरतो। निवातवुत्तीति नीचवृत्ति। पटिसङ्घाति पटिसङ्घाय जाणेन उपपरिक्खित्वा। यं तं अवन्दियकम्मं अनुज्जातन्ति सम्बन्धो। इमस्स अपलोकनकम्मस्स ठानं होतीति एवम्पि अपलोकनकम्मं पवत्ततीति अत्थो। कम्ममेव लक्खणन्ति कम्मलक्खणं। ओसारणनिस्सारणभण्डुकम्मादयो विय कम्मञ्च हुत्वा अञ्जञ्च नामं न लभति, कम्ममेव हुत्वा उपलक्खीयतीति “कम्मलक्खण”न्ति वुच्चति। एतम्पि कम्मलक्खणमेवाति वुत्तकम्मलक्खणं दस्सेतुं “अच्छिन्नचीवरजिण्णचीवरनट्टचीवरान”न्तिआदि वृत्तं। इणपलिबोधम्पीति इणमेव पलिबोधो इणपलिबोधो, तम्पि दातुं वट्ठति। सचे तादिसं भिक्खुं इणायिका पलिबुन्धन्ति, तत्तुप्पादतोपि तस्स इणं सोधेतुं वट्ठतीति अधिप्पायो।

छत्तं वा वेदिकं वाति एत्थ वेदिकाति चेतियस्स उपरि चतुरस्सचयो वुच्चति। छत्तन्ति ततो उद्धं वलयानि दस्सेत्वा कतो अगगचयो वुच्चति। चेतियस्स उपनिक्खेपतोति चेतिये नवकम्मत्ताय उपनिक्खित्ततो, चेतियसन्तकतोति वृत्तं होति। अज्जा कतिका कातब्बाति पुरिमकतिकाय असङ्गहितत्ता वृत्तं। तेहीति येसं पुग्गलिकद्धाने तिड्ढन्ति, तेहि। दसभागन्ति दसमभागं। तत्थाति तस्मिं विहारे। मूलेति पुब्बे। “इतो पट्टाय भाजेत्वा खादन्तू”ति वचनेनेव यथासुखं परिभोगो पटिक्खित्तो होतीति आह “पुरिमकतिका पटिप्पस्सम्भती”ति।

अनुविचरित्वाति पच्छतो पच्छतो गन्त्वा। अपच्चासीसन्तेनाति तेसं सन्तिका

पच्चयं अपच्चासीसन्तेन। मूलभागन्ति वृत्तमेवत्थं विभावेति “दसभागमत्त”न्ति। अकतावासं वा कत्वाति ततो उप्पन्नआयेन कत्वा। जगितकाले च न वारेतब्बाति जगितानं पुप्फफलभरितकाले न वारेतब्बा। जगगनकालेति जगितुं आरद्धकाले। जत्तिकम्मट्टानभेदेति जत्तिकम्मस्स ठानभेदे।

कम्मवग्गवण्णना निड्डिता।

अपज्जते पज्जतवग्गवण्णना



५००. सत्त आपत्तिक्खन्धा पज्जत्तं नामाति सम्बन्धो । ककुसन्धकोणागमनकस्सपा एव सत्त आपत्तिक्खन्धे पज्जपेसुं, विपस्सीआदयो पन ओवादपातिमोक्खं उद्दिंसु, न सिक्खापदं पज्जपेसुन्ति आह “ककुसन्धञ्च...पे०... अन्तरा केनचि अपज्जत्ते सिक्खापदे”ति । सेसमेत्थ सुविज्जेय्यमेव ।

इति समन्तपासादिकाय विनयट्ठकथाय सारत्थदीपनियं

परिवारट्ठकथावण्णना समत्ता ।

### निगमनकथावण्णना

अवसानगाथासु पन अयमत्थो । विभत्तदेसनन्ति उभतोविभङ्गखन्धकपरिवारेहि विभत्तदेसनं विनयपिटकन्ति योजेतब्बं । तस्साति तस्स विनयस्स ।

तन्निदन्तिआदि पठमपाराजिकवण्णनायं वुत्तनयमेव ।

सत्थुमहाबोधिविभूसितोति सत्थुना परिभुत्तमहाबोधिविभूसितो मण्डितो, तस्स महाविहारस्स दक्खिणभागे उत्तमं यं पधानघरन्ति सम्बन्धो । तत्थ पधानघरन्ति तंनामकं परिवेणं । सुचिचारित्तसीलेन, भिक्खुसङ्घेन सेवितन्ति इदम्पि पधानघरविसेसनं ।

तत्थाति तस्मिं पधानघरे । चारुपाकारसञ्चितन्ति मनापेन पाकारेन परिकिखत्तं । सीतच्छायतरूपेतन्ति घननिचितपत्तसञ्चन्नसाखापसाखताय सीतच्छायेहि रुक्खेहि उपेतं । विकसितकमलकुवलयपुण्डरीकसोगन्धिकदिपुप्फसञ्चन्नमधुरसीतलुदकपुण्णताय सम्पन्ना सलिलासया अस्साति सम्पन्नसलिलासयो । उद्दिसित्वाति बुद्धसिरिं नाम थेरं निस्साय, तस्स अज्झेसनं निस्सायाति वुत्तं होति । इद्धाति अत्थविनिच्छयादीहि इद्धा फीता परिपुण्णा ।

सिरिनिवासस्साति सिरिया निवासट्ठानभूतस्स । जयसंवच्छरेति जयप्पत्तसंवच्छरे । अयन्ति थेरं बुद्धसिरिं उद्दिस्स या विनयवण्णना आरद्धा, अयं । धम्मूपसंहिताति कुसलसन्निस्सिता । इदानि सदेवकस्स लोकस्स अच्चन्तसुखाधिगमाय अत्तनो पुज्जं परिणामेन्तो “चिरट्ठित्तथ धम्मस्सा”तिआदिमाह । तत्थ समाचितन्ति उपचितं । सब्बस्स आनुभावेनाति सब्बस्स तस्स पुज्जस्स तेजेन । सब्बेपि पाणिनोति कामावचरादिभेदा सब्बे सत्ता । सद्धम्मरससेविनोति यथारहं बोधित्तयाधिगमवसेन सद्धम्मरससेविनो भवन्तु । सेसमेत्थ सुविज्जेय्यमेव ।

निगमनकथावण्णना निट्ठिता ।

### निगमनकथा

एत्तावता च —

विनये पाटवत्थाय, सासनस्स च वुट्ठिया ।  
वण्णना या समारद्धा, विनयट्ठकथाय सा ॥

सारथ्यदीपनी नाम, सब्बसो परिनिद्धिता ।  
तिंससहस्समत्तेहि, गन्थेहि परिमाणतो ॥

अज्झेसितो नरिन्देन, सोहं परक्कमबाहुना ।  
सद्धम्मट्ठितिकामेन, सासनुज्जोतकारिना ॥

तेनेव कारिते रम्मे, पासादसतमण्डिते ।  
नानादुमगणाकिण्णे, भावनाभिरतालये ॥

सीतलूदकसम्पन्ने, वसं जेतवने इमं ।  
अत्थव्यज्जनसम्पन्नं, अकासिं सुविनिच्छयं ॥

यं सिद्धं इमिना पुज्जं, यं चज्जं पसुतं मया ।  
एतेन पुज्जकम्मेन, दुतिये अत्तसम्भवे ॥

तावतिंसे पमोदेन्तो, सीलाचारगुणे रतो ।  
अलग्गो पज्चकामेसु, पत्त्वान पठमं फलं ॥

अन्तिमे अत्तभावम्हि, मेत्तेय्यं मुनिपुङ्गवं ।  
लोकगगपुगलं नाथं, सब्बसत्तहिते रतं ॥

दिस्वान तस्स धीरस्स, सुत्वा सद्धम्मदेसनं ।  
अधिगन्त्वा फलं अगगं, सोभेय्यं जिनसासनं ॥

सदा रक्खन्तु राजानो, धम्मेनेव इमं पजं ।  
निरता पुज्जकम्मेसु, जोतेन्तु जिनसासनं ॥

इमे च पाणिनो सब्बे, सब्बदा निरुपद्दवा ।  
निच्चं कल्याणसङ्कप्पा, पप्पोन्तु अमतं पदन्ति ॥

सारथ्यदीपनी नाम विनयटीका निद्धिता ।